

गोस्वामी तुलसीदास कृत  
श्रीमद्रामचरितमानसकृतज्ञता—ज्ञापन

कह रघुपति सुनु भामिनि बाता ।  
मानउँ एक भगति कर नाता ॥  
जाति पॉति कुल धरम बड़ाई ।  
धन बल परिजन गुन चतुराई ॥  
भगति हीन नर सोहड़ कैसा ।  
बिनु जल बारिद देखिअ जैसा ॥

इस पुस्तक के प्रकाशन के लिए  
इण्डियन सोसाइटी फार ह्यूमन एण्ड रूरल एडवान्समेण्ट  
(इशारा) देवरिया, उ० प्र० तथा इसके  
अध्यक्ष श्री जगत नारायण लाल श्रीवास्तव,  
आई० ए० एस० (सेवानिवृत्त) ने आर्थिक सहायता दी है ।  
इसके लिए हम दोनों के हृदय से आभारी हैं ।

## विषय सूची

विषय	पृष्ठ सं.
1. मानस पाठ का विधान	6
2. नम्र निवेदन	7
3. गोस्वामी तुलसीदास का जीवन-परिचय – डा० स्वामी भगवदाचार्य, अयोध्या	17
4. तुलसी का भक्ति-दर्शन – डा० रामजी तिवारी, मुम्बई	21
5. बालकाण्ड	29
6. अयोध्याकाण्ड	176
7. अरण्यकाण्ड	279
8. किष्किन्धाकाण्ड	303
9. सुन्दरकाण्ड	316
10.	लंकाकाण्ड 341
11.	उत्तरकाण्ड 397
12.	श्रीरामायणजी की आरती 456
13.	युगपुरुष श्रीराम – डा० महावीर सिंह, भोपाल 458
14.	मानस के नारी पात्र – श्रीमती कुमकुम मिश्रा, लखनऊ 462
15.	रामभक्त हनुमान् – डा० श्रीकांत श्रीवास्तव, जौनपुर 466
16. तुलसी की भक्ति और कामदाम – अशोक त्रिपाठी, दिल्ली	470
रामचरितमानस का पाठ विधान	1

मचरितमानस अद्वितीय ग्रन्थ है । इसकी चौपाइयों मंत्रों की तरह हैं । भौतिक समस्याओं के समाधान के लिए तथा आध्यात्मिक उन्नति के लिए रामचरितमानस का पाठ रामबाण की तरह अचूक दवा है । मानस का विधिवत पाठ नवरात्रि में करने की परिपाटी है । इसके अतिरिक्त कुछ लोग एक महीने के अन्दर भी इसका पाठ करते हैं । इसके अलावा जब भी सहूलियत हो मानस का पाठ किया जा सकता है । इसके लिए कोई बन्धन नहीं है । बस एक ही शर्त है – व्यक्ति के मन में श्रद्धा और भक्ति होनी चाहिए । मानस में गोस्वामी जी ने स्वयं कहा है

—

‘कथा न कहिअ सठही हठसीलहि । जो मन लाइ न सुन हरि लीलहि  
कइअ न लोभी कोधिहि कामिहि । जो न भजइ सचराचर स्वामिहि ॥

राम कथा के तेइ अधिकारी । जिन्ह कें सतसंगति अति प्यारी ॥’

राम कथा कहने और सुनने के लिए केवल भक्ति ही आवश्यक है । मानस पाठ करते समय यह मानना चाहिए कि हनुमान जी इस कथा का श्रवण कर रहे हैं । इसलिए जब भी मानस पाठ करें, सामने हनुमान जी का चित्र या उनकी मूर्ति अवश्य रखें । अगर ये दोनों नहीं हों तो हनुमान जी के लिए एक आसन प्रदान करना चाहिए और मन में यह भाव रखना चाहिए कि हनुमान जी कथा सुन रहे हैं । श्रद्धा भाव के साथ रामचरितमानस की पूजा अर्चना और हनुमान जी की पूजा की जा सकती है । इसके लिए किसी मंत्र की आवश्यकता नहीं । केवल भाव ही काफी है । जहाँ तक सम्भव हो शांत वातावरण में स्नान कर आसन पर बैठकर मानस का पाठ करना चाहिए । नवरात्रि और मासिक पाठ के उपरान्त हवन भी करना चाहिए । अन्त में रामायणजी की आरती भी करनी चाहिए ।

रामायण का पाठ कभी भी किसी भी समय किया जा सकता है । परन्तु पाठ करते समय पूरा ध्यान मानस पर लगाना चाहिए और मानस की पँक्तियों का अर्थ भी समझना चाहिए । इस प्रकार मानस पाठ करने से प्रत्येक व्यक्ति का कल्याण होगा इसमें कोई सन्देह नहीं है ।

रामचरितमानस का पाठ करने के कई लाभ हैं । जिस परिवार में नित्य श्रद्धापूर्वक रामचरितमानस का पाठ होगा उस परिवार में सदैव सुख-शांति बनी रहेगी । उस परिवार का कोई भी सदस्य ब्लड-प्रेसर या मानसिक तनाव से पीड़ित नहीं होगा । उस परिवार में किसी की अकाल-मृत्यु नहीं होगी । मानस के सुन्दरकाण्ड का नित्य श्रद्धापूर्वक पाठ करने से छात्र-छात्राओं को परीक्षा में सफलता मिलती है, रागियों का कष्ट दूर होता है । जिस परिवार में रामचरितमानस का पाठ होगा उस परिवार के सभी सदस्यों के बीच हमेशा सद्भावना बनी रहेगी । अतः सभी स्थितियों में मानस का पाठ शुभ है ।

गोस्वामी तुलसीदास द्वारा रचित रामचरितमानस भारतीय संस्कृति का सार ग्रंथ है । गोस्वामी जी ने इसकी रचना आज से 431 वर्ष पूर्व की थी । राम कथा को आधार बनाकर लिखी गयी पुस्तकों में यह सबसे अधिक लोकप्रिय है । एक अनुमान के अनुसार अब तक रामचरितमानस की छः करोड़ से भी अधिक प्रतियाँ बिक चुकी हैं । किसी अन्य साहित्यिक कृति की इतनी प्रति शायद ही छपी हो । रामचरितमानस का अनुवाद दुनिया की सभी प्रमुख भाषाओं में भी हो चुका है । इस पर सैकड़ों आलोचनात्मक ग्रंथ भी लिखे जा चुके हैं ।

श्रद्धालुओं के लिए मानस की चौपाइयों मंत्र की तरह हैं । लाखों लोग इनका जप करके आध्यात्मिक उन्नति तो प्राप्त करते ही हैं, अपनी भौतिक समस्याओं का भी समाधान पाते हैं । इसके लिए किसी प्रमाण की आवश्यकता नहीं ।

गोस्वामी तुलसीदास एक महान वैष्णव संत और समाजसुधारक थे । उनकी रचना ने निराशा के दिनों में भारतीय समाज को सम्बल प्रदान किया । पश्चिम की ओर से हो रहे विदेशी आक्रमणों से त्रस्त भारतीय जनमानस के समक्ष राम-कथा के माध्यम से मर्यादा पुरुषोत्तम राम का आदर्श चरित प्रस्तुत करके लोगों में नयी आशा और विश्वास की ज्योति जलाई । हिन्दी के सुप्रसिद्ध समालोचक आचार्य रामचंद्र शुक्ल ने (पृष्ठ 9 गोस्वामी तुलसीदास, अनु प्रकाशन, जयपुर) कहा है “गोस्वामी जी के वचनों में हृदय को स्पर्श करने की जो शक्ति है वह अन्यत्र दुर्लभ है । उनकी वाणी के प्रभाव से आज भी हिन्दू भक्त अवसर के अनुसार सौंदर्य पर मुग्ध होता है, महत्व पर श्रद्धा करता है, शील की ओर प्रवृत्त होता है, सन्मार्ग पर पैर रखता है, विपत्ति में धैर्य धारण करता है, कठिन कार्य में उत्साहित होता है, दया से आर्द्र होता है, बुराई पर ग्लानि करता है, शिष्टता का अवलंबन करता है और मानवजीवन के महत्व का अनुभव करता है” ।

विभिन्न प्रकाशकों द्वारा प्रकाशित रामचरितमानस के दर्जनों संस्करण उपलब्ध हैं । कुछ हस्तलिखित प्रतियाँ भी हैं जो पूरी नहीं हैं । मानस के इन संस्करणों में सैकड़ों की संख्या में पाठभेद हैं । एक संस्करण की कई चौपाइयों दूसरे संस्करणों में गायब हैं । अधिकांश संस्करणों में मानस के 8 काण्ड हैं, जबकि कुछ संस्करणों में आठवाँ काण्ड – लवकुश काण्ड निकाल दिया गया है । ऐसी परिस्थिति में यह तय कर पाना आसान नहीं है कि रामचरितमानस का शुद्ध और मानक पाठ क्या है ? गोस्वामी जी की हाथ की लिखी कोई प्रति उपलब्ध नहीं है । गोस्वामी जी के समय में रचनाकार अपनी रचना लिख लेते थे और बाद में प्रतिलिपिकार उनकी प्रतियाँ बनाते थे । इस प्रक्रिया में कुछ छूट जाना, कुछ जुड़ जाना या कुछ बदल जाना असम्भव नहीं लगता है । इतने सारे पाठभेद होने का यह एक प्रमुख कारण है ।

प्राचीन भारतीय साहित्य में प्रक्षिप्त अंश लिखने की एक गौरवशाली परम्परा देखी जाती है । जब भी कोई रचना बहुत लोकप्रिय होती थी तो कुछ 'उर्वर' मस्तिष्क वाले रचनाकार उसमें अपनी रचना जोड़ देते थे । इसका सबसे बड़ा उदाहरण है – महाभारत । मूल महाभारत वर्तमान महाभारत से काफी कम श्लोकों का था । यहाँ तक कि उसका नाम भी पारम्भ में 'जय' था । बाद में उसमें कुछ और श्लोक जोड़े गये और उसका नाम भारत हो गया । प्रक्षिप्त श्लोक जोड़ने की यह प्रवृत्ति बाद में भी जारी रही और भारत में कुछ और श्लोक जोड़कर उसे महाभारत बना दिया गया । यही हाल वाल्मीकि रामायण का भी है । अब विद्वान इस पर एकमत हैं कि वाल्मीकि रामायण का एक बड़ा हिस्सा प्रक्षिप्त है । इसी तरह रामचरितमानस की बढ़ती हुयी लोकप्रियता को देखकर अगर बाद में अन्य कवियों ने उसमें कुछ जोड़ दिया हो तो कोई आश्चर्य नहीं । गोस्वामी जी के साथ एक और समस्या थी । संस्कृत के पण्डित उनसे ईर्ष्या रखते थे । वे इसके घोर विरोधी थे कि कोई व्यक्ति लोगों की भाषा में रामकथा लिखे । इस प्रकार के विद्वानों ने तुलसीदास को बहुत कष्ट दिया । बहुत सम्भव है कि इसी परम्परा के कुछ विद्वानों ने उनके निधन के बाद उनके रामचरितमानस में कुछ अवांछनीय चौपाइयों जोड़ दी हों, जिनसे गोस्वामी जी की आलोचना हो सके । अतः यह कहना कि वर्तमान रामचरितमानस में कुछ भी प्रक्षिप्त नहीं है, तर्कसंगत नहीं लगता । जब एक पूरा लवकुशकाण्ड प्रक्षिप्त हो सकता है तो शेष 7 काण्डों में अगर कुछ चौपाइयों प्रक्षिप्त हों तो इसमें किसी को कोई आश्चर्य नहीं होना चाहिए ।

लवकुशकाण्ड को निकालने के उपरान्त मानस में कुल 4304 चौपाइयों और 1165 दोहे बचते हैं । चौपाई चार पदों या अर्द्धालियों का छन्द है । मानस में 103 चौपाइयों ऐसी हैं जिनमें केवल दो अर्द्धालियों हैं । डा० जगदीश प्रसाद कौशिक के अनुसार (काव्य दर्पण – साहित्यागार प्रकाशन, जयपुर पृष्ठ-164) 'चौपाई चार चरणों का छन्द है, प्रत्येक चरण में 16 मात्राएँ होती हैं ' मानस में जो 103 चौपाइयों केवल 2 अर्द्धालियों की हैं, ऐसा लगता है कि उनकी शेष अर्द्धालियों प्रतिलिपि करत समय भूल से छूट गयीं या उन्हें ही किसी और ने बाद में जोड़ दिया होगा । गोस्वामी जी जैसा समर्थ कवि दो अर्द्धालियों की चौपाई क्यों लिखेगा ? यह बात अयोध्या काण्ड को देखने से सिद्ध हो जाती है । अयोध्या काण्ड सबसे व्यवस्थित काण्ड है, इसमें कुल 1306 चौपाइयों में से केवल 7 चौपाइयों ऐसी हैं जो 2 अर्द्धालियों की हैं । अयोध्या काण्ड की एक और विशेषता है कि इसमें एक तरंग में अर्थात् दो दोहे या सोरठों के बीच चार चौपाइयों का समूह है । तरंग का अर्थ है एक दोहा या सोरठ के बाद से लेकर अगले दोहे या सोरठ तक आने वाली चौपाइयों का समूह । कुछ लोगों का ख्याल है कि मानस में जिन तरंगों में चार से अधिक चौपाइयों हैं या जहाँ दो अर्द्धालियों की चौपाई है वहाँ गोस्वामी जी के बाद किसी अन्य कवि ने कुछ अर्द्धालियों जोड़ दी होंगी । अयोध्याकाण्ड की यह व्यवस्था अन्य काण्डों में गड़बड़ा गयी है । अयोध्याकाण्ड में केवल एक तरंग साढ़े चार चौपाई की है ।

मानस में कुल 791 तरंगें ऐसी हैं जिनमें 4 चौपाइयों हैं । एक चौपाई की एक तरंग, तीन चौपाइयों की एक तरंग तथा साढ़े तीन चौपाइयों की ग्यारह तरंगें हैं । चार से अधिक चौपाइयों की कुल 116 तरंगें हैं । ढाई चौपाइयों की एक तरंग किस्किन्धा काण्ड में भी है ।

हिन्दी के वरिष्ठ समालोचक और पिंगल शास्त्र के विद्वान आचार्य पुत्तूलाल शुक्ल 'चन्द्राकर' ने रामचरितमानस की छंद योजना पर एक विद्वत्तापूर्ण निबंध लिखा है (पृष्ठ-261 – चन्द्राकर ग्रन्थावली, अम्बुजा प्रकाशन, लखनऊ) "मानस की चौपाइयों में दो प्रकार के अपवाद पाये गये हैं । प्रथम प्रकार के अपवाद वे हैं जिनमें 16 मात्राएँ तो हैं पर अन्त में रगड़ आया है । दूसरे प्रकार का

रामचरितमानस अद्वितीय ग्रन्थ है । इसकी चौपाइयों मंत्रों की तरह हैं । भौतिक समस्याओं के समाधान के लिए तथा आध्यात्मिक उन्नति के लिए रामचरितमानस का पाठ रामबाण की तरह अचूक दवा है । मानस का विधिवत पाठ नवरात्रि में करने की परिपाटी है । इसके अतिरिक्त कुछ लोग एक महीने के अन्दर भी इसका पाठ करते हैं । इसके अलावा जब भी सहूलियत हो मानस का पाठ किया जा सकता है । इसके लिए कोई बन्धन नहीं है । बस एक ही शर्त है – व्यक्ति के मन में श्रद्धा और भक्ति होनी चाहिए । मानस में गोस्वामी जी ने स्वयं कहा है

'कथा न कहिअ सठही हठसीलहि । जो मन लाइ न सुन हरि लीलहि  
कड़िअ न लोभी कोधिहि कामिहि । जो न भजइ सचराचर स्वामिहि ॥  
राम कथा के तेइ अधिकारी । जिन्ह कें सतसंगति अति प्यारी ॥'

राम कथा कहने और सुनने के लिए केवल भक्ति ही आवश्यक है । मानस पाठ करते समय यह मानना चाहिए कि हनुमान जी इस कथा का श्रवण कर रहे हैं । इसलिए जब भी मानस पाठ करें, सामने हनुमान जी का चित्र या उनकी मूर्ति अवश्य रखें । अगर ये दोनों नहीं हों तो हनुमान जी के लिए एक आसन प्रदान करना चाहिए और मन में यह भाव रखना चाहिए कि हनुमान जी कथा सुन रहे हैं । श्रद्धा भाव के साथ रामचरितमानस की पूजा अर्चना और हनुमान जी की पूजा की जा सकती है । इसके लिए किसी मंत्र की आवश्यकता नहीं । केवल भाव ही काफी है । जहाँ तक सम्भव हो शांत वातावरण में स्नान कर आसन पर बैठकर मानस का पाठ करना चाहिए । नवरात्रि और मासिक पाठ के उपरान्त हवन भी करना चाहिए । अन्त में रामायणजी की आरती भी करनी चाहिए ।

रामायण का पाठ कभी भी किसी भी समय किया जा सकता है । परन्तु पाठ करते समय पूरा ध्यान मानस पर लगाना चाहिए और मानस की पँक्तियों का अर्थ भी समझना चाहिए । इस प्रकार मानस पाठ करने से प्रत्येक व्यक्ति का कल्याण होगा इसमें कोई सन्देह नहीं है ।

रामचरितमानस का पाठ करने के कई लाभ हैं । जिस परिवार में नित्य श्रद्धापूर्वक रामचरितमानस का पाठ होगा उस परिवार में सदैव सुख-शांति बनी रहेगी । उस परिवार का कोई भी सदस्य ब्लड-प्रेसर या मानसिक तनाव से पीड़ित नहीं होगा । उस परिवार में किसी की अकाल-मृत्यु नहीं होगी । मानस के सुन्दरकाण्ड का नित्य श्रद्धापूर्वक पाठ करने से छात्र-छात्राओं को परीक्षा में सफलता मिलती है, रोगियों का कष्ट दूर होता है । जिस परिवार में रामचरितमानस का पाठ होगा उस परिवार के सभी सदस्यों के बीच हमेशा सद्भावना बनी रहेगी । अतः सभी स्थितियों में मानस का पाठ शुभ है ।

गोस्वामी तुलसीदास द्वारा रचित रामचरितमानस भारतीय संस्कृति का सार ग्रंथ है । गोस्वामी जी ने इसकी रचना आज से 431 वर्ष पूर्व की थी । राम कथा को आधार बनाकर लिखी गयी पुस्तकों में यह सबसे अधिक लोकप्रिय है । एक अनुमान के अनुसार अब तक रामचरितमानस की छः करोड़ से भी अधिक प्रतियाँ बिक चुकी हैं । किसी अन्य साहित्यिक कृति की इतनी प्रति

शायद ही छपी हो । रामचरितमानस का अनुवाद दुनिया की सभी प्रमुख भाषाओं में भी हो चुका है । इस पर सैकड़ों आलोचनात्मक ग्रंथ भी लिखे जा चुके हैं ।

श्रद्धालुओं के लिए मानस की चौपाइयों मंत्र की तरह हैं । लाखों लोग इनका जप करके आध्यात्मिक उन्नति तो प्राप्त करते ही हैं, अपनी भौतिक समस्याओं का भी समाधान पाते हैं । इसके लिए किसी प्रमाण की आवश्यकता नहीं ।

गोस्वामी तुलसीदास एक महान वैष्णव संत और समाजसुधारक थे । उनकी रचना ने निराशा के दिनों में भारतीय समाज को सम्बल प्रदान किया । पश्चिम की ओर से हो रहे विदेशी आक्रमणों से त्रस्त भारतीय जनमानस के समक्ष राम-कथा के माध्यम से मर्यादा पुरुषोत्तम राम का आदर्श चरित प्रस्तुत करके लोगों में नयी आशा आर विश्वास की ज्योति जलाई । हिन्दी के सुप्रसिद्ध समालोचक आचार्य रामचंद्र शुक्ल ने (पृष्ठ 9 गोस्वामी तुलसीदास, अनु प्रकाशन, जयपुर) कहा है "गोस्वामी जी के वचनों में हृदय को स्पर्श करने की जो शक्ति है वह अन्यत्र दुर्लभ है । उनकी वाणी के प्रभाव से आज भी हिन्दू भक्त अवसर के अनुसार सौंदर्य पर मुग्ध होता है, महत्व पर श्रद्धा करता है, शील की ओर प्रवृत्त होता है, सन्मार्ग पर पैर रखता है, विपत्ति में धैर्य धारण करता है, कठिन कार्य में उत्साहित होता है, दया से आर्द्र होता है, बुराई पर ग्लानि करता है, शिष्टता का अवलंबन करता है और मानवजीवन के महत्व का अनुभव करता है" ।

विभिन्न प्रकाशकों द्वारा प्रकाशित रामचरितमानस के दर्जनों संस्करण उपलब्ध हैं । कुछ हस्तलिखित प्रतियाँ भी हैं जो पूरी नहीं हैं । मानस के इन संस्करणों में सैकड़ों की संख्या में पाठभेद हैं । एक संस्करण की कई चौपाइयों दूसरे संस्करणों में गायब हैं । अधिकांश संस्करणों में मानस के 8 काण्ड हैं, जबकि कुछ संस्करणों में आठवाँ काण्ड – लवकुश काण्ड निकाल दिया गया है । ऐसी परिस्थिति में यह तय कर पाना आसान नहीं है कि रामचरितमानस का शुद्ध और मानक पाठ क्या है ? गोस्वामी जी की हाथ की लिखी कोई प्रति उपलब्ध नहीं है । गोस्वामी जी के समय में रचनाकार अपनी रचना लिख लेते थे और बाद में प्रतिलिपिकार उनकी प्रतियाँ बनाते थे । इस प्रक्रिया में कुछ छूट जाना, कुछ जुड़ जाना या कुछ बदल जाना असम्भव नहीं लगता है । इतने सारे पाठभेद होने का यह एक प्रमुख कारण है ।

प्राचीन भारतीय साहित्य में प्रक्षिप्त अंश लिखने की एक गौरवशाली परम्परा देखी जाती है । जब भी कोई रचना बहुत लोकप्रिय होती थी तो कुछ 'उर्वर' मस्तिष्क वाले रचनाकार उसमें अपनी रचना जोड़ देते थे । इसका सबसे बड़ा उदाहरण है – महाभारत । मूल महाभारत वर्तमान महाभारत से काफी कम श्लोकों का था । यहाँ तक कि उसका नाम भी प्रारम्भ में 'जय' था । बाद में उसमें कुछ और श्लोक जोड़े गये और उसका नाम भारत हो गया । प्रक्षिप्त श्लोक जोड़ने की यह प्रवृत्ति बाद में भी जारी रही और भारत में कुछ और श्लोक जोड़कर उसे महाभारत बना दिया गया । यही हाल वाल्मीकि रामायण का भी है । अब विद्वान इस पर एकमत हैं कि वाल्मीकि रामायण का एक बड़ा हिस्सा प्रक्षिप्त है । इसी तरह रामचरितमानस की बढ़ती हुयी लोकप्रियता को देखकर अगर बाद में अन्य कवियों ने उसमें कुछ जोड़ दिया हो तो कोई आश्चर्य नहीं । गोस्वामी जी के साथ एक और समस्या थी । संस्कृत के पण्डित उनसे ईर्ष्या रखते थे । वे इसके घोर विरोधी थे कि कोई व्यक्ति लोगों की भाषा में रामकथा लिखे । इस प्रकार के विद्वानों ने तुलसीदास को बहुत कष्ट दिया । बहुत सम्भव है कि इसी परम्परा के कुछ विद्वानों ने उनके निधन के बाद उनके रामचरितमानस में कुछ अवांछनीय चौपाइयों जोड़ दी हों, जिनसे गोस्वामी जी की आलोचना हो सके । अतः यह कहना कि वर्तमान रामचरितमानस में कुछ भी प्रक्षिप्त नहीं है, तर्कसंगत नहीं लगता । जब एक पूरा लवकुशकाण्ड प्रक्षिप्त हो सकता है तो शेष 7 काण्डों में अगर कुछ चौपाइयों प्रक्षिप्त हों तो इसमें किसी को कोई आश्चर्य नहीं होना चाहिए ।

लवकुशकाण्ड को निकालने के उपरान्त मानस में कुल 4304 चौपाइयों और 1165 दोहे बचते हैं । चौपाई चार पदों या अर्द्धालियों का छन्द है । मानस में 103 चौपाइयों ऐसी हैं जिनमें केवल दो अर्द्धालियों हैं । डा० जगदीश प्रसाद कौशिक के अनुसार (काव्य दर्पण – साहित्यागार प्रकाशन, जयपुर पृष्ठ-164) 'चौपाई चार चरणों का छन्द है, प्रत्येक चरण में 16 मात्राएँ होती हैं ' मानस में जो 103 चौपाइयों केवल 2 अर्द्धालियों की हैं, ऐसा लगता है कि उनकी शेष अर्द्धालियों प्रतिलिपि करते समय भूल से छूट गयीं या उन्हें ही किसी और ने बाद में जोड़ दिया होगा । गोस्वामी जी जैसा समर्थ कवि दो अर्द्धालियों की चौपाई क्यों लिखेगा ? यह बात अयोध्या काण्ड को देखने से सिद्ध हो जाती है । अयोध्या काण्ड सबसे व्यवस्थित काण्ड है, इसमें कुल 1306 चौपाइयों में से केवल 7 चौपाइयों ऐसी हैं जो 2 अर्द्धालियों की हैं । अयोध्या काण्ड की एक और विशेषता है कि इसमें एक तरंग में अर्थात् दो दोहे या सोरठों के बीच चार चौपाइयों का समूह है । तरंग का अर्थ है एक दोहा या सोरठा के बाद से लेकर अगले दोहे या सोरठे तक आने वाली चौपाइयों का समूह । कुछ लोगों का ख्याल है कि मानस में जिन तरंगों में चार से अधिक चौपाइयों हैं या जहाँ दो अर्द्धालियों की चौपाई है वहाँ गोस्वामी जी के बाद किसी अन्य कवि ने कुछ अर्द्धालियों जोड़ दी होंगी । अयोध्याकाण्ड की यह व्यवस्था अन्य काण्डों में गड़बड़ा गयी है । अयोध्याकाण्ड में केवल एक तरंग साढ़े चार चौपाई की है ।

मानस में कुल 791 तरंगों ऐसी हैं जिनमें 4 चौपाइयों हैं । एक चौपाई की एक तरंग, तीन चौपाइयों की एक तरंग तथा साढ़े तीन चौपाइयों की ग्यारह तरंगें हैं । चार से अधिक चौपाइयों की कुल 116 तरंगें हैं । ढाई चौपाइयों की एक तरंग किष्किन्धा काण्ड में भी है ।

हिन्दी के वरिष्ठ समालोचक और पिंगल शास्त्र के विद्वान आचार्य पुत्तूलाल शुक्ल 'चन्द्राकर' ने रामचरितमानस की छंद योजना पर एक विद्वत्तापूर्ण निबंध लिखा है (पृष्ठ-261 – चन्द्राकर ग्रन्थावली, अम्बुजा प्रकाशन, लखनऊ) "मानस की चौपाइयों में दो प्रकार के अपवाद पाये गये हैं । प्रथम प्रकार के अपवाद वे हैं जिनमें 16 मात्राएँ तो हैं पर अन्त में रगड़ आया है । दूसरे प्रकार का अपवाद वह है जो वस्तुतः बहुत बड़ा अपवाद है जहाँ 15 मात्राओं का चौबोला छंद आया है । छंद शास्त्र की दृष्टि से इन स्थानों को चिन्त्य ही नहीं निन्द्य भी माना जाता है । बालकाण्ड और

अयोध्याकाण्ड में बड़ी उत्कृष्टता है । इन दोनों काण्डों में ये अपवाद नहीं हैं । बालकाण्ड और अयोध्याकाण्ड में ढाई हजार से अधिक चौपाइयों लिखने के उपरान्त गोस्वामी जी की बाद की चौपाइयों में ऐसे अपवादों का आना बहुत बड़ा प्रश्न खड़ा करता है । ऐसी त्रुटियों को प्रतिलिपिकारों की त्रुटियाँ कहकर भी हम अपने को समझा नहीं पाते और दो काण्ड निर्दोष लिखने के बाद गोस्वामी जी ने ऐसे चरण कैसे लिखे यह भी समझ में नहीं आता" चन्द्राकर जी के इस कथन से भी यह संकेत मिलता है कि प्रारम्भ के दो काण्डों के बाद अन्य काण्डों में प्रक्षिप्त अंश काफी संख्या में हो सकते हैं । इसी लेख में चन्द्राकर जी ने स्पष्ट किया है कि अरण्यकाण्ड में एक चौपाई में गीघ द्वारा राम की वन्दना और ढाई चौपाइयों की तरंग में बालि द्वारा राम की वन्दना बाद में जोड़ी गयी प्रतीत होती है । इसी प्रकार बालकाण्ड में सप्तर्षियों और पार्वती के बीच वार्तालाप में एक अर्द्धाली छूटी हुयी लगती है । चन्द्राकर जी ने गहन और विस्तृत अध्ययन के उपरान्त यह निष्कर्ष निकाला है कि एक दर्जन से अधिक स्थानों पर अर्द्धालियों छूट गयीं हैं ।

रामचरितमानस के उत्तरकाण्ड में – 'प्रथमहिं अति अनुराग भवानी' से लेकर 'कथा समस्त भुसुण्डि बखानी । जो मैं तुम्ह सन कही भवानी ।।' तक उन प्रसंगों की सूची दी गयी है जिनका वर्णन रामचरितमानस में किया गया है । इस सूची में अयोध्या काण्ड, अरण्यकाण्ड, किष्किन्धाकाण्ड और सुन्दरकाण्ड के सभी छोटे-बड़े प्रसंगों का उल्लेख है जबकि बालकाण्ड, लंकाकाण्ड और उत्तरकाण्ड के कई प्रमुख प्रसंगों को इस सूची में सम्मिलित नहीं किया गया है । इस सूची में बालकाण्ड से केवल रामचरितसरोवर, नारदमोह, रावण का जन्म, भगवान राम का

अवतार, बाल लीला, बिश्वामित्र आगमन और राम-सीता के विवाह का उल्लेख है जबकि बालकाण्ड के अन्य प्रमुख प्रसंगों जैसे – वन्दना, मानस सरिता, याज्ञवल्क्य भारद्वाज संवाद, भानुप्रताप की कथा, सती का मोह और शिव-पार्वती के विवाह का उल्लेख इस सूची में नहीं है । इसी प्रकार लंकाकाण्ड से केवल अंगद का रावण के दरबार में दूत बनकर जाना, निसाचरों और वानरों की लड़ाई, कुंभकरन तथा मेघनाद की वीरता का वर्णन, रावण-बध, मंदोदरी का शोक, विभीषण का राज्याभिषेक, सीता-श्रीराम का मिलन और देवताओं द्वारा श्रीराम की वन्दना को ही इस सूची में शामिल किया गया है जबकि रावण के अखाड़े का वर्णन, रावण-मंदोदरी संवाद, लक्ष्मण को शक्तिबाण लगना, हनुमान जी द्वारा संजीवनी बूटी लाना और सीता की अग्नि-परीक्षा जैसी प्रमुख घटनाओं का उल्लेख इस सूची में नहीं है । इसी प्रकार उत्तरकाण्ड से श्रीराम का पुष्पक विमान द्वारा अयोध्या आना, उनका राज्याभिषेक, श्रीराम द्वारा प्रजाजनों को उपदेस को ही इस सूची में शामिल किया गया है । परन्तु भरत हनुमान भेंट, बंदरों आदि की विदाई, राम-राज्य का वर्णन, मुनियों द्वारा राम की वन्दना, मायाकृत दोषों का वर्णन, कागभुसुण्डि की कहानी, कलियुग आदि का वर्णन इस सूची में शामिल नहीं किया गया है । पूरे रामचरितमानस में शिव-पार्वती तथा कागभुसुण्डि और गरुड़ का उल्लेख श्रोता और वक्ता के रूप में बार-बार आता है जबकि याज्ञवल्क्य और भारद्वाज का उल्लेख केवल बालकाण्ड और लवकुशकाण्ड में ही आता है । बालकाण्ड के जिन प्रसंगों को उत्तरकाण्ड की सूची में शामिल नहीं किया गया है उनके बारे में मानस विशेषज्ञों का ऐसा विचार है कि गोस्वामी जी ने इन प्रसंगों को स्वयं उत्तरकाण्ड लिखने के बाद बालकाण्ड में जोड़ा होगा । अगर ऐसा है तो गोस्वामी जी उत्तरकाण्ड की सूची में भी संशोधन कर सकते थे । परन्तु ऐसा नहीं किया गया है । इसलिए ऐसा लगता है कि बालकाण्ड के भारद्वाज याज्ञवल्क्य संवाद, सती का मोह इत्यादि प्रसंग तुलसीदास के बाद किसी अन्य कवि ने जोड़ दिया होगा । लवकुशकाण्ड को अधिकांश विद्वान पूरी तरह प्रक्षिप्त मानते हैं । हालाँकि नवलकिशोर प्रिन्टिंग प्रेस लखनऊ से संवत् 2006 में प्रकाशित रामायण में लवकुशकाण्ड को प्रक्षिप्त नहीं माना गया है । रामायण के इस संस्करण में अन्य कई प्रसंगों को प्रक्षिप्त मानते हुए भी पुस्तक के मूल पाठ में शामिल किया गया है ।

अयोध्याकाण्ड में एक भी दोहा या सोरठा ऐसा नहीं है जिसके साथ दूसरा दोहा या सोरठा दिया गया हो जबकि बाद के काण्डों में दो से लेकर छः दोहे या सोरठे तक एक साथ दिये गये हैं । अयोध्याकाण्ड के बाद गोस्वामी जी की शैली में अचानक इस परिवर्तन से भी कई सवाल खड़े होते हैं । रामचरितमानस में जो विवादास्पद प्रसंग हैं उनकी चर्चा कोई भी कथावाचक या रामायणी अपने प्रवचन में नहीं करता है क्योंकि सम्बन्धित चौपाइयों या दोहे अप्रिय हैं । उनका उल्लेख करने से कुछ लोगों की भावनाओं को ठेस लगेगी ।

रामचरितमानस के पाठ निर्धारण में काशिराज संस्करण का योगदान अमूल्य है । इसके विद्वान संपादक आचार्य विश्वनाथ प्रसाद मिश्र ने पुस्तक की भूमिका में लिखा है “मानस-हस्तलेखावगाहन के कम में देखा गया कि यों तो पाठ वृद्धि और प्रक्षेप की प्रवृत्ति बहुत पहले से है किन्तु अति प्रक्षेप संवत् 1785 से हुआ और संवत् 1820 तक पराकाष्ठा पर जा पहुँचा । निश्चय हुआ कि यथाशक्य संवत् 1785 के पूर्ववर्ती हस्तलेखों का ही उपयोग हो । छूट केवल प्राचीन परम्परासूचक प्रतियों को ही दी जाय । साथ ही कैथी (लिपि) की इसी सीमा के अन्तर्गत की प्रतियों का भी अवश्य विनियोग हो । स्थूल रूप में मानस प्रणेता के अवसान काल के अनन्तर एक शतक तक के उत्तरवर्ती हस्तलेखों का नियोजन हो और मानस के सर्जनकाल (संवत् 1631) से संवत् 1785 तक सम्भव हो तो प्रत्येक दशक का एक हस्तलेख अवश्य हो ।” विद्वान आचार्य ने बहुत ही वैज्ञानिक ढंग से निर्धारित सीमा के अन्तर्गत उपलब्ध मानस की हस्तलिखित प्रतिलिपियों का अध्ययन करके रामचरितमानस का मानक पाठ तैयार किया है । आचार्य मिश्र ने मानस के इस संस्करण में पाठभेदों और प्रक्षिप्त अंशों को भी समाहित किया है

। उनका यह कार्य निश्चय ही वंदनीय है । परन्तु जैसा उन्होंने स्वयं कहा है कि मानस में प्रक्षिप्त अंश लिखने की परम्परा गोस्वामी जी के अवसान के उपरान्त ही प्रारम्भ हो गयी थी । अतः इसमें कोई आश्चर्य नहीं कि उसी अवधि में कुछ ऐसे अंश जोड़ दिये गये जो गोस्वामी जी के विचारों और सिद्धान्तों से बिल्कुल मेल नहीं खाते । तुलसी साहित्य के मर्मज्ञ विद्वान डा० माताप्रसाद गुप्त ने अपनी पुस्तक 'रामचरितमानस' – प्रकाशक हिन्दुस्तानी एकेडमी इलाहाबाद (वर्ष 1949) की भूमिका में लिखा है कि – "कवि (तुलसीदास) की हस्तलिखित या उसकी समकक्ष प्रतियों के अभाव में यही एक मात्र प्रणाली (संपूर्ण ग्रंथ के लिए समस्त बहिर्साक्ष्य और अन्तः साक्ष्य का विप्लेशन करके निकाले हुए व्यापक सिद्धान्तों का अनुसरण करते हुए) रह जाती है जिसकी सहायता से कवि के पाठ के अधिक से अधिक निकट पहुँचने का प्रयास किया जा सकता है ।"

इस परिप्रेक्ष्य में मानस के कुछ प्रमुख प्रसंगों पर भी विचार किया जाना चाहिए जिन्हें लेकर अक्सर विवाद उठता रहता है । इस सिलसिले में सुन्दरकाण्ड की वह चौपाई उल्लेखनीय है जो सबसे अधिक विवादास्पद रही है –

'ढोल गवॉर सूद्र पशु नारी । सकल ताड़ना के अधिकारी' यह कथन समुद्र का है । श्रीराम के क्रोध करने के बाद समुद्र ने अपने बचाव में दो बातें कहीं । पहली बात 'गगन समीर अनल जल धरनी । इन कहि नाथ सहज जड़ करनी ॥' इनमें समुद्र जल है । इसलिए स्वभावतः जड़ होने के कारण उसने श्रीराम के अनुरोध की अनदेखी की । इसके बाद समुद्र ने दूसरी बात कही 'ढोल गवॉर सूद्र पशु नारी । सकल ताड़ना के अधिकारी' । समुद्र का यह कथन यहाँ असंगत लगता है क्योंकि समुद्र न तो ढोल है, न शूद्र है, न पशु है, न नारी है । समुद्र को गवॉर भी नहीं कहा जा सकता क्योंकि वह रघुकुल का कुलगुरु है – 'प्रभु तुम्हार कुलगुरु जलधि' । जब समुद्र इनमें से कोई नहीं है, तो उसके इस कथन की सार्थकता क्या है ? अर्थात् समुद्र का यह कथन यहाँ अप्रासंगिक है । ऐसा लगता है कि गोस्वामी जी के स्वर्गवास के उपरान्त मानस की प्रतिलिपि करते समय किसी कारणवश यह अर्द्धाली चिपका दी गयी होगी । इसके स्थान पर जो अर्द्धाली रही होगी वह कुछ ऐसी होगी – 'कपटी कुटिल कुमति उरगारी । सकल ताड़ना के अधिकारी ॥' आश्चर्य इस बात का है कि मानस के टीकाकारों ने इस पंक्ति पर इस दृष्टि से कभी विचार ही नहीं किया और सभी का प्रयास यह रहा कि वे इसी चौपाई को तर्कसंगत बताते रहें । यह अर्द्धाली इतनी सरल और स्पष्ट है कि इसकी व्याख्या की कोई आवश्यकता ही नहीं । यह प्रक्षिप्त है, ऐसा मानने के अलावा और कोई रास्ता नहीं ।

इसी प्रकार का एक और उदाहरण अरण्यकाण्ड की वह चौपाई है जिसपर विवाद उठता रहता है –

'सापत ताड़त परुष कहंता । बिप्र पूज्य अस मानहिं संता ॥

पूजिहि बिप्र सकल गुण हीना । सूद्र न गुन गन ग्यान प्रबीना ॥'

गोस्वामी तुलसीदास ऐसी तर्कहीन बात कैसे कह सकते हैं । उन्होंने उत्तरकाण्ड में ब्राह्मण के लिए यहाँ तक कहा –

'बिप्र निरक्षर लोलुप कामी । अनाचार सठ वृषली स्वामी ॥'

इसी प्रकार के कई अन्य उद्धरण दिये जा सकते हैं जहाँ गोस्वामी जी ने स्वयं ब्राह्मणों की आलोचना की है । गोस्वामी जी ब्राह्मणों के बारे में तर्कहीन बात कर ही नहीं सकते । उनकी रामकथा क्या है ? एक क्षत्रिय राजकुमार ने रावण जैसे सम्पन्न ब्राह्मणकुल का नाश कर दिया । अगर अरण्यकाण्ड की उपरोक्त चौपाई सही है तो राम द्वारा रावणबध का पूरा कार्य शास्त्र विरुद्ध हो जायेगा । सम्भवतः यही कारण है कि हिन्दी के प्रख्यात समालोचक और तुलसी साहित्य के मर्मज्ञ विद्वान आचार्य सूर्य प्रसाद दीक्षित भी यह मानते हैं कि 'पूजिहि बिप्र सकल गुण हीना' जैसी चौपाइयाँ प्रक्षिप्त हैं ।

सीता की अग्नि-परीक्षा भी एक प्रसंग है जिसे लेकर भगवान श्रीराम की आलोचना की जाती है । रामचरितमानस के उत्तरकाण्ड में मानस के प्रसंगों की जो सूची दी गयी है जिसका उल्लेख ऊपर किया जा चुका है उसमें सीता की अग्नि परीक्षा का कोई उल्लेख नहीं है । इससे ऐसा लगता है कि सीता की अग्नि परीक्षावाला अंश गोस्वामी जी का लिखा हुआ नहीं है । रामकथा के विशेषज्ञों ने भी सीता की अग्नि-परीक्षा को पूरी तरह प्रक्षिप्त माना है । महाभारत के रामोपाख्यान में भी सीता की अग्नि परीक्षा का कोई उल्लेख नहीं है । रामकथा के मर्मज्ञ विद्वान फादर कामिल बुल्के और बेवर जैसे पाश्चात्य विद्वान भी इस प्रसंग को प्रक्षिप्त मानते हैं –

“सीता की अग्नि-परीक्षा के प्रक्षिप्त होने में बहुत कम सन्देह है । वाल्मीकि रामायण के युद्धकाण्ड के अन्त में दो बार समस्त रामकथा का सिंहावलोकन प्रस्तुत किया गया है किन्तु अग्नि परीक्षा का उल्लेख नहीं है । बालकाण्ड की दोनों अनुक्रमणिकाओं का प्रमाणिक संस्करण भी अग्नि परीक्षा के विषय में मौन है । ”(पृष्ठ-424 रामकथा का विकास – कामिल बुल्के) रामचरितमानस मुख्यतः वाल्मीकि रामायण पर आधारित है और जब इसमें ही अग्नि-परीक्षा का उल्लेख नहीं है तो रामचरितमानस में भी इसे प्रक्षिप्त मानने के अलावा अन्य कोई रास्ता नहीं है । वैसे राम और सीता के सम्बन्ध में तुलसीदास ने पहले ही कहा है – ‘गिरा अरथ जल बीचि सम कहिअत भिन्न न भिन्न ।’ जिस श्रीराम ने गौतम ऋषि की पत्नी अहल्या का उद्धार क्षणमात्र में कर दिया जिसने धोखे से ही सही इन्द्र के साथ सहवास भी किया था । वे ही श्रीराम अपनी प्राणवल्लभा पत्नी सीता के साथ इतना कठोर कैसे हो सकते थे कि उनकी वे अग्नि-परीक्षा लें । लगता है कि अग्नि-परीक्षा का प्रसंग मध्यकालीन युग की सामाजिक मान्यताओं से प्रभावित होकर किसी ने जोड़ दिया होगा ।”

मानस का एक और प्रसंग बड़ा बिचित्र लगता है । वह प्रसंग है – ‘बालि वध’ का । मानस के अधिकांश संस्करणों में ऐसा उल्लेख मिलता है कि श्रीराम ने छिप कर बालि का वध किया था । यह बात तर्क की कसौटी पर खरी नहीं उतरती । मर्यादापुरुषोत्तम रघुकुलशिरोमणि और ब्रह्म के अवतार श्रीराम मर्यादा का इस प्रकार उल्लंघन क्यों करेंगे । आदि रामायण में ऐसा उल्लेख है कि श्रीराम ने बालि को द्वंद्व युद्ध में मारा था । महाभारत के रामोपाख्यान, तिब्बती और खोटानी रामायणों में भी ऐसा ही वर्णन मिलता है । प्रचलित वाल्मीकि रामायण के तीनों ही पाठों में बालि और राम के द्वंद्व युद्ध का उल्लेख है (रामकथा का विकास – कामिल बुल्के – पृष्ठ-380) । गोस्वामी जी ने किष्किन्धा काण्ड में लिखा है कि बालि के प्रश्न के उत्तर में भगवान श्रीराम ने कहा ‘मूढ तोहि अतिसय अभिमाना । नारि सिखावन करसि न काना ॥ मम भुजबल आश्रित तेहि जानी । मारा चहहि अधम अभिमानी ॥’ अर्थात् जिस सुग्रीव पर राम की कृपा हो उसे कौन मार सकता है । इसके साथ ही श्रीराम ने बालि वध का दूसरा कारण भी दिया –

‘अनुज वधू भगिनी सुत नारी । सुन सठ कन्या सम ये चारी ॥

इन्हिं कुदृष्टि बिलोकहि जेई । ताहि बधे कछु पाप न होई ॥’

श्रीराम के उत्तर के इन दोनों अंशों को देखने से यही निष्कर्ष निकाला जाना चाहिए कि भगवान राम ने ही बालि का वध द्वन्द्व युद्ध में किया होगा ।

मानस के लंकाकाण्ड में एक प्रसंग है – लक्ष्मण शक्तिबाण लगने से मूर्छित हैं । हनुमान जी वैद्य के कहने पर संजीवनी बूटी लेने जाते हैं, लौटते समय अयाध्या के ऊपर से गुजरते समय भरत ने उन्हें कोई राक्षस समझकर बाण से मार कर जमीन पर गिरा दिया । यह भरत और हनुमान जी की पहली मुलाकात थी । इसके पश्चात् उत्तरकाण्ड में श्रीराम की सलाह पर हनुमान जी भरत को श्रीराम के आने की सूचना देने के लिए जाते हैं । उस समय हनुमान की पुनः भरत से मुलाकात होती है । इस मुलाकात का मानस में जिस तरह वर्णन किया गया है उससे ऐसा नहीं लगता कि भरत और हनुमान की भेंट पहले भी हुयी होगी । इन दोनों ही प्रसंगों का उल्लेख उत्तरकाण्ड में वर्णित रामकथा के प्रसंगों की सूची में भी नहीं है । इससे

यह अनुमान लगाया जाता है कि लक्ष्मण को शक्तिबाण लगने का प्रसंग प्रक्षिप्त है । वैसे भी हनुमान जी से पहली बार भेंट होने के उपरान्त जब भरत को पता लगा कि श्रीराम संकट में हैं और लक्ष्मण को शक्तिबाण लग गया है, ऐसी विषम परिस्थिति में पहले चाहे जैसी भी प्रतिज्ञा की हो भरत राम की मदद के लिए अवश्य जाते । परन्तु उन्होंने ऐसा नहीं किया । इसलिए यह पूरा प्रसंग प्रक्षिप्त लगता है ।

रामचरितमानस में प्रक्षिप्त अंशों की चर्चा करते समय यह प्रश्न उठना स्वाभाविक है कि गोस्वामी जी द्वारा रचित मानस में कुल कितनी चौपाइयों रहीं होंगी । इस सम्बन्ध में उत्तरकाण्ड के अन्त में लिखित वह छन्द विचारणीय है जिसमें कहा गया है –

‘सतपंच चौपाई मनोहर जानि जो नर उर धरै’ । लखनऊ के नवलकिशोर प्रेस द्वारा प्रकाशित रामायण में इसका अर्थ 5100 चौपाइयों किया गया है । सनातन धर्म परिषद् के अध्यक्ष डा0 स्वामी भगवदाचार्य इसका अर्थ 35 करते हैं और वे उत्तरकाण्ड के – ‘प्रथमहिं अति अनुराग भवानी’ से लेकर सोरठा-68 तक की चौपाइयों की ओर संकेत करते हैं । हालाँकि स्वामी जी द्वारा उल्लिखित चौपाइयों की संख्या केवल 17.5 होती है । परन्तु अगर दो अर्द्धालियां की एक चौपाई मान ली जाय तो स्वामी जी का कथन युक्तिसंगत लगता है । वैसे तो चौपाई में चार पद होते हैं लेकिन व्यवहार में लोग दो पदों की चौपाई को भी चौपाई मान लेते हैं । वाराणसी के एक प्रतिष्ठित अखबार ने 4 अप्रैल, 2005 के सम्पादकीय में सतपंच का अर्थ उन चौपाइयों से किया है जो उत्तरकाण्ड के – ‘मेरु शिखर बट छाया मुनि लोमस आसीन’ से लेकर मानस के अन्त तक की हैं । इसमें दो सौ साढ़े इकहत्तर चौपाइयों, तीन श्लोक, तीन छंद, दो सोरठा और अड़तीस दोहे आते हैं । विद्वान संपादक ने सतपंच का यह अर्थ किस आधार पर किया है, वही जानें ।

वास्तव में तुलसीदास ने सत शब्द का प्रयोग मानस में अन्यत्र एक सौ ही के अर्थ में किया है । अतः सतपंच का अर्थ एक सौ पाँच या पाँच सौ ही होना चाहिए । अब प्रश्न यह उठता है कि ये चौपाइयों कौन सी हैं ? अगर नवल किशोर प्रेस द्वारा प्रकाशित रामायण की टीका पर ध्यान दिया जाय तो सतपंच का अर्थ मानस में चौपाइयों की संख्या से ही है । परन्तु प्रश्न यह है कि क्या गोस्वामी जी द्वारा रचित मानस में केवल पाँच सौ ही चौपाइयों रहीं होंगी । यह सही नहीं लगता । कुछ लोग दो दोहों या सोरठों के बोच की चौपाइयों के समूह को एक तरंग मानते हुए उन्हें एक चौपाई मानकर गणना करते हैं । लवकुशकाण्ड को निकालने के उपरान्त मानस में कुल तरंगों की संख्या 1074 है । अगर मूल मानस इस प्रकार की पाँच सौ तरंगों का था तो वर्तमान में उपलब्ध मानस का आधे से अधिक भाग प्रक्षिप्त हो जायेगा । वैसे तो यह बात बड़ी अटपटी लगती है किन्तु पाँच सौ तरंगों में मानस की कथा कही जा सकती है । जो भी हो यह अनुसंधान का विषय है ।

### निष्कर्ष

रामचरितमानस गंगा की तरह है । इस तरह का वर्णन गोस्वामी जी ने बार-बार किया है । जिस प्रकार गंगा में मिलने वाली अन्य नदियों का जल भी गंगा में मिलकर गंगाजल हो जाता है, उसी प्रकार अगर गोस्वामी जी द्वारा रचित मानस में बाद में कुछ लोगों ने कुछ पंक्तियों जोड़ दी तो उन्हें भी रामचरितमानस का हिस्सा माना जाना चाहिए । आज लोक व्यवहार में ऐसा हो भी रहा है । परन्तु गंगाजल में भी अगर कुछ खर-पतवार आ जाते हैं, तो उन्हें अलग करके ही गंगाजल ग्रहण किया जाता है । रामचरितमानस में कुछ सूक्तियाँ जैसे – ‘ढोल गवॉर सूद्र पशु नारी’, ‘पूजहिं विप्र सकल गुणहीना’, ‘जदपि जोषिता नहिं अधिकारी’ ‘काने खोरे कूबरे, कुटिल कुचाली जानि’, ‘अवगुन आठ सदा उर रहहीं’ ऐसी सूक्तियाँ हैं जो गंगाजल में खर-पतवार की तरह हैं । वर्तमान परिस्थिति में इन्हें अलग करके ही गंगाजल से आचमन किया जाना चाहिए । इन सूक्तियों का गोस्वामी तुलसीदास के जीवन-दर्शन से कोई मेल नहीं खाता । वे स्पष्ट कहते हैं – ‘कीरति भनिति भूति भलि सोई । सुरसरि सम सब करि हित होई

।।' अगर मानस की उपरोक्त सूक्तियों से समाज के किसी वर्ग का दिल दुखता हो तो गोस्वामी जी की रचना सुरसरि के समान सब के लिए हितकारी कैसे हो सकती है ।

किंवदन्तियों का कोई वैज्ञानिक आधार नहीं होता । परन्तु वे किसी तथ्य की ओर अवश्य संकेत करती हैं । किंवदन्ती है कि रामचरितमानस पर स्वयं भगवान शंकर ने 'सत्यम् शिवम् सुन्दरम्' लिखकर सही किया था । जिस रचना को स्वयं ईश्वर ने अपना आशीर्वाद दिया हो, उसमें मनुष्य-मनुष्य के बीच भेदभाव कैसे हो सकता है । गोस्वामी जी तो समस्त चराचर जगत को राममय मानते हैं । वे संत और असंत दोनों की वन्दना करते हैं । वे वैष्णव संत हैं । वे अप्रिय सत्य भी क्यों कहेंगे ।

रामचरितमानस को विद्वान लोग कालजयी रचना कहते हैं । मानस के उपरोक्त विवादास्पद प्रसंगों की जब चर्चा होती है तो कुछ विद्वान कहते हैं कि तुलसीदास की रचना को उनके युग के परिवेश के परिप्रेक्ष्य में देखा जाना चाहिए । यह सच है कि कवि की रचना पर उसके समय का प्रभाव अवश्यमेव पड़ता है परन्तु अगर किसी रचना में ऐसे सिद्धान्त और आदर्श हैं जो किसी कालखंड विशेष में ही लागू होते हैं तो उस रचना को कालजयी रचना नहीं कहा जा सकता । रामचरितमानस निःसन्देह एक कालजयी रचना है । इसमें वर्णित आदर्श और सिद्धान्त तब तक लागू होंगे जब तक इस पृथ्वी पर पर्वत मौजूद हैं, नदियों में पानी बह रहा है, आकाश में सूर्य और चन्द्रमा प्रकाशमान हो रहे हैं । परन्तु इसका तात्पर्य यह नहीं कि मानस में यदि बाद में किसी ने कुछ जोड़ दिया हो तो उसे भी कालजयी मान लिया जाय । इस बात को ध्यान में रखकर राष्ट्र और समाज के व्यापक हित में तुलसीदास के रामचरितमानस का मूल्यांकन और पाठ निर्धारण किया जाना चाहिए ।

लवकुशकाण्ड को निकाल देने के बाद रामचरितमानस में 103 चौपाइयाँ ऐसी हैं जिनमें केवल दो-दो अर्द्धालियाँ हैं । चार हजार तीन सौ से अधिक चौपाइयों में से केवल एक सौ तीन चौपाइयों में ऐसा होना आश्चर्यजनक है । गास्वामी तुलसीदास महान साहित्यकार थे, उन्हें काव्य-शास्त्र और पिंगल का पूरा ज्ञान था । इसलिए यह विश्वास किया जाना चाहिए कि वे दो अर्द्धालियों की चौपाई नहीं लिखेंगे । इसी विश्वास के आधार पर मानस के प्रस्तुत संस्करण में एक सौ तीन में से अधिकांश चौपाइयों को शुद्ध करके चार अर्द्धालियों वाली चौपाई बना दी गयी है ।

मानस के पाठ संशोधन के कम में एक सत्य घटना का उल्लेख करना आवश्यक है । लखनऊ के गोमती नगर मोहल्ले में महिलाओं की एक संस्था के एक प्रतिनिधि ने मुझे बताया कि वे प्रत्येक मंगलवार को किसी न किसी सदस्य के घर पर सुन्दरकाण्ड का पाठ आयोजित करती हैं । इस कम में जब 'ढोल गवार शूद्र पशु नारी' चौपाई आती है तो उसे हम लोग नहीं पढ़ते हैं क्योंकि हम लोगों का यह विश्वास है कि यह चौपाई तुलसीदास की लिखी हुयी नहीं हो सकती । उपरोक्त चौपाई को सही ठहराने के लिए सैकड़ों मानस विशेषज्ञों ने हजारों पृष्ठों के बड़े बड़े ग्रन्थ लिखे हैं । इसके उपरान्त भी आम आदमी उनकी बात से सहमत नहीं हो सका है । महिलाओं द्वारा इस चौपाई का नहीं पढ़ा जाना इसी बात का संकेत है । मानस विशेषज्ञों को इस पर गहराई से विचार विमर्श करना चाहिए कि वे अब तक इस चौपाई को सही क्यों ठहराते रहे हैं ? वे ऐसा क्यों नहीं सोचते कि यह चौपाई प्रक्षिप्त हो सकती है ।

मानस के इस संस्करण को लिपिबद्ध करने में आचार्य विश्वनाथ प्रसाद मिश्र द्वारा सम्पादित काशिराज संस्करण, हिन्दुस्तानी एकेडमी, इलाहाबाद द्वारा प्रकाशित तथा डा0 माता प्रसाद गुप्त द्वारा संपादित रामचरितमानस, नवलकिशोर प्रिन्टिंग प्रेस लखनऊ द्वारा मुद्रित तथा रूपनारायण पाण्डेय द्वारा सम्पादित रामायण, गीताप्रेस द्वारा प्रकाशित रामचरितमानस तथा अम्बुजा प्रकाशन लखनऊ द्वारा प्रकाशित 'चन्द्राकर ग्रन्थावली' की सहायता ली गयी है । इसके लिए हम इन सभी संस्थाओं और व्यक्तियों के प्रति आभार व्यक्त करते हैं ।

यह पुस्तक लिखने की प्रेरणा मुझे कहीं से हुई, ठीक से नहीं कह सकता । शायद इसके पीछे किसी अदृश्य शक्ति का हाथ हो । परन्तु इस सम्बन्ध में जब मैंने मानस मर्मज्ञ डा० महावीर सिंह से चर्चा की तो उन्होंने थोड़ी देर सोचने के बाद कहा कि, हॉ! इस बात की खोज होनी चाहिए कि रामचरितमानस में कौन से अंश प्रक्षिप्त हैं । इसके बाद डा० महावीर सिंह ने प्रारम्भ से लेकर अंत तक इस ग्रन्थ के सम्पादन में मेरा मार्गदर्शन किया । इसके लिए मैं उनका आभारी हूँ । इसी बीच हमारी मुलाकात हमारे मित्र श्री जगत नारायण लाल श्रीवास्तव से हुई जो भारतीय प्रशासनिक सेवा के सेवानिवृत्त अधिकारी हैं । उन्होंने हमारे कार्य के बारे में सुनते ही कहा कि वे इस ग्रन्थ के प्रकाशन के लिए आर्थिक सहायता देंगे । मुझे लगा कि श्रीयुत श्रीवास्तव के रूप में हनुमान जी यह संकेत कर रहे हैं कि मैं यह काम अवश्य पूरा करूँ । श्री जगत नारायण लाल श्रीवास्तव देश के उन गिने-चुने प्रशासनिक अधिकारियों में से हैं जो सेवानिवृत्ति के बाद भी पिछड़े वर्गों विशेषकर महिलाओं के आर्थिक उत्थान और शिक्षा के प्रचार-प्रसार में लगे हुए हैं । मुझे यह स्वीकार करने में कोई संकोच नहीं है कि इनके सहयोग से ही मानस का यह संस्करण तैयार हो सका है । इसलिए मैं इनका कृतज्ञ हूँ ।

गोण्डा के श्री जगन्नाथ त्रिपाठी भी धन्यवाद के पात्र हैं जिन्होंने हमसे सहमत न होते हुए भी बहुमूल्य सुझाव दिये । उनका अध्ययन बहुत गहन है उसे नमन करता हूँ। श्री के० पी० श्रीवास्तव जो रिटायर्ड आई०ए०एस० अधिकारी हैं का भी मैं आभारी हूँ जिन्होंने अपने निजी पुस्तकालय का खुलकर उपयोग करने दिया । अरूण कुमार चौबे का मैं विशेष रूप से अनुग्रहीत हूँ जिन्होंने इस ग्रन्थ के लिए सुन्दर रेखाचित्र बनाये । श्री बलदेव चौधरी जो एक युवा सामाजिक कार्यकर्ता हैं तथा एक राजनीतिक दल के प्रमुख नेता हैं भी धन्यवाद के पात्र हैं जिन्होंने सतत मेरा उत्साहवर्द्धन किया । सुन्दरकाण्ड के संपादन में गोरखपुर के वरिष्ठ पत्रकार गिरिजेश राय ने कुछ अमूल्य सुझाव दिये जिससे मानस के इस संस्करण की श्रीवृद्धि हुयी । इसी तरह अरण्यकाण्ड के संपादन में लखनऊ के वरिष्ठ पत्रकार जगदम्बा प्रसाद शुक्ल के विचारों से मुझे काफी सहायता मिली इसके लिए मैं उनका आभारी हूँ । सनातन धर्म परिषद के अन्तर्राष्ट्रीय अध्यक्ष डा० स्वामी भगवदाचार्य का आभारी हूँ जिन्होंने समय-समय पर मेरा उत्साहवर्द्धन किया । उदीयमान लेखक सूर्यकान्त शर्मा हमारे मित्र हैं प्रकाशन के विशेषज्ञ हैं सहृदय हैं काव्य के पारखी हैं उनके अमूल्य सुझावों के लिए मैं उनका ऋणी हूँ । मानस प्रेमियों सर्वश्री धीरेन्द्र ओझा तथा राम प्रताप 'सरोज' का भी मैं आभारी हूँ जिन्होंने मेरा सतत उत्साहवर्द्धन किया । केन्द्र सरकार में इंजीनियर के रूप में बड़े पद पर काम कर चुके लखनऊ के श्री सर्वेश्वर दयाल मिश्र किसी बात को तब तक स्वीकार नहीं करते जब तक वह तर्क संगत न हो । इस ग्रंथ के सम्पादन के दौरान उनसे कई बार विचार विमर्श करने का अवसर मिला जिससे हमारा मार्ग दर्शन हुआ । उन्हें साधुवाद देता हूँ । आकाशवाणी लखनऊ के समाचार विभाग के निदेशक श्री मुन्नीलाल ने मानस के इस संस्करण के प्रकाशन के लिए आर्थिक सहयोग का प्रबन्ध किया । इसके लिए व कोटिशः धन्यवाद के पात्र है । सार्वजनिक कार्यों में यह उनकी सुरुचि का परिचायक है ।

वाराणसी से प्रकाशित हिन्दी दैनिक सन्मार्ग के विद्वान सम्पादक का भी मैं बहुत आभारी हूँ जिन्होंने रामचरितमानस के सम्बन्ध में संपादकीय लिखकर मेरा मार्गदर्शन किया । यद्यपि उन्होंने हमारे विचारों से सहमति व्यक्त नहीं की परन्तु अपने संपादकीय में उन्होंने जो सिद्धान्त प्रतिपादित किये उसकी वजह से मैं कई त्रुटियों करने से बच गया । इसके लिए उन्हें साधुवाद । हमारा प्रयास रहा है कि ग्रंथ के प्रकाशन में पूफ की कोई भूल न रह जाय, इसके बावजूद अनेक गलतियां रह गयीं होंगी इसके लिए हम अपने पाठकों से क्षमाप्रार्थी हैं ।

हम यह दावा तो नहीं करते कि प्रस्तुत रामचरितमानस ही गोस्वामी तुलसीदास द्वारा रचित रामचरितमानस का हूबहू मूल पाठ है, परन्तु हमें विश्वास है कि रामचरितमानस के अब तक

जितने संस्करण प्रकाशित हुए हैं उन सब में हमारा ही संस्करण गोस्वामी जी द्वारा लिखित मानस के मूल पाठ के सबसे नज़दीक होना चाहिए ।

हिन्दी के प्रतिष्ठित कथा शिल्पी नवनीत मिश्र का विश्वास है कि रामचरित मानस अपौरुषेय रचना है मैं उनसे शत-प्रतिशत सहमत हूँ। ऐसा लगता है कि स्वयं भगवान शंकर ने गोस्वामी जी के माध्यम से मानस की रचना की –‘रचि महेश निज मानस राखा’

अमेरिका के फिलेडेल्फिया निवासी डा० स्वतंत्र कुमार पिडारा मानस के सम्मानित विद्वान हैं। प्राचीन भारतीय ग्रंथों में किसी प्रकार के संशोधन को वह एक जटिल समस्या मानते हैं परन्तु उनका मत है किस सनातन धर्म की प्रतिष्ठा के लिए सतत विचार-विमर्श होते रहना चाहिए। इस तरह प्रकारान्तर से इस ग्रंथ के सम्पादन के लिए उनका भी आशीर्वाद प्राप्त है।

देवरिया से प्रकाशित होने वाली साहित्यिक पत्रिका ‘अंचल भारती’ के विद्वान सम्पादक डा० जयनाथ मणि त्रिपाठी किसी भी साहित्यिक कृति में किसी प्रकार के संशोधन के पक्षधर नहीं हैं परन्तु वर्तालाप के दौरान उन्होंने मानस के कई प्रसंगों की अद्भुत व्याख्या की। उससे इस ग्रंथ के प्रकाशन में सहायता मिली हम उनके भी आभारी हैं।

ग्रन्थ की पाण्डुलिपि तैयार करने में हमारे मित्र गोपाल नाथ शुक्ला का विशेष योगदान रहा । इसके लिए मैं उनका आभारी हूँ । मैं अपनी धर्मपत्नी श्रीमती सुशीला शुक्ला और सुपुत्री अमृता शुक्ला का भी विशेष रूप से आभारी हूँ जिन्होंने कई उपयोगी सुझाव दिये । ग्रन्थ के सम्पादन के लिए घर में अनुकूल वातावरण बनाये रखने का श्रेय इन्हीं को जाता है ।

उम्मीद है कि समाज के सभी वर्गों के लोग इस ग्रन्थ का स्वागत करेंगे ।

रामसागर शुक्ल

श्री राम विवाह पंचमी, विक्रम सम्वत् 2062

6 दिसम्बर 2005

लखनऊ ।

बन्दुं तुलसी के चरन जिन्ह कीन्हेउ जग काज ।

कलि समुद्र बूड़त लखेउ प्रगटेउ सप्त जहाज ॥

सूकरखेत राजापुर गांव ।

तुलसी जनमे थे एहि ठाँव ॥

रामचरितमानस के रचयिता गोस्वामी तुलसीदास का जन्म संवत् 1589 में श्रावण शुक्ला सप्तमी के दिन अयोध्या के निकट गोण्डा जनपद के सूकरखेत में सरयू तट पर राजापुर गांव में हुआ था । इनकी माता का नाम हुलसी तथा पिता का नाम आत्माराम दुबे था । तुलसी बचपन में माता-पिता की छत्रछाया से वंचित हो गये । चुनिया दासी ने इनका पालन-पोषण किया परन्तु उसका भी निधन तुलसीदास के बचपन में ही हो गया । इसके उपरान्त तुलसीदास राजापुर से पाँच किलोमीटर दक्षिण नरहरि आश्रम पसका आए । वहाँ उनके गुरु नरहरिदास ने उनको शरण दी । बाद में उन्होंने ही उन्हें दीक्षित किया । तुलसीदास के गुरु नरहरिदास गोरखपुर जिले के बाँसगांव तहसील में सोहगौरा गांव के निवासी थे । वे शाण्डिल्य गोत्रीय तिवारी ब्राह्मण थे ।

श्री अवधनारायण सिंह, आइ०पी०एस० ने नेपाल से प्राप्त एक पाण्डुलिपि के आधार पर कहा है कि गोस्वामी जी के पिता आत्माराम दुबे देवरिया जिले के मझौली रियासत में बांसडीह गांव के रहने वाले थे । वहाँ भारी सूखा पड़ने के कारण गोस्वामी जी के पूर्वज गोण्डा जिले के

राजापुर में आ गये और अपनी विद्वत्ता से थोड़े ही दिनों में पसका रियासत के राजपुरोहित हो गये । कालान्तर में उस गाँव के और लोग भी राजापुर गाँव में आकर बस गये । आज भी राजापुर में दुबे ब्राह्मण काफी संख्या में हैं । पितृपक्ष में वे आत्माराम, हुलसी और तुलसी के नाम श्राद्ध, पिण्डदान और तर्पण करते हैं । तुलसी का ननिहाल बहराइच जिले के दधिवल कुण्ड दहौरा में था । तुलसी की माता हुलसी धनीर मिश्र की पुत्री थीं । अब्दुल रहीम खानखाना ने संकेत किया है कि –

सुर तिय नर तिय नाग तिय अस चाहत सब कोय,  
गोद लिए हुलसी फिरें तुलसी सो सुत होय ॥

स्वामी नरहरिदास ने गोस्वामी तुलसीदास को विद्याध्ययन के लिए काशी में शेष सनातन की पाठशाला में भेजा । वहाँ तुलसीदास ने पन्द्रह वर्षों तक वेद-वेदान्त, व्याकरण, दर्शन आदि का विधिवत अध्ययन किया ।

गोस्वामी जी ने दोहावली में बहराइच का भी उल्लेख किया है—

लही आँख कब आँधरे बांझ पूत कब ल्याय,  
कब कोढी काया लही जग बहराइच जाय ॥

राजापुर सूकरखेत में तुलसी के पिता आत्माराम दुबे के नाम से आज भी एक गोचर भूमि है जिसे आत्माराम टिपरा कहते हैं । आत्माराम दुबे सरयूपारीण ब्राह्मण थे । गोण्डा और आसपास के जिलों में आज भी सरयूपारीण ब्राह्मणों का बाहुल्य है ।

गोस्वामी तुलसीदास बालब्रह्मचारी थे । उन्होंने विनयपत्रिका में लिखा –

‘ब्याह न बरेखी जाति पांति न चाहत हौं’

कवितावली में भी उन्होंने इस तरह का संकेत दिया –

‘धूत कहौं, अवधूत कहौं, रजपूत कहौं, जोलहा कहौं कोरु ।

काहूकी बेटीसों बेटा न ब्याहब, काहूकी जाति बिगार न सोरु ॥’

कुछ लोग गोस्वामी जी की पत्नी का नाम रत्नावली बताते हैं । वास्तव में तुलसीदास नाम के कई साहित्यकार हो चुके हैं । इनमें से बलरामपुर जिले के देवीपाटन के एक तुलसीदास थे जिन्होंने जानकी विजय, गंगा कथा आदि रचनाएँ कीं । इनकी पत्नी का नाम रत्नावली था । भ्रम से लोग दोनों तुलसीदास को एक ही समझ लेते हैं । परन्तु वास्तविकता यह है कि मानस के रचयिता गोस्वामी तुलसीदास अविवाहित थे ।

शिक्षा ग्रहण करने के उपरान्त गोस्वामी तुलसीदास ने भारत के विभिन्न तीर्थों का भ्रमण किया । चित्रकूट में रामघाट पर हनुमान जी की कृपा से उन्होंने भगवान श्रीराम के दर्शन किए ।

‘चित्रकूट के घाट पर भई संतन्ह की भीर,

तुलसिदास चंदन घिसैं तिलक देत रघुबीर ॥’

बाद में गोस्वामी जी अयोध्या आ गये । वहीं उन्होंने संवत् 1631 में रामचरितमानस की रचना प्रारम्भ की तथा संवत् 1633 के मार्गशीर्ष शुक्ल पक्ष पंचमी तिथि, श्रीराम विवाह के दिन दो वर्ष सात माह छब्बीस दिन के बाद मानस की रचना पूर्ण हुई । गोस्वामी जी की प्रारम्भिक रचना रामलला नहछू बताई जाती है । उनकी अंतिम रचना विनय पत्रिका है । संवत् 1680 में श्रावण कृष्णा तीज तिथि को काशी के अस्सी घाट पर गोस्वामी जी शरीर त्याग कर साकेतवासी हो गये ।

गोस्वामी जी ने मानस के प्रचार के लिए कई महत्वपूर्ण कार्य किए । उन्होंने काशी में द्वादश हनुमान मंदिरों की स्थापना की । उन्होंने रामलीला भी शुरू करायी । गोस्वामी जी का व्यक्तिगत जीवन बहुत संघर्षपूर्ण था । मानस की रचना उन्होंने अवधी में की । इसका विरोध तत्कालीन विद्वानों ने किया जो चाहते थे कि मानस की रचना संस्कृत में ही की जाय । परन्तु

तुलसीदास रामकथा को जन-जन तक पहुँचाना चाहते थे । इसलिए उन्होंने विद्वानों के विरोध के बावजूद अवधी भाषा में ही रामकथा लिखी ।

गोस्वामी तुलसीदास ने अपने जीवन के सम्बन्ध में स्पष्ट रूप से कुछ अधिक नहीं लिखा है इसलिए इस सम्बन्ध में कई तरह के विचार प्रस्तुत किए गये हैं । कुछ लोग गोस्वामी जी का जन्म स्थान बांदा जिले का राजापुर मानते हैं, जबकि कुछ लोग एटा जिले का सोरो तुलसी का जन्म मानते हैं । मानस में तुलसीदास ने लिखा –

‘मैं पुनि निज गुर सन सुनी, कथा सो सूकरखेत ।

समुझी नहिं तसि बाल पन तब अति रहेउँ अचेत ॥’

अर्थात् सूकरखेत में तुलसीदास ने बचपन में रामकथा का श्रवण किया था । यह सूकरखेत अयोध्या के पास होना चाहिए । इस सम्बन्ध में विनय पत्रिका में गोस्वामी जी कहते हैं –

‘आलसी अभागे मोसे तैं कृपालु पाले-पोसे ।

राजा मेरे राजाराम अवध सहरू ॥’

अर्थात् गोस्वामी जी अयोध्या के पास के रहने वाले थे । इस दृष्टि से भी गोण्डा जिले का पसका सूकरखेत गोस्वामी जी का जन्म-स्थान सिद्ध होता है । अयोध्या की चौरासी कोसी परिक्रमा के अन्तर्गत भी यह स्थान आता है । राजापुर से पाँच किलोमीटर दक्षिण सरयू-घाघरा के संगम पर नरहरिदास का आश्रम आज भी मौजूद है। वहीं पर आठ किलोमीटर दूर वाराही देवी का मन्दिर है ।

कवितावली में गोस्वामी जी ने कहा प्रभु! आपका जो गोत्र है वही मेरा भी गोत्र है – ‘साह ही को गोतु गोतु होत है गुलाम को’ । भगवान श्रीराम का गोत्र भारद्वाज गोत्र है और गोस्वामी जी के वर्तमान वंशजों का भी गोत्र भारद्वाज है । कवितावली में ही तुलसीदास जी ने एक और संकेत दिया – ‘तुलसी तिहारो घर जायउ है घरको’ इस प्रकार यह स्पष्ट हो जाता है कि तुलसीदास जी का जन्म-स्थान गोण्डा जिले का राजापुर ही है । उनकी रचनाओं में जिस भाषा, संस्कृति और आचार-व्यवहार का उल्लेख है वह भी पूर्वी उत्तर प्रदेश के गांव से ही मेल खाता है ।

स्कन्द पुराण में कहा गया है –

‘दश कोटि सहस्राणि दश कोटि शतानि च । तीर्थानि सरयूनद्याः घर्घरोदक संगमे ॥

अर्थात् सरयू और घाघरा के संगम पर पवित्र तीर्थ है और यह तीर्थ आज का सूकरखेत है । इसका प्रमाण देवीभागवत पुराण और रुद्र यामलतंत्र में भी मिलता है । आचार्य रामचन्द्र शुक्ल के अनुसार कुछ लोग भ्रम से सूकरखेत को एटा का सोरो समझ लेते हैं, जो सही नहीं है । वास्तव में सूकरखेत गोण्डा जिले में सरयू के किनारे स्थित एक तीर्थ है । कुछ निहित स्वार्थी तत्त्वों ने ग्रन्थों में फेर-बदल करके तुलसीदास का जन्म-स्थान बांदा जिले के राजापुर में प्रचारित करने का प्रयास किया । परन्तु अब इसकी पोल खुल गयी है । अब अधिकांश विद्वान यह मानने लगे हैं कि तुलसीदास का जन्म गोण्डा जिले के राजापुर में ही हुआ था । स्वामी श्री राम सुन्दर दास जी रामायणी, स्वामी श्रीकान्त शरण जी, श्री स्वामी नृत्य गोपाल दास जी, श्री स्वामी सीताराम शरण जी, स्वामी श्री गुरुचरणदास जी व्यास, तुलसी साहित्य के विशेषज्ञ डॉ० भगीरथ मिश्र, डॉ० सूर्य प्रसाद दीक्षित, डॉ० रामजी तिवारी, लल्लन प्रसाद व्यास, डॉ० रमाशंकर तिवारी, डॉ० कमलाशंकर त्रिपाठी, श्री के० पी० श्रीवास्तव, डॉ० रामफेर त्रिपाठी आदि विद्वानों का स्पष्ट मत है कि तुलसीदास बालब्रह्मचारी थे और उनका जन्म गोण्डा जिले के राजापुर में हुआ था ।

अनेक विद्वानों ने अवधी भाषा, अवधी संस्कृति, पुरावशेषों और हस्तलेखों का तुलनात्मक अध्ययन करने के बाद यह निष्कर्ष निकाला है कि अयोध्या के पास सरयू तट पर स्थित

सूकरखेत से संलग्न राजापुर गांव ही मानस के रचयिता गोस्वामी तुलसीदास की जन्म-स्थली है ।

गोस्वामी जी के बारे में अनेक किंवदन्तियाँ प्रचलित हैं । कहा जाता है कि एक बार चोरों ने गोस्वामी जी द्वारा रचित रामचरितमानस को चुराने का प्रयास किया । परन्तु जब चोर रात्रि में गोस्वामी जी के निवास स्थान पर गये तो उन्होंने देखा कि वहाँ भगवान श्रीराम व लक्ष्मण धनुषबाण लिए हुये गोस्वामी जी के घर की रखवाली कर रहे थे । चोर वापस चले गये । बताया जाता है कि बाद में उन्होंने सन्यास धारण करके भगवत् प्राप्ति की । एक अन्य विवरण के अनुसार काशी के उदभट विद्वान श्री मधुसूदन सरस्वती ने रामचरितमानस को देखकर हर्षातिरेक से अपना विचार इस प्रकार प्रगट किया –

“आनन्दकानने ह्यस्मिन् तुलसी जंगमस्तरुः ।

कविता मंजरी भाति रामभ्रमरभूषिता ॥”

अर्थात् काशीरूपी वन में तुलसीदास एक चलता-फिरता पौधा है । उनकी कविता रूपी मंजरी अत्यन्त सुन्दर है जिसपर रामरूपी भ्रमर मंडराया करता है ।

एक अन्य कथा के अनुसार भक्तमाल के प्रणेता स्वामी नाभादास गोस्वामी जी की प्रशंशा सुनकर उनसे मिलने काशी गये । परन्तु संयोगवश उनकी भेंट नहीं हो सकी और वे वृन्दावन लौट गये । इस बात का पता चलते ही गोस्वामी जी नाभादास से मिलने वृन्दावन गये । जिस समय गोस्वामी जी वहाँ पहुँचे उस समय वहाँ भण्डारा में पंगत फिर रही थी । गोस्वामी जी भी पंगत में बैठ गये । खीर परोसी जा रही थी । गोस्वामी जी के पास खीर लेने के लिए कोई पात्र नहीं था । अचानक पास से एक जूता लेकर उन्होंने कहा खीर इसमें डाल दीजिए और बड़े प्रेम से जूते में रखी हुई खीर को भगवद्प्रसाद समझकर ग्रहण कर लिया । इसी संदर्भ में गोस्वामी जी ने कहा –

‘तुलसी जाके मुखन ते धोखेहु निकसत राम,

तिन्ह के पग की पगतरी मेरे सिर को चाम ॥

तुलसीदास की भक्ति को देखकर नाभादास ने उनके बारे में कहा –

“कलि कुटिल जीव निस्तार हित वाल्मीकि तुलसी भयो”

डॉ० ग्रियर्सन ने अपने शोध निबंध ‘हिन्दुस्तान का मध्यकालीन साहित्य’ में उल्लेख किया है कि गौतम बुद्ध के बाद उत्तरी भारत के सबसे बड़े लोकनायक तुलसीदास थे । इस महान संत ने रामचरितमानस जैसा विश्व प्रसिद्ध महाकाव्य समाज को प्रदान किया । मानस संगम कानपुर के संस्थापक विद्वान डा० बद्री नारायण तिवारी ने एक जगह लिखा है “विश्वकवि गोस्वामी तुलसीदास जी के अनेक रूप हैं । वे कवि, संत, भक्त, दार्शनिक के साथ ही समाज सुधारक भी थे । तुलसी की जीवन यात्रा जन्म से ही चुनौतीपूर्ण रही । उन्हें अपने सामाजिक जीवन में तमाम विरोधों का सामना करना पड़ा । उनके साहित्य सृजन के क्षेत्र में अनेक बाधाएं आयीं किन्तु तुलसी के दृढ़ संकल्प ने सदैव उनका मार्ग प्रशस्त किया । उनकी चेतना में असीम आत्म-बल का सागर था । प्रभु राम की कृपा उनके साथ थी जिससे उनका सृजन जनमानस के अंतस तक आत्मसात हो रहा है ।

डा० स्वामी भगवदाचार्य सनातन धर्म परिषद् के अन्तर्राष्ट्रीय अध्यक्ष हैं । गोस्वामी तुलसीदास के साहित्य के प्रचार-प्रसार के लिए इन्होंने देश के सभी प्रमुख शहरों में तुलसी पीठों की स्थापना की है । यह कार्य अभी भी जारी है । प्रस्तुत निबंध तुलसीदास के जीवन के सम्बन्ध में उनके विस्तृत शोध का सारांश है ।

गोस्वामी जी का भक्ति निरूपण समन्वय पर आधारित है । इसलिए उनका भक्ति-दर्शन व्यापक और समावेशक है । उन्होंने कुछ नये मानक भी स्थापित किये । भक्ति को परिभाषित करते हुए उन्होंने कहा—जाते वेगि द्रवों में भाई । सो मम भगति भगत सुखदाई ॥

उक्त अर्द्धाली में भक्ति की संक्षिप्ततम परिभाषा दी गयी है किन्तु अपनी अर्थ व्याप्ति में वह बहुत अर्थगर्भ है । गोस्वामी जी का मत है कि जो भाव, विचार या किया आराध्य को शीघ्र द्रवित कर दे वही भक्ति है । किन्तु ध्यातव्य है यह परिभाषा स्वयं भगवान द्वारा स्थापित करायी गयी है । इससे उसकी प्रामाणिकता सिद्ध होती है । दूसरी मार्मिक बात यह है कि भक्ति भगवान और भक्त के बीच एक रागात्मक सम्बन्ध अर्थात् बन्धुत्व स्थापित करती है, इसलिए उसमें कवल भगवान का त्वरित द्रवीभूत हो जाना ही पर्याप्त नहीं है, भगत सुखदायी होना भी आवश्यक है । अर्थात् भक्ति वही है जिससे आराध्य तत्काल द्रवीभूत होकर अनुकूल हो और शरणागत भक्त प्रीति-प्रतीतिपूर्वक आह्लाद का अनुभव करे । ध्यान से देखने पर लक्षित होगा कि इस छोटी सी परिभाषा में प्रेम, प्रपत्ति और शरणागति के साथ ही ईश्वर कृपा, भक्ति की श्रेष्ठता, आराध्य की सर्वशक्तिमत्ता तथा भक्ति से प्राप्त होने वाले आध्यात्मिक आनन्द का समावेश हो गया है । दोहावली में भक्ति को परिभाषित करते हुए गोस्वामी जी लिखते हैं—

राम सों नीति पथ चलिय रागरिस जीति ।

तुलसी संतन के मते इहै भगति की रीति ॥

उक्त दोहे में राम की प्रीति के साथ नीति-पथ के अनुसरण और रागरिस से विरत होने की बात कही गयी है । वस्तुतः राग-द्वेष से आविष्ट चित्त में राम की प्रीति का उदय हो ही नहीं सकता । राग-द्वेष से उपराम होने के पश्चात ही आराध्य के प्रति शुद्ध प्रपत्ति और अनुरक्ति का भाव उत्पन्न होता है । नीतिपथ का अनुसरण आचरण मूलक शुचिता द्वारा विषयासक्ति से विमुक्त करता है । अभिप्राय यह है 'नीति-पथ' के अनुसरण और 'रागरिस' पर विजय प्राप्त करने से भक्त के हृदय में राम की प्रेम-स्वरूपा भक्ति की भूमिका तैयार होती है । यम-नियम नियंत्रित नीति-पथ-अनुगामी, विरज विशुद्ध चित्त वाला भक्त-हृदय, निष्काम भाव से भगवान की पावन प्रीति में तद्वत हो जाता है । यही 'परानुरक्ति' अथवा परम प्रेमा भक्ति है ।

प्रेमाभक्ति और गुणात्मिका भक्ति के उभय रूपों में गोस्वामी जी प्रेमाभक्ति के पोषक हैं । राम के प्रति प्रीति-प्रतीति ही रामाकार होने का साधन है । प्रीति ही माया मुक्त करके भगवान की भक्ति में अनन्यभाव से अनुरक्त करती है । अखण्ड विश्वास और अनन्यता प्रेम की ठोस भूमि है । उस भूमि पर पहुँचा हुआ भक्त माया-मोह के प्रवाह में पतित नहीं होता । ऐसे अखण्ड श्रद्धा-संयुक्त भक्त के हृदय में उद्भूत प्रीति असाध्य को भी साध्य बना देती है । पाहन से परमेश्वर निकल आते हैं । गोस्वामी जी कहते हैं—

प्रीति बढौं प्रह्लाद को जिन पाहन ते परमेशुर काढे ।

इतना ही नहीं इस प्रीति प्रतीति की प्रगाढ़ता के कारण ही शैली प्रतिमाओं को ईश्वर का स्वरूप मानकर उनकी पूजा की जाने लगी —

प्रीति प्रतीति बढी तुलसी तबसे सब पाहन पूजन लागे ।

गोस्वामी जी मानते हैं कि बिना प्रीति प्रतीति के न तो रामपद में अनुराग ही सम्भव है और न भक्ति ही । ऐसी स्थिति में राम के द्रवीभूत होने का प्रश्न नहीं उठता । राम की कृपा के बिना भवसागर पार करने का कोई उपाय नहीं । उनका दृढ़ विश्वास है —

प्रीति प्रतीति राम पद पंकज

सकल सुमंगल खानी ।

सर्व मंगलप्रदा प्रीति के पावन रस का आस्वाद अनुभव कर लेने पर सभी प्रकार के स्वाद स्वयंमेव फीके पड़ जाते हैं ।

गोस्वामी जी कहते हैं—

जो मोहिं राम लागते मीठे, तौ नवरस षटरस अनरस ह्वै जाते सब सीठे ॥

स्पष्ट है कि प्रीति परिपाक से निष्पन्न भक्ति रसामृत का स्वाद गोस्वामी जी के अनुसार अन्यतम है । काव्य अथवा कलाक्षेत्र के नौ रस तथा जिह्वा द्वारा आस्वाद्य छः रस भक्ति रस के सम्मुख

निःसार हो जाते हैं । राम के प्रति इस प्रियत्व की लोकोत्तरता के कारण ही गोस्वामी जी घोषित करते हैं—

जाके प्रिय न राम बैदेही ।

तजिए ताहि कोटि बैरी सम यद्यपि परम सनेही ॥

गोस्वामी जी की कवितावली, गीतावली, मानस, विनयपत्रिका जैसी कृतियों में राम की प्रीति-प्रतीति के पोषक असंख्य उदाहरण भरे पड़े हैं । सारांशतः यही कहा जा सकता है कि प्रीति-प्रतीति गोस्वामी जी के भक्ति दर्शन का केन्द्रीय तत्व है । गोस्वामी जी ने अपने युग धर्म को ध्यान में रखते हुए शास्त्रोक्त वैधी भक्ति पर अधिक बल नहीं दिया । वैधी भक्ति के प्रति जनमानस को आकर्षित और आस्थावान बनाने में व्यावहारिक बाधाओं का उन्हें ध्यान था । इसलिए मूर्तिपूजा का विरोध न करने पर भी गोस्वामी जी ने उस पर अधिक बल नहीं दिया । उन्होंने तो ध्यान, यज्ञ और पूजा को कमशः कृत युग, त्रेता और द्वापर की वस्तु माना । कलियुग के लिए हरिगुणगान ही भवसागर पार करने का एकमात्र उपाय है । गोस्वामी जी लिखते हैं—

कृत युग सब योगी विज्ञानी । करि हरि ध्यान तरहिं भव प्रानी ॥

त्रेता विविध यज्ञ नर करहीं । प्रभुहिं समर्पिं करम भव तरही ॥

द्वापर करि रघुपति पद पूजा । नर भव तरहिं उपाय न दूजा ॥

कलियुग केवल हरिगुन गाहा । गावत नर पावहिं भव थाहा ॥

गोस्वामी जी ने कलिकाल में योग, यज्ञ और ध्यान के स्थान पर भगवान गुणानुवाद या नामजप को ही विश्वसनीय आधार माना है । वस्तुतः सभी युगों में सभी प्रवृत्तियों के लोग विद्यमान रहते हैं । किन्तु युगों के अनुसार प्रवृत्तियों में स्वाभाविक संकमणशीलता आ जाती है । युगधर्म की अनुकूलता वाली प्रवृत्ति प्रमुख हो जाती है और शेष प्रवृत्तियाँ गौड । कलियुग में भी यही स्थिति है । गोस्वामी जी ने स्वयं देखा था कि यवनों द्वारा मूर्तियों का भंजन हो रहा था । मूर्ति-पूजा में आस्था रखने वाले लोग निरीह और निरुपाय होकर दुर्दान्त यवनों की अमानुषिक लीला देखते रहे । धर्म विरुद्ध कठोर आचरण के बावजूद ये शासक निरापद बने रहे । ऐसी स्थिति में मूर्ति पूजा का प्रचार या उस पर अतिरिक्त बल युगधर्म के अनुकूल नहीं था । यही कारण है कि गोस्वामी जी ने नाम की आस्था पर अत्यधिक बल दिया । उन्होंने युग धर्म की अनिवार्यता और सार्थकता को रेखांकित करते हुए स्पष्ट किया —

नित युग धर्म होंहिं सब करे । हृदय राम माया के प्रेरे ॥

सुद्ध तत्व समता बिग्याना । कृत प्रभाव प्रसन्न मन जाना ॥

सत्व बहुतरज कछु रतिकरमा । सब बिधि सुख त्रेता कर धरमा ॥

बहु रज स्वल्प सत्व कहु तामस । द्वापर धरम, हरष भय मानस ॥

तामस बहुत रजो गुन थोरा । कलि प्रभाव विरोध चहुँ ओरा ॥

बुध जुग धरम जानि मन माहीं । तजि अधर्म रति धरम कराहीं ॥

उक्त उद्धरण से स्पष्ट है कि गोस्वामी जी स्वीकार करते हैं कि युग विशेष में दूसरे युगों की विशेषताएं विद्यमान रहती हैं किन्तु युग प्रधान प्रवृत्ति ही सर्वाधिक उदग्र और प्रतिष्ठित रहती है । बुद्धिमान लोग युग धर्म का भली भाँति मनन करके अर्थात् युग धर्म की सापेक्षता में अधर्म निवारण और धर्माचरण का निश्चय करते हैं । युगधर्म की सापेक्षता में ही भक्ति भी सर्वग्राह्य और सर्वस्वीकृत हो पाती है । गोस्वामी जी के समय में ईश्वर आराधना की अनेक प्रणालियाँ प्रचलित थीं । अनेक पन्थों का प्रचलन था । आराध्य देवों के तर-तम भेद को लेकर अनेक विवाद भी खड़े हो गये थे । कबीर पन्थी सन्तों का सगुण-भक्ति विरोध और सूफियों की रहस्यमयी प्रेम साधना भी जन मानस के अनुकूल नहीं पड़ रही थी । ऐसी अराजक स्थिति में गोस्वामी जी ने वैज्ञानिक और सुगम भक्ति-पथ का संधान किया । उन्होंने कहा—

श्रुतिसम्मत हरिभक्तिपथ, संजुत विरति विवेक ।

तेहिं न चलहिं नर मोह बस, कलपहिं पंथ अनेक ॥

इस परिभाषा में गोस्वामी जी भक्ति के जिस स्वरूप को रेखांकित कर रहे हैं उसकी विशेषताओं पर ध्यान देना अत्यन्त रोचक है । जिस मार्ग में चलकर जीवन की चरम सार्थकता को प्राप्त किया जा सकता है, जिस पथ का अनुसरण जीवन की चरम सिद्धि तक पहुँचाता है वह हरिभक्ति पथ है । हरभक्ति ही त्रितापों को दूर करने, माया-मोह से बचाने, हरिविमुखता से रोकने, सत्संग में लगाने, व्यक्तित्वाभिमान को मिटाने और लोकोत्तर भक्तिरसामृत के प्रभाव से परम प्रेम की अनुभूति कराने का सर्वोत्तम साधन है । ध्यातव्य है कि युगधर्म के अनुसार गोस्वामी जी ज्ञानपथ और कर्मपथ की अपेक्षा भक्ति-पथ को ही वरीयता देते हैं किन्तु वे ज्ञान पथ और कर्म पथ का निषेध नहीं करते, ज्ञान पथ और कर्म पथ समन्वित भक्तिपथ की श्रेष्ठता पर बल देते हैं, इसलिए भक्ति पथ को स्पष्ट करने के लिए 'श्रुति सम्मत हरिभक्ति पथ' की बात करते हैं । 'श्रुति' शब्द का प्रयोग गोस्वामी जी ने केवल वेद ग्रन्थों अथवा निगमों के लिए ही नहीं किया है । नानापुराणनिगमागम सभी उनकी श्रुति-सीमा में आते हैं । अभिप्राय यह है कि गोस्वामी जी उस हरिभक्ति पथ की प्रतिष्ठा करना चाहते हैं जो भारतीय परम्परा में निगमों, आगमों, पुराणों आदि से समर्थित है । श्रुति शब्द से दूसरा संकेत यह मिलता है कि गोस्वामी जी स्मृतियों की शास्त्रोक्त सरणियों की अपेक्षा महर्षियों की अनुभव सिद्ध आप्त वाणी को अधिक व्यवहार्य और प्रामाणिक मानते हैं । श्रुति सम्मत की शर्त लगाने से उनका अभिप्राय भारतीय परम्परा की रक्षा और व्यावहारिक अकाट्यता से है ।

'श्रुति सम्मत हरिभक्ति पथ' के लिए वैराग्य और विवेक का संयोग भी अनिवार्य है । लौकिक आसक्तियों, एषणाओं, संसक्तियों, वासनाओं से विरक्त हुए बिना माया-प्रवाह-पतित चित्त में भक्ति-भाव का उदय असम्भव है । इसलिए गोस्वामी जी मोहजनित दुर्बलताओं से विरति को भक्ति के लिए आवश्यक मानते हैं । विरति के साथ ही विवेक भी आवश्यक तत्व है । विवेक वह ज्ञानात्मक शक्ति है जो करणीय और अकरणीय का विभाजन करती है । इसी से नीर-क्षीर का भेद सम्भव होता है । विवेक ही युग धर्म के परिप्रेक्ष्य में कर्तव्य निर्धारण की वैज्ञानिक दृष्टि प्रदान करता है । ऐन्द्रिक वासनाओं, अन्धविश्वासों, मानवीय दुर्बलताओं, कुकृत्य और कुपथ के परिणामों आदि का यथार्थ ज्ञान विवेक शक्ति से ही प्राप्त होता है । गोस्वामी जी का स्पष्ट मत है कि हरिभक्ति के पथ पर चलने वाले के लिए अन्धश्रद्धा अथवा भावात्मक उद्वेग के स्थान पर प्रखर विवेक की आवश्यकता होती है । यह विवेक ही बहुपन्थों और नाना मतवादों में उलझी धारणाओं के बीच से सार्थक और मूल्यवान तत्व का संधान करता है । विवेक भक्ति की प्रामाणिकता को सिद्ध करता है । इस परिभाषा पर विचार करने से स्पष्ट होता है कि गोस्वामी जी विरति और विवेक से युक्त, श्रुतिसम्मत हरिभक्ति पथ के समर्थक और पोषक हैं । उनकी भक्ति के विस्तृत वृत्त में नानापुराणनिगमागम की भारतीय परम्परा, ज्ञान, वैराग्य कर्म की साधना, सगुण-निर्गुण ब्रह्म की आराधना, लोक और वेद की आस्था, सामाजिक, सांस्कृतिक, राष्ट्रीय और नैतिक मूल्यों में अकंप निष्ठा, मन वाणी और कर्म की पवित्रता आदि सभी कुछ समाविष्ट है ।

गोस्वामी जी भक्ति को साध्य और साधन दोनों रूपों में स्वीकार करते हैं । साधनरूपा भक्ति राम कृपा से सत्संग द्वारा प्रेरित और पोषित होकर आराध्य भगवान राम की ओर उन्मुख करती है । किन्तु सच्चे भक्त को अनपायनी भक्ति के ही वरदान की कामना हाती है । अर्थ, धर्म, काम, मोक्ष जैसे पुरुषार्थ छोड़कर सच्चा भक्त 'जन्म जन्म रति राम पद' का वरदान माँगता है । गोस्वामी जी के साहित्य में चित्रित शिव, कागभुसुंडि, गरुड, भरत आदि भक्त प्रेमाभक्ति को प्राप्त करने का ही लक्ष्य रखते हैं । यहाँ भक्ति साधन और सिद्धि दोनों बन जाती है । ज्ञान का दीप किसी तीव्र ज्ञाँके के प्रभाव से बुझ सकता है किन्तु भक्ति तो तेजपुंज मणि है । यदि एक बार प्राप्त हो जाये तो किसी भी प्रकार की तमिश्रा के ठहरने का प्रश्न ही नहीं उठता

। इस दृष्टि से भक्ति सर्वाधिक प्रत्ययकारी और समर्थ साधन है । किन्तु इस साधन से भक्त को कौन-सी सिद्धि प्राप्त करनी है ? उत्तर होगा भक्ति रसामृत के अगाध सागर में आकण्ठ अवगाहित होकर महाभाव के चरम आनन्द को प्राप्त करना । अर्थात् भव-भीति से आत्यन्तिक मुक्ति पाकर अनन्य भाव से भगवान की रागात्मिका भक्ति में लीन होना । स्पष्ट है कि गोस्वामी जी के अनुसार साधन रूप भक्ति का साध्य भी अन्ततः अखण्ड भक्ति ही है ।

मानस के उत्तरकाण्ड में ज्ञान-दीप और भक्ति मणि की चर्चा की गयी है । ज्ञान दीप एक सुदीर्घ प्रक्रिया का परिणाम है । इसके लिए मन का नियन्त्रण, कामनाओं से मुक्ति, इन्द्रिय निगह, निश्चयात्मिका बुद्धि, वैराग्य, जाग्रत, स्वप्न, सुषुप्ति जैसी तीनों अवस्थाओं और सत, रज और तम तीनों गुणों को समेकित करके, मदादि दोषों को भस्म करना पड़ता है । इस प्रकार प्रज्वलित ज्ञान दीप अनेक दुखों का हर्ता होता है । रंचमात्र की अनवधानता होते ही विषय वासनाओं का प्रबल झोंका ज्ञानदीप को बुझा देता है । किन्तु भक्ति-मणि स्वयं प्रकाश्य है । स्त्री स्वरूपा और मायापति की परमप्रिय पटरानी होने के कारण भक्ति पर माया का कोई बल नहीं चलता । भक्ति-मणि के शाश्वत प्रकाश में समस्त अविद्याओं का विनाश स्वयमेव हो जाता है । गोस्वामी जी कहते हैं -

राम भगति मनि उर बस जाके । दुख लवलेस न सपनेहु ताके ॥

ध्यातव्य है कि गोस्वामी जी ज्ञानमार्ग अथवा कर्ममार्ग के विरोधी नहीं हैं । वे स्वीकार करते हैं कि -

भगतिहि ज्ञानहिं नहिं कछु भेदा । उभय हरहिं भवसंभव खेदा ॥

कर्म मार्ग भी प्रत्येक स्थिति में उपादेय होता है । अन्तर केवल यह है कि गोस्वामी जी भक्ति को निरूपम और निरूपाधि मानते हैं । माया का उस पर प्रभाव नहीं पड़ता । इसलिए विज्ञानी मुनि सभी सुखों की खानि भक्ति का वरण करते हैं । ज्ञान और कर्म भक्ति के साधक उपादान के रूप में ही उपादेय होते हैं- 'ज्ञान पंथ कृपान कै धारा' अथवा 'अति दुर्लभ कैवल्य परम पद' जैसी उक्तियों में गोस्वामी जी ने ज्ञानपंथ की संकटापन्नता और दुरुहता को ही रेखांकित किया है ।

अविहित साधनों में रति और भय की भौंति द्वेष भी भक्ति का एक स्वीकृत साधन है । भागवत के अनुसार तो द्वेषानुबन्ध द्वारा होने वाली तन्मयता भक्तियोग से भी अधिक श्रेष्ठ होती है । द्वेष के द्वारा भी एकाग्रभाव से मनोनिवेश की स्थिति होती है । दूसरी ओर राम का कोध भी मोक्षदायी होता है । गोस्वामी जी इस तथ्य का समर्थन करते हुए लिखते हैं -

निर्बान दायक कोध जाकर भगति अवसहिं बसकरी ।

रावण इस बात से अवगत है कि 'होइहिं भजन न तामस देहा' । इसलिए रावण वैरभाव का मार्ग अपनाता है । यह निश्चय करता है -

'तो मैं जाइ बयरु हठि करऊँ । प्रभु सर प्रान तजे भव तरऊँ ॥'

द्विजामिस भोगी दानवों ने वैरभाव से ही राम का स्मरण किया था किन्तु कोमलमति करुणानिधान राम ने उन्हें परमगति प्रदान की । रति, भय, काम या स्नेह से उत्पन्न होने वाली भक्ति से द्वेषजा भक्ति की स्थिति भिन्न है । द्वेषभाव और भक्तिभाव का सामंजस्य अथवा द्वेषभाव का भक्तिभाव में रूपान्तरण असम्भव है । इस सन्दर्भ में ध्यातव्य है कि भागवतकार ने भी द्वेषता भक्ति की तदाकारता पर ही विशेष बल दिया है ।

यथा वैरानुबन्धेन मर्त्यस्तन्मयताभियात् ।

न तथा भक्तियोगेन इति में निश्चिता मतिः ॥

वैर भाव की उदग्रता के कारण चित्तवृत्तियों का निरुद्ध हो जाना और मनोनिवेश की स्थिति में एकाग्रता का उत्पन्न हो जाना मनोवैज्ञानिक भी है । भक्ति शास्त्रों के अनुसार द्वेषभाव की यह तदाकारता भगवान के अविराम संधान का कारण बनती है और अन्ततः मुक्ति प्रदान करती है ।

इस प्रक्रिया में स्वयं भगवान ही समस्त चित्तवृत्तियों का केन्द्र बन जाते हैं । गोस्वामी जी भी इस अर्थ में द्वेषजा भक्ति को स्वीकार करते हैं । द्वेषभाव की तदाकारता अनुरक्तिकामी न होकर मुक्तिकामी होती है । अतः इस प्रक्रिया का आत्यन्तिक फल मोक्ष ही है जबकि रागानुगा भक्ति का अन्तिम लक्ष्य 'राम-चरण-रति' है । गोस्वामी जी की मान्यता है कि रावण ही नहीं समस्त दानव समूह का मन रामाकार हो जाने के कारण ब्रह्मपद का अधिकारी बना ।

रामाकार भये तिन्हके मन । गए ब्रह्मपद तजि सरीर रन ॥

दानव समूह की यह रामाकारता निश्चय ही बैरभाव का ही परिणाम थी ।

कृपासाधनः

ईश्वर की इच्छा से बिना किसी याचना या आग्रह के जो अनुकूलता प्रदान की जाती है उसे कृपा कहा जाता है । भगवान की भक्ति को प्राप्त करने के लिए भगवान की कृपा को आवश्यक माना गया है । यद्यपि इसमें साधक की ओर से कोई निश्चित प्रयास नहीं होता तथापि भक्तिप्रदायिनी होने के कारण इसे साधन रूप में स्वीकार किया जाता है । गोस्वामी जी ने रामकृपा को सर्वोत्तम और सर्वोपरि साधन के रूप में स्वीकार किया है । रामकृपा के साथ ही उसकी प्राप्ति में सहायक भगवान राम के अन्तेवासी सीता, हनुमान, भरत, लक्ष्मण की कृपा, देवकृपा, विप्रकृपा, आदि का भी गोस्वामी जी ने आख्यान किया है । गोस्वामी जी के अनुसार रामकृपा ही भक्ति प्राप्ति का मूल कारण है । भक्ति मणि इस संसार में रहती है किन्तु 'रामकृपा बिन नहि कोउ लहई' यह भक्ति सभी को मिलती भी नहीं, 'रामकृपा कोइ एक पाई' इसका कारण यह है कि रामकृपा के बिना राम की प्रभुता का ज्ञान ही नहीं हो पाता । ज्ञान के अभाव में प्रीति-प्रतीति सम्भव नहीं होती । प्रीति-प्रतीति के अभाव में दृढ़ भक्ति असम्भव है अतः भक्ति का मूल कारण रामकृपा ही है । गोस्वामी जी कहते हैं—

'प्रीति बिना नहिं भगति दुढ़ाई । जिमि खगपति जल कै चिकनाई ॥

गोस्वामी जी के अनुसार मोक्ष के साधन धाम शरीर की प्राप्ति भी रामकृपा से ही होती है । 'रामकृपा नासहिं भव रोगा' रामकृपा भव रोगों को ही दूर नहीं करती, भक्ति के सभी साधनों में सहायक होती है । गोस्वामी जी की मान्यता है कि सत्संग के बिना विवेक सम्भव नहीं होता और सत्संग रामकृपा का ही परिणाम होता है । इसलिए काग

भुसुंड़ि स्पष्ट शब्दों में कहते हैं —

'रामकृपा बिनुसुनु खगराई । जानि न जाइ राम प्रभुताई ॥'

इतना ही नहीं

'रामकृपा बिनु सपनेहु, जीव न लह विश्राम ।'

इस सन्दर्भ में विचारणीय है कि यदि कृपाजन्य भक्ति अहेतुक भाव से ईश्वर द्वारा प्रदान की जाती है तो साधक के आचरणमूलक कर्म अथवा दायित्व का महत्व ही समाप्त हो जाता है । दूसरी ओर ईश्वर के विवेक पर भी प्रश्न चिन्ह लग सकता है । यदि कृपा के इस सिद्धान्त को स्वीकार कर लिया जाये तो भगवान की कृपा से सभी प्राणियों को समानभाव से भक्ति की प्राप्ति हो जानी चाहिए, किन्तु ऐसा नहीं होता । गोस्वामी जी स्वयं लिखते हैं—

'सो रघुनाथ भगति श्रुति गाई । रामकृपा काहू एक पाई ॥'

रामकृपा तो किसी बिरले को ही प्राप्त हाने वाली वस्तु है अतः यह व्यक्तिपरक अपवादात्मक मार्ग है । इसे सर्वसुलभ सिद्धान्त के रूप में प्रतिष्ठित नहीं किया जा सकता । कार्य-कारण योग अथवा कर्मचक्र सिद्धान्त के अनुसार कर्म और फल में अटूट सम्बन्ध होता है । इसलिए हमारे शास्त्रों में किया धर्म पर अत्यधिक बल दिया गया है । गोस्वामी जी इस तथ्य की उपेक्षा नहीं करते । यह स्थापित करते हुए भी कि 'कारण बिन रघुबीर कृपाला' वे किया-धर्म की प्रतिष्ठा करते हैं । उनकी मान्यता है कि जीवन में आने वाली शुभ-अशुभ, सुख-दुःख की स्थितियाँ कर्मों का ही परिणाम होती हैं । उनकी स्पष्ट उक्ति है —

‘कर्म प्रधान विश्व करि राखा । जो जस करइ सो तस फल चाखा ॥’  
‘निजकृत कर्म भोग सब भ्राता’ के सिद्धान्त को प्रतिष्ठित करने के साथ ही गोस्वामी जी भगवान राम को भी ‘सुभ अरू असुभ करम फल दाता’ के रूप में घोषित करते हैं । इस विमर्श से यह स्पष्ट हाता है कि गोस्वामी जी राम-भक्ति को कृपा और किया दोनों अथवा कृपा और किया के समन्वित रूप से साध्य मानते हैं ।

संक्षेप में कहा जा सकता है कि गोस्वामी जी ने भक्ति के विहित, अविहित और कृपा साधनों को पारम्परिक मान्यताओं के अनुसार ग्रहण किया है किन्तु उनकी महत्वपूर्ण विशेषता यह है कि उनकी दृष्टि इस दिशा में भी समन्वयवादी और जनोन्मुखी रही है ।

गोस्वामी जी के भक्तिदर्शन में हृदयपक्ष और बुद्धिपक्ष का मणि-कांचन योग है । यही कारण है, कि गोस्वामी जी की भक्ति पद्धति में तर्क और श्रद्धाभाव तथा विरक्ति और आसक्ति में विवेक सम्मत सानुपातिक समन्वय स्थापित किया गया है । पाप-ताप-संयुक्त संस्कृति-चक्र से मुक्ति पाने के लिए ‘श्रुतिसम्मत और विरति-विवेक से युक्त’ भक्ति को उन्होंने सर्वोत्तम साधन माना है । धर्म साधना में गोस्वामी जी ने अनुष्ठान धर्मी बाह्य साधनों के स्थान पर नाम जप के महामन्त्र पर बल दिया जो सहज ही सर्वसुलभ है और कलियुग उद्धार का एक मात्र आधार है ।

गोस्वामी जी का भक्ति दर्शन लोक सेवा और लोक कल्याण की भूमि पर आधारित है । वस्तुतः उनके लिए लोक सेवा ही सच्ची राम सेवा है –

‘परहित सरिस धर्म नहिं भाई ।

पर पीड़ा सम नहिं अधमाई’

*लेखक हिन्दी साहित्य के अन्तर्राष्ट्रीय ख्यातिप्राप्त विद्वान तथा मानस मर्मज्ञ हैं ।  
प्रस्तुत लेख उनके एक निबंध का संपादित अंश है ।  
इसे उन्होंने मानस के पाठकों के लिए दिया है ।  
हम उनके आभारी हैं ।*



गणपतये नमः

बालकाण्ड

श्लोक

वर्णानामर्थसंघानां रसानां छन्दसामपि ।  
मंगलानां च कर्त्तारौ वन्दे वाणीविनायकौ ॥ 1 ॥  
भवानीशंकरौ वन्दे श्रद्धाविश्वासरूपिणौ ।  
याभ्यां विना न पश्यन्ति सिद्धाः स्वान्तःस्थमीश्वरम् ॥ 2 ॥  
वन्दे बोधमयं नित्यं गुरुं शंकररूपिणम् ।  
यमाश्रितो हि वकोपि चन्द्रः सर्वत्र वन्द्यते ॥ 3 ॥  
सीतारामगुणग्रामपुण्यारण्यविहारिणौ ।  
वन्दे विशुद्धविज्ञानौ कवीश्वरकपीश्वरौ ॥ 4 ॥  
उद्भवस्थितिसंहारकारिणीं क्लेशहारिणीम् ।  
सर्वश्रेयस्करिणीं सीतां नतोहं रामवल्लभाम् ॥ 5 ॥  
यन्मायावशवर्ति विश्वमखिलं ब्रह्मादिदेवासुरा  
यत्सत्त्वादमृषैव भाति सकलं रज्जौ यथाहेर्भ्रमः ।  
यत्पादप्लवमेकमेव हि भवाम्भोधेस्तितीर्षावतां  
वन्देहं तमशेषकारणपरं रामाख्यमीशं हरिम् ॥ 6 ॥  
नानापुराणनिगमागमसम्मतं यद्  
रामायणे निगदितं क्वचिदन्यतोपि ।  
स्वान्तः सुखाय तुलसी रघुनाथगाथा—  
भाषानिबद्धमतिमन्जुलमातनोति ॥ 7 ॥

सो०— जेहि सुमिरत सिधि होइ गन नायक करिबर बदन ।  
करउ अनुग्रह सोइ बुद्धि रासि सुभ गुन सदन ॥1॥  
मूक होइ बाचाल पंगु चढइ गिरिबर गहन ॥  
जासु कृपौ सो दयाल द्रवउ सकल कलि मल दहन ॥2॥  
नील सरोरुह स्याम तरुन अरुन बारिज नयन ।  
करउ सो मम उर धाम सदा छीरसागर सयन ॥3॥  
कुंद इंदु सम देह उमा रमन करुना अयन ।  
जाहि दीन पर नेह करउ कृपा मर्दन मयन ॥4॥  
बंदउँ गुरु पद कंज कृपा सिंधु नररूप हर ।  
महामोह तम पुंज जासु बचन रवि कर निकर ॥5॥  
बंदउँ गुरु पद पदुम परागा । सुरुचि सुबास सरस अनुरागा ॥  
अमिय मूरिमय चूरन चारु । समन सकल भव रुज परिवारु ॥  
सुकृति संभु तन बिमल बिभूती । मंजुल मंगल मोद प्रसूती ॥  
जन मन मंजु मुकुर मल हरनी । किएँ तिलक गुन गन बस करनी ॥

श्रीगुर पद नख मनि गन जोती । सुमिरत दिव्य दृष्टि हियेँ होती ॥  
दलन मोह तम सो सप्रकासू । बडेँ भाग उर आवइ जासू ॥  
उघरहिँ बिमल बिलोचन ही के । मिटहिँ दोष दुख भव रजनी के ॥  
सूझहिँ राम चरित मनि मानिक । गुपुत प्रगट जहेँ जो जेहि खानिक ॥

दो०— जथा सुअंजन अंजि दृग साधक सिद्ध सुजान ।  
कौतुक देखत सैल बन भूतल भूरि निधान ॥ 1  
गुरु पद रज मृदु मंजुल अंजन । नयन अमिअ दृग दोष बिभंजन ॥  
तेहिँ करि बिमल बिबेक बिलोचन । बरनउँ राम चरित भव मोचन ॥  
सुजन समाज सकल गुन खानी । करउँ प्रनाम सप्रेम सुबानी ॥  
साधु चरित सुभ चरित कपासू । निरस बिसद गुनमय फल जासू ॥  
जो सहि दुख परछिद्र दुरावा । बंदनीय जेहिँ जग जस पावा ॥  
मुद मंगलमय संत समाजू । जो जग जंगम तीरथराजू ॥  
राम भक्ति जहेँ सुरसरि धारा । सरसइ ब्रह्म बिचार प्रचारा ॥  
बिधि निषेधमय कलि मल हरनी । करम कथा रबिनंदनि बरनी ॥  
हरि हर कथा बिराजति बेनी । सुनत सकल मुद मंगल देनी ॥

— गणपतये नमः

### बालकाण्ड

#### श्लोक

वर्णानामर्थसंघानां रसानां छन्दसामपि ।  
मंगलानां च कर्त्तारौ वन्दे वाणीविनायकौ ॥ 1 ॥  
भवानीशंकरौ वन्दे श्रद्धाविश्वासरूपिणौ ।  
याभ्यां विना न पश्यन्ति सिद्धाः स्वान्तःस्थमीश्वरम् ॥ 2 ॥  
वन्दे बोधमयं नित्यं गुरुं शंकररूपिणम् ।  
यमाश्रितो हि वकोपि चन्द्रः सर्वत्र वन्द्यते ॥ 3 ॥  
सीतारामगुणग्रामपुण्यारण्यविहारिणौ ।  
वन्दे विशुद्धविज्ञानौ कवीश्वरकपीश्वरौ ॥ 4 ॥  
उद्भवस्थितिसंहारकारिणीं क्लेशहारिणीम् ।  
सर्वश्रेयस्करीं सीतां नतोहं रामवल्लभाम् ॥ 5 ॥  
यन्मायावशवर्तिं विश्वमखिलं ब्रह्मादिदेवासुरा  
यत्सत्त्वादमृषैव भाति सकलं रज्जौ यथाहेर्भ्रमः ।  
यत्पादप्लवमेकमेव हि भवाम्भोधेस्तितीर्षावतां  
वन्देहं तमशेषकारणपरं रामाख्यमीशं हरिम् ॥ 6 ॥  
नानापुराणनिगमागमसम्मतं यद्  
रामायणे निगदितं क्वचिदन्यतोपि ।

स्वान्तः सुखाय तुलसी रघुनाथगाथा—

भाषानिबद्धमतिमन्जुलमातनोति ॥ 7 ॥

सो०— जेहि सुमिरत सिधि होइ गन नायक करिबर बदन ।

करउ अनुग्रह सोइ बुद्धि रासि सुभ गुन सदन ॥1॥

मूक होइ बाचाल पंगु चढ़इ गिरिबर गहन ॥

जासु कृपों सो दयाल द्रवउ सकल कलि मल दहन ॥2॥

नील सरोरुह स्याम तरुन अरुन बारिज नयन ।

करउ सो मम उर धाम सदा छीरसागर सयन ॥3॥

कुंद इंदु सम देह उमा रमन करुना अयन ।

जाहि दीन पर नेह करउ कृपा मर्दन मयन ॥4॥

बंदउं गुरु पद कंज कृपा सिंधु नररूप हर ।

महामोह तम पुंज जासु बचन रबि कर निकर ॥5॥

बंदउं गुरु पद पदुम परागा । सुरुचि सुबास सरस अनुरागा ॥

अमिय मूरिमय चूरन चारु । समन सकल भव रुज परिवारु ॥

सुकृति संभु तन बिमल बिभूती । मंजुल मंगल मोद प्रसूती ॥

जन मन मंजु मुकुर मल हरनी । किएँ तिलक गुन गन बस करनी ॥

श्रीगुर पद नख मनि गन जोती । सुमिरत दिव्य दृष्टि हियेँ होती ॥

दलन मोह तम सो सप्रकासू । बड़े भाग उर आवइ जासू ॥

उघरहिं बिमल बिलोचन ही के । मिटहिं दोष दुख भव रजनी के ॥

सूझहिं राम चरित मनि मानिक । गुपुत प्रगट जहें जो जेहि खानिक ॥

दो०— जथा सुअंजन अंजि दृग साधक सिद्ध सुजान ।

कौतुक देखत सैल बन भूतल भूरि निधान ॥ 1

गुरु पद रज मृदु मंजुल अंजन । नयन अमिअ दृग दोष बिभंजन ॥

तेहिं करि बिमल बिबेक बिलोचन । बरनउं राम चरित भव मोचन ॥

सुजन समाज सकल गुन खानी । करउं प्रनाम सप्रेम सुबानी ॥

साधु चरित सुभ चरित कपासू । निरस बिसद गुनमय फल जासू ॥

जो सहि दुख परछिद्र दुरावा । बंदनीय जेहिं जग जस पावा ॥

मुद मंगलमय संत समाजू । जो जग जंगम तीरथराजू ॥

राम भक्ति जहें सुरसरि धारा । सरसइ ब्रह्म बिचार प्रचारा ॥

बिधि निषेधमय कलि मल हरनी । करम कथा रबिनंदनि बरनी ॥

हरि हर कथा बिराजति बेनी । सुनत सकल मुद मंगल देनी ॥

बटु बिस्वास अचल निज धरमा । तीरथराज समाज सुकरमा ॥

सबहि सुलभ सब दिन सब देसा । सेवत सादर समन कलेसा ॥

अकथ अलौकिक तीरथराऊ । देइ सद्य फल प्रगट प्रभाऊ ॥

दो०— सुनि समुझहिं जन मुदित मन मज्जहिं अति अनुराग ।

लहहिं चारि फल अछत तनु साधु समाज प्रयाग ॥2

मज्जन फल पेखिअ ततकाला । काक होहिं पिक बकउ मराला ॥

सुनि आचरज करै जनि कोई । सतसंगति महिमा नहिं कोई ॥

बालमीक नारद घटजोनी । निज निज मुखनि कही निज होनी ॥

जलचर थलचर नभचर नाना । जे जड़ चेतन जीव जहाना ॥

मति कीरति गति भूति भलाई । जब जेहिं जतन जहों जेहिं पाई ॥

सो जानब सतसंग प्रभाऊ । लोकहुँ बेद न आन उपाऊ ॥

बिनु सतसंग बिबेक न होई । राम कृपा बिनु सुलभ न सोई ॥

सतसंगत मुद मंगल मूला । सोइ फल सिधि सब साधन फूला ॥  
 सठ सुधरहिं सतसंगति पाई । पारस परस कुधात सुहाई ॥  
 बिधि बस सुजन कुसंगत परहीं । फनि मनि सम निज गुन अनुसरहीं ॥  
 बिधि हरि हर कबि कोबिद बानी । कहत साधु महिमा सकुचानी ॥  
 सो मो सन कहि जात न कैसैं । साक बनिक मनि गुन गन जैसैं ॥  
 दो०— बंदउँ संत समान चित हित अनहित नहिं कोइ ।  
 अंजलि गत सुभ सुमन जिमि सम सुगंध कर दोइ ॥ 3 (क)  
 संत सरल चित जगत हित जानि सुभाउ सनेहु ।  
 बालबिनय सुनि करि कृपा रामचरन रति देहु ॥ 3 (ख)  
 बन्दउँ सुजन महीसुर चरना । मोह जनित संसय सब हरना ॥  
 बहुरि बंदि खल गन सतिभाएँ । जे बिनु काज दाहिनेहु बाएँ ॥  
 पर हित हानि लाभ जिन्ह करैं । उजरैं हरष बिषाद बसेरैं ॥  
 हरि हर जस राकेस राहु से । पर अकाज भट सहसबाहु से ॥  
 जे पर दोष लखहिं सहसाखी । पर हित घृत जिन्ह के मन माखी ॥  
 तेज कृसानु रोष महिषेसा । अघ अवगुन धन धनी धनेसा ॥  
 उदय केत सम हित सबही के । कुंभकरन सम सेवत नीके ॥  
 पर अकाजु लागि तनु परिहरहीं । जिमि हिम उपल कृषी दलि गरहीं ॥  
 बंदउँ खल जस सेष सरोषा । सहस बदन बरनइ पर दोषा ॥  
 पुनि प्रनवउँ पृथुराज समाना । पर अघ सुनइ सहस दस काना ॥  
 बहुरि सक सम बिनवउँ तेही । संतत सुरानीक हित जेही ॥  
 बचन बज्र जेहि सदा पिआरा । सहस नयन पर दोष निहारा ॥  
 दो०— उदासीन अरि मीत हित सुनत जरहिं खल रीति ।  
 जानि पानि जुग जोरि जन बिनती करइ सप्रीति ॥ 4  
 मैं अपनी दिसि कीन्ह निहोरा । तिन्ह निज ओर न लाउब भोरा ॥  
 बायस पलिअहिं अति अनुरागा । होहिं निरामिष कबहुँ कि कागा ॥  
 बंदउँ संत असंतन चरना । दुखप्रद उभय बीच कछु बरना ॥  
 बिछुरत एक प्रान हरि लेहीं । मिलत एक दुख दारुन देहीं ॥  
 उपजहिं एक संग जग माहीं । जलज जोंक जिमि गुन बिलगाहीं ॥  
 सुधा सुरा सम साधु असाधू । जनक एक जग जलधि अगाधू ॥  
 सुधा सुधाकर सुरसरि साधू । गरल अनल कलिमल सरि ब्याधू ॥  
 गुन अवगुन जानत सब कोई । जो जेहि भाव नीक तेहि सोई ॥  
 दो०— भलो भलाइहि पै लहइ लहइ निचाइहि नीचु ।  
 सुधा सराहिअ अमरतौं गरल सराहिअ मीचु ॥ 5  
 भल अनभल निज निज करतूती । लहत सुजस अपलोक बिभूती ॥  
 खल अघ अगुन साधु गुन गाहा । उभय अपार उदधि अवगाहा ॥  
 तेहि तें कछु गुन दोष बखाने । संग्रह त्याग न बिनु पहिचाने ॥  
 भलेउ पोच सब बिधि उपजाए । गनि गुन दोष बेद बिलगाए ॥  
 कहहिं बेद इतिहास पुराना । बिधि प्रपंचु गुन अवगुन साना ॥  
 दुख सुख पाप पुन्य दिन राती । साधु असाधु सुजाति कुजाती ॥  
 दानव देव ऊँच अरु नीचू । अमिअ सुजीवनु माहुरु मीचू ॥  
 माया ब्रह्म जीव जगदीसा । लच्छि अलच्छि रंक अवनीसा ॥  
 कासी मग सुरसरि कमनासा । मरु मारव महिदेव गवासा ॥  
 सरग नरक अनुराग बिरागा । निगमागम गुन दोष बिभागा ॥

दो०— जड़ चेतन गुन दोषमय बिस्व कीन्ह करतार ।

संत हंस गुन गहहिं पय परिहरि बारि बिकार ॥ 6

अस बिबेक जब देइ बिधाता । तब तजि दोष गुनहिं मनु राता ॥  
काल सुभाउ करम बरिआई । भलेउ प्रकृति बस चुकइ भलाई ॥  
सो सुधारि हरिजन जिमि लेहीं । दलि दुख दोष बिमल जसु देहीं ॥  
खलउ करहिं भल पाइ सुसंगू । मिटइ न मलिन सुभाउ अभंगू ॥  
लखि सुबेष जग बंचक जेरू । बेष प्रताप पूजिअहिं तेरू ॥  
उघरहिं अंत न होइ निबाहू । कालनेमि जिमि रावन राहू ॥  
किएहुं कुबेषु साधु सनमानू । जिमि जग जामवंत हनुमानू ॥  
हानि कुसंग सुसंगति लाहू । लोकहुं बेद बिदित सब काहू ॥  
गगन चढ़इ रज पवन प्रसंगा । कीचहिं मिलइ नीच जल संगी ॥  
साधु असाधु सदन सुक सारीं । सुमिरहिं राम देहिं गनि गारीं ॥  
धूम कुसंगति कारिख होई । लिखिअ पुरान मंजु मसि सोई ॥  
सोइ जल अनल अनिल संघाता । होइ जलद जग जीवन दाता ॥

दो०— ग्रह भेषज जल पवन पट पाइ कुजोग सुजोग ।

होहिं कुबस्तु सुबस्तु जग लखहिं सुलच्छन लोग ॥ 7 (क)

सम प्रकास तम पाख दुहुं नाम भेद बिधि कीन्ह ।

ससि सोषक पोषक समुझि जग जस अपजस दीन्ह ॥ 7 (ख)

जड़ चेतन जग जीव जत सकल राममय जानि ।

बंदउँ सब के पद कमल सदा जोरि जुग पानि ॥ 7 (ग)

देव दनुज नर नाग खग प्रेत पितर गंधर्ब ।

बंदउँ किंनर रजनिचर कृपा करहु अब सर्ब ॥ 7 (घ)

आकर चारि लाख चौरासी । जाति जीव जल थल नभ बासी ॥

सीय राममय सब जग जानी । करउँ प्रनाम जोरि जुग पानी ॥

जानि कृपाकर किंकर मोहू । सब मिलि करहु छाड़ि छल छोहू ॥

निज बुधि बल भरोस मोहि नाही । तातें बिनय करउँ सब पाहीं ॥

करन चहउँ रघुपति गुन गाहा । लघु मति मोरि चरित अवगाहा ॥

सूझ न एकउ अंग उपाऊ । मन मति रंक मनोरथ राऊ ॥

मति अति नीच ऊँचि रुचि आछी । चहिअ अमिअ जग जुरइ न छाछी ॥

छमिहहिं सज्जन मोरि ढिठाई । सुनिहहिं बालबचन मन लाई ॥

जौ बालक कह तोतरि बाता । सुनिहिं मुदित मन पितु अरु माता ॥

हंसिहहिं कूर कुटिल कुबिचारी । जे पर दूषन भूषनधारी ॥

निज कबित्त केहि लाग न नीका । सरस होउ अथवा अति फीका ॥

जे पर भनिति सुनत हरषाहीं । ते बर पुरुष बहुत जग नाही ॥

जग बहु नर सर सरि सम भाई । जे निज बाढ़ि बढहिं जल पाई ॥

सज्जन सकृत सिंधु सम कोई । देखि पूर बिधु बाढ़इ जोई ॥

दो०— भाग छोट अभिलाषु बड़ करउँ एक बिस्वास ।

पैहहिं सुख सुनि सुजन सब खल करिहहिं उपहास ॥ 8

खल परिहास होइ हित मोरा । काक कहहिं कलकंठ कठोरा ॥

हंसहि बक दादुर चातकही । हंसहिं मलिन खल बिमल बतकही ॥

कबित रसिक न राम पद नेहू । तिन्ह कहें सुखद हास रस एहू ॥

भाषा भनिति भोरि मति मोरी । हंसिबे जोग हंसें नहिं खोरी ॥

प्रभु पद प्रीति न सामुझि नीकी । तिन्हहि कथा सुनि लागिहि फीकी ॥

हरि हर पद रति मति न कुतरकी । तिन्ह कहँ मधुर कथा रघुबर की ॥  
 राम भगति भूषित जियँ जानी । सुनिहहिं सुजन सराहि सुबानी ॥  
 कबि न होउँ नहिं बचन प्रबीनू । सकल कला सब बिद्या हीनू ॥  
 आखर अरथ अलंकृति नाना । छंद प्रबंध अनेक बिधाना ॥  
 भाव भेद रस भेद अपारा । कबित दोष गुन बिबिध प्रकारा ॥  
 दो०— भनिति मोरि सब गुन रहित बिस्व बिदित गुन एक ।  
 सो बिचारि सुनिहहिं सुमति जिन्ह कें बिमल बिबेक ॥ 9  
 एहि महेँ रघुपति नाम उदारा । अति पावन पुरान श्रुति सारा ॥  
 मंगल भवन अमंगल हारी । उमा सहित जेहि जपत पुरारी ॥  
 भनिति बिचित्र सुकबि कृत जोऊ । राम नाम बिनु सोह न सोऊ ॥  
 बिधुबदनी सब भौंति सँवारी । सोह न बसन बिना बर नारी ॥  
 सब गुन रहित कुकबि कृत बानी । राम नाम जस अंकित जानी ॥  
 सादर कहहिं सुनिहिं बुध ताही । मधुकर सरिस संत गुनग्राही ॥  
 जदपि कबित रस एकउ नाहीं । राम प्रताप प्रगट एहि माहीं ॥  
 सोइ भरोस मोरें मन आवा । केहिं न सुसंग बडप्पनु पावा ॥  
 धूमउ तजइ सहज करुआई । अगरु प्रसंग सुगंध बसाई ॥  
 भनिति भदेस बस्तु भलि बरनी । राम कथा जग मंगल करनी ॥  
 छ०— मंगल करनि कलि मल हरनि तुलसी कथा रघुनाथ की ।  
 गति कूर कबिता सरित की ज्योँ सरित पावन पाथ की ॥  
 प्रभु सुजस संगति भनिति भलि होइहि सुजन मन भावनी ।  
 भव अंग भूति मसान की सुमिरत सुहावनि पावनी ॥  
 दो०— प्रिय लागिहि अति सबहि मम भनिति राम जस संग ।  
 दारु बिचारु कि करइ कोउ बंदिअ मलय प्रसंग ॥ 10 (क)  
 स्याम सुरभि पय बिसद अति गुनद करहिं सब पान ।  
 गिरा ग्राम्य सिय राम जस गावहिं सुनिहिं सुजान ॥ 10 (ख)  
 बित बिबेक एक नहिं मोरें । सत्य कहउँ लिखि कागद कोरें ॥  
 मनि मानिक मुकुता छबि जैसी । अहि गिरि गज सिर सोह न तैसी ॥  
 नृप किरीट तरुनी तनु पाई । लहहिं सकल सोभा अधिकाई ॥  
 तैसेहिं सुकबि कबित बुध कहहीं । उपजहिं अनत अनत छबि लहहीं ॥  
 भगति हेतु बिधि भवन बिहाई । सुमिरत सारद आवति धाई ॥  
 राम चरित सर बिनु अन्हवाएँ । सो श्रम जाइ न कोटि उपाएँ ॥  
 कबि कोबिद अस हृदयँ बिचारी । गावहिं हरि जस कलि मल हारी ॥  
 कीन्हें प्राकृत जन गुन गाना । सिर धुनि गिरा लगत पछिताना ॥  
 हृदय सिंधु मति सीप समाना । स्वाति सारदा कहहिं सुजाना ॥  
 जाँ बरसइ बर बारि बिचारु । होहिं कबित मुकुतामनि चारु ॥  
 दो०— जुगुति बेधि पुनि पोहिअहिं रामचरित बर ताग ।  
 पहिरहिं सज्जन बिमल उर सोभा अति अनुराग ॥11॥  
 जे जनमे कलिकाल कराला । करतब बायस बेष मराला ॥  
 चलत कुपंथ बेद मग छोड़े । कपट कलेवर कलि मल भौड़े ॥  
 बंचक भगत कहाइ राम के । किंकर कंचन कोह काम के ॥  
 तिन्ह महेँ प्रथम रेख जग मोरी । धींग धरमध्वज धंधक धोरी ॥  
 जाँ अपने अवगुन सब कहऊँ । बाढ़इ कथा पार नहिं लहऊँ ॥  
 ताते मै अति अलप बखाने । थोरे महुँ जानिहहिं सयाने ॥

समुझि बिबिधि बिधि बिनती मोरी । कोउ न कथा सुनि देइहि खोरी ॥  
 एतेहु पर करिहहिं जे असंका । मोहि ते अधिक ते जड़ मति रंका ॥  
 कबि न होउं नहिं चतुर कहावउं । मति अनुरूप राम गुन गावउं ॥  
 कहँ रघुपति क चरित अपारा । कहँ मति मोरि निरत संसारा ॥  
 जेहिं मारुत गिरि मेरु उड़ाहीं । कहहु तूल केहि लेखे माहीं ॥  
 समुझत अमित राम प्रभुताई । करत कथा मन अति कदराई ॥

दो०— सारद सेस महेस बिधि आगम निगम पुरान ।

नेति नेति कहि जासु गुन करहिं निरंतर गान ॥ 12  
 सब जानत प्रभु प्रभुता सोई । तदपि कहँ बिनु रहा न कोई ॥  
 तहाँ बेद अस कारन राखा । भजन प्रभाउ भाँति बहु भाषा ॥  
 एक अनीह अरूप अनामा । अज सच्चिदानंद पर धामा ॥  
 ब्यापक विस्वरूप भगवाना । तेहिं धरि देह चरित कृत नाना ॥  
 सो केवल भगतन हित लागी । परम कृपाल प्रनत अनुरागी ॥  
 जेहि जन पर ममता अति छोहू । जेहिं करुना करि कीन्ह न कोहू ॥  
 गई बहोर गरीब नेवाजू । सरल सबल साहिब रघुराजू ॥  
 बुध बरनहिं हरि जस अस जानी । करहिं पुनीत सुफल निज बानी ॥  
 तेहिं बल मैं रघुपति गुन गाथा । कहिहउं नाइ राम पद माथा ॥  
 मुनिन्ह प्रथम हरि कीरति गाई । तेहिं मग चलत सुगम मोहि भाई ॥

दो०— अति अपार जे सरित बर जौं नृप सेतु कराहिं ।

चढ़ि पिपीलिकउ परम लघु बिनु श्रम पारहि जाहिं ॥ 13  
 एहि प्रकार बल मनहि देखाई । करिहउं रघुपति कथा सुहाई ॥  
 ब्यास आदि कबि पुंगव नाना । जिन्ह सादर हरि सुजस बखाना ॥  
 चरन कमल बंदउं तिन्ह केरे । पुरवहुँ सकल मनोरथ मेरे ॥  
 कलि के कबिन्ह करउं परनामा । जिन्ह बरने रघुपति गुन ग्रामा ॥  
 जे प्राकृत कबि परम सयाने । भाषौं जिन्ह हरि चरित बखाने ॥  
 भए जे अहहिं जे होइहहिं आगें । प्रनवउं सबहि कपट सब त्यागें ॥  
 होहु प्रसन्न देहु बरदानू । साधु समाज भनिति सनमानू ॥  
 जो प्रबंध बुध नहिं आदरहीं । सो श्रम बादि बाल कबि करहीं ॥  
 राम सुकीरति भनिति भदेसा । असमंजस अस मोहि अँदेसा ॥  
 तुम्हरी कृपाँ सुलभ सोउ मोरे । सिअनि सुहावनि टाट पटोरे ॥

दो०— सरल कबित कीरति बिमल सोइ आदरहिं सुजान ।

सहज बयर बिसराइ रिपु जो सुनि करहिं बखान ॥ 14 (क)  
 सो न होइ बिनु बिमल मति मोहि मति बल अति थोर ।  
 करहु कृपा हरि जस कहउं पुनि पुनि करउं निहोर ॥ 14 (ख)  
 कबि कोबिद रघुबर चरित मानस मंजु मराल ।  
 बाल बिनय सुनि सुरुचि लखि मोपर होहु कृपाल ॥ 14 (ग)

सो०— बंदउं मुनि पद कंजु रामायन जेहिं निरमयउ ।

सखर सुकोमल मंजु दोष रहित दूषन सहित ॥ 14 (घ)  
 बंदउं चारिउ बेद भव बारिधि बोहित सरिस ।  
 जिन्हहि न सपनेहुँ खेद बरनत रघुबर बिसद जसु ॥ 14 (ङ)  
 बंदउं बिधि पद रेनु भव सागर जेहिं कीन्ह जहँ ।  
 संत सुधा ससि धेनु प्रगटे खल बिष बारुनी ॥ 14 (च)

दो०— बिबुध बिप्र बुध ग्रह चरन बंदि कहउं कर जोरि ।

होइ प्रसन्न पुरवहु सकल मंजु मनोरथ मोरि ॥ 14 (छ)  
 पुनि बंदउँ सारद सुरसरिता । जुगल पुनीत मनोहर चरिता ॥  
 मज्जन पान पाप हर एका । कहत सुनत एक हर अबिबेका ॥  
 गुर पितु मातु महेस भवानी । प्रनवउँ दीनबंधु दिन दानी ॥  
 सेवक स्वामि सखा सिय पी के । हित निरुपधि सब बिधि तुलसी के ॥  
 कलि बिलोकि जग हित हर गिरिजा । साबर मंत्र जाल जिन्ह सिरिजा ॥  
 अनमिल आखर अरथ न जापू । प्रगट प्रभाउ महेस प्रतापू ॥  
 सो उमेस मोहि पर अनकूला । करिहिं कथा मुद मंगल मूला ॥  
 सुमिरि सिवा सिव पाइ पसाऊ । बरनउँ रामचरित चित चाऊ ॥  
 भनिति मोरि सिव कृपाँ बिभाती । ससि समाज मिलि मनहुँ सुराती ॥  
 जे एहि कथहि सनेह समेता । कहिहहिं सुनिहहिं समुझि सचेता ॥  
 होइहहिं राम चरन अनुरागी ॥ कलि मल रहित सुमंगल भागी ॥  
 कीरति भनिति भूति भलि सोई । सुरसरि सम सब कर हित होई ॥  
 दो०— सपनेहुँ साचेहुँ मोहि पर जाँ हर गौरि पसाउ ।

तौ फुर होउ जो कहेउँ सब भाषा भनिति प्रभाउ ॥ 15  
 बंदउँ अवध पुरी अति पावनि । सरजू सरि कलि कलुष नसावनि ॥  
 प्रनवउँ पुर नर नारि बहोरी । ममता जिन्ह पर प्रभुहि न थोरी ॥  
 सिय निंदक अघ ओघ नसाए । लोक बिसोक बनाइ बसाए ॥  
 बंदउँ कौसल्या दिसि प्राची । कीरति जासु सकल जग माची ॥  
 प्रगटेउ जहँ रघुपति ससि चारू । बिस्व सुखद खल कमल तुसारू ॥  
 दसरथ राउ सहित सब रानी । सुकृत सुमंगल मूरति मानी ॥  
 करउँ प्रनाम करम मन बानी । करहु कृपा सुत सेवक जानी ॥  
 जिन्हहि बिरचि बड़ भयउ बिधाता । महिमा अवधि राम पितु माता ॥  
 सो०— बंदउँ अवध भुआल सत्य प्रेम जेहि राम पद ।

बिछुरत दीनदयाल प्रिय तनु तून इव परिहरेउ ॥16  
 प्रनवउँ परिजन सहित बिदेहू । जाहि राम पद गूढ सनेहू ॥  
 जोग भोग महेँ राखेउ गोई । राम बिलोकत प्रगटेउ सोई ॥  
 प्रनवउँ प्रथम भरत के चरना । जासु नेम ब्रत जाइ न बरना ॥  
 राम चरन पंकज मन जासू । लुबुध मधुप इव तजइ न पासू ॥  
 बंदउँ लछिमन पद जलजाता । सीतल सुभग भगत सुख दाता ॥  
 रघुपति कीरति बिमल पताका । दंड समान भयउ जस जाका ॥  
 शेष सहोसीस जग कारन । जो अवतरेउ भूमि भय टारन ॥  
 सदा सो सानुकूल रह मो पर । कृपासिंधु सौमित्रि गुनाकर ॥  
 रिपुसूदन पद कमल नमामी । सूर सुसील भरत अनुगामी ॥  
 महाबीर बिनवउँ हनुमाना । राम जासु जस आप बखाना ॥

दो०— प्रनवउँ पवनकुमार खल बन पावक ग्यानघन ।  
 जासु हृदय आगार बसहिं राम सर चाप धर ॥17  
 कपिपति रीछ निसाचर राजा । अंगदादि जे कीस समाजा ॥  
 बंदउँ सब के चरन सुहाए । अधम सरीर राम जिन्ह पाए ॥  
 रघुपति चरन उपासक जेते । खग मृग सुर नर असुर समेते ॥  
 बंदउँ पद सरोज सब केरे । जे बिनु काम राम के चेरे ॥  
 सुक सनकादि भगत मुनि नारद । जे मुनिबर बिग्यान बिसारद ॥  
 प्रनवउँ सबहि धरनि धरि सीसा । करहु कृपा जन जानि मुनीसा ॥

जनकसुता जग जननि जानकी । अतिसय प्रिय करुना निधान की ॥  
ताके जुग पद कमल मनावरें । जासु कृपाँ निरमल मति पावरें ॥  
पुनि मन बचन कर्म रघुनायक । चरन कमल बंदरें सब लायक ॥  
राजिवनयन धरें धनु सायक । भगत बिपति भंजन सुख दायक ॥

दो० गिरा अरथ जल बीचि सम कहिअत भिन्न न भिन्न ।

बंदरें सीता राम पद जिन्हहि परम प्रिय खिन्न ॥१८

बंदरें नाम राम रघुबर को । हेतु कृसानु भानु हिमकर को ।  
बिधि हरि हरमय बेद प्रान सो । अगुन अनूपम गुन निधान सो ॥  
महामंत्र जोइ जपत महेसू । कासीं मुकुति हेतु उपदेसू ॥  
महिमा जासु जान गनराऊ । प्रथम पूजिअत नाम प्रभाऊ ॥  
जान आदिकबि नाम प्रतापू । भयउ सुद्ध करि उलटा जापू ॥  
सहस नाम सम सुनि सिव बानी । जपि जेई पिय संग भवानी ॥  
हरषे हेतु हेरि हर ही को । किय भूषन तिय भूषन ती को ॥  
नाम प्रभाउ जान सिव नीको । कालकूट फलु दीन्ह अमी को ॥

दो०— बरषा रितु रघुपति भगति तुलसी सालि सुदास ।

राम नाम बर बरन जुग सावन भादव मास ॥१९

आखर मधुर मनोहर दोऊ । बरन बिलोचन जन जिय जोऊ ॥  
सुमिरत सुलभ सुखद सब काहू । लोक लाहु परलोक निबाहू ॥  
कहत सुनत सुमिरत सुठि नीके । राम लखन सम प्रिय तुलसी के ॥  
बरनत बरन प्रीति बिलगाती । ब्रह्म जीव सम सहज सँघाती ॥  
नर नारायन सरिस सुभ्राता । जग पालक बिसेषि जन त्राता ॥  
भगति सुतिय कल करन बिभूषन । जग हित हेतु बिमल बिधु पूषन ॥  
स्वाद तोष सम सुगति सुधा के । कमठ सेष सम धर बसुधा के ॥  
जन मन मंजु कंज मधुकर से । जीह जसोमति हरि हलधर से ॥

दो०— एकु छत्रु एकु मुकुटमनि सब बरननि पर जोउ ।

तुलसी रघुबर नाम के बरन बिराजत दोउ ॥२०

समुझत सरिस नाम अरु नामी । प्रीति परसपर प्रभु अनुगामी ॥  
नाम रूप दुइ ईस उपाधी । अकथ अनादि सुसामुझि साधी ॥  
को बड़ छोट कहत अपराधू । सुनि गुन भेदु समुझिहहिं साधू ॥  
देखिअहिं रूप नाम आधीना । रूप ग्यान नहिं नाम बिहीना ॥  
रूप बिसेष नाम बिनु जानें । करतल गत न परहिं पहिचानें ॥  
सुमिरिअ नाम रूप बिनु देखें । आवत हृदयें सनेह बिसेषें ॥  
नाम रूप गति अकथ कहानी । समुझत सुखद न परति बखानी ॥  
अगुन सगुन बिच नाम सुसाखी । उभय प्रबोधक चतुर दुभाषी ॥

दो०— राम नाम मनिदीप धरु जीह देहरीं द्वार ।

तुलसी भीतर बाहेरहुँ जाँ चाहसि उजिआर ॥२१

नाम जीहें जपि जागहिं जोगी । बिरति बिरंचि प्रपंच बियोगी ॥  
ब्रह्मसुखहिं अनुभवहिं अनूपा । । अकथ अनामय नाम न रूपा ॥  
चहहिं गूढ़ गति जेरु । नाम जीहें जपि जानहिं तेरु ॥  
साधक नाम जपहिं लय लाएँ । होहिं सिद्ध अनिमादिक पाएँ ॥  
जपहिं नामु जन आरत भारी । मिटहिं कुसंकट होहिं सुखारी ॥  
राम भगत जग चारि प्रकारा । सुकृती चारिउ अनघ उदारा ॥  
चहू चतुर कहुँ नाम अधारा । ग्यानी प्रभुहि बिसेषि पिआरा ॥

जाना

चहुँ जुग चहुँ श्रुति नाम प्रभाऊ । कलि बिसेषि नहिं आन उपाऊ ॥  
 दो०— सकल कामना हीन जे राम भगति रस लीन ॥  
 नाम सुप्रेम पिपूष हृद तिन्हहुँ किए मन मीन ॥22  
 अगुन सगुन दुइ ब्रह्म सरूपा । अकथ अगाध अनादि अनूपा ॥  
 मोरें मत बड़ नामु दुहू तें । किए जेहिं जुग निज बस निज बूतें ॥  
 प्रौढ़ि सुजन जनि जानहिं जन की । कहउँ प्रतीति प्रीति रुचि मन की ॥  
 एकु दारुगत दखिअ एकू । पावक सम जुग ब्रह्म बिबेकू ॥  
 उभय अगम जुग सुगम नाम तें । कहेउँ नामु बड़ ब्रह्म राम तें ॥  
 ब्यापकु एकु ब्रह्म अबिनासी । सत चेतन घन आनंद रासी ॥  
 अस प्रभु हृदयें अछत अबिकारी । सकल जीव जग दीन दुखारी ॥  
 नाम निरूपन नाम जतन तें । सोउ प्रगटत जिमि मोल रतन तें ॥  
 दो० निरगुन तें एहि भौंति बड़ नाम प्रभाउ अपार ।  
 कहउँ नामु बड़ राम तें निज बिचार अनुसार ॥23  
 राम भगत हित नर तनु धारी । सहि संकट किए साधु सुखारी ॥  
 नामु सप्रेम जपत अनयासा । भगत होहिं मुद मंगल बासा ॥  
 राम एक तापस तिय तारी । नाम कोटि खल कुमति सुधारी ॥  
 रिषि हित राम सुकेतुसुता की । सहित सेन सुत कीन्हि बिबाकी ॥  
 सहित दोष दुख दास दुरासा । दलइ नामु जिमि रबि निसि नासा ॥  
 भंजेउ राम आपु भव चापू । भव भय भंजन नाम प्रतापू ॥  
 दंडक बनु प्रभु कीन्ह सुहावन । जन मन अमित नाम किए पावन ॥  
 निसिचर निकर दले रघुनंदन । नामु सकल कलि कलुष निकंदन ॥  
 दो०— सबरी गीध सुसेवकनि सुगति दीन्हि रघुनाथ ।  
 नाम उधारे अमित खल बेद बिदित गुन गाथ ॥24  
 राम सुकंठ बिभीषन दोऊ । राखे सरन जान सबु कोऊ ॥  
 नाम गरीब अनेक नेवाजे । लोक बेद बर बिरिद बिराजे ॥  
 राम भालु कपि कटकु बटोरा । सेतु हेतु श्रमु कीन्ह न थोरा ॥  
 नामु लेत भवसिंधु सुखाहीं । करहु बिचारु सुजन मन माहीं ॥  
 राम सकुल रन रावनु मारा । सीय सहित निज पुर पगु धारा ॥  
 राजा रामु अवध रजधानी । गावत गुन सुर मुनि बर बानी ॥  
 सेवक सुमिरत नामु सप्रीती । बिनु श्रम प्रबल मोह दलु जोती ॥  
 फिरत सनेहें मगन सुख अपने । नाम प्रसाद सोच नहिं सपनें ॥  
 दो०— ब्रह्म राम तें नामु बड़ बर दायक बर दानि ।  
 रामचरित सत कोटि महें लिय महेस जियें जानि ॥ 25  
 मासपारायण, पहला विश्राम  
 नाम प्रसाद संभु अबिनासी । साजु अमंगल मंगल रासी ॥  
 सुक सनकादि सिद्ध मुनि जोगी । नाम प्रसाद ब्रह्मसुख भोगी ॥  
 नारद जानेउ नाम प्रतापू । जग प्रिय हरि हरि हर प्रिय आपू ॥  
 नामु जपत प्रभु कीन्ह प्रसादू । भगत सिरोमनि भे प्रहलादू ॥  
 ध्रुवें सगलानि जपेउ हरि नाऊँ । पायउ अचल अनूपम ठाऊँ ॥  
 सुमिरि पवनसुत पावन नामू । अपने बस करि राखे रामू ॥  
 अपतु अजामिलु गजु गनिकाऊ । भए मुकुत हरि नाम प्रभाऊ ॥  
 कहाँ कहाँ लगी नाम बड़ाई । रामु न सकहिं नाम गुन गाई ॥  
 दो०— नामु राम को कलपतरु कलि कल्यान निवासु ।

जो सुमिरत भयो भोंग तें तुलसी तुलसीदासु ॥26  
 चहुँ जुग तीनि काल तिहुँ लोका । भए नाम जपि जीव बिसोका ॥  
 बेद पुरान संत मत एहू । सकल सुकृत फल राम सनेहू ।  
 ध्यानु प्रथम जुग मखबिधि दूर्जे । द्वापर परितोषत प्रभु पूर्जे ॥  
 कलि केवल मल मूल मलीना । पाप पयोनिधि जन मन मीना ॥  
 नाम कामतरु काल कराला । सुमिरत समन सकल जग जाला ॥  
 राम नाम कलि अभिमत दाता । हित परलोक लोक पितु माता ॥  
 नहिं कलि करम न भगति बिबेकू । राम नाम अवलंबन एकू ॥  
 कालनेमि कलि कपट निधानू । राम सुमति समरथ हनुमानू ॥  
 दो0— राम नाम नरकेसरी । कनककसिपु कलिकाल ।

जापक जन प्रहलाद जिमि पालिहि दलि सुरसाल ॥27  
 भायँ कुभायँ अनख आलसहूँ । नाम जपत मंगल दिसि दसहूँ ॥  
 सुमिरि सो नाम राम गुन गाथा । करउँ नाइ रघुनाथहि माथा ॥  
 मोरि सुधारिहि सो सब भौंती । जासु कृपा नहिं कृपाँ अघाती ॥  
 राम सुस्वामि कुसेवकु मोसो । निज दिसि देखि दयानिधि पोसो ॥  
 लोकहुँ बेद सुसाहिब रीती । बिनय सुनत पहिचानत पोती ॥  
 गनी गरीब ग्रामनर नागर । पंडित मूढ मलीन उजागर ॥  
 सुकबि कुकबि निज मति अनुहारी । नृपहि सराहत सब नर नारी ॥  
 साधु सुजान सुसील नृपाला । ईस अंस भव परम कृपाला ॥  
 सुनि सनमानहिं सबहि सुबानी । भनिति भगति नति गति पहिचानी ॥  
 यह प्राकृत महिपाल सुभाऊ । जान सिरोमनि कोसलराऊ ॥  
 रीझत राम सनेह निसोतें । को जग मंद मलिनमति मोतें ॥

दो0— सठ सेवक की प्रीति रुचि रखिहहिं राम कृपालु ।  
 उपल किए जलजान जेहिं सचिव सुमति कपि भालु ॥ 28 (क)  
 हौंहु कहावत सबु कहत राम सहत उपहास ।  
 साहिब सीतानाथ सो सेवक तुलसीदास ॥ 28 (ख)  
 अति बड़ि मोरि ढिठाई खोरी । सुनि अघ नरकहुँ नाक सकोरी ॥  
 समुझि सहम मोहि अपडर अपनें । सो सुधि राम कीन्हि नहिं सपनें ॥  
 सुनि अवलोकि सुचित चख चाही । भगति मोरि मति स्वामि सराही ॥  
 कहत नसाइ होइ हिये नीकी । रीझत राम जानि जन जी की ॥  
 रहति न प्रभु चित चूक किए की । करत सुरति सय बार हिए की ॥  
 जेहिं अघ बधेउ ब्याध जिमि बाली । फिरि सुकंठ सोइ कीन्हि कुचाली ॥  
 सोइ करतूति बिभीषन केरी । सपनेहुँ सो न राम हिये हेरी ॥  
 ते भरतहि भेंटत सनमाने । राजसभाँ रघुबीर बखाने ॥

दो0 प्रभु तरु तर कपि डार पर ते किए आपु समान ।  
 तुलसी कहूँ न राम से साहिब सीलनिधान ॥ 29 (क)  
 राम निकाई रावरी है सबही को नीक ।  
 जाँ यह सौँची है सदा तौ नीको तुलसीक ॥ 29 (ख)  
 एहि बिधि निज गुन दोष कहि सबहि बहुरि सिरु नाइ ।  
 बरनउँ रघुबर बिसद जसु सुनि कलि कलुष नसाइ ॥ 29 (ग)  
 जागबलिक जो कथा सुहाई । भरद्वाज मुनिबरहि सुनाई ॥  
 कहिहउँ सोइ संबाद बखानी । सुनहुँ सकल सज्जन सुखु मानी ॥  
 संभु कीन्ह यह चरित सुहावा । बहुरि कृपा करि उमहि सुनावा ॥

सोइ सिव कागभुसुंझिहि दीन्हा । राम भगत अधिकारी चीन्हा ॥  
 तेहि सन जागबलिक पुनि पावा । तिन्ह पुनि भरद्वाज प्रति गावा ॥  
 ते श्रोता बकता समसीला । सर्वेदरसी जानहिं हरिलीला ॥  
 जानहिं तीनि काल निज ग्याना । करतल गत आमलक समाना ॥  
 औरउ जे हरिभगत सुजाना । कहहिं सुनहिं समुझहिं बिधि नाना ॥  
 दो०— मैं पुनि निज गुर सन सुनी कथा सो सूकरखेत ।

समुझी नहिं तसि बालपन तब अति रहेउं अचेत ॥ 30 (क)  
 श्रोता बकता ग्याननिधि कथा राम कै गूढ ।

किमि समुझौं मैं जीव जड़ कलि मल ग्रसित बिमूढ़ ॥ 30 (ख)  
 तदपि कही गुर बारहिं बारा । समुझि परी कछु मति अनुसार ॥  
 भाषाबद्ध करबि मैं सोई । मोरें मन प्रबोध जेहिं होई ॥  
 जस कछु बुधि बिबेक बल मेरे । तस कहिहउं हिये हरि के प्रेरे ॥  
 निज संदेह मोह भ्रम हरनी । करउं कथा भव सरिता तरनी ॥  
 बुध विश्राम सकल जन रंजनि । रामकथा कलि कलुष बिभंजनि ॥  
 रामकथा कलि पंनग भरनी । पुनि बिबेक पावक कहुं अरनी ॥  
 रामकथा कलि कामद गाई । सुजन सजीवनि मूरि सुहाई ॥  
 सोइ बसुधातल सुधा तरंगिनि । भय भंजनि भ्रम भेक भुअंगिनि ॥  
 असुर सेन सम नरक निकंदिनि । साधु बिबुध कुल हित गिरिनंदिनि ॥  
 संत समाज पयोधि रमा सी । बिस्व भार भर अचल छमा सी ॥  
 जम गन मुहँ मसि जग जमुना सी । जीवन मुकुति हेतु जनु कासी ॥  
 रामहि प्रिय पावनि तुलसी सी । तुलसिदास हित हिये हुलसी सी ॥  
 सिवप्रिय मेकल सैल सुता सी । सकल सिद्धि सुख संपति रासी ॥  
 सदगुन सुरगन अंब अदिति सी । रघुबर भगति प्रेम परमिति सी ॥  
 दो० रामकथा मंदाकिनी चित्रकूट चित चारु ।

तुलसी सुभग सनेह बन सिय रघुबीर बिहारु ॥ 31

रामचरित चिंतामनि चारु । संत सुमति तिय सुभग सिंगारु ॥  
 जग मंगल गुनग्राम राम के । दानि मुकुति धन धरम धाम के ॥  
 सदगुर ग्यान बिराग जोग के । बिबुध बैद भव भीम रोग के ॥  
 जननि जनक सिय राम प्रेम के । बीच सकल ब्रत धरम नेम के ॥  
 समन पाप संताप सोक के । पिय पालक परलोक लोक के ॥  
 सचिव सुभट भूपति बिचार के । कुंभज लोभ उदधि अपार के ॥  
 काम कोह कलिमल करिगन के । केहरि सावक जन मन बन के ॥  
 अतिथि पूज्य प्रियतम पुरारि के । कामद घन दारिद दवारि के ॥  
 मंत्र महामनि बिषय ब्याल के । मेटत कठिन कुअंक भाल के ॥  
 हरन मोह तम दिनकर कर से । सेवक सालि पाल जलधर से ॥  
 अभिमत दानि देवतरु बर से । सेवत सुलभ सुखद हरि हर से ॥  
 सुकबि सरद नभ मन उडगन से । रामभगत जन जीवन धन से ॥  
 सकल सृकृत फल भूरि भोग से । जग हित निरुपधि साधु लोग से ॥  
 सेवक मन मानस मराल से । पावन गंग तरंग माल से ॥

दो० कुपथ कुतरक कुचालि कलि कपट दंभ पाषंड ।

दहन राम गुन ग्राम जिमि इंधन अनल प्रचंड ॥ 32 (क)

रामचरित राकेस कर सरिस सुखद सब काहु ।

सज्जन कुमुद चकोर चित हित बिसेषि बड़ लाहु ॥ 32 (ख)

कीन्हि प्रस्न जेहि भॉति भवानी । जेहि बिधि संकर कहा बखानो ॥  
 सो सब हेतु कहब मैं गाई । कथाप्रबंध बिचित्र बनाई ॥  
 जेहिं यह कथा सुनी नहिं होई । जनि आचरजु करै सुनि सोई ॥  
 कथा अलौकिक सुनहिं जे ग्यानी । नहिं आचरजु करहिं अस जानी ॥  
 रामकथा कै मिति जग नाहीं । असि प्रतीति तिन्ह के मन माहीं ॥  
 नाना भॉति राम अवतारा । रामायन सत कोटि अपारा ॥  
 कल्पभेद हरिचरित सुहाए । भॉति अनेक मुनीसन्ह गाए ॥  
 करिअ न संसय अस उर आनी । सुनिअ कथा सादर रति मानी ॥  
 दो०— राम अनंत अनंत गुन अमित कथा बिस्तार ।  
 सुनि आचरजु न मानिहहिं जिन्ह कें बिमल बिचार ॥ 33  
 एहि बिधि सब संसय करि दूरी । सिर धरि गुर पद पंकज धूरी ॥  
 पुनि सबही बिनवउं कर जोरी । करत कथा जेहिं लाग न खोरी ॥  
 सादर सिवहि नाइ अब माथा । बरनउं बिसद राम गुन गाथा ॥  
 संबत सोरह सै एकतीसा । करउं कथा हरि पद धरि सीसा ॥  
 नौमी भौम बार मधु मासा । अवधपुरीं यह चरित प्रकासा ॥  
 जेहि दिन राम जनम श्रुति गावहिं । तीरथ सकल तहाँ चलि आवहिं ॥  
 असुर नाग खग नर मुनि देवा । आइ करहिं रघुनायक सेवा ॥  
 जन्म महोत्सव रचहिं सुजाना । करहिं राम कल कीरति गाना ॥  
 दो०— मज्जहिं सज्जन बृंद बहु पावन सरजू नीर ।  
 जपहिं राम धरि ध्यान उर सुंदर स्याम सरीर ॥ 34  
 दरस परस मज्जन अरु पाना । हरइ पाप कह बेद पुराना ॥  
 नदी पुनीत अमित महिमा अति । कहि न सकइ सारदा बिमलमति ॥  
 राम धामदा पुरी सुहावनि । लोक समस्त बिदित अति पावनि ॥  
 चारि खानि जग जीव अपारा । अवध तजें तनु नहिं संसारा ॥  
 सब बिधि पुरी मनोहर जानी । सकल सिद्धिप्रद मंगल खानी ॥  
 बिमल कथा कर कीन्ह अरंभा । सुनत नसाहिं काम मद दंभा ॥  
 रामचरितमानस एहि नामा । सुनत श्रवन पाइअ बिश्रामा ॥  
 मन करि बिषय अनल बन जरई । होइ सुखी जाँ एहिं सर परई ॥  
 रामचरितमानस मुनि भावन । बिरचेउ संभु सुहावन पावन ॥  
 त्रिबिध दोष दुख दारिद दावन । कलि कुचालि कुलि कलुष नसावन ॥  
 रचि महेस निज मानस राखा । पाइ सुसमउ सिवा सन भाषा ॥  
 तातें रामचरितमानस बर । धरेउ नाम हिये हेरि हरषि हर ॥  
 दो०— जस मानस जेहि बिधि भयउ जग प्रचार जेहि हेतु ।  
 अब सोइ कहउं प्रसंग सब सुमिरि उमा बृषकेतु ॥ 35  
 संभु प्रसाद सुमति हिये हुलसी । रामचरितमानस कबि तुलसी ॥  
 करइ मनोहर मति अनुहारी । सुजन सुचित सुनि लेहु सुधारी ॥  
 सुमति भूमि थल हृदय अगाधू । बेद पुरान उदधि घन साधू ॥  
 बरषहिं राम सुजस बर बारी । मधुर मनोहर मंगलकारी ॥  
 लीला सगुन जो कहहिं बखानी । सोइ स्वच्छता करइ मल हानी ॥  
 प्रेम भगति जो बरनि न जाई । सोइ मधुरता सुसीतलताई ॥  
 सो जल सुकृत सालि हित होई । राम भगत जन जीवन सोई ॥  
 मेधा महि गत सो जल पावन । सकलि श्रवन मग चलेउ सुहावन ॥  
 भरेउ सुमानस सुथल थिराना । सुखद सीत रुचि चारु चिराना ॥

दो०— सुठि सुंदर संबाद बर बिरचे बुद्धि बिचारि ।

तेइ एहि पावन सुभग सर घाट मनोहर चारि ॥ 36

सप्त प्रबंध सुभग सोपाना । ग्यान नयन निरखत मन माना ॥  
रघुपति महिमा अगुन अबाधा । बरनब सोइ बर बारि अगाधा ॥  
राम सीय जस सलिल सुधासम । उपमा बीचि बिलास मनोरम ॥  
पुरइनि सघन चारु चौपाई । जुगुति मंजु मनि सीप सुहाई ॥  
छंद सोरठा सुंदर दोहा । सोइ बहुरंग कमल कुल सोहा ॥  
अरथ अनूप सुभाव सुभासा । सोइ पराग मकरंद सुबासा ॥  
सुकृत पुंज मंजुल अलि माला । ग्यान बिराग बिचार मराला ॥  
धुनि अवरेब कबित गुन जाती । मीन मनोहर ते बहुभौंती ॥  
अरथ धरम कामादिक चारी । कहब ग्यान बिग्यान बिचारी ॥  
नव रस जप तप जोग बिरागा । ते सब जलचर चारु तड़ागा ॥  
सुकृती साधु नाम गुन गाना । ते बिचित्र जल बिहग समाना ॥  
संतसभा चहुँ दिसि अर्वेराई । श्रद्धा रितु बसंत सम गाई ॥  
भगति निरूपन बिबिध बिधाना । छमा दया दम लता बिताना ॥  
सम जम नियम फूल फल ग्याना । हरि पद रति रस बेद बखाना ॥

दो०— पुलक बाटिका बाग बन सुख सुबिहंग बिहारु ।

माली सुमन सनेह जल सींचत लोचन चारु ॥ 37

जे गावहिं यह चरित सँभारे । तेइ एहि ताल चतुर रखवारे ॥  
सदा सुनहिं सादर नर नारी । तेइ सुरबर मानस अधिकारी ॥  
औरउ कथा अनेक प्रसंगा । तेइ सुक पिक बहुबरन बिहंगा ॥  
अति खल जे बिषई बग कागा । एहिं सर निकट न जाहिं अभागा ॥  
संबुक भेक सेवार समाना । इहों न बिषय कथा रस नाना ॥  
तेहि कारन आवत हिये हारे । कामी काक बलाक बिचारे ॥  
आवत एहिं सर अति कठिनाई । राम कृपा बिनु आइ न जाई ॥  
कठिन कुसंग कुपंथ कराला । तिन्ह के बचन बाघ हरि ब्याला ॥  
गृह कारज नाना जंजाला । ते अति दुर्गम सैल बिसाला ॥  
बन बहु बिषम मोह मद माना । नदीं कुतर्क भयंकर नाना ॥

दो०— जे श्रद्धा संबल रहित नहिं संतन्ह कर साथ ।

तिन्ह कहुँ मानस अगम अति जिन्हहिं न प्रिय रघुनाथ ॥ 38

जौं करि कष्ट जाइ पुनि कोई । जातहिं नीद जुड़ाई होई ॥  
जड़ता जाड़ बिषम उर लागा । गएहुँ न मज्जन पाव अभागा ॥  
करि न जाइ सर मज्जन पाना । फिरि आवइ समेत अभिमाना ॥  
जौं बहोरि कोउ पूछन आवा । सर निंदा करि ताहि बुझावा ॥  
सकल बिघ्न ब्यापहिं नहिं तेही । राम सुकृपों बिलोकहिं जेही ॥  
सोइ सादर सर मज्जनु करई । महा घोर त्रयताप न जरई ॥  
जो नहाइ चह एहिं सर भाई । सो सतसंग करउ मन लाई ॥  
अस मानस मानस चख चाही । भइ कबि बुद्धि बिमल अवगाही ॥  
भयउ हृदये आनंद उछाहू । उमगेउ पम प्रमोद प्रबाहू ॥  
चली सुभग कबिता सरिता सो । राम बिमल जस जल भरिता सो ॥  
सरजू नाम सुमंगल मूला । लोक बेद मत मंजुल कूला ॥  
नदी पुनीत सुमानस नंदिनि । कलिमल तून तरु मूल निकंदिनि ॥

दो०— श्रोता त्रिविध समाज पुर ग्राम नगर दुहुँ कूल ।

संतसभा अनुपम अवध सकल सुमंगल मूल ॥ 39

रामभगति सुरसरितहि जाई । मिली सुकीरति सरजु सुहाई ॥  
सानुज राम समर जसु पावन । मिलेउ महानदु सोन सुहावन ॥  
जुग बिच भगति देवधुनि धारा । सोहति सहित सुबिरति बिचारा ॥  
त्रिबिध ताप त्रासक तिमुहानी । राम सरूप सिंधु समुहानी ॥  
मानस मूल मिली सुरसरिही । सुनत सुजन मन पावन करिही ॥  
बिच बिच कथा बिचित्र बिभागा । जनु सरि तीर तीर बन बागा ॥  
उमा महेस बिबाह बराती । ते जलचर अगनित बहुभौती ॥  
रघुबर जनम अनंद बधाई । भर्वर तरंग मनोहरताई ॥  
दो०— बालचरित चहु बंधु के बनज बिपुल बहुरंग ।

नृप रानी परिजन सुकृत मधुकर बारिबिहंग ॥ 40

सीय स्वयंबर कथा सुहाई । सरित सुहावनि सो छबि छाई ॥  
नदी नाव पटु प्रस्न अनेका । केवट कुसल उतर सबिबेका ॥  
सुनि अनुकथन परस्पर होई । पथिक समाज सोह सरि सोई ॥  
घोर धार भृगुनाथ रिसानी । घाट सुबद्ध राम बर बानी ॥  
सानुज राम बिबाह उछाहू । सो सुभ उमग सुखद सब काहू ॥  
कहत सुनत हरषहिं पुलकाहीं । ते सुकृती मन मुदित नहाहीं ॥  
राम तिलक हित मंगल साजा । परब जोग जनु जुरे समाजा ॥  
काई कुमति केकई केरी । परी जासु फल बिपति घनेरी ॥

दो०— समन अमित उतपात सब भरतचरित जपजाग ।

कलि अघ खल अवगुन कथन ते जलमल बग काग ॥ 41

कीरति सरित छहूँ रितु रुरी । समय सुहावनि पावनि भूरी ॥  
हिम हिमसैलसुता सिव ब्याहू । सिसिर सुखद प्रभु जनम उछाहू ॥  
बरनब राम बिबाह समाजू । सो मुद मंगलमय रितुराजू ॥  
ग्रीषम दुसह राम बनगवनू । पंथकथा खर आतप पवनू ॥  
बरषा घोर निसाचर रारी । सुरकुल सालि सुमंगलकारी ॥  
राम राज सुख बिनय बड़ाई । बिसद सुखद सोइ सरद सुहाई ॥  
सती सिरामनि सिय गुनगाथा । सोइ गुन अमल अनूपम पाथा ॥  
भरत सुभाउ सुसीतलताई । सदा एकरस बरनि न जाई ॥

दो०— अवलोकनि बोलनि मिलनि प्रीति परसपर हास ।

भायप भलि चहु बंधु की जल माधुरी सुबास ॥ 42

आरति बिनय दीनता मोरी । लघुता ललित सुबारि न थोरी ॥  
अदभुत सलिल सुनत गुनकारी । आस पिआस मनोमल हारी ॥  
राम सुप्रेमहि पोषत पानी । हरत सकल कलि कलुष गलानी ॥  
भव श्रम सोषक तोषक तोषा । समन दुरित दुख दारिद दोषा ॥  
काम कोह मद मोह नसावन । बिमल बिबेक बिराग बढ़ावन ॥  
सादर मज्जन पान किए तें । मिटहिं पाप परिताप हिए तें ॥  
जिन्ह एहिं बारि न मानस धोए । ते कायर कलिकाल बिगोए ॥  
तृषित निरखि रबि कर भव बारी । फिरिहिं मृग जिमि जीव दुखारी ॥

दो०— मति अनुहारि सुबारि गुन गन गनि मन अन्हवाइ ।

सुमिरि भवानी संकरहि कह कबि कथा सुहाइ ॥ 43 (क)

अब रघुपति पद पंकरुह हिये धरि पाइ प्रसाद ।

कहउं जुगल मुनिबर्ज कर मिलन सुभग संबाद ॥ 43 (ख)

भरद्वाज मुनि बसहिं प्रयागा । तिन्हहि राम पद अति अनुरागा ॥  
 तापस सम दम दया निधाना । परमारथ पथ परम सुजाना ॥  
 माघ मकरगत रबि जब होई । तीरथपतिहिं आव सब कोई ॥  
 देव दनुज किंनर नर श्रेणी । सादर मज्जहिं सकल त्रिबेनी ॥  
 पूजहिं माधव पद जलजाता । परसि अखय बटु हरषहिं गाता ॥  
 भरद्वाज आश्रम अति पावन । परम रम्य मुनिबर मन भावन ॥  
 तहाँ होइ मुनि रिषय समाजा । जाहिं जे मज्जन तीरथराजा ॥  
 मज्जहिं प्रात समेत उछाहा । कहहिं परसपर हरि गुन गाहा ॥  
 दो०— ब्रह्म निरूपन धरम बिधि बरनहिं तत्व बिभाग ।  
 कहहिं भगति भगवंत कै संजुत ग्यान बिराग ॥ 44  
 एहि प्रकार भरि माघ नहाहीं । पुनि सब निज निज आश्रम जाहीं ॥  
 प्रति संबत अति होइ अनंदा । मकर मज्जि गवनहिं मुनिबृंदा ॥  
 एक बार भरि मकर नहाए । सब मुनीस आश्रमन्ह सिधाए ॥  
 जागबलिक मुनि परम बिबेकी । भरद्वाज राखे पद टेकी ॥  
 सादर चरन सरोज पखारे । अति पुनीत आसन बैठारे ॥  
 करि पूजा मुनि सुजसु बखानी । बोले अति पुनीत मृदु बानी ॥  
 नाथ एक संसउ बड़ मोरें । करगत बेदतत्व सबु तोरें ॥  
 कहत सो मोहि लागत भय लाजा । जाँ न कहउँ बड़ होइ अकाजा ॥  
 दो० संत कहहिं असि नीति प्रभु श्रुति पुरान मुनि गाव ।  
 होइ न बिमल बिबेक उर गुर सन किँँ दुराव ॥ 45  
 अस बिचारि प्रगटँँ निज मोहू । हरहु नाथ करि जन पर छोहू ॥  
 राम नाम कर अमित प्रभावा । संत पुरान उपनिषद गावा ॥  
 संतत जपत संभु अबिनासी । सिव भगवान ग्यान गुन रासी ॥  
 आकर चारि जीव जग अहहीं । कासीं मरत परम पद लहहीं ॥  
 सोपि राम महिमा मुनिराया । सिव उपदेसु करत करि दाया ॥  
 रामु कवन प्रभु पूछँँ तोही । कहिअ बुझाइ कृपानिधि मोही ॥  
 एक राम अवघेस कुमारा । तिन्ह कर चरित बिदित संसारा ॥  
 नारि बिरहँँ दुखु लहेउ अपारा । भयउ रोषु रन रावनु मारा ॥  
 दो०— प्रभु सोइ राम कि अपर कोउ जाहि जपत त्रिपुरारि ।  
 सत्यधाम सर्वग्य तुम्ह कहहु बिबेकु बिचारि ॥ 46  
 जैसें मिटै मोर भ्रम भारी । कहहु सो कथा नाथ बिस्तारी ॥  
 जागबलिक बोले मुसुकाई । तुम्हहि बिदित रघुपति प्रभुताई ॥  
 रामभगत तुम्ह मन कम बानी । चतुराई तुम्हारि मैं जानी ॥  
 चाहहु सुनै राम गुन गूढा । कीन्हिहु प्रस्न मनहुँँ अति मूढा ॥  
 तात सुनहु सादर मनु लाई । कहउँँ राम कै कथा सुहाई ॥  
 महामोहु महिषेसु बिसाला । रामकथा कालिका कराला ॥  
 रामकथा ससि किरन समाना । संत चकोर करहिं जेहि पाना ॥  
 ऐसेइ संसय कीन्ह भवानी । महादेव तब कहा बखानी ॥  
 दो०— कहउँँ सो मति अनुहारि अब उमा संभु संबाद ।  
 भयउ समय जेहि हेतु जेहि सुनु मुनि मिटिहि बिषाद ॥ 47  
 एक बार त्रेता जुग माहीं । संभु गए कुंभज रिषि पाहीं ॥  
 संग सती जगजननि भवानी । पूजे रिषि अखिलेस्वर जानी ॥  
 रामकथा मुनिबर्ज बखानी । सुनी महेस परम सुखु मानी ॥

रिषि पूछी हरिभगति सुहाई । कही संभु अधिकारी पाई ॥  
 कहत सुनत रघुपति गुन गाथा । कछु दिन तहाँ रहे गिरिनाथा ॥  
 मुनि सन बिदा मागि त्रिपुरारी । चले भवन सँग दच्छकुमारी ॥  
 तेहि अवसर भंजन महिभारा । हरि रघुबंस लीन्ह अवतारा ॥  
 पिता बचन तजि राजु उदासी । दंडक बन बिचरत अबिनासी ॥  
 दो० हृदयँ बिचारत जात हर केहि बिधि दरसनु होइ ।  
 गुप्त रूप अवतरत प्रभु गएँ जान सबु कोइ ॥ 48 (क)  
 सो० संकर उर अति छोभु सती न जानहि मरमु सोइ ।  
 तुलसी दरसन लोभु मन डरु लोचन लालची ॥ 48 (ख)  
 रावन मरन मनुज कर जाचा । प्रभु बिधि बचनु कीन्ह चह साचा ॥  
 जौं नहिं जाउँ रहइ पछितावा । करत बिचारु न बनत बनावा ॥  
 एहि बिधि भए सोचबस ईसा । तेही समय जाइ दससीसा ॥  
 लीन्ह नीच मारीचहि संगी । भयउ तुरत सोइ कपट कुरंगी ॥  
 करि छलु मूढ़ हरी बैदेही । प्रभु प्रभाउ तस बिदित न तेही ॥  
 मृग बधि बंधु सहित हरि आए । आश्रमु देखि नयन जल छाए ॥  
 बिरह बिकल नर इव रघुराई । खोजत बिपिन फिरत दोउ भाई ॥  
 कबहुँ जोग बियोग न जाकेँ । देखा प्रगट बिरह दुख ताकेँ ॥  
 दो० अति बिचित्र रघुपति चरित जानहिं परम सुजान ।  
 जे मतिमंद बिमोह बस हृदयँ धरहिं कछु आन ॥ 49  
 संभु समय तेहि रामहि देखा । उपजा हियँ अति हरषु बिसेषा ॥  
 भरि लोचन छबिसिंधु निहारी । कुसमय जानि न कीन्हि चिन्हारी ॥  
 जय सच्चिदानंद जग पावन । अस कहि चलेउ मनोज नसावन ॥  
 चले जात सिव सती समेता । पुनि पुनि पुलकत कृपानिकेता ॥  
 सतीं सो दसा संभु कै देखी । उर उपजा संदेहु बिसेषी ॥  
 संकरु जगतबंधु जगदीसा । सुर नर मुनि सब नावत सीसा ॥  
 तिन्ह नृपसुतहि कीन्ह परनामा । कहि सच्चिदानंद परधामा ॥  
 भए मगन छबि तासु बिलोकी । अजहुँ प्रीति उर रहति न रोकी ॥  
 दो० ब्रह्म जो ब्यापक बिरज अज अकल अनीह अभेद ।  
 सो कि देह धरि होइ नर जाहि न जानत बेद ॥ 50  
 बिष्णु जो सुर हित नरतनु धारी । सोउ सर्वग्य जथा त्रिपुरारी ॥  
 खोजइ सो कि अग्य इव नारी । ग्यानधाम श्रीपति असुरारी ॥  
 संभुगिरा पुनि मृषा न होई । सिव सर्वग्य जान सबु कोई ॥  
 अस संसय मन भयउ अपारा । होइ न हृदयँ प्रबोध प्रचारा ॥  
 जद्यपि प्रगट न कहेउ भवानी । हर अंतरजामी सब जानी ॥  
 सुनहि सती तव सत्य सुभाऊ । संसय अस न धरिअ उर काऊ ॥  
 जासु कथा कुंभज रिषि गाई । भगति जासु मैं मुनिहि सुनाई ॥  
 सोइ मम इष्टदेव रघुबीरा । सेवत जाहि सदा मुनि धीरा ॥  
 छं० मुनि धीर जोगी सिद्ध संतत बिमल मन जेहि ध्यावहीं ।  
 कहि नेति निगम पुरान आगम जासु कीरति गावहीं ॥  
 सोइ रामु ब्यापक ब्रह्म भुवन निकाय पति माया धनी ।  
 अवतरेउ अपने भगत हित निजतंत्र नित रघुकुलमनी ॥  
 सो० लाग न उर उपदेसु जदपि कहेउ सिवें बार बहु ।  
 बोले बिहसि महेसु हरिमाया बलु जानि जियँ ॥ 51

जौं तुम्हरे मन अति संदेहू । तौ किन जाइ परीछा लेहू ॥  
 तब लागि बैठ अहउँ बटछाहीं । जब लागि तुम्ह ऐहहु मोहि पाहीं ॥  
 जैसें जाइ मोह भ्रम भारी । करेहु सो जतनु बिबेक बिचारी ॥  
 चलीं सती सिव आयसु पाई । करहिं बिचारु करौं का भाई ॥  
 इहाँ संभु अस मन अनुमाना । दच्छसुता कहुं नहिं कल्याना ॥  
 मोरेहु कहें न संसय जाहीं । बिधि बिपरीत भलाई नाहीं ॥  
 होइहि सोइ जो राम रचि राखा । को करि तर्क बढ़ावै साखा ॥  
 अस कहि लगे जपन हरिनामा । गईं सती जहें प्रभु सुखधामा ॥

दो० पुनि पुनि हृदयें बिचारु करि धरि सीता कर रूप ।

आगें होइ चलि पंथ तेहिं जेहिं आवत नरभूप ॥ 52

लछिमन दीख उमाकृत बेषा । चकित भए भ्रम हृदयें बिसषा ॥  
 कहि न सकत कछु अति गंभीरा । प्रभु प्रभाउ जानत मतिधीरा ॥  
 सती कपटु जानेउ सुरस्वामी । सबदरसी सब अंतरजामी ॥  
 सुमिरत जाहि मिटइ अग्याना । सोइ सरबग्य रामु भगवाना ॥  
 सती कीन्ह चह तहँहुँ दुराऊ । देखन चह रघुबीर प्रभाऊ ॥  
 निज माया बलु हृदयें बखानी । बोले बिहसि रामु मृदु बानी ॥  
 जोरि पानि प्रभु कीन्ह प्रनामू । पिता समेत लीन्ह निज नामू ॥  
 कहेउ बहोरि कहाँ बृषकेतू । बिपिन अकेलि फिरहु केहि हेतू ॥

दो० राम बचन मृदु गूढ सुनि उपजा अति संकोचु ।

सती सभित महेस पहिं चलीं हृदयें बड़ सोचु ॥ 53

मैं संकर कर कहा न माना । निज अग्यानु राम पर आना ॥  
 जाइ उतरु अब देहउँ काहा । उर उपजा अति दारुन दाहा ॥  
 जाना राम सतीं दुखु पावा । निज प्रभाउ कछु प्रगटि जनाव ॥  
 सतीं दीख कौतुकु मग जाता । आगें रामु सहित श्री भ्राता ॥  
 फिरि चितवा पाछें प्रभु देखा । सहित बंधु सिय सुंदर बेषा ॥  
 जहें चितवहिं तहें प्रभु आसीना । सेवहिं सिद्ध मुनीस प्रबीना ॥  
 देखे सिव बिधि बिष्णु अनेका । अमित प्रभाउ एक तें एका ॥  
 बंदत चरन करत प्रभु सेवा । बिबिध बेष देखे सब देवा ॥

दो० सती बिधात्री इंदिरा देखीं अमित अनूप ।

जेहिं जेहिं बेष अजादि सुर तेहि तेहि तन अनुरूप ॥ 54

देखे जहें तहें रघुपति जेते । सक्तिन्ह सहित सकल सुर तेते ॥  
 जीव चराचर जो संसारा । देखे सकल अनेक प्रकारा ॥  
 पूजहिं प्रभुहि देव बहु बेषा । राम रूप दूसर नहिं देखा ॥  
 अवलोके रघुपति बहुतेरे । सीता सहित न बेष घनेरे ॥  
 सोइ रघुबर सोइ लछिमनु सीता । देखि सती अति भई सभिता ॥  
 हृदय कप तन सुधि कछु नाहीं । नयन मूदि बैठीं मग माहीं ॥  
 बहुरि बिलोकेउ नयन उघारी । कछु न दीख तहें दच्छकुमारी ॥  
 पुनि पुनि नाइ राम पद सीसा । चलीं तहाँ जहें रहे गिरीसा ॥

दो०— गईं समीप महेस तब हँसि पूछी कुसलात ।

लीन्ह परीक्षा कवन बिधि कहहु सत्य सब बात ॥ 55

मासपारायण, दूसरा विश्राम

सतीं समुझि रघुबीर प्रभाऊ । भय बस सिव सन कीन्ह दुराऊ ॥  
 कछु न परीक्षा लीन्ह गोसाईं । कीन्ह प्रनामु तुम्हारिहि नाई ॥

जो तुम्ह कहा सो मृषा न होई । मोरें मन प्रतीति अति सोई ॥  
 तब संकर देखेउ धरि ध्याना । सतीं जो कीन्ह चरित सबु जाना ।  
 बहुरि राममायहि सिरु नावा । प्रेरि सतिहि जेहिं झूठ कहावा ॥  
 हरि इच्छा भावी बलवाना । हृदयें बिचारत संभु सुजाना ॥  
 सतीं कीन्ह सीता कर बेषा । सिव उर भयउ बिषाद बिसेषा ॥  
 जाँ अब करउँ सती सन प्रीती । मिटइ भगति पथ होइ अनीती ॥  
 दो०— परम पुनीत न जाइ तजि किएँ प्रेम बड़ पापु ।  
 प्रगटि न कहत महेसु कछु हृदयें अधिक संतापु ॥ 56  
 तब संकर प्रभु पद सिरु नावा । सुमिरत रामु हृदयें अस आवा ॥  
 एहिं तन सतिहि भेट मोहि नाही । सिव संकल्पु कीन्ह मन माहीं ॥  
 अस बिचारि संकरु मतिधीरा । चले भवन सुमिरत रघुबीरा ॥  
 चलत गगन भै गिरा सुहाई । जय महेस भलि भगति दृढ़ाई ॥  
 अस पन तुम्ह बिनु करइ को आना । रामभगत समरथ भगवाना ॥  
 सुनि नभगिरा सती उर सोचा । पूछा सिवहि समेत सकोचा ॥  
 कीन्ह कवन पन कहहु कृपाला । सत्यधाम प्रभु दीनदयाला ॥  
 जदपि सतीं पूछा बहु भाँती । तदपि न कहेउ त्रिपुर आराती ॥  
 दो०— सतीं हृदयें अनुमान किय सबु जानेउ सर्वग्य ।  
 कीन्ह कपटु मैं संभु सन यथा सहज जड़ अग्य ॥ 57 (क)  
 सो०— जलु पय सरिस बिकाइ देखहु प्रीति कि रीति भलि ।  
 बिलग होइ रसु जाइ कपट खटाई परत पुनि ॥ 57 (ख)  
 हृदयें सोचु समुझत निज करनी । चिंता अमित जाइ नहिं बरनी ॥  
 कृपासिंधु सिव परम अगाधा । प्रगट न कहेउ मोर अपराधा ॥  
 संकर रुख अवलोकि भवानी । प्रभु मोहि तजेउ हृदयें अकुलानी ॥  
 निज अघ समुझि न कछु कहि जाई । तपइ अवाँ इव उर अधिकाई ॥  
 सतिहि ससोच जानि बृषकेतू । कहां कथा सुंदर सुख हेतू ॥  
 बरनत पंथ बिबिध इतिहासा । बिस्वनाथ पहुँचे कैलासा ॥  
 तहँ पुनि संभु समुझि पन आपन । बैठे बट तर करि कमलासन ॥  
 संकर सहज सरूपु सम्हारा । लागि समाधि अखंड अपारा ॥  
 दो०— सती बसहिं कैलास तब अधिक सोचु मन माहिं ।  
 मरमु न कोऊ जान कछु जुग सम दिवस सिराहिं ॥ 58  
 नित नव सोचु सती उर भारा । कब जैहउँ दुख सागर पारा ॥  
 मैं जो कीन्ह रघुपति अपमाना । पुनि पतिबचनु मृषा करि जाना ॥  
 सो फलु मोहि बिधातौ दीन्हा । जो कछु उचित रहा सोइ कीन्हा ॥  
 अब बिधि अस बूझिअ नहिं तोही । संकर बिमुख जिआवसि मोही ॥  
 कहि न जाइ कछु हृदय गलानी । मन महुँ रामहि सुमिर सयानी ॥  
 जाँ प्रभु दीनदयालु कहावा । आरति हरन बेद जसु गावा ॥  
 तौ मैं बिनय करउँ कर जोरी । छूटउ बेगि देह यह मोरी ॥  
 जाँ मोरें सिव चरन सनेहू । मन कम बचन सत्य ब्रतु एहू ॥  
 दो०— तौ सबदरसी सुनिअ प्रभु करउ सो बेगि उपाइ ।  
 होइ मरनु जेहिं बिनहिं श्रम दुसह बिपत्ति बिहाइ ॥ 59  
 एहि बिधि दुखित प्रजेसकुमारी । अकथनीय दारुन दुखु भारी ॥  
 बीतें संबत सहस सतासी । तजी समाधि संभु अबिनासी ॥  
 राम नाम सिव सुमिरन लागे । जानेउ सतीं जगतपति जागे ॥

जाइ संभु पद बंदन कीन्हा । सनमुख संकर आसनु दीन्हा ॥  
लगे कहन हरिकथा रसाला । दच्छ प्रजेस भए तेहि काला ॥  
देखा बिधि बिचारि सब लायक । दच्छहि कीन्ह प्रजापति नायक ॥  
बड़ अधिकार दच्छ जब पावा । अति अभिमानु हृदयें तब आवा ॥  
नहिं कोउ अस जनमा जग माहीं । प्रभुता पाइ जाहि मद नाहीं ॥  
दो० दच्छ लिए मुनि बोलि सब करन लगे बड़ जाग ।

नेवते सादर सकल सुर जे पावत मख भाग ॥ 60  
किंनर नाग सिद्ध गंधर्बा । बधुन्ह समेत चले सुर सर्बा ॥  
बिष्णु बिरचि महेसु बिहाई । चले सकल सुर जान बनाई ॥  
सती बिलोके ब्योम बिमाना । जात चले सुंदर बिधि नाना ॥  
सुर सुंदरी करहिं कल गाना । सुनत श्रवन छूटहिं मुनि ध्याना ॥  
पूछेउ तब सिवें कहेउ बखानी । पिता जग्य सुनि कछु हरषानी ॥  
जौं महेसु मोहि आयसु देहीं । कछु दिन जाइ रहौं मिस एहीं ॥  
पति परित्याग हृदयें दुखु भारी । कहइ न निज अपराध बिचारी ॥  
बोली सती मनोहर बानी । भय संकोच प्रेम रस सानी ॥

दो०— पिता भवन उत्सव परम जौं प्रभु आयसु होइ ।  
तौ मैं जाउँ कृपायतन सादर देखन सोइ ॥ 61  
कहेहु नीक मोरेहुँ मन भावा । यह अनुचित नहिं नेवत पठावा ॥  
दच्छ सकल निज सुता बोलाई । हमरे बयर तुम्हउ बिसराई ॥  
ब्रह्मसर्भां हम सन दुख माना । तेहि तें अजहुँ करहिं अपमाना ॥  
जौं बिनु बोलें जाहु भवानी । रहइ न सीलु सनेहु न कानी ॥  
जदपि मित्र प्रभु पितु गुर गेहा । जाइअ बिनु बोलेहुँ न सँ देहा ॥  
तदपि बिरोध मान जहँ कोई । तहाँ गएँ कल्यानु न होई ॥  
भौंति अनेक संभु समुझावा । भावी बस न ग्यानु उर आवा ॥  
कह प्रभु जाहु जो बिनहिं बोलाएँ । नहिं भलि बात हमारे भाएँ ॥

दो०— कहि देखा हर जतन बहु रहइ न दच्छकुमारि ।  
दिए मुख्य गन संग तब बिदा कीन्ह त्रिपुरारि ॥ 62  
पिता भवन जब गई भवानी । दच्छ त्रास काहुँ न सनमानी ॥  
सादर भलेहिं मिली एक माता । भगिनीं मिलीं बहुत मुसुकाता ॥  
दच्छ न कछु पूछी कुसलाता । सतिहि बिलोकि जरे सब गाता ॥  
सतीं जाइ देखेउ तब जागा । कतहुँ न दीख संभु कर भागा ॥  
तब चित चढ़ेउ जो संकर कहेऊ । प्रभु अपमानु समुझि उर दहेऊ ॥  
पाछिल दुखु न हृदयें अस ब्यापा । जस यह भयउ महा परितापा ॥  
जद्यपि जग दारुन दुख नाना । सब तें कठिन जाति अवमाना ॥  
समुझि सो सतिहि भयउ अति कोधा । बहु बिधि जननीं कीन्ह प्रबोधा ॥

दो०— सिव अपमानु न जाइ सहि हृदयें न होइ प्रबोध ।  
सकल सभहि हटि हटकि तब बोलीं बचन सकोध ॥ 63  
सुनहु सभासद सकल मुनिंदा । कही सुनी जिन्ह संकर निंदा ॥  
सो फलु तुरत लहब सब काहुँ । भली भौंति पछिताब पिताहुँ ॥  
संत संभु श्रीपति अपबादा । सुनिअ जहाँ तहँ असि मरजादा ॥  
काटिअ तासु जीभ जो बसाई । श्रवन मूदि न त चलिअ पराई ॥  
जगदातमा महेसु पुरारी । जगत जनक सब के हितकारी ॥  
पिता मंदमति निंदत तेही । दच्छ सुक संभव यह देही ॥

तजिहउँ तुरत देह तेहि हेतू । उर धरि चंद्रमौलि बृषकेतू ॥  
 अस कहि जोग अगिनि तनु जारा । भयउ सकल मख हाहाकारा ॥  
 दो०— सती मरनु सुनि संभु गन लगे करन मख खीस ।  
 जग्य बिधंस बिलोकि भृगु रच्छा कीन्हि मुनीस ॥ 64  
 समाचार सब संकर पाए । बीरभद्रु करि कोप पठाए ॥  
 जग्य बिधंस जाइ तिन्ह कीन्हा । सकल सुरन्ह बिधिवत फलु दीन्हा ॥  
 भै जगबिदित दच्छ गति सोई । जसि कछु संभु बिमुख कै होई ॥  
 यह इतिहास सकल जग जानी । ताते मैं संछेप बखानी ॥  
 सती मरत हरि सन बरु मागा । जनम जनम सिव पद अनुरागा ॥  
 तेहि कारन हिमगिरि गृह जाई । जनमीं पारबती तनु पाई ॥  
 जब तें उमा सैल गृह जाई । सकल सिद्धि संपति तहें छाई ॥  
 जहें तहें मुनिन्ह सुआश्रम कीन्हे । उचित बास हिम भूधर दीन्हे ॥  
 दो०— सदा सुमन फल सहित सब दुम नव नाना जाति ।  
 प्रगटीं सुंदर सैल पर मनि आकर बहु भौंति ॥ 65  
 सरिता सब पुनीत जलु बहहीं । खग मृग मधुप सुखी सब रहहीं ॥  
 सहज बयरु सब जीवन्ह त्यागा । गिरि पर सकल करहिं अनुरागा ॥  
 सोह सैल गिरिजा गृह आएँ । जिमि जनु रामभगति के पाएँ ॥  
 नित नूतन मंगल गृह तासू । ब्रह्मादिक गावहिं जसु जासू ॥  
 नारद समाचार सब पाए । कौतुकहीं गिरि गेह सिधाए ॥  
 सैलराज बड़ आदर कीन्हा । पद पखारि बर आसनु दीन्हा ॥  
 नारि सहित मुनि पद सिरु नावा । चरन सलिल सबु भवनु सिंचावा ॥  
 निज सौभाग्य बहुत गिरि बरना । सुता बोलि मेली मुनि चरना ॥  
 दो०— त्रिकालग्य सर्वग्य तुम्ह गति सर्वत्र तुम्हारि ।  
 कहहु सुता के दोष गुन मुनिबर हृदयें बिचारि ॥ 66  
 कह मुनि बिहसि गूढ मृदु बानी । सुता तुम्हारि सकल गुन खानी ॥  
 सुंदर सहज सुसील सयानी । नाम उमा अंबिका भवानी ॥  
 सब लच्छन संपन्न कुमारी । होइहि संतत पियहि पिआरी ॥  
 सदा अचल एहि कर अहिवाता । एहि तें जसु पैहहि पितु माता ॥  
 होइहि पूज्य सकल जग माहीं । एहि सेवत कछु दुर्लभ नाहीं ॥  
 एहि कर नामु सुमिरि संसारा । त्रिय चढ़िहहिं पतिब्रत असिधारा ॥  
 सैल सुलच्छन सुता तुम्हारी । सुनहु जे अब अवगुन दुइ चारी ॥  
 अगुन अमान मातु पितु हीना । उदासीन सब संसय छीना ॥  
 दो०— जोगी जटिल अकाम मन नगन अमंगल बेष ।  
 अस स्वामी एहि कहें मिलिहि परी हस्त असि रेख ॥ 67  
 सुनि मुनि गिरा सत्य जियें जानी । दुख दंपतिहि उमा हरषानी ॥  
 नारदहूँ यह भेदु न जाना । दसा एक समुझब बिलगाना ॥  
 सकल सखीं गिरिजा गिरि मैना । पुलक सरीर भरे जल नैना ॥  
 होइ न मृषा देवरिषि भाषा । उमा सो बचनु हृदयें धरि राखा ॥  
 उपजेउ सिव पद कमल सनेहू । मिलन कठिन मन भा संदेहू ॥  
 जानि कुअवसरु प्रीति दुराई । सखी उछंग बैठी पुनि जाई ॥  
 झूठि न होइ देवरिषि बानी । सोचहिं दंपति सखीं सयानी ॥  
 उर धरि धीर कहइ गिरिराऊ । कहहु नाथ का करिअ उपाऊ ।  
 दो०— कह मुनीस हिमवंत सुनु जो बिधि लिखा लिलार ।

देव दनुज नर नाग मुनि कोउ न मेटनिहार ॥ 68  
तदपि एक मैं कहउँ उपाई । होइ करै जाँ दैउ सहाई ॥  
जस बरु मैं बरनेउँ तुम्ह पाहीं । मिलिहि उमहि तस संसय नाहीं ॥  
जे जे बर के दोष बखाने । ते सब सिव पहिं मैं अनुमाने ॥  
जाँ बिबाहु संकर सन होई । दोषउ गुन सम कह सबु कोई ॥  
जाँ अहि सेज सयन हरि करहीं । बुध कछु तिन्ह कर दोषु न धरहीं ॥  
भानु कृसानु सर्ब रस खाहीं । तिन्ह कहँ मंद कहत कोउ नाहीं ॥  
सुभ अरु असुभ सलिल सब बहई । सुरसरि कोउ अपुनीत न कहई ॥  
समरथ कहँ नहिं दोषु गोसाई । रबि पावक सुरसरि की नाई ॥

दो0— जाँ अस हिसिषा करहिं नर जड़ बिबेक अभिमान ।

परहिं कल्प भरि नरक महुँ जीव कि ईस समान ॥ 69

सुरसरि जल कृत बारुनि जाना । कबहुँ न संत करहिं तेहि पाना ॥  
सुरसरि मिलें सो पावन जैसें । ईस अनीसहि अंतरु तैसें ॥  
संभु सहज समरथ भगवाना । एहि बिबाहँ सब बिधि कल्याना ॥  
दुराराध्य पै अहहिं महेसू । आसुतोष पुनि किऐँ कलेसू ॥  
जाँ तपु करै कुमारि तुम्हारी । भाविउ मेटि सकहिं त्रिपुरारी ॥  
जद्यपि बर अनेक जग माहीं । एहि कहँ सिव तजि दूसर नाहीं ॥  
बर दायक प्रनतारति भंजन । कृपासिंधु सेवक मन रंजन ॥  
इच्छित फल बिनु सिव अवराधे । लहिअ न कोटि जोग जप साधे ॥

दो0— अस कहि नारद सुमिरि हरि गिरिजहि दीन्हि असीस ।

होइहि यह कल्यान अब संसय तजहु गिरीस ॥ 70

कहि अस ब्रह्मभवन मुनि गयऊ । आगिल चरित सुनहु जस भयऊ ॥  
पतिहि एकांत पाइ कह मैना । नाथ न मैं समुझे मुनि बैना ॥  
जाँ धरु बरु कुलु होइ अनूपा । करिअ बिबाहु सुता अनुरूपा ॥  
न त कन्या बरु रहउ कुआरी । कंत उमा मम प्रानपिआरी ॥  
जाँ न मिलिहि बरु गिरिजहि जोगू । गिरि जड़ सहज कहिहि सबु लोगू ॥  
सोइ बिचारि पति करेहु बिबाहू । जेहिं न बहोरि होइ उर दाहू ॥  
अस कहि परी चरन धरि सीसा । बोले सहित सनेह गिरीसा ॥  
बरु पावक प्रगटै ससि माहीं । नारद बचनु अन्यथा नाहीं ॥

दो0— प्रिया सोचु परिहरहु सबु सुमिरहु श्रीभगवान ।

पारबतिहि निरमयउ जेहिं सोइ करिहि कल्यान ॥ 71

अब जाँ तुम्हहि सता पर नेहू । तौ अस जाइ सिखावनु देहू ॥  
करै सो तपु जेहिं मिलहिं महेसू । आन उपायें न मिटिहि कलेसू ॥  
नारद बचन सगर्भ सहेतू । सुंदर सब गुन निधि बृषकेतू ॥  
अस बिचारि तुम्ह तजहु असंका । सबहि भौंति संकरु अकलंका ॥  
सुनि पति बचन हरषि मन माहीं । गई तुरत उठि गिरिजा पाहीं ॥  
उमहि बिलोकि नयन भरे बारी । सहित सनेह गोद बैठारी ॥  
बारहिं बार लेति उर लाई । गदगद कंठ न कछु कहि जाई ॥  
जगत मातु सर्वग्य भवानी । मातु सुखद बोलीं मृदु बानी ॥

दो0— सुनहि मातु मैं दीख अस सपन सुनावउँ तोहि ।

सुंदर गौर सुबिप्रबर अस उपदसेउ मोहि ॥ 72

करहि जाइ तपु सैलकुमारी । नारद कहा सो सत्य बिचारी ॥  
मातु पितहि पुनि यह मत भावा । तपु सुखप्रद दुख दोष नसावा ॥

तपबल रचइ प्रपंचु बिधाता । तपबल बिष्णु सकल जग त्राता ।  
तपबल संभु करहि संघारा । तपबल सेषु धरइ महिभारा ॥  
तप अधार सब सृष्टि भवानी । करहि जाइ तपु अस जिये जानी ॥  
सुनत बचन बिसमित महतारी । सपन सुनायउ गिरिहि हँकारी ॥  
मातु पितहि बहुबिधि समुझाई । चलीं उमा तप हित हरषाई ॥  
प्रिय परिवार पिता अरु माता । भए बिकल मुख आव न बाता ॥

दो०— बेदसिरा मुनि आइ तब सबहि कहा समुझाइ ।

पारबती महिमा सुनत रहे प्रबोधहि पाइ ॥ 73

उर धरि उमा प्रानपति चरना । जाइ बिपिन लागीं तपु करना ॥  
अति सुकुमार न तनु तप जोगू । पति पद सुमिरि तजेउ सबु भोगू ॥  
नित नव चरन उपज अनुरागा । बिसरी देह तपहिं मनु लागा ॥  
संबत सहस मूल फल खाए । सागु खाइ सत बरष गर्वाए ॥  
कछु दिन भोजनु बारि बतासा । किए कठिन कछु दिन उपबासा ॥  
बेल पाती महि परइ सुखाई । तीनि सहस संबत सोइ खाई ॥  
पुनि परिहरे सुखानेउ परना । उमहि नामु तब भयउ अपरना ॥  
देखि उमहि तप खीन सरीरा । ब्रह्मगिरा भै गगन गभीरा ॥

दो०— भयउ मनोरथ सुफल तव सुनु गिरिराजकुमारि ।

परिहरु दुसह कलेस सब अब मिलिहहिं त्रिपुरारि ॥ 74

अस तपु काहुँ न कीन्ह भवानी । भए अनेक धीर मुनि ग्यानी ॥  
अब उर धरहु ब्रह्म बर बानी । सत्य सदा संतत सुचि जानी ॥  
आवै पिता बोलावन जबहीं । हठ परिहरि घर जाएहु तबहीं ॥  
मिलहिं तुम्हहि जब सप्त रिषीसा । जानेहु तब प्रमान बागीसा ॥  
सुनत गिरा बिधि गगन बखानी । पुलक गात गिरिजा हरषानी ॥  
उमा चरित सुंदर मैं गावा । सुनहु संभु कर चरित सुहावा ॥  
जब तें सतीं जाइ तनु त्यागा । तब तें सिव मन भयउ बिरागा ॥  
जपहिं सदा रघुनायक नामा । जहँ तहँ सुनहिं राम गुन ग्रामा ॥

दा०— चिदानंद सुखधाम सिव बिगत मोह मद काम ।

बिचरहिं महि धरि हृदयें हरि सकल लोक अभिराम ॥ 75

कतहुँ मुनिन्ह उपदेसहिं ग्याना । कतहुँ राम गुन करहिं बखाना ॥  
जदपि अकाम तदपि भगवाना । भगत बिरह दुख दुखित सुजाना ॥  
एहि बिधि गयउ कालु बहु बीती । नित नै होइ राम पद प्रीती ॥  
नेमु प्रेमु संकर कर देखा । अबिचल हृदयें भगति कै रेखा ॥  
प्रगटे रामु कृतग्य कृपाला । रूप सील निधि तेज बिसाला ॥  
बहु प्रकार संकरहि सराहा । तुम्ह बिनु अस ब्रतु को निरबाहा ॥  
बहुबिधि राम सिवहि समुझावा । पारबती कर जन्मु सुनावा ॥  
अति पुनीत गिरिजा कै करनी । बिस्तर सहित कृपानिधि बरनी ॥

दो०— अब बिनती मम सुनहु सिव जौं मो पर निज नेहु ।

जाइ बिबाहहु सैलजहि यह मोहि मार्गें देहु ॥ 76

कह सिव जदपि उचित अस नाहीं । नाथ बचन पुनि मेटि न जाहीं ॥  
सिर धरि आयसु करिअ तुम्हारा । परम धरमु यह नाथ हमारा ॥  
मातु पिता गुर प्रभु कै बानी । बिनहिं बिचार करिअ सुभ जानी ॥  
तुम्ह सब भाँति परम हितकारी । अग्या सिर पर नाथ तुम्हारी ॥  
प्रभु तोषेउ सुनि संकर बचना । भक्ति बिबेक धर्म जुत रचना ॥

कह प्रभु हर तुम्हार पन रहेऊ । अब उर राखेहु जो हम कहेऊ ॥  
अंतरधान भए अस भाषी । संकर सोइ मूरति उर राखी ॥  
तबहिं सप्तरिषि सिव पहिं आए । बोले प्रभु अति बचन सुहाए ॥  
दो०— पारबती पहिं जाइ तुम्ह प्रेम परिच्छा लेहु ।

गिरिहि प्रेरि पठएहु भवन दूरि करेहु संदेहु ॥ 77  
रिषिन्ह गौरि देखी तहें कैसी । मूरतिमत तपस्या जैसी ॥  
बोले मुनि सुनु सैलकुमारी । करहु कवन कारन तपु भारी ॥  
केहि अवराधहु का तुम्ह चहहू । हम सन सत्य मरमु किन कहहू ॥  
कहत बचन मनु अति सकुचाई । हेंसिहहु सुनि हमारि जड़ताई ॥  
मनु हठ परा न सुनइ सिखावा । चहत बारि पर भीति उठावा ॥  
नारद कहा सत्य सोइ जाना । बिनु पंखन्ह हम चहहिं उड़ाना ॥  
देखहु मुनि अबिबेकु हमारा । चाहिअ सदा सिवहि भरतारा ॥

दो०— सुनत बचन बिहसे रिषय गिरिसंभव तव देह ।

नारद कर उपदेसु सुनि कहहु बसेउ किसु गेह ॥ 78  
दच्छसुतन्ह उपदेसेन्हि जाई । तिन्ह फिरि भवनु न देखा आई ॥  
चित्रकेतु कर घरु उन घाला । कनककसिपु कर पुनि अस हाला ॥  
नारद सिख जे सुनहिं नर नारी । अवसि होहिं तजि भवनु भिखारी ॥  
मन कपटी तन सज्जन चीन्हा । आपु सरिस सबही चह कीन्हा ॥  
तेहि कें बचन मानि बिस्वासा । तुम्ह चाहहु पति सहज उदासा ॥  
निर्गुन निलज कुबेष कपाली । अकुल अगेह दिगंबर ब्याली ॥  
कहहु कवन सुखु अस बरु पाए । भल भूलिहु ठग के बौराएँ ॥  
पंच कहें सिवें सती बिबाही । पुनि अवडेरि मराएन्हि ताही ॥

दो०— अब सुख सोवत सोचु नहिं भीख मागि भव खाहिं ।

सहज एकाकिन्ह के भवन कबहुँ कि नारि खटाहिं ॥ 79  
अजहुँ मानहु कहा हमारा । हम तुम्ह कहुँ बरु नीक बिचारा ॥  
अति सुंदर सुचि सुखद सुसीला । गावहिं बेद जासु जस लीला ॥  
दूषन रहित सकल गुन रासी । श्रीपति पुर बैकुंठ निवासी ॥  
अस बरु तुम्हहि मिलाउब आनी । सुनत बिहसि कह बचन भवानी ॥  
सत्य कहेहु गिरिभव तनु एहा । हठ न छूट छूटै बरु देहा ॥  
कनकउ पुनि पषान तें होई । जारेहुँ सहजु न परिहर सोई ॥  
नारद बचन न मैं परिहरऊँ । बसउ भवनु उजरउ नहिं डरऊँ ॥  
गुर कें बचन प्रतीति न जेही । सपनेहुँ सुगम न सुख सिधि तेही ॥

दो०— महादेव अवगुन भवन बिष्णु सकल गुन धाम ।

जेहि कर मनु रम जाहि सन तेहि तेही सन काम ॥ 80  
जौं तुम्ह मिलतेहु प्रथम मुनीसा । सुनतिउँ सिख तुम्हारि धरि सीसा ॥  
अब मैं जन्मु संभु हित हारा । को गुन दूषन करै बिचारा ॥  
जौं तुम्हरे हठ हृदयें बिसेषी । रहि न जाइ बिनु किऐँ बरेषी ॥  
तौ कौतुकिअन्ह आलसु नाही । बर कन्या अनेक जग माहीं ॥  
जन्म कोटि लागि रगर हमारी । बरउँ संभु न त रहउँ कुआरी ॥  
तजउँ न नारद कर उपदेसू । आपु कहहिं सत बार महेसू ॥  
मैं पा परउँ कहइ जगदंबा । तुम्ह गृह गवनहु भयउ बिलंबा ॥  
देखि प्रेमु बोले मुनि ग्यानी । जय जय जगदंबिके भवानी ॥

दो०— तुम्ह माया भगवान सिव सकल जगत पितु मातु ।

नाइ चरन सिर मुनि चले पुनि पुनि हरषत गातु ॥ 81  
जाइ मुनिन्ह हिमवंतु पठाए । करि बिनती गिरजहि गृह ल्याए ॥  
बहुरि सप्तरिषि सिव पहिं जाई । कथा उमा कै सकल सुनाई ॥  
भए मगन सिव सुनत सनेहा । हरषि सप्तरिषि गवने गेहा ॥  
मनु थिर करि तब संभु सुजाना । लगे करन रघुनायक ध्याना ॥  
तारकु असुर भयउ तेहि काला । भुज प्रताप बल तेज बिसाला ॥  
तेहिं सब लोक लोकपति जीते । भए देव सुख संपति रीते ॥  
अजर अमर सो जीति न जाई । हारे सुर करि बिबिध लराई ॥  
तब बिरंचि सन जाइ पुकारे । देखे बिधि सब देव दुखारे ॥

दो०— सब सन कहा बुझाइ बिधि दनुज निघन तब हाइ ।

संभु सुक संभूत सुत एहि जीतइ रन सोइ ॥ 82

मोर कहा सुनि करहु उपाई । होइहि ईस्वर करिहि सहाई ॥  
सतीं जो तजी दच्छ मख देहा । जनमी जाइ हिमाचल गेहा ॥  
तेहिं तपु कीन्ह संभु पति लागी । सिव समाधि बैठे सबु त्यागी ॥  
जदपि अहइ असमंजस भारी । तदपि बात एक सनहु हमारी ॥  
पठवहु कामु जाइ सिव पाहीं । करै छोभु संकर मन माहीं ॥  
तब हम जाइ सिवहि सिर नाई । करवाउब बिबाहु बरिआई ॥  
एहि बिधि भलेहिं देवहित होई । मत अति नीक कहइ सबु कोई ॥  
अस्तुति सुरन्ह कीन्हि अति हेतू । प्रगटेउ बिषमबान झषकेतू ॥

दो०— सुरन्ह कही निज बिपति सब सुनि मन कीन्ह बिचार ।

संभु बिरोध न कुसल मोहि बिहसि कहेउ अस मार ॥ 83

तदपि करब मैं काजु तुम्हारा । श्रुति कह परम धरम उपकारा ॥  
पर हित लागि तजइ जो देही । संतत संत प्रसंसहिं तेही ॥  
अस कहि चलेउ सबहि सिरु नाई । सुमन धनुष कर सहित सहाई ॥  
चलत मार अस हृदयें बिचारा । निज बस कीन्ह सकल संसारा ॥  
कोपेउ जबहिं बारिचरकेतू । छन महुँ मिटे सकल श्रुति सेतू ॥  
ब्रह्मचर्ज ब्रत संजम नाना । धीरज धरम ग्यान बिग्याना ॥

सदाचार जप जोग बिरागा । सभय बिबेक कटकु सबु भागा ॥

छं०— भागेउ बिबेकु सहाय सहित सो सुभट संजुग महि मरे ।

सदग्रंथ पर्वत कंदरन्हि महुँ जाइ तेहि अवसर दुरे ॥

होनिहार का करतार को रखवार जग खरभरु परा ।

दुइ माथ केहि रतिनाथ जेहि कहुँ कोपि कर धनु सरु धरा ॥

दो०— जे सजीव जग अचर चर नारि पुरुष अस नाम ।

ते निज निज मरजाद तजि भए सकल बस काम ॥ 84

सब के हृदयें मदन अभिलाषा । लता निहारि नवहिं तरु साखा ॥

नदीं उमगि अंबुधि कहुँ धाई । संगम करहिं तलाव तलाई ॥

जहें असि दसा जड़न्ह कै बरनी । को कहि सकइ सचेतन करनी ॥

पसु पच्छी नभ जल थलचारी । भए कामबस समय बिसारी ॥

मदन अंध ब्याकुल सब लोका । निसि दिनु नहिं अवलोकहिं कोका ॥

देव दनुज नर किंनर ब्याला । प्रेत पिसाच भूत बेताला ॥

इन्ह कै दसा न कहेउँ बखानी । सदा काम के चरे जानी ॥

सिद्ध बिरक्त महामुनि जोगी । तेपि कामबस भए बियोगी ॥

छं०— भए कामबस जोगीस तापस पावैरन्हि की को कहै ।

देखिं चराचर नारिमय जे ब्रह्ममय देखत रहे ॥  
 अबला बिलोकहिं पुरुषमय जगु पुरुष सब अबलामयं ।  
 दुइ दंड भरि ब्रह्मांड भीतर कामकृत कौतुक अयं ॥  
 सो०— धरी न काहूँ धीर सब के मन मनसिज हरे ।  
 जे राखे रघुबीर ते उबरे तेहि काल महुँ ॥ 85  
 उभय घरी अस कौतुक भयऊ । जौ लागि कामु संभु पहिं गयऊ ॥  
 सिवहि बिलोकि ससंकेउ मारु । भयउ जथाथिति सबु संसारु ॥  
 भए तुरत सब जीव सुखारे । जिमि मद उत्तरि गएँ मतवारे ॥  
 रुद्रहि देखि मदन भय माना । दुराधरष दुर्गम भगवाना ॥  
 फिरत लाज कछु करि नहिं जाई । मरनु ठानि मन रचेसि उपाई ॥  
 प्रगटेसि तुरत रुचिर रितुराजा । कुसुमित नव तरु राजि बिराजा ॥  
 बन उपबन बापिका तड़ागा । परम सुभग सब दिसा बिभागा ॥  
 जहँ तहँ जनु उमगत अनुरागा । देखि मुएहुँ मन मनसिज जागा ॥  
 छ०— जागइ मनोभव मुएहुँ मन बन सुभगता न परै कही ।  
 सीतल सुगंध सुमंद मारुत मदन अनल सखा सही ॥  
 बिकसे सरन्हि बहु कंज गुंजत पुंज मंजुल मधुकरा ।  
 कलहंस पिक सुक सरस रव करि गान नाचहिं अपछरा ॥  
 दो०— सकल कला करि कोटि बिधि हारेउ सेन समेत ।  
 चली न अचल समाधि सिव कोपेउ हृदयनिकेत ॥ 86  
 देखि रसाल बिटप बर साखा । तेहि पर चढ़ेउ मदनु मन माखा ॥  
 सुमन चाप निज सर संधाने । अति रिस ताकि श्रवन लागि ताने ॥  
 छाड़े बिषम बिसिख उर लागे । छूटि समाधि संभु तब जागे ॥  
 भयउ ईस मन छोभु बिसेषी । नयन उघारि सकल दिसि देखी ॥  
 सौरभ पल्लव मदनु बिलोका । भयउ कोपु कंपेउ त्रैलोका ॥  
 तब सिवें तीसर नयन उघारा । चितवत कामु भयउ जरि छारा ॥  
 हाहाकार भयउ जग भारी । डरपे सुर भए असुर सुखारी ॥  
 समुझि कामसुखु सोचहिं भोगी । भए अकंटक साधक जोगी ॥  
 छ०— जोगी अकंटक भए पति गति सुनत रति मुरुछित भई ।  
 रोदति बदति बहु भौंति करुना करति संकर पहिं गई ॥  
 अति प्रेम करि बिनती बिबिध बिधि जोरि कर सन्मुख रही ।  
 प्रभु आसुतोष कृपाल सिव अबला निरखि बोले सही ॥  
 दो०— अब तें रति तव नाथ कर होइहि नामु अनंगु ।  
 बिनु बपु ब्यापिहि सबहि पुनि सुनु निज मिलन प्रसंगु ॥ 87  
 जब जदुबंस कृष्ण अवतारा । होइहि हरन महा महिभारा ॥  
 कृष्ण तनय होइहि पति तोरा । बचनु अन्यथा होइ न मोरा ॥  
 रति गवनी सुनि संकर बानी । कथा अपर अब कहउँ बखानी ॥  
 देवन्ह समाचार सब पाए । ब्रह्मादिक बैकुंठ सिधाए ॥  
 सब सुर बिष्णु बिरंचि समेता । गए जहाँ सिव कृपानिकेता ॥  
 पृथक पृथक तिन्ह कीन्हि प्रसंसा । भए प्रसन्न चंद्र अवतंसा ॥  
 बोले कृपासिंधु बृषकेतु । कहहु अमर आए केहि हेतू ॥  
 कह बिधि तुम्ह प्रभु अंतरजामी । तदपि भगति बस बिनवउँ स्वामी ॥  
 दो०— सकल सुरन्ह के हृदयँ अस संकर परम उछाहु ।  
 निज नयनन्हि देखा चहहिं नाथ तुम्हार बिबाहु ॥ 88

यह उत्सव देखिअ भरि लोचन । सोइ कछु करहु मदन मद मोचन ॥  
 कामु जारि रति कहूँ बरु दीन्हा । कृपासिंधु यह अति भल कीन्हा ॥  
 सासति करि पुनि करहिं पसाऊ । नाथ प्रभुन्ह कर सहज सुभाऊ ॥  
 पारबतीं तपु कीन्हा अपारा । करहु तासु अब अंगीकारा ॥  
 सुनि बिधि बिनय समुझि प्रभु बानी । ऐसेइ होउ कहा सुखु मानी ॥  
 तब देवन्ह दुंदुभीं बजाई । बरषि सुमन जय जय सुर साई ॥  
 अवसरु जानि सप्तरिषि आए । तुरतहिं बिधि गिरिभवन पटाए ॥  
 प्रथम गए जहँ रहीं भवानी । बोले मधुर बचन छल सानी ॥  
 दो०— कहा हमार न सुनेहु तब नारद के उपदेस ।

अब भा झूठ तुम्हार पन जारेउ कामु महेस ॥ 89

मासपारायण, तीसरा विश्राम

सुनि बोलीं मुसुकाइ भवानी । उचित कहेहु मुनिबर बिग्यानी ॥  
 तुम्हरेँ जान कामु अब जारा । अब लगि संभु रहे सबिकारा ॥  
 हमरेँ जान सदा सिव जोगी । अज अनवद्य अकाम अभोगी ॥  
 जोँ मैं सिव सेये अस जानी । प्रीति समेत कर्म मन बानी ॥  
 तौ हमार पन सुनहु मुनीसा । करिहहिं सत्य कृपानिधि ईसा ॥  
 तुम्ह जो कहा हर जारेउ मारा । सोइ अति बड़ अबिबेकु तुम्हारा ॥  
 तात अनल कर सहज सुभाऊ । हिम तेहि निकट जाइ नहिं काऊ ॥  
 गएँ समीप सो अवसि नसाई । असि मन्मथ महेस की नाई ॥

दो०— हियेँ हरषे मुनि बचन सुनि देखि प्रीति बिस्वास ।

चले भवानिहि नाइ सिर गए हिमाचल पास ॥ 90

सबु प्रसंगु गिरिपतिहि सुनावा । मदन दहन सुनि अति दुखु पावा ॥  
 बहुरि कहेउ रति कर बरदाना । सुनि हिमवंत बहुत सुखु माना ॥  
 हृदयेँ बिचारि संभु प्रभुताई । सादर मुनिबर लिए बोलाई ॥  
 सुदिनु सुनखतु सुघरी सोचाई । बेगि बेदबिधि लगन धराई ॥  
 पत्री सप्तरिषिन्ह सोइ दीन्ही । गहि पद बिनय हिमाचल कीन्ही ॥  
 जाइ बिधिहि तिन्ह दीन्हि सो पाती । बाचत प्रीति न हृदयेँ समाती ॥  
 लगन बाचि अज सबहि सुनाई । हरषे मुनि सब सुर समुदाई ॥  
 सुमन बृष्टि नभ बाजन बाजे । मंगल कलस दसहुँ दिसि साजे ॥

दो०— लगे सँवारन सकल सुर बाहन बिबिध बिमान ।

होहिं सगुन मंगल सुभद करहिं अपछरा गान ॥ 91

सिवहि संभु गन करहिं सिंगारा । जटा मुकुट अहि मौरु सँवारा ॥  
 कुंडल कंकन पहिरे ब्याला । तन बिभूति पट केहरि छाला ॥  
 ससि ललाट सुंदर सिर गंगा । नयन तीनि उपबीत भुजंगा ॥  
 गरल कंठ उर नर सिर माला । असिव बेष सिवधाम कृपाला ॥  
 कर त्रिसूल अरु डमरु बिराजा । चले बसहँ चढ़ि बाजहिं बाजा ॥  
 देखि सिवहि सुरत्रिय मुसुकाहीं । बर लायक दुलहिनि जग नाहीं ॥  
 बिष्णु बिरंचि आदि सुरब्राता । चढ़ि चढ़ि बाहन चले बराता ॥  
 सुर समाज सब भौंति अनूपा । नहिं बरात दूलह अनुरूपा ॥

दो०— बिष्णु कहा अस बिहसि तब बोलि सकल दिसिराज ।

बिलग बिलग होइ चलहु सब निज निज सहित समाज ॥ 92

बर अनुहारि बरात न भाई । हँसी करैहहु पर पुर जाई ॥  
 बिष्णु बचन सुनि सुर मुसुकाने । निज निज सेन सहित बिलगाने ॥

मनहीं मन महेसु मुसुकाहीं । हरि के बिंग्य बचन नहिं जाहीं ॥  
 अति प्रिय बचन सुनत प्रिय करे । भृंगिहि प्रेरि सकल गन टेरे ॥  
 सिव अनुसासन सुनि सब आए । प्रभु पद जलज सीस तिन्ह नाए ॥  
 नाना बाहन नाना बेषा । बिहसे सिव समाज निज देखा ॥  
 कोउ मुखहीन बिपुल मुख काहू । बिनु पद कर कोउ बहु पद बाहू ॥  
 बिपुल नयन कोउ नयन बिहीना । रिष्टपुष्ट कोउ अति तनखीना ॥  
 छं०— तन खीन कोउ अति पीन पावन कोउ अपावन गति धरें ।  
 भूषन कराल कपाल कर सब सद्य सोनित तन भरें ॥  
 खर स्वान सुअर सृकाल मुख गन बेष अगनित को गनै ।  
 बहु जिनस प्रेत पिसाच जोगि जमात बरनत नहिं बनै ॥  
 सो०— नाचहिं गावहिं गीत परम तरंगी भूत सब ।  
 देखत अति बिपरीत बोलहिं बचन बिचित्र बिधि ॥ 93  
 जस दूलहु तसि बनी बराता । कौतुक बिबिध होहिं मग जाता ॥  
 इहाँ हिमाचल रचेउ बिताना । अति बिचित्र नहिं जाइ बखाना ॥  
 सैल सकल जहें लगि जग माहीं । लघु बिसाल नहिं बरनि सिराहीं ॥  
 बन सागर सब नदीं तलावा । हिमगिरि सब कहूँ नेवत पठावा ॥  
 कामरूप सुंदर तन धारी । सहित समाज सहित बर नारी ॥  
 गए सकल तुहिनाचल गेहा । गावहिं मंगल सहित सनेहा ॥  
 प्रथमहिं गिरि बहु गृह सँवराए । जथाजोगु तहें तहें सब छाए ॥  
 पुर सोभा अवलोकि सुहाई । लागइ लघु बिरंचि निपुनाई ॥  
 छं०— लघु लाग बिधि की निपुनता अवलोकि पुर सोभा सही ।  
 बन बाग कूप तड़ाग सरिता सुभग सब सक को कही ॥  
 मंगल बिपुल तोरन पताका केतु गृह गृह सोहहीं ।  
 बनिता पुरुष सुंदर चतुर छबि देखि मुनि मन मोहहीं ॥  
 दो०— जगदंबा जहें अवतरी सो पुरु बरनि कि जाइ ।  
 रिद्धि सिद्धि संपत्ति सुख नित नूतन अधिकाइ ॥ 94  
 नगर निकट बरात सुनि आई । पुर खरभरु सोभा अधिकाई ॥  
 करि बनाव सजि बाहन नाना । चले लेन सादर अगवाना ॥  
 हिर्ये हरषे सुर सेन निहारी । हरिहि देखि अति भए सुखारी ॥  
 सिव समाज जब देखन लागे । बिडरि चले बाहन सब भागे ॥  
 धरि धीरजु तहें रहे सयाने । बालक सब लै जीव पराने ॥  
 गए भवन पूछहिं पितु माता । कहहिं बचन भय कंपित गाता ॥  
 कहिअ काह कहि जाइ न बाता । जम कर धार किधौं बरिआता ॥  
 बरु बौराह बसहें असवारा । ब्याल कपाल बिभूषन छारा ॥  
 छं०— तन छार ब्याल कपाल भूषन नगर जटिल भयंकरा ।  
 सँग भूत प्रेत पिसाच जोगिनि बिकट मुख रजनीचरा ॥  
 जो जिअत रहिहि बरात देखत पुन्य बड़ तेहि कर सही ।  
 देखिहि सो उमा बिबाहु घर घर बात असि लरिकन्ह कही ॥  
 दो०— समुझि महेस समाज सब जननि जनक मुसुकाहिं ।  
 बाल बुझाए बिबिध बिधि निडर होहु डरु नाहिं ॥ 95  
 लै अगवान बरातहि आए । दिए सबहि जनवास सुहाए ॥  
 मैनों सुभ आरती सँवारी । संग सुमंगल गावहिं नारी ॥  
 कंचन थार सोह बर पानी । परिछन चली हरहि हरषानी ॥

बिकट बेष रुद्रहि जब देखा । अबलन्ह उर भय भयउ बिसेषा ॥  
 भागि भवन पैठीं अति त्रासा । गए महेसु जहाँ जनवासा ॥  
 मैना हृदयें भयउ दुखु भारी । लीन्ही बोलि गिरीसकुमारी ॥  
 अधिक सनेहँ गोद बैठारी । स्याम सरोज नयन भरे बारी ॥  
 जेहिं बिधि तुम्हहि रूपु अस दीन्हा । तेहिं जड़ बरु बाउर कस कीन्हा ॥  
 छं०— कस कीन्हा बरु बौराह बिधि जेहिं तुम्हहि सुंदरता दई ।  
 जो फलु चहिअ सरतरुहिं सो बरबस बबूरहिं लागई ॥  
 तुम्ह सहित गिरि तें गिरौं पावक जरौं जलनिधि महुँ परौं ।  
 घरु जाउ अपजसु होउ जग जीवत बिबाहु न हौं करौं ॥  
 दो०— भई बिकल अबला सकल दुखित देखि गिरिनारि ।  
 करि बिलापु रोदति बदति सुता सनेहु सँभारि ॥ 96  
 नारद कर मैं काह बिगारा । भवनु मोर जिन्ह बसत उजारा ॥  
 अस उपदेसु उमहि जिन्ह दीन्हा । बौरै बरहि लागि तपु कीन्हा ॥  
 साचेहुँ उन्ह कें मोह न माया । उदासीन धनु धामु न जाया ॥  
 पर घर घालक लाज न भीरा । बौंझ कि जान प्रसव कै पीरा ॥  
 जननिहि बिकल बिलोकि भवानी । बोली जुत बिबेक मृदु बानी ॥  
 अस बिचारि सोचहि मति माता । सो न टरइ जो रचइ बिधाता ॥  
 करम लिखा जाँ बाउर नाहू । तौ कत दोसु लगाइअ काहू ॥  
 तुम्ह सन मिटहिं कि बिधि के अंका । मातु ब्यर्थ जनि लेहु कलंका ॥  
 छं०— जनि लेहु मातु कलंकु करुना परिहरहु अवसर नहीं ।  
 दुखु सुखु जो लिखा लिलार हमरें जाब जहँ पाउब तहीं ॥  
 सुनि उमा बचन बिनीत कोमल सकल अबला सोचहीं ।  
 बहु भौंति बिधिहि लगाइ दूषन नयन बारि बिमोचहीं ॥  
 दो०— तेहि अवसर नारद सहित अरु रिषि सप्त समेत ।  
 समाचार सुनि तुहिनगिरि गवने तुरत निकेत ॥ 97  
 तब नारद सबही समुझावा । पूरुब कथाप्रसंगु सुनावा ॥  
 मयना सत्य सुनहु मम बानी । जगदंबा तव सुता भवानी ॥  
 अजा अनादि सक्ति अबिनासिनि । सदा संभु अरधंग निवासिनि ॥  
 जग संभव पालन जय कारिनि । निज इच्छा लीला बपु धारिनि ॥  
 जनमीं प्रथम दच्छ गृह जाई । नामु सती सुंदर तनु पाई ॥  
 तहँहुँ सतो संकरहि बिबाहीं । कथा प्रसिद्ध सकल जग माहीं ॥  
 एक बार आवत सिव संग्गा । देखेउ रघुकुल कमल पतंग्गा ॥  
 भयउ मोहु सिव कहा न कीन्हा । भ्रम बस बेषु सीय कर लीन्हा ॥  
 छं०— सिय बेषु सतीं जो कीन्हा तेहिं अपराध संकर परिहरीं ।  
 हर बिरहँ जाइ बहोरि पितु कें जग्य जोगानल जरीं ॥  
 अब जनमि तुम्हरे भवन निज पति लागि दारुन तपु किया ।  
 अस जानि संसय तजहु गिरिजा सर्वदा संकर प्रिया ॥  
 दो०— सुनि नारद के बचन तब सब कर मिटा बिषाद ।  
 छन महुँ ब्यापेउ सकल पुर घर घर यह संबाद ॥ 98  
 तब मयना हिमवंतु अनंदे । पुनि पुनि पारबती पद बंदे ॥  
 नारि परुष सिसु जुबा सयाने । नगर लोग सब अति हरषाने ॥  
 लगे होन पुर मंगलगाना । सजे सबहिं हाटक घट नाना ॥  
 भौंति अनेक भई जेवनारा । सूपसास्त्र जस कछु ब्यवहारा ॥

सो जेवनार कि जाइ बखानी । बसहिं भवन जेहिं मातु भवानी ॥  
 सादर बोले सकल बराती । बिष्णु बिरंचि देव सब जाती ॥  
 बिबिधि पॉति बैठी जेवनारा । लागे परुसन निपुन सुआरा ॥  
 नारिबृंद सुर जेवेंत जानी । लगीं देन गारीं मृदु बानी ॥  
 छं०— गारीं मधुर स्वर देहिं सुंदरि बिंग्य बचन सुनावहीं ।  
 भोजनु करहिं सुर अति बिलंबु विनोदु सुनि सचु पावहीं ॥  
 जेवेंत जो बढयो अनंदु सो मुख कोटिहूँ न परै कह्यो ।  
 अचवॉइ दीन्हे पान गवने बास जहँ जाको रह्यो ॥  
 दो०— बहुरि मुनिन्ह हिमवंत कहँ लगन सुनाई आइ ।  
 समय बिलोकि बिबाह कर पठए देव बोलाइ ॥ 99  
 बोलि सकल सुर सादर लीन्हे । सबहि जथोचित आसन दीन्हे ॥  
 बेदी बेद बिधान सँवारी । सुभग सुमंगल गावहिं नारी ॥  
 सिंघासन अति दिव्य सुहावा । जाइ न बरनि बिरंचि बनावा ॥  
 बैठे सिव बिप्रन्ह सिरु नाई । हृदयें सुमिरि निज प्रभु रघुराई ॥  
 बहुरि मुनीसन्ह उमा बोलाई । करि सिंगारु सखीं लै आई ॥  
 देखत रूपु सकल सुर मोहे । बरनै छबि अस जग कबि को है ॥  
 जगदंबिका जानि भव भामा । सुरन्ह मनहिं मन कीन्ह प्रनामा ॥  
 सुंदरता मरजाद भवानी । जाइ न कोटिहूँ बदन बखानी ॥  
 छं०— कोटिहूँ बदन नहिं बनै बरनत जग जननि सोभा महा ।  
 सकुचहिं कहत श्रुति शेष सारद मंदमति तुलसी कहा ॥  
 छबिखानि मातु भवानि गवनीं मध्य मंडप सिव जहाँ ।  
 अवलोकि सकहिं न सकुच पति पद कमल मनु मधुकरु तहाँ ॥  
 दो०— मुनि अनुसासन गनपतिहि पूजेउ संभु भवानि ।  
 कोउ सुनि संसय करै जनि सुर अनादि जियें जानि ॥ 100  
 जसि बिबाह कै बिधि श्रुति गाई । महामुनिन्ह सो सब करवाई ॥  
 गहि गिरीस कुस कन्या पानी । भवहि समरपीं जानि भवानी ॥  
 पानिग्रहन जब कीन्ह महेसा । हियें हरषे तब सकल सुरेसा ॥  
 बेदमंत्र मुनिबर उच्चरहीं । जय जय जय संकर सुर करहीं ॥  
 बाजहिं बाजन बिबिध बिधाना । सुमनबृष्टि नभ भै बिधि नाना ॥  
 हर गिरिजा कर भयउ बिबाहू । सकल भुवन भरि रहा उछाहू ॥  
 दासीं दास तुरग रथ नागा । धेनु बसन मनि बस्तु बिभागा ॥  
 अन्न कनकभाजन भरि जाना । दाइज दीन्ह न जाइ बखाना ॥  
 छं०— दाइज दियो बहु भॉति पुनि कर जोरि हिमभूधर कह्यो ।  
 का देउँ पूरनकाम संकर चरन पंकज गहि रह्यो ॥  
 सिवें कृपासागर ससुर कर संतोषु सब भॉतिहिं कियो ।  
 पुनि गहे पद पाथोज मयनों प्रेम परिपूरन हियो ॥  
 दो०— नाथ उमा मम प्रान सम गृहकिंकरी करेहु ।  
 छमेहु सकल अपराध अब होइ प्रसन्न बरु देहु ॥ 101  
 बहु बिधि संभु सासु समुझाई । गवनी भवन चरन सिरु नाई ॥  
 जननीं उमा बोलि तब लीन्ही । लै उछंग सुंदर सिख दीन्ही ॥  
 करेहु सदा संकर पद पूजा । नारिधरमु पति देउ न दूजा ॥  
 बचन कहत भरे लोचन बारी । बहुरि लाइ उर लीन्हि कुमारी ॥  
 कत बिधि सृजीं नारि जग माहीं । पराधीन सपनेहुँ सुखु नाही ॥

भै अति प्रेम बिकल महतारी । धीरजु कीन्ह कुसमय बिचारी ॥  
 पुनि पुनि मिलति परति गहि चरना । परम प्रेमु कछु जाइ न बरना ॥  
 सब नारिन्ह मिलि भेटि भवानी । जाइ जननि उर पुनि लपटानी ॥  
 छं०— जननिहि बहुरि मिलि चली उचित असीम सब काहूँ दर्ई ।  
 फिरि फिरि बिलोकति मातु तन तब सखीं लै सिव पहिं गई ॥  
 जाचक सकल संतोषि संकरु उमा सहित भवन चले ।  
 सब अमर हरषे सुमन बरषि निसान नभ बाजे भले ॥  
 दो०— चले संग हिमवंतु तब पहुँचावन अति हेतु ।  
 बिबिध भौंति परितोषु करि बिदा कीन्ह बृषकेतु ॥ 102  
 तुरत भवन आए गिरिराई । सकल सैल सर लिए बोलाई ॥  
 आदर दान बिनय बहुमाना । सब कर बिदा कीन्ह हिमवाना ॥  
 जबहिं संभु कैलासहिं आए । सुर सब निज निज लोक सिधाए ॥  
 जगत मातु पितु संभु भवानी । तेहिं सिंगारु न कहउँ बखानी ॥  
 करहिं बिबिध बिधि भोग बिलासा । गनन्ह समेत बसहिं कैलासा ॥  
 हर गिरिजा बिहार नित नयरु । एहि बिधि बिपुल काल चलि गयरु ॥  
 तब जनमेउ षटबदन कुमारा । तारकु असुरु समर जेहिं मारा ॥  
 आगम निगम प्रसिद्ध पुराना । षन्मुख जन्मु सकल जग जाना ॥  
 छं०— जगु जान षन्मुख जन्मु कर्मु प्रतापु पुरुषारथु महा ।  
 तेहि हेतु मैं बृषकेतु सुत कर चरित संछेपहिं कहा ॥  
 यह उमा संभु बिबाहु जे नर नारि कहहिं जे गावहीं ।  
 कल्यान काज बिबाह मंगल सर्वदा सुखु पावहीं ॥  
 दो०— चरित सिंधु गिरिजा रमन बेद न पावहिं पारु ।  
 बरनै तुलसीदास किमि अति मतिमंद गवौरु ॥ 103  
 संभु चरित सुनि सरस सुहावा । भरद्वाज मुनि अति सुखु पावा ॥  
 बहु लालसा कथा पर बाढी । नयनन्हि नीरु रोमावलि ठाढी ॥  
 प्रेम बिबस मुख आव न बानी । दसा देखि हरषे मुनि ग्यानी ॥  
 अहो धन्य तव जन्मु मुनीसा । तुम्हहि प्रान सम प्रिय गौरीसा ॥  
 सिव पद कमल जिन्हहि रति नाही । रामहि ते सपनेहुँ न सोहाहीं ॥  
 बिनु छल बिस्वनाथ पद नेहू । राम भगत कर लच्छन एहू ॥  
 सिव सम को रघुपति ब्रतधारी । बिनु अघ तजी सती असि नारी ॥  
 पनु करि रघुपति भगति देखाई । को सिव सम रामहि प्रिय भाई ॥  
 दो०— प्रथमहिं मैं कहि सिव चरित बूझा मरमु तुम्हार ।  
 सुचि सेवक तुम्ह राम के रहित समस्त बिकार ॥ 104  
 मैं जाना तुम्हार गुन सीला । कहउँ सुनहु अब रघुपति लीला ॥  
 सुनु मुनि आजु समागम तोरें । कहि न जाइ जस सुखु मन मोरं ॥  
 राम चरित अति अमित मुनीसा । कहि न सकहिं सत कोटि अहीसा ॥  
 तदपि जथाश्रुत कहउँ बखानी । सुमिरि गिरापति प्रभु धनुपानी ॥  
 सारद दारुनारि सम स्वामी । रामु सूत्रधर अंतरजामी ॥  
 जेहि पर कृपा बरहिं जनु जानी । कबि उर अजिर नचावहिं बानी ॥  
 प्रनवउँ सोइ कृपाल रघुनाथा । बरनउँ बिसद तासु गुन गाथा ॥  
 परम रम्य गिरिबरु कैलासू । सदा जहाँ सिव उमा निवासू ॥  
 दो०— सिद्ध तपोधर जोगिजन सुर किंनर मुनिबृंद ।  
 बसहिं तहाँ सुकृती सकल सेवहिं सिव सुखकंद ॥ 105

हरि हर बिमुख धर्म रति नाहीं । ते नर तहें सपनेहुँ नहिं जाहीं ॥  
 तेहि गिरि पर बट बिटप बिसाला । नित नूतन सुंदर सब काला ॥  
 त्रिबिध समीर सुसीतलि छाया । सिव बिश्राम बिटप श्रुति गाया ॥  
 एक बार तेहि तर प्रभु गयऊ । तरु बिलोकि उर अति सुखु भयऊ ॥  
 निज कर डासि नागरिपु छाला । बैठे सहजहिं संभु कृपाला ॥  
 कुंद इंदु दर गौर सरीरा । भुज प्रलंब परिधन मुनिचीरा ॥  
 तरुन अरुन अंबुज सम चरना । नख दुति भगत हृदय तम हरना ॥  
 भुजग भूति भूषन त्रिपुरारी । आननु सरद चंद छबि हारी ॥

दो०— जटा मुकुट सुरसरित सिर लोचन नलिन बिसाल ।

नीलकंठ लावन्यनिधि सोह बालबिधु भाल ॥ 106

बैठे सोह कामरिपु कैसैं । धरें सरीरु सांतरसु जैसैं ॥  
 पारबती भल अवसरु जानी । गई संभु पहिं मातु भवानी ॥  
 जानि प्रिया आदरु अति कीन्हा । बाम भाग आसनु हर दीन्हा ॥  
 बैठीं सिव समीप हरषाई । पूरुब जन्म कथा चित आई ॥  
 पति हिये हेतु अधिक अनुमानी । बिहसि उमा बोलीं प्रिय बानी ॥  
 कथा जो सकल लोक हितकारी । सोइ पूछन चह सैलकुमारी ॥  
 बिस्वनाथ मम नाथ पुरारी । त्रिभुवन महिमा बिदित तुम्हारी ॥  
 चर अरु अचर नाग नर देवा । सकल करहिं पद पंकज सेवा ॥

दो० प्रभु समरथ सर्बग्य सिव सकल कला गुन धाम ।

जोग ग्यान बैराग्य निधि प्रनत कलपतरु नाम ॥ 107

जाँ मो पर प्रसन्न सुखरासी । जानिअ सत्य मोहि निज दासी ॥  
 तौ प्रभु हरहु मोर अग्याना । कहि रघुनाथ कथा बिधि नाना ॥  
 जासु भवनु सुरतरु तर होई । सहि कि दरिद्र जनित दुखु सोई ॥  
 ससिभूषन अस हृदयें बिचारी । हरहु नाथ मम मति भ्रम भारी ॥  
 प्रभु जे मुनि परमारथबादी । कहहिं राम कहूँ ब्रह्म अनादी ॥  
 सेस सारदा बेद पुराना । सकल करहिं रघुपति गुन गाना ॥  
 तुम्ह पुनि राम राम दिन राती । सादर जपहु अर्नेग आराती ॥  
 रामु सो अवध नृपति सुत सोई । की अज अगुन अलखगति कोई ॥

दो० जाँ नृप तनय त ब्रह्म किमि नारि बिरहें मति भोरि ।

देखि चरित महिमा सुनत भ्रमति बुद्धि अति मोरि ॥ 108

जाँ अनीह ब्यापक बिभु कोऊ । कहहु बुझाइ नाथ मोहि सोऊ ॥  
 अग्य जानि रिस उर जनि धरहू । जेहि बिधि मोह मिटै सोइ करहू ॥  
 मैं बन दीखि राम प्रभुताई । अति भय बिकल न तुम्हहि सुनाई ॥  
 तदपि मलिन मन बोधु न आवा । सो फलु भली भौंति हम पावा ॥  
 अजहूँ कछु संसउ मन मोरें । करहु कृपा बिनवउँ कर जोरें ॥  
 प्रभु तब मोहि बहु भौंति प्रबोधा । नाथ सो समुझि करहु जनि कोधा ॥  
 तब कर अस बिमोह अब नाहीं । रामकथा पर रुचि मन माहीं ॥  
 कहहु पुनीत राम गुन गाथा । भुजगराज भूषन सुरनाथा ॥

दो० बंदउँ पद धरि धरनि सिरु बिनय करउँ कर जोरि ।

बरनहु रघुबर बिसद जसु श्रुति सिद्धांत निचोरि ॥ 109

जदपि नाथ मैं नहिं अधिकारी । दासी मन कम बचन तुम्हारी ॥  
 गूढउ तत्व न साधु दुरावहिं । आरत अधिकारी जहें पावहिं ॥  
 अति आरति पूछउँ सुरराया । रघुपति कथा कहहु करि दाया ॥

प्रथम सो कारन कहहु बिचारी । निर्गुन ब्रह्म सगुन बपु धारी ॥  
पुनि प्रभु कहहु राम अवतारा । बालचरित पुनि कहहु उदारा ॥  
कहहु जथा जानकी बिबाहीं । राज तजा सो दूषन काहीं ॥  
बन बसि कीन्हे चरित अपारा । कहहु नाथ जिमि रावन मारा ॥  
राज बैठि कीन्हीं बहु लीला । सकल कहहु संकर सुखसीला ॥  
दो०— बहुरि कहहु करुनायतन कीन्ह जो अचरज राम ।

प्रजा सहित रघुबंसमनि किमि गवने निज धाम ॥ 110  
पुनि प्रभु कहहु सो तत्व बखानी । जेहिं बिग्यान मगन मुनि ग्यानी ॥  
भगति ग्यान बिग्यान बिरागा । पुनि सब बरनहु सहित बिभागा ॥  
औरउ राम रहस्य अनेका । कहहु नाथ अति बिमल बिबेका ॥  
जो प्रभु मैं पूछा नहिं होई । सोउ दयाल राखहु जनि गोई ॥  
तुम्ह त्रिभुवन गुर बेद बखाना । आन जीव पौवर का जाना ॥  
प्रस्न उमा कै सहज सुहाई । छल बिहीन सुनि सिव मन भाई ॥  
हर हियँ रामचरित सब आए । प्रेम पुलक लोचन जल छाए ॥  
श्रीरघुनाथ रूप उर आवा । परमानंद अमित सुख पावा ॥

दो०— मगन ध्यानरस दंड जुग पुनि मन बाहेर कीन्ह ।  
रघुपति चरित महेस तब हरषित बरनै लीन्ह ॥ 111  
झूठेउ सत्य जाहि बिनु जानें । जिमि भुजंग बिनु रजु पहिचानें ॥  
जेहि जानें जग जाइ हेराई । जागें जथा सपन भ्रम जाई ॥  
बंदउँ बालरूप सोइ रामू । सब सिधि सुलभ जपत जिसु नामू ॥  
मंगल भवन अमंगल हारी । द्रवउ सो दसरथ अजिर बिहारी ॥  
करि प्रनाम रामहि त्रिपुरारी । हरषि सुधा सम गिरा उचारी ॥  
धन्य धन्य गिरिराजकुमारी । तुम्ह समान नहिं कोउ उपकारी ॥  
पूँछेहु रघुपति कथा प्रसंगा । सकल लोक जग पावनि गंगा ॥  
तुम्ह रघुबीर चरन अनुरागी । कीन्हिहु प्रस्न जगत हित लागी ॥

दो०— राम कृपा तें पारबति सपनेहुँ तव मन माहिं ।  
सोक मोह संदेह भ्रम मम बिचार कछु नाहिं ॥ 112  
तदपि असंका कीन्हिहु सोई । कहत सुनत सब कर हित होई ॥  
जिन्ह हरि कथा सुनी नहिं काना । श्रवन रंध्र अहिभवन समाना ॥  
नयनन्हि संत दरस नहिं देखा । लोचन मोरपंख कर लेखा ॥  
ते सिर कटु तुंबरि समतूला । जे न नमत हरि गुर पद मूला ॥  
जिन्ह हरिभगति हृदयँ नहिं आनी । जीवत सव समान तेइ प्रानी ॥  
जो नहिं करइ राम गुन गाना । जीह सो दादुर जीह समाना ॥  
कुलिस कठोर निदुर सोइ छाती । सुनि हरिचरित न जो हरषाती ॥  
गिरिजा सुनहु राम कै लीला । सुर हित दनुज बिमोहनसीला ॥

दो०— रामकथा सुरधेनु सम सेवत सब सुख दानि ।  
सतसमाज सुरलोक सब को न सुनै अस जानि ॥ 113  
रामकथा सुंदर कर तारी । संसय बिहग उड़ावनिहारी ॥  
रामकथा कलि बिटप कुठारी । सादर सुनु गिरिराजकुमारी ॥  
राम नाम गुन चरित सुहाए । जनम करम अगनित श्रुति गाए ॥  
जथा अनंत राम भगवाना । तथा कथा कीरति गुन नाना ॥  
तदपि जथा श्रुत जसि मति मोरी । कहिहउँ देखि प्रीति अति तोरी ॥  
उमा प्रस्न तव सहज सुहाई । सुखद संतसंमत मोहि भाई ॥

एक बात नहिं मोहि सोहानी । जदपि मोह बस कहेहु भवानी ॥  
तुम्ह जो कहा राम कोउ आना । जेहि श्रुति गाव धरहिं मुनि ध्याना ॥  
दो०— कहहिं सुनहिं अस अधम नर ग्रसे जे मोह पिसाच ।

पाषंडी हरि पद बिमुख जानहिं झूठ न साच ॥ 114

अग्य अकोबिद अंध अभागी । काई बिषय मुकुर मन लागी ॥  
लंपट कपटी कुटिल बिसेषी । सपनेहुं संतसभा नहिं देखी ॥  
कहहिं ते बेद असंमत बानी । जिन्ह कें सूझ लाभु नहिं हानी ॥  
मुकुर मलिन अरु नयन बिहीना । राम रूप देखहिं किमि दीना ॥  
जिन्ह कें अगुन न सगुन बिबेका । जल्पहिं कल्पित बचन अनेका ॥  
हरिमाया बस जगत भ्रमाहीं । तिन्हहि कहत कछु अघटित नाहीं ॥  
बातुल भूत बिबस मतवारे । ते नहिं बोलहिं बचन बिचारे ॥  
जिन्ह कृत महामोह मद पाना । तिन्ह कर कहा करिअ नहिं काना ॥

सो०— अस निज हृदयें बिचारि तजु संसय भजु राम पद ।

सनु गिरिराज कुमारि भ्रम तम रबि कर बचन मम ॥ 115

सगुनहि अगुनहि नहिं कछु भेदा । गावहिं मुनि पुरान बुध बेदा ॥  
अगुन अरूप अलख अज जोई । भगत प्रेम बस सगुन सो होई ॥  
जो गुन रहित सगुन सोइ कैसैं । जलु हिम उपल बिलग नहिं जैसैं ॥  
जासु नाम भ्रम तिमिर पतंगा । तेहि किमि कहिअ बिमोह प्रसंगा ॥  
राम सच्चिदानंद दिनेसा । नहिं तहें मोह निसा लवलेसा ॥  
सहज प्रकासरूप भगवाना । नहिं तहें पुनि बिग्यान बिहाना ॥  
हरष बिषाद ग्यान अग्याना । जीव धर्म अहमिति अभिमाना ॥  
राम ब्रह्म व्यापक जग जाना । परमानंद परेस पुराना ॥

दो०— पुरुष प्रसिद्ध प्रकास निधि प्रगट परावर नाथ ।

रघुकुलमनि मम स्वामि सोइ कहि सिवें नायउ माथ ॥ 116

निज भ्रम नहिं समुझहिं अग्यानी । प्रभु पर मोह धरहिं जड़ प्रानी ॥  
जथा गगन घन पटल निहारी । झॉपेउ भानु कहहिं कुबिचारी ॥  
चितव जो लोचन अंगुलि लाएँ । प्रगट जुगल ससि तेहि के भाएँ ॥  
उमा राम बिषइक अस मोहा । नभ तम धूम धूरि जिमि सोहा ॥  
बिषय करन सुर जीव समेता । सकल एक तें एक सचेता ॥  
सब कर परम प्रकासक जोई । राम अनादि अवधपति सोई ॥  
जगत प्रकास्य प्रकासक रामू । मायाधीस ग्यान गुन धामू ॥  
जासु सत्यता तें जड़ माया । भास सत्य इव मोह सहाया ॥

दो०— रजत सीप महुं भास जिमि जथा भानु कर बारि ।

जदपि मृषा तिहुं काल सोइ भ्रम न सकइ कोउ टारि ॥ 117

एहि बिधि जग हरि आश्रित रहई । जदपि असत्य देत दुख अहई ॥  
जौं सपनें सिर काटै कोई । बिनु जागें न दूरि दुख होई ॥  
जासु कृपाँ अस भ्रम मिटि जाई । गिरिजा सोइ कृपाल रघुराई ॥  
आदि अंत कोउ जासु न पावा । मति अनुमानि निगम अस गावा ॥  
बिनु पद चलइ सुनइ बिनु काना । कर बिनु करम करइ बिधि नाना ॥  
आनन रहित सकल रस भोगी । बिनु बानी बकता बड़ जोगी ॥  
तन बिनु परस नयन बिनु देखा । ग्रहइ घान बिनु बास असेषा ॥  
असि सब भॉति अलौकिक करनी । महिमा जासु जाइ नहिं बरनी ॥

दो०— जेहि इमि गावहिं बेद बुध जाहि धरहिं मुनि ध्यान ।

सोइ दसरथ सुत भगत हित कोसलपति भगवान ॥ 118  
 कासीं मरत जंतु अवलोकी । जासु नाम बल करउँ बिसोकी ॥  
 सोइ प्रभु मोर चराचर स्वामी । रघुबर सब उर अंतरजामी ॥  
 बिबसहुँ जासु नाम नर कहहीं । जनम अनेक रचित अघ दहहीं ॥  
 सादर सुमिरन जे नर करहीं । भव बारिधि गोपद इव तरहीं ॥  
 राम सो परमात्मा भवानी । तहँ भ्रम अति अबिहित तव बानी ॥  
 अस संसय आनत उर माहीं । ग्यान बिराग सकल गुन जाहीं ॥  
 सुनि सिव के भ्रम भंजन बचना । मिटि गै सब कुतरक कै रचना ॥  
 भइ रघुपति पद प्रीति प्रतीती । दारुन असंभावना बीती ॥

दो०— पुनि पुनि प्रभु पद कमल गहि जोरि पंकरुह पानि ।

बोलीं गिरिजा बचन बर मनहुँ प्रेम रस सानि ॥ 119

ससि कर सम सुनि गिरा तुम्हारी । मिटा मोह सरदातप भारी ॥  
 तुम्ह कृपाल सबु संसउ हरेऊ । राम स्वरूप जानि मोहि परेऊ ॥  
 नाथ कृपाँ अब गयउ बिषादा । सुखी भयउँ प्रभु चरन प्रसादा ॥  
 अब मोहि आपनि किंकरि जानी । जदपि महा मतिमंद अयानी ॥  
 प्रथम जो मैं पूछा सोइ कहहू । जौं मो पर प्रसन्न प्रभु अहहू ॥  
 राम ब्रह्म चिनमय अबिनासी । सर्व रहित सब उर पुर बासी ॥  
 नाथ धरेउ नरतनु केहि हेतू । मोहि समुझाइ कहहु बृषकेतू ॥  
 उमा बचन सुनि परम बिनीता । रामकथा पर प्रीति पुनीता ॥

दो०— हियँ हरषे कामारि तब संकर सहज सुजान ।

बहु बिधि उमहि प्रसंसि पुनि बोले कृपानिधान ॥ 120 (क)

नवान्हपारायण, पहला विश्राम

मासपारायण, चौथा विश्राम

सो०— सुनु सुभ कथा भवानि रामचरितमानस विमल ।

कहा भुसुंछि बखानि सुना बिहग नायक गरुड़ ॥ 120 (ख)

सो संबाद उदार जेहि बिधि भा आगें कहब ।

सुनहु राम अवतार चरित परम सुंदर अनघ ॥ 120 (ग)

हरि गुन नाम अपार कथा रूप अगनित अमित ।

मैं निज मति अनुसार कहउँ उमा सादर सुनहु ॥ 120 (घ)

सुनु गिरिजा हरिचरित सुहाए । बिपुल बिसद निगमागम गाए ॥

हरि अवतार हेतु जेहि होई । इदमित्थं कहि जाइ न सोई ॥

राम अतर्क्य बुद्धि मन बानी । मत हमार अस सुनहि सयानी ॥

तदपि संत मुनि बेद पुराना । जस कछु कहहिं स्वमति अनुमाना ॥

तस मैं सुमुखि सुनावउँ तोही । समुझि परइ जस कारन मोही ॥

जब जब होइ धरम कै हानी । बाढ़हिं असुर अधम अभिमानी ॥

करहिं अनीति जाइ नहिं बरनी । सीदहिं संत धेनु सुर धरनी ॥

तब तब प्रभु धरि बिबिध सरीरा । हरहिं कृपानिधि सज्जन पीरा ॥

दो०— असुर मारि थापहिं सुरन्ह राखहिं निज श्रुति सेतु ।

जग बिस्तारहिं बिसद जस राम जन्म कर हेतु ॥ 121

सोइ जस गाइ भगत भव तरहीं । कृपासिंधु जन हित तनु धरहीं ॥

राम जनम के हेतु अनेका । परम बिचित्र एक तें एका ॥

जनम एक दुइ कहउँ बखानी । सावधान सुनु सुमति भवानी ॥

द्वारपाल हरि के प्रिय दोउ । जय अरु बिजय जान सब कोऊ ॥

बिप्र श्राप तें दुनउ भाई । तामस असुर देह तिन्ह पाई ॥  
कनककसिपु अरु हाटक लोचन । जगत बिदित सुरपति मद मोचन ॥  
बिजई समर बीर बिख्याता । धरि बराह बपु एक निपाता ॥  
होइ नरहरि दूसर पुनि मारा । जन प्रहलाद सुजस बिस्तारा ॥

दो०— भए निसाचर जाइ तेइ महाबीर बलवान ।

कुंभकरन रावन सुभट सुर बिजई जग जान ॥ 122  
मुकुत न भए हते भगवाना । तीनि जनम द्विज बचन प्रवाना ॥  
एक बार तिन्ह के हित लागी । धरेउ सरीर भगत अनुरागी ॥  
कस्यप अदिति तहाँ पितु माता । दसरथ कौसल्या बिख्याता ॥  
एक कलप एहि बिधि अवतारा । चरित पवित्र किए संसारा ॥  
एक कलप सुर देखि दुखारे । समर जलंधर सन सब हारे ॥  
संभु कीन्ह संग्राम अपारा । दनुज महाबल मरइ न मारा ॥  
परम सती असुराधिप नारी । तेहिं बल ताहि न जितहिं पुरारी ॥

दो०— छल करि टारेउ तासु ब्रत प्रभु सुर कारज कीन्ह ।

जब तेहिं जानेउ मरम तब श्राप कोप करि दीन्ह ॥ 123  
तासु श्राप हरि दीन्ह प्रमाना । कौतुकनिधि कृपाल भगवाना ॥  
तहाँ जलंधर रावन भयऊ । रन हति राम परम पद दयऊ ॥  
एक जनम कर कारन एहा । जेहि लागि राम धरी नरदेहा ॥  
प्रति अवतार कथा प्रभु केरी । सुनु मुनि बरनी कबिन्ह घनेरी ॥  
नारद श्राप दीन्ह एक बारा । कलप एक तेहि लागि अवतारा ॥  
गिरिजा चकित भई सुनि बानी । नारद बिष्णुभगत पुनि ग्यानी ॥  
कारन कवन श्राप मुनि दीन्हा । का अपराध रमापति कीन्हा ॥  
यह प्रसंग मोहि कहहु पुरारी । मुनि मन मोह आचरज भारी ॥

दो०— बोले बिहसि महेस तब ग्यानी मूढ न कोइ ।

जेहि जस रघुपति करहिं जब सो तस तेहि छन होइ ॥ 124 (क)

सो०— कहउँ राम गुन गाथ भरद्वाज सादर सुनहु ।

भव भंजन रघुनाथ भजु तुलसी तजि मान मद ॥ 124 (ख)  
हिमगिरि गुहा एक अति पावनि । बह समीप सुरसरी सुहावनि ॥  
आश्रम परम पुनीत सुहावा । देखि देवरिषि मन अति भावा ॥  
निरखि सैल सरि बिपिन बिभागा । भयउ रमापति पद अनुरागा ॥  
सुमिरत हरिहि श्राप गति बाधी । सहज बिमल मन लागि समाधी ॥  
मुनि गति देखि सुरेस डेराना । कामहि बोलि कीन्ह सनमाना ॥  
सहित सहाय जाहु मम हेतू । चलेउ हरषि हियेँ जलचरकेतू ॥  
सुनासीर मन महुँ असि त्रासा । चहत देवरिषि मम पुर बासा ॥  
जे कामी लोलुप जग माहीं । कुटिल काक इव सबहि डेराहीं ॥

दो०— सूख हाड़ लै भाग सठ स्वान निरखि मृगराज ।

छीनि लेइ जनि जान जड़ तिभि सुरपतिहि न लाज ॥ 125  
तेहि आश्रमहिं मदन जब गयऊ । निज मायों बसंत निरमयऊ ॥  
कुसुमित बिबिध बिटप बहुरंगा । कूजहिं कोकिल गुंजहिं भृंगा ॥  
चली सुहावनि त्रिबिध बयारी । काम कृसानु बढावनिहारी ॥  
रंभादिक सुरनारि नबीना । सकल असमसर कला प्रबीना ॥  
करहिं गान बहु तान तरंगा । बहुबिधि कीड़हिं पानि पतंगा ॥  
देखि सहाय मदन हरषाना ॥ कीन्हेसि पुनि प्रपंच बिधि नाना ॥

काम कला कछु मुनिहि न ब्यापी । निज भयें डरेउ मनोभव पापी ॥  
सीम कि चॉपि सकइ कोउ तासू । बड़ रखवार रमापति जासू ॥  
दो०— सहित सहाय सभीत अति मानि हारि मन मैन ।  
गहेसि जाइ मुनि चरन तब कहि सुठि आरत बैन ॥ 126  
भयउ न नारद मन कछु रोषा । कहि प्रिय बचन काम परितोषा ॥  
नाइ चरन सिरु आयसु पाई । गयउ मदन तब सहित सहाई ॥  
मुनि सुसीलता आपनि करनी । सुरपति सभों जाइ सब बरनी ॥  
सुनि सब कें मन अचरजु आवा । मुनिहि प्रसंसि हरिहि सिरु नावा ॥  
तब नारद गवने सिव पाही । जिता काम अहमिति मन माहीं ॥  
मार चरित संकरहि सुनाए । अतिप्रिय जानि महेस सिखाए ॥  
बार बार बिनवउं मुनि तोही । जिमि यह कथा सुनायहु मोही ॥  
तिमि जनि हरिहि सुनावहु कबहूँ । चलेहूँ प्रसंग दुराएहु तबहूँ ॥  
दो०— संभु दीन्ह उपदेस हित नहिं नारदहि सोहान ।

भरद्वाज कौतुक सुनहु हरि इच्छा बलवान ॥ 127  
राम कीन्ह चाहिं सोइ होई । करै अन्यथा अस नहिं कोई ॥  
संभु बचन मुनि मन नहिं भाए । तब बिरंचि के लोक सिधाए ॥  
एक बार करतल बर बीना । गावत हरि गुन गान प्रबीना ॥  
छीरसिंधु गवने मुनिनाथा । जहँ बस श्रीनिवास श्रुतिमाथा ॥  
हरषि मिले उठि रमानिकेता । बैठे आसन रिषिहि समेता ॥  
बोले बिहसि चराचर राया । बहुते दिनन कीन्हि मुनि दाया ॥  
काम चरित नारद सब भाषे । जद्यपि प्रथम बरजि सिर्वे राखे ॥  
अति प्रचंड रघुपति कै माया । जेहि न मोह अस को जग जाया ॥

दो०— रूख बदन करि बचन मृदु बोले श्रीभगवान ।  
तुम्हरे सुमिरन तें मिटहिं मोह मार मद मान ॥ 128  
सुनु मुनि मोह होइ मन ताकें । ग्यान बिराग हृदय नहिं जाकें ॥  
ब्रह्मचरज ब्रत रत मतिधीरा । तुम्हहि कि करइ मनोभव पीरा ॥  
नारद कहेउ सहित अभिमाना । कृपा तुम्हारि सकल भगवाना ॥  
करुनानिधि मन दीख बिचारी । उर अंकुरेउ गरब तरु भारी ॥  
बेगि सो मैं डारिहउं उखारी । पन हमार सेवक हितकारी ॥  
मुनि कर हित मम कौतुक होई । अवसि उपाय करबि मैं सोई ॥  
तब नारद हरि पद सिर नाई । चले हृदयें अहमिति अधिकारी ॥  
श्रीपति निज माया तब प्रेरी । सुनहु कठिन करनी तेहि केरी ॥

दो० बिरचेउ मग महूँ नगर तेहिं सत जोजन बिस्तार ।  
श्रीनिवासपुर तें अधिक रचना बिबिध प्रकार ॥ 129  
बसहिं नगर सुंदर नर नारी । जनु बहु मनसिज रति तनुधारी ॥  
तेहिं पुर बसइ सीलनिधि राजा । अगनित हय गय सेन समाजा ॥  
सत सुरेस सम बिभव बिलासा । रूप तेज बल नीति निवासा ॥  
बिस्वमोहिनी तासु कुमारी । श्री बिमोह जिसु रूपु निहारी ॥  
सोइ हरिमाया सब गुन खानी । सोभा तासु कि जाइ बखानी ॥  
करइ स्वयंबर सो नृपबाला । आए तहें अगनित महिपाला ॥  
मुनि कौतुकी नगर तेहिं गयऊ । पुरबासिन्ह सब पूछत भयऊ ॥  
सुनि सब चरित भूपगृहें आए । करि प्जा नृप मुनि बैठाए ॥  
दो० आनि देखाई नारदहि भूपति राजकुमारि ।

कहहु नाथ गुन दोष सब एहि के हृदयें बिचारि ॥ 130  
 देखि रूप मुनि बिरति बिसारी । बड़ी बार लगि रहे निहारी ॥  
 लच्छन तासु बिलोकि भुलाने । हृदयें हरष नहिं प्रगट बखाने ॥  
 जो एहि बरइ अमर सोइ होइ । समरभूमि तेहि जीत न कोई ॥  
 सेवहिं सकल चराचर ताही । बरइ सीलनिधि कन्या जाही ॥  
 लच्छन सब बिचारि उर राखे । कछुक बनाइ भूप सन भाषे ॥  
 सुता सुलच्छन कहि नृप पाहीं । नारद चले सोच मन माहीं ॥  
 करौं जाइ सोइ जतन बिचारी । जेहि प्रकार मोहि बरै कुमारी ॥  
 जप तप कछु न होइ तेहि काला । हे बिधि मिलइ कवन बिधि बाला ॥

दो० एहि अवसर चाहिअ परम सोभा रूप बिसाल ।

जो बिलोकि रीझै कुअँरि तब मेलै जयमाल ॥ 131

हरि सन मागौं सुंदरताई । होइहि जात गहरु अति भाई ॥  
 मोरें हित हरि सम नहिं कोऊ । एहि अवसर सहाय सोइ होऊ ॥  
 बहुबिधि बिनय कीन्हि तेहि काला । प्रगटेउ प्रभु कौतुकी कृपाला ॥  
 प्रभु बिलोकि मुनि नयन जुड़ाने । होइहि काजु हिऐं हरषाने ॥  
 अति आरति कहि कथा सुनाई । करहु कृपा करि होहु सहाई ॥  
 आपन रूप देहु प्रभु मोही । आन भॉति नहिं पावौं ओही ॥  
 जेहि बिधि नाथ होइ हित मोरा । करहु सो बेगि दास मैं तोरा ॥  
 निज माया बल देखि बिसाला । हियें हँसि बोले दीनदयाला ॥

दो० जेहि बिधि होइहि परम हित नारद सुनहु तुम्हार ।

सोइ हम करब न आन कछु बचन न मृषा हमार ॥ 132

कुपथ माग रुज ब्याकुल रोगी । बैद न देइ सुनहु मुनि जोगी ॥  
 एहि बिधि हित तुम्हार मैं ठयऊ । कहि अस अंतरहित प्रभु भयऊ ॥  
 माया बिबस भए मुनि मूढा । समुझी नहिं हरि गिरा निगूढा ॥  
 गवने तुरत तहाँ रिषिराई । जहाँ स्वयंबर भूमि बनाई ॥  
 निज निज आसन बैठे राजा । बहु बनाव करि सहित समाजा ॥  
 मुनि मन हरष रूप अति मारें । मोहि तजि आनहि बरिहि न भोरें ॥  
 मुनि हित कारन कृपानिधाना । दीन्ह कुरूप न जाइ बखाना ॥  
 सो चरित्र लखि काहुँ न पावा । नारद जानि सबहिं सिर नावा ॥

दो० रहे तहाँ दुइ रुद्र गन ते जानहिं सब भेउ ।

बिप्रबेष देखत फिरहिं परम कौतुकी तेउ ॥ 133

जेहिं समाज बैठे मुनि जाई । हृदयें रूप अहमिति अधिकाई ॥  
 तहें बैठे महेस गन दोऊ । बिप्रबेष गति लखइ न कोऊ ॥  
 करहिं कूटि नारदहि सुनाई । नीकि दीन्हि हरि सुंदरताई ॥  
 रीझिहि राजकुअँरि छबि देखी । इन्हहि बरिहि हरिजानि बिसेषी ॥  
 मुनिहि मोह मन हाथ पराएँ । हँसहिं संभु गन अति सचु पाएँ ॥  
 जदपि सुनहिं मुनि अटपटि बानी । समुझि न परइ बुद्धि भ्रम सानी ॥  
 काहुँ न लखा सो चरित बिसेषा । सो सरूप नृपकन्याँ देखा ॥  
 मर्कट बदन भयंकर देही । देखत हृदयें कोध भा तेही ॥

दो० सखीं संग लै कुअँरि तब चलि जनु राजमराल ।

देखत फिरइ महीप सब कर सरोज जयमाल ॥ 134

जेहि दिसि बैठे नारद फूली । सो दिसि तेहिं न बिलोकी भूली ॥  
 पुनि पुनि मुनि उकसहिं अकुलाहीं । देखि दसा हर गन मुसुकाहीं ॥  
 धरि नृपतनु तहें गयउ कृपाला । कुअँरि हरषि मेलेउ जयमाला ॥

दुलहिनि लै गे लच्छिनिवासा । नृपसमाज सब भयउ निरासा ॥  
 मुनि अति बिकल मोहँ मति नाठी । मनि गिरि गई छूटि जनु गौंठी ॥  
 तब हर गन बोले मुसुकाई । निज मुख मुकुर बिलोकहु जाई ॥  
 अस कहि दोउ भागे भयँ भारी । बदन दीख मुनि बारि निहारी ॥  
 बेषु बिलोकि कोध अति बाढा । तिन्हहि सराप दीन्ह अति गाढा ॥  
 दो० होहु निसाचर जाइ तुम्ह कपटी पापी दोउ ।  
 हँसेहु हमहि सो लेहु फल बहुरि हँसेहु मुनि कोउ ॥ 135  
 पुनि जल दीख रूप निज पावा । तदपि हृदयँ संतोष न आवा ॥  
 फरकत अधर कोप मन माहीं । सपदि चले कमलापति पाहीं ॥  
 देहउँ श्राप कि मरिहउँ जाई । जगत मोरि उपहास कराई ॥  
 बीचहिं पंथ मिले दनुजारी । संग रमा सोइ राजकुमारी ॥  
 बोले मधुर बचन सुरसाई । मुनि कहँ चले बिकल की नाई ॥  
 सुनत बचन उपजा अति कोधा । माया बस न रहा मन बोधा ॥  
 पर संपदा सकहु नहिं देखी । तुम्हरेँ इरिषा कपट बिसेषी ॥  
 मथत सिंधु रुद्रहि बौरायहु । सुरन्ह प्रेरि बिष पान करायहु ॥  
 दो० असुर सुरा बिष संकरहि आपु रमा मनि चारु ।  
 स्वारथ साधक कुटिल तुम्ह सदा कपट ब्यवहारु ॥ 136  
 परम स्वतंत्र न सिर पर कोई । भावइ मनहि करहु तुम्ह सोई ॥  
 भलेहि मंद मंदेहि भल करहु । बिसमय हरष न हियँ कछु धरहु ॥  
 डहकि डहकि परिचेहु सब काहू । अति असंक मन सदा उछाहू ॥  
 करम सुभासुभ तुम्हहि न बाधा । अब लगि तुम्हहि न काहूँ साधा ॥  
 भले भवन अब बायन दीन्हा । पावहुगे फल आपन कीन्हा ॥  
 बंचेहु मोहि जवनि धरि देहा । सोइ तनु धरहु श्राप मम एहा ॥  
 कपि आकृति तुम्ह कीन्हि हमारी । करिहहिं कीस सहाय तुम्हारी ॥  
 मम अपकार कीन्ह तुम्ह भारी । नारि बिरहँ तुम्ह होब दुखारी ॥  
 दो० श्राप सीस धरि हरषि हियँ प्रभु बहु बिनती कीन्हि ।  
 निज माया कै प्रबलता करषि कृपानिधि लीन्हि ॥ 137  
 जब हरि माया दूरि निवारी । नहिं तहँ रमा न राजकुमारी ॥  
 तब मुनि अति सभोत हरि चरना । गहे पाहि प्रनतारति हरना ॥  
 मृषा होउ मम श्राप कृपाला । मम इच्छा कह दीनदयाला ॥  
 मैं दुर्बचन कहे बहुतेरे । कह मुनि पाप मिटिहिं किमि मेरे ॥  
 जपहु जाइ संकर सत नामा । होइहि हृदयँ तुरत बिश्रामा ॥  
 कोउ नहिं सेव समान प्रिय मोरें । असि परतीति तजहु जनि भारें ॥  
 जेहि पर कृपा न करहिं पुरारी । सो न पाव मुनि भगति हमारी ॥  
 अस उर धरि महि बिचरहु जाई । अब न तुम्हहि माया निअराई ॥  
 दो० बहुबिधि मुनिहि प्रबोधि प्रभु तब भए अंतरधान ।  
 सत्यलोक नारद चले करत राम गुन गान ॥ 138  
 हर गन मुनिहि जात पथ देखी । बिगतमोह मन हरष बिसेषी ॥  
 अति सभोत नारद पहिं आए । गहि पद आरत बचन सुनाए ॥  
 हर गन हम न बिप्र मुनिराया । बड़ अपराध कीन्ह फल पाया ॥  
 श्राप अनुग्रह करहु कृपाला । बोले नारद दीनदयाला ॥  
 निसिचर जाइ होहु तुम्ह दोऊ । बैभव बिपुल तेज बल होऊ ॥  
 भुजबल बिस्व जितब तुम्ह जहिआ । धरिहहिं बिष्णु मनुज तनु तहिआ ॥  
 समर मरन हरि हाथ तुम्हारा । होइहहु मुकुत न पुनि संसारा ॥

चले जुगल मुनि पद सिर नाई । भए निसाचर कालहि पाई ॥  
 दो० एक कलप एहि हेतु प्रभु लीन्ह मनुज अवतार ।  
 सुर रंजन सज्जन सुखद हरि भंजन भुबि भार ॥ 139  
 एहि बिधि जनम करम हरि केरे । सुंदर सुखद बिचित्र घनेरे ॥  
 कलप कलप प्रति प्रभु अवतरहीं । चारु चरित नानाबिधि करहीं ॥  
 तब तब कथा मुनीसन्ह गाई । परम पुनीत प्रबंध बनाई ॥  
 बिबिध प्रसंग अनूप बखाने । करहिं न सुनि आचरजु सयाने ॥  
 हरि अनंत हरिकथा अनंता । कहहिं सुनिं बहुबिधि सब संता ॥  
 रामचंद्र के चरित सुहाए । कलप कोटि लागि जाहिं न गाए ॥  
 यह प्रसंग मैं कहा भवानी । हरिमार्यो मोहहिं मुनि ग्यानी ॥  
 प्रभु कौतुकी प्रनत हितकारी । सेवत सुलभ सकल दुख हारी ॥  
 सो० सुर नर मुनि कोउ नाहिं जेहि न मोह माया प्रबल ।  
 अस बिचारि मन माहिं भजिअ महामाया पतिहि ॥ 140  
 अपर हेतु सुनु सैलकुमारी । कहउँ बिचित्र कथा बिस्तारी ॥  
 जेहि कारन अज अगुन अरुपा । ब्रह्म भयउ कोसलपुर भूपा ॥  
 जो प्रभु बिपिन फिरत तुम्ह देखा । बंधु समेत धरें मुनिबेषा ॥  
 जासु चरित अवलोकि भवानी । सती सरीर रहिहु बौरानी ॥  
 अजहुँ न छाया मिटति तुम्हारी । तासु चरित सुनु भ्रम रुज हारी ॥  
 लीला कीन्हि जो तेहिं अवतारा । सो सब कहिहउँ मति अनुसारा ॥  
 भरद्वाज सुनि संकर बानी । सकुचि सप्रेम उमा मुसुकानी ॥  
 लगे बहुरि बरनै बृषकेतू । सो अवतार भयउ जेहि हेतू ॥  
 दो० सो मैं तुम्ह सन कहउँ सबु सुनु मुनीस मन लाइ ।  
 राम कथा कलि मल हरनि मंगल करनि सुहाइ ॥ 141  
 स्वायंभू मनु अरु सतरूपा । जिन्ह तें भै नरसृष्टि अनूपा ॥  
 दंपति धरम आचरन नीका । अजहुँ गाव श्रुति जिन्ह कै लीका ॥  
 नृप उत्तानपाद सुत तासू । ध्रुव हरि भगत भयउ सुत जासू ॥  
 लघु सुत नाम प्रियव्रत ताही । बेद पुरान प्रसंसहिं जाही ॥  
 देवहूति पुनि तासु कुमारी । जो मुनि कर्दम कै प्रिय नारी ॥  
 आदिदेव प्रभु दीनदयाला । जठर धरेउ जेहिं कपिल कृपाला ॥  
 सांख्य सास्त्र जिन्ह प्रगट बखाना । तत्व बिचार निपुन भगवाना ॥  
 तेहिं मनु राज कीन्ह बहु काला । प्रभु आयसु सब बिधि प्रतिपाला ॥  
 सो० होइ न बिषय बिराग भवन बसत भा चौथपन ।  
 हृदयँ बहुत दुख लाग जनम गयउ हरिभगति बिनु ॥ 142  
 बरबस राज सुतहि तब दीन्हा । नारि समेत गवन बन कीन्हा ॥  
 तीरथ बर नैमिष बिख्याता । अति पुनीत साधक सिधि दाता ॥  
 बसहिं तहाँ मुनि सिद्ध समाजा । तहँ हियँ हरषि चलेउ मनु राजा ॥  
 पंथ जात सोहहिं मतिधीरा । ग्यान भगति जनु धरें सरीरा ॥  
 पहुँचे जाइ धेनुमति तीरा । हरषि नहाने निरमल नीरा ॥  
 आए मिलन सिद्ध मुनि ग्यानी । धरम धुरंधर नृपरिषि जानी ॥  
 जहँ जहँ तीरथ रहे सुहाए । मुनिन्ह सकल सादर करवाए ॥  
 कृस सरीर मुनिपट परिधाना । सत समाज नित सुनिं पुराना ॥  
 दो० द्वादस अच्छर मंत्र पुनि जपहिं सहित अनुराग ।  
 बासुदेव पद पंकरुह दंपति मन अति लाग ॥ 143  
 करहिं अहार साक फल कंदा । सुमिरहिं ब्रह्म सच्चिदानंदा ॥

पुनि हरि हेतु करन तप लागे । बारि अधार मूल फल त्यागे ॥  
उर अभिलाष निरंतर होई । देखिअ नयन परम प्रभु सोई ॥  
अगुन अखंड अनंत अनादी । जेहि चिंतहिं परमारथबादी ॥  
नेति नेति जेहि बेद निरूपा । निजानंद निरूपाधि अनूपा ॥  
संभु बिरंचि बिष्णु भगवाना । उपजहिं जासु अंस तें नाना ॥  
ऐसेउ प्रभु सेवक बस अहई । भगत हेतु लीलातनु गहई ॥  
जौं यह बचन सत्य श्रुति भाषा । तौ हमार पूजिहि अभिलाषा ॥  
दो० एहि बिधि बीते बरष षट सहस बारि आहार ।

संबत सप्त सहस्त्र पुनि रहे समीर अधार ॥ 144

बरष सहस दस त्यागेउ सोऊ । ठाढे रहे एक पद दोऊ ॥  
बिधि हरि हर तप देखि अपारा । मनु समीप आए बहु बारा ॥  
मागहु बर बहु भौंति लोभाए । परम धीर नहिं चलहिं चलाए ॥  
अस्थिमात्र होइ रहे सरीरा । तदपि मनाग मनहिं नहिं पीरा ॥  
प्रभु सर्बग्य दास निज जानी । गति अनन्य तापस नृप रानी ॥  
मागु मागु बरु भै नभ बानी । परम गभीर कृपामृत सानी ॥  
मृतक जिआवनि गिरा सुहाई । श्रवन रंघ्र होइ उर जब आई ॥  
हृष्टपुष्ट तन भए सुहाए । मानहुँ अबहिं भवन ते आए ॥

दो० श्रवन सुधा सम बचन सुनि पुलक प्रफुल्लित गात ।

बोले मनु करि दंडवत प्रेम न हृदयें समात ॥ 145

सुनु सेवक सुरतरु सुरधेनू । बिधि हरिहर बंदित पद रेनू ॥  
सेवत सुलभ सकल सुख दायक । प्रनतपाल सचराचर नायक ॥  
जौं अनाथ हित हम पर नेहू । तौ प्रसन्न होइ यह बर देहू ॥  
जो सरूप बस सिव मन माहीं । जेहि कारन मुनि जतन कराहीं ॥  
जो भुसुंडि मन मानस हंसा । सगुन अगुन जेहि निगम प्रसंसा ॥  
देखहिं हम सो रूप भरि लोचन । कृपा करहु प्रनतारति मोचन ॥  
दंपति बचन परम प्रिय लागे । मृदुल बिनीत प्रेम रस पागे ॥  
भगत बछल प्रभु कृपानिधाना । बिस्वबास प्रगटे भगवाना ॥

दो० नील सरोरुह नील मनि नील नीरधर स्याम ।

लाजहिं तन सोभा निरखि कोटि कोटि सत काम ॥ 146

सरद मयंक बदन छबि सींवा । चारु कपोल चिबुक दर ग्रीवा ॥  
अधर अरुन रद सुंदर नासा । बिधु कर निकर बिनिंदक हासा ॥  
नव अंबुज अंबक छबि नीकी । चितवनि ललित भावेंती जी की ॥  
भृकुटि मनोज चाप छबि हारी । तिलक ललाट पटल दुतिकारी ॥  
कुंडल मकर मुकुट सिर भ्राजा । कुटिल केस जनु मधुप समाजा ॥  
उर श्रीबत्स रुचिर बनमाला । पदिक हार भूषन मनिजाला ॥  
केहरि कंधर चारु जनेऊ । बाहु विभूषन सुंदर तेऊ ॥  
करि कर सरिस सुभग भुजदंडा । कटि निषंग कर सर कोदंडा ॥

दो० तडित बिनिंदक पीत पट उदर रेख बर तीनि ।

नाभि मनोहर लेति जनु जमुन भवेंर छबि छीनि ॥ 147

पद राजीव बरनि नहिं जाहीं । मुनि मन मधुप बसहिं जेन्ह माहीं ॥  
बाम भाग सोभति अनुकूला । आदिसक्ति छबिनिधि जगमूला ॥  
जासु अंस उपजहिं गुनखानी । अगनित लच्छि उमा ब्रह्मानी ॥  
भृकुटि बिलास जासु जग होई । राम बाम दिसि सीता सोई ॥  
छबिसमुद्र हरि रूप बिलोकी । एकटक रहे नयन पट रोकी ॥

चितवहिं सादर रूप अनूपा । तृप्ति न मानहिं मनु सतरूपा ॥  
 हरष बिबस तन दसा भुलानी । परे दंड इव गहि पद पानी ॥  
 सिर परसे प्रभु निज कर कंजा । तुरत उठाए करुनापुंजा ॥  
 दो० बोले कृपानिधान पुनि अति प्रसन्न मोहि जानि ।  
 मागहु बर जोइ भाव मन महादानि अनुमानि ॥ 148  
 सुनि प्रभु बचन जोरि जुग पानी । धरि धीरजु बोली मृदु बानी ॥  
 नाथ देखि पद कमल तुम्हारे । अब पूरे सब काम हमारे ॥  
 एक लालसा बड़ि उर माहीं । सुगम अगम कहि जाति सो नाही ॥  
 तुम्हहि देत अति सुगम गोसाईं । अगम लाग मोहि निज कृपनाईं ॥  
 जथा दरिद्र बिबुधतरु पाईं । बहु संपति मागत सकुचाईं ॥  
 तासु प्रभाउ जान नहिं सोई । तथा हृदयें मम संसय होई ॥  
 सो तुम्ह जानहु अंतरजामी । पुरवहु मोर मनोरथ स्वामी ॥  
 सकुच बिहाइ मागु नृप मोही । मोरें नहिं अदेय कछु तोही ॥  
 दो० दानि सिरोमनि कृपानिधि नाथ कहउँ सतिभाउ ।  
 चाहउँ तुम्हहि समान सुत प्रभु सन कवन दुराउ ॥ 149  
 देखि प्रीति सुनि बचन अमोले । एवमस्तु करुनानिधि बोले ॥  
 आपु सरिस खोजौं कहँ जाई । नृप तव तनय होब मैं आई ॥  
 सतरूपहि बिलोकि कर जोरें । देबि मागु बरु जो रुचि तोरें ॥  
 जो बरु नाथ चतुर नृप मागा । सोइ कृपाल मोहि अति प्रिय लागा ॥  
 प्रभु परंतु सुठि होति ढिठाई । जदपि भगत हित तुम्हहि सोहाई ॥  
 तुम्ह ब्रह्मादि जनक जग स्वामी । ब्रह्म सकल उर अंतरजामी ॥  
 अस समुझत मन संसय होई । कहा जो प्रभु प्रवान पुनि सोई ॥  
 जे निज भगत नाथ तव अहहीं । जो सुख पावहिं जो गति लहहीं ॥  
 दो० सोइ सुख सोइ गति सोइ भगति सोइ निज चरन सनेहु ।  
 सोइ बिबेक सोइ रहनि प्रभु हमहि कृपा करि देहु ॥ 150  
 सुनि मृदु गूढ रुचिर बर रचना । कृपासिंधु बोले मृदु बचना ॥  
 जो कछु रुचि तुम्हरे मन माहीं । मैं सो दीन्ह सब संसय नाही ॥  
 मातु बिबेक अलौकिक तोरें । कबहुँ न मिटिहि अनुग्रह मोरें ॥  
 बंदि चरन मनु कहेउ बहोरी । अवर एक बिनती प्रभु मोरी ॥  
 सुत बिषइक तव पद रति होऊ । मोहि बड़ मूढ़ कहै किन कोऊ ॥  
 मनि बिनु फनि जिमि जल बिनु मीना । मम जीवन तिमि तुम्हहि अधीना ॥  
 अस बरु मागि चरन गहि रहेऊ । एवमस्तु करुनानिधि कहेऊ ॥  
 अब तुम्ह मम अनुसासन मानी । बसहु जाइ सुरपति रजधानी ॥  
 सो० तहँ करि भोग बिसाल तात गएँ कछु काल पुनि ।  
 होइहहु अवध भुआल तब मैं होब तुम्हार सुत ॥ 151  
 इच्छामय नरबेष सँवारें । होइहउँ प्रगट निकेत तुम्हारें ॥  
 अंसन्ह सहित देह धरि ताता । करिहउँ चरित भगत सुखदाता ॥  
 जे सुनि सादर नर बड़भागी । भव तरिहहिं ममता मद त्यागी ॥  
 आदिसक्ति जेहिं जग उपजाया । सोउ अवतरिहि मोरि यह माया ॥  
 पुरउब मैं अभिलाष तुम्हारा । सत्य सत्य पन सत्य हमारा ॥  
 पुनि पुनि अस कहि कृपानिधाना । अंतरधान भए भगवाना ॥  
 दंपति उर धरि भगत कृपाला । तेहिं आश्रम निवसे कछु काला ॥  
 समय पाइ तनु तजि अनयासा । जाइ कीन्ह अमरावति बासा ॥  
 दो० यह इतिहास पुनीत अति उमहि कही बृषकेतु ।

भरद्वाज सुनु अपर पुनि राम जनम कर हेतु ॥ 152

मासपारायण, पौचवौ विश्राम

सुनु मुनि कथा पुनीत पुरानी । जो गिरिजा प्रति संभु बखानी ॥  
बिस्व बिदित एक कैकय देसू । सत्यकेतु तहँ बसइ नरेसू ॥  
धरम धुरंधर नीति निधाना । तेज प्रताप सील बलवाना ॥  
तेहि कै भए जुगल सुत बीरा । सब गुन धाम महा रनधीरा ॥  
राज धनी जो जेठ सुत आही । नाम प्रतापभानु अस ताही ॥  
अपर सुतहि अरिमर्दन नामा । भुजबल अतुल अचल संग्रामा ॥  
भाइहि भाइहि परम समीती । सकल दोष छल बरजित प्रीती ॥  
जेठे सुतहि राज नृप दीन्हा । हरि हित आपु गवन बन कीन्हा ॥

दो० जब प्रतापरबि भयउ नृप फिरी दोहाई देस ।

प्रजा पाल अति बेदबिधि कतहुँ नहीं अघ लेस ॥ 153

नृप हितकारक सचिव सयाना । नाम धरमरुचि सुक समाना ॥  
सचिव सयान बंधु बलबीरा । आपु प्रतापपुंज रनधीरा ॥  
सेन संग चतुरंग अपारा । अमित सुभट सब समर जुझारा ॥  
सेन बिलोकि राउ हरषाना । अरु बाजे गहगहे निसाना ॥  
बिजय हेतु कटकई बनाई । सुदिन साधि नृप चलेउ बजाई ॥  
जहँ तहँ परीं अनेक लराई । जीते सकल भूप बरिआई ॥  
सप्त दीप भुजबल बस कीन्हे । लै लै दंड छाड़ि नृप दीन्हे ॥  
सकल अविनि मंडल तेहि काला । एक प्रतापभानु महिपाला ॥

दो० स्वबस बिस्व करि बाहुबल निज पुर कीन्ह प्रबेसु ।

अरथ धरम कामादि सुख सेवइ समयँ नरेसु ॥ 154

भूप प्रतापभानु बल पाई । कामधेनु भै भूमि सुहाई ॥  
सब दुख बरजित प्रजा सुखारी । धरमसील सुंदर नर नारी ॥  
सचिव धरमरुचि हरि पद प्रीती । नृप हित हेतु सिखव नित नीती ॥  
गुर सुर संत पितर महिदेवा । करइ सदा नृप सब कै सेवा ॥  
भूप धरम जे बेद बखाने । सकल करइ सादर सुख माने ॥  
दिन प्रति देइ बिबिध बिधि दाना । सुनइ सास्त्र बर बेद पराना ॥  
नाना बापीं कूप तड़ागा । सुमन बाटिका सुंदर बागा ॥  
संतभवन सुरभवन सुहाए । सब तीरथन्ह बिचित्र बनाए ॥

दो० जहँ लागि कहे पुरान श्रुति एक एक सब जाग ।

बार सहठे सहठे नृप किए सहित अनुराग ॥ 155

हृदयँ न कछु फल अनुसंधाना । भूप बिबेकी परम सुजाना ॥  
करइ जे धरम करम मन बानी । बासुदेव अर्पित नृप ग्यानी ॥  
चढ़ि बर बाजि बार एक राजा । मृगया कर सब साजि समाजा ॥  
बिंध्याचल गभीर बन गयऊ । मृग पुनीत बहु मारत भयऊ ॥  
फिरत बिपिन नृप दीख बराहू । जनु बन दुरेउ ससिहि ग्रसि राहू ॥  
बड़ बिधि नहिं समात मुख माहीं । मनहुँ कोध बस उगिलत नाहीं ॥  
कोल कराल दसन छबि गाई । तनु बिसाल पीवर अधिकाई ॥  
घुरुघुरात हय आरौ पाएँ । चकित बिलोकत कान उठाएँ ॥

दो० नील महीधर सिखर सम देखि बिसाल बराहु ।

चपरि चलेउ हय सुटुकि नृप हॉकि न होइ निबाहु ॥ 156

आवत देखि अधिक रव बाजी । चलेउ बराह मरुत गति भाजी ॥

तुरत कीन्ह नृप सर संधाना । महि मिलि गयउ बिलोकत बाना ॥  
 तकि तकि तीर महीस चलावा । करि छल सुअर सरीर बचावा ॥  
 प्रगटत दुरत जाइ मृग भागा । रिस बस भूप चलेउ सँग लागा ॥  
 गयउ दूरि घन गहन बराहू । जहँ नाहिन गज बाजि निबाहू ॥  
 अति अकेल बन बिपल कलेसू । तदपि न मृग मग तजइ नरेसू ॥  
 कोल बिलोकि भूप बड़ धीरा । भागि पैठ गिरिगुहौ गभीरा ॥  
 अगम देखि नृप अति पछिताई । फिरेउ महाबन परेउ भुलाई ॥  
 दो० खेद खिन्न छुद्धित तृषित राजा बाजि समेत ।  
 खोजत ब्याकुल सरित सर जल बिनु भयउ अचेत ॥ 157  
 फिरत बिपिन आश्रम एक देखा । तहँ बस नृपति कपट मुनिबेषा ।  
 जासु देस नृप लीन्ह छड़ाई । समर सेन तजि गयउ पराई ॥  
 समय प्रतापभानु कर जानी । आपन अति असमय अनुमानी ॥  
 गयउ न गृह मन बहुत गलानी । मिला न राजहि नृप अभिमानी ॥  
 रिस उर मारि रंक जिमि राजा । बिपिन बसइ तापस केँ साजा ॥  
 तासु समीप गवन नृप कीन्हा । यह प्रतापरबि तेहिं तब चीन्हा ॥  
 राउ तृषित नहिं सो पहिचाना । देखि सुबेष महामुनि जाना ॥  
 उतरि तुरग तें कीन्ह प्रनामा । परम चतुर न कहेउ निज नामा ॥  
 दो० भूपति तृषित बिलोकि तेहिं सरबरु दीन्ह देखाइ ।  
 मज्जन पान समेत हय कीन्ह नृपति हरषाइ ॥ 158  
 गै श्रम सकल सुखी नृप भयऊ । निज आश्रम तापस लै गयऊ ॥  
 आसन दीन्ह अस्त रबि जानी । पुनि तापस बोलेउ मुदु बानी ॥  
 को तुम्ह कस बन फिरहु अकेलें । सुंदर जुबा जीव परहेलें ॥  
 चकबर्ति के लच्छन तोरें । देखत दया लागि अति मोरें ॥  
 नाम प्रतापभानु अवनीसा । तासु सचिव मैं सुनहु मुनीसा ॥  
 फिरत अहेरें परेउँ भुलाई । बड़े भाग देखेउँ पद आई ॥  
 हम कहँ दुर्लभ दरस तुम्हारा । जानत हौं कछु भल होनिहारा ॥  
 कह मुनि तात भयउ अंधिआरा । जोजन सत्तरि नगरु तुम्हारा ॥  
 दो० निसा घोर गंभीर बन पंथ न सुनहु सुजान ।  
 बसहु आजु अस जानि तुम्ह जाएहु होत बिहान ॥ 159 (क)  
 तुलसी जासि भवतब्यता तैसी मिलइ सहाइ ।  
 आपुनु आवइ ताहि पहिं ताहि तहाँ लै जाइ ॥ 159 (ख)  
 भलेहिं नाथ आयसु धरि सीसा । बोंधि तुरग तरु बैठ महीसा ॥  
 नृप बहु भौंति प्रसंसेउ ताही । चरन बंदि निज भाग्य सराही ॥  
 पुनि बोलेउ मृदु गिरा सुहाई । जानि पिता प्रभु करउँ ढिठाई ॥  
 मोहि मुनीस सुत सेवक जानी । नाथ नाम निज कहहु बखानी ॥  
 तेहि न जान नृप नृपहि सो जाना । भूप सुहृद सो कपट सयाना ॥  
 बैरी पुनि छत्री पुनि राजा । छल बल कीन्ह चहइ निज काजा ॥  
 समुझि राजसुख दुखित अराती । अवाँ अनल इव सुलगइ छाती ॥  
 सरल बचन नृप के सुनि काना । बयर सँभारि हृदयँ हरषाना ॥  
 दो० कपट बोरि बानी मृदुल बोलेउ जुगुति समेत ।  
 नाम हमार भिखारि अब निर्धन रहित निकेत ॥ 160  
 कह नृप जे बिग्यान निधाना । तुम्ह सारिखे गलित अभिमाना ॥  
 सदा रहहिं अपनपा दुराएँ । सब बिधि कुसल कुबेष बनाएँ ॥  
 तेहि तें कहहिं संत श्रुति टेरेँ । परम अकिंचन प्रिय हरि केरेँ ॥

तुम्ह सम अधन भिखारि अगेहा । होत बिरंचि सिवहि संदेहा ॥  
 जोसि सोसि तव चरन नमामी । मो पर कृपा करिअ अब स्वामी ॥  
 सहज प्रीति भूपति कै देखी । आपु बिषय बिस्वास बिसेषी ॥  
 सब प्रकार राजहि अपनाई । बोलेउ अधिक सनेह जनाई ॥  
 सुनु सतिभाउ कहउँ महिपाला । इहाँ बसत बीते बहु काला ॥  
 दो० अब लगि मोहि न मिलेउ कोउ मैं न जनावउँ काहु ।  
 लोकमान्यता अनल सम कर तप कानन दाहु ॥ 161 (क)  
 सो० तुलसी देखि सुबेषु भूलहिं मूढ न चतुर नर ।  
 सुंदर केकिहि पेखु बचन सुधा सम असन अहि ॥ 161 (ख)  
 तातें गुपुत रहउँ जग माहीं । हरि तजि किमपि प्रयोजन नाहीं ॥  
 प्रभु जानत सब बिनहिं जनाएँ । कहहु कवनि सिधि लोक रिझाएँ ॥  
 तुम्ह सुचि सुमति परम प्रिय मोरें प्रीति प्रतीति मोहि पर तारें ॥  
 अब जौ तात दुरावउँ तोही । दारुन दोष घटइ अति मोही ॥  
 जिमि जिमि तापसु कथइ उदासा । तिमि तिमि नृपहि उपज बिस्वासा ॥  
 देखा स्वबस कर्म मन बानी । तब बोला तापस बगध्यानी ॥  
 नाम हमार एकतनु भाई । सुनि नृप बोलेउ पुनि सिरु नाई ॥  
 कहहु नाम कर अरथ बखानी । मोहि सेवक अति आपन जानी ॥  
 दो० आदिसृष्टि उपजी जबहिं तब उत्पति भै मोरि ।  
 नाम एकतनु हेतु तेहि देह न धरी बहोरि ॥ 162  
 जनि आचरजु करहु मन माहीं । सुत तप तें दुर्लभ कछु नाहीं ॥  
 तपबल तें जग सृजइ बिधाता । तपबल बिष्नु भए परित्राता ॥  
 तपबल संभु करहिं संघारा । तप तें अगम न कछु संसारा ॥  
 भयउ नृपहि सुनि अति अनुरागा । कथा पुरातन कहै सो लागा ॥  
 करम धरम इतिहास अनेका । करइ निरूपन बिरति बिबेका ॥  
 उदभव पालन प्रलय कहानी । कहेसि अमित आचरज बखानी ॥  
 सुनि महीप तापस बस भयऊ । आपन नाम कहन तब लयऊ ॥  
 कह तापस नृप जानउँ तोही । कीन्हेहु कपट लाग भल मोही ॥  
 सो० सुनु महीस असि नीति जहँ तहँ नाम न कहहिं नृप ।  
 मोहि तोहि पर अति प्रीति सोइ चतुरता बिचारि तव ॥ 163  
 नाम तुम्हार प्रताप दिनेसा । सत्यकेतु तव पिता नरेसा ॥  
 गुर प्रसाद सब जानिअ राजा । कहिअ न आपन जानि अकाजा ॥  
 देखि तात तव सहज सुधाई । प्रीति प्रतीति नीति निपुनाई ॥  
 उपजि परी ममता मन मोरें । कहउँ कथा निज पूछे तोरें ॥  
 अब प्रसन्न मैं संसय नाहीं । मागु जो भूप भाव मन माहीं ॥  
 सुनि सुबचन भूपति हरषाना । गहि पद बिनय कीन्हि बिधि नाना ॥  
 कृपासिंधु मुनि दरसन तोरें । चारि पदारथ करतल मोरें ॥  
 प्रभुहि तथापि प्रसन्न बिलोकी । मागि अगम बर होउँ असोकी ॥  
 दो० जरा मरन दुख रहित तनु समर जितै जनि कोउ ।  
 एकछत्र रिपुहीन महि राज कलप सत होउ ॥ 164  
 कह तापस नृप ऐसेइ होऊ । कारन एक कठिन सुनु सोऊ ॥  
 कालउ तुअ पद नाइहि सीसा । एक बिप्रकुल छाड़ि महीसा ॥  
 तपबल बिप्र सदा बरिआरा । तिन्ह के कोप न कोउ रखवारा ॥  
 जौ बिप्रन्ह बस करहु नरेसा । तौ तुअ बस बिधि बिष्नु महेसा ॥  
 चल न ब्रह्मकुल सन बरिआई । सत्य कहउँ दोउ भुजा उठाई ॥

बिप्र श्राप बिनु सुनु महिपाला । तोर नास नहिं कवनेहुँ काला ॥  
 हरषेउ राउ बचन सुनि तासू । नाथ न होइ मोर अब नासू ॥  
 तव प्रसाद प्रभु कृपानिधाना । मो कहूँ सर्ब काल कल्याना ॥  
 दो० एवमस्तु कहि कपटमुनि बोला कुटिल बहोरि ।  
 मिलब हमार भुलाब निज कहहु त हमहि न खोरि ॥ 165  
 तातें मैं तोहि बरजउँ राजा । कहै कथा तव परम अकाजा ॥  
 छठें श्रवन यह परत कहानी । नाम तुम्हार सत्य मम बानी ॥  
 यह प्रगटें अथवा द्विजश्रापा । नास तोर सुनु भानुप्रतापा ॥  
 आन उपायें निधन तव नाहीं । जाँ हरि हर कोपहिं मन माहीं ॥  
 सत्य नाथ पद गहि नृप भाषा । द्विज गुर कोप कहहु को राखा ॥  
 राखइ गुर जाँ कोप बिधाता । गुर बिरोध नहिं कोउ जग त्राता ॥  
 जाँ न चलब हम कहे तुम्हारें । होउ नास नहिं सोच हमारें ॥  
 एकहिं डर डरपत मन मोरा । प्रभु महिदेव श्राप अति घोरा ॥  
 दो० होहिं बिप्र बस कवन बिधि कहहु कृपा करि सोउ ।  
 तुम्ह तजि दीनदयाल निज हितू न देखउँ कोउ ॥ 166  
 सुनु नृप बिबिध जतन जग माहीं । कष्टसाध्य पुनि होहिं कि नाहीं ॥  
 अहइ एक अति सुगम उपाई । तहाँ परंतु एक कठिनाई ॥  
 मम आधीन जुगुति नृप सोई । मोर जाब तव नगर न होई ॥  
 आजु लगें अरु जब तें भयऊँ । काहू के गृह ग्राम न गयऊँ ॥  
 जाँ न जाउँ तव होइ अकाजू । बना आइ असमंजस आजू ॥  
 सुनि महीस बोलेउ मृदु बानी । नाथ निगम असि नीति बखानी ॥  
 बड़े सनेह लघुन्ह पर करहीं । गिरि निज सिरनि सदा तून धरहीं ॥  
 जलधि अगाध मौलि बह फेनू । संतत धरनि धरत सिर रेनू ॥  
 दो० अस कहि गहे नरेस पद स्वामी होहु कृपाल ।  
 मोहि लागि दुख सहिअ प्रभु सज्जन दीनदयाल ॥ 167  
 जानि नृपहि आपन आधीना । बोला तापस कपट प्रबीना ॥  
 सत्य कहउँ भूपति सुनु तोही । जग नाहिन दुर्लभ कछु मोही ॥  
 अवसि काज मैं करिहउँ तोरा । मन तन बचन भगत तैं मोरा ॥  
 जोग जुगुति तप मंत्र प्रभाऊ । फलइ तबहिं जब करिअ दुराऊ ॥  
 जाँ नरेस मैं करौँ रसोई । तुम्ह परुसहु मोहि जान न कोई ॥  
 अन्न सो जोइ जोइ भोजन करई । सोइ सोइ तव आयसु अनुसरई ॥  
 पुनि तिन्ह के गृह जेवैइ जोऊ । तव बस होइ भूप सुनु सोऊ ॥  
 जाइ उपाय रचहु नृप एहू । संबत भरि संकलप करेहू ॥  
 दो० नित नूतन द्विज सहस सत बरेहु सहित परिवार ।  
 मैं तुम्हरे संकलप लागि दिनहिं करबि जेवनार ॥ 168  
 एहि बिधि भूप कष्ट अति थोरें । होइहहिं सकल बिप्र बस तोरें ॥  
 करिहहिं बिप्र होम मख सेवा । तेहिं प्रसंग सहजेहिं बस देवा ॥  
 और एक तोहि कहउँ लखाऊ । मैं एहिं बेष न आउब काऊ ॥  
 तुम्हरे उपरोहित कहूँ राया । हरि आनब मैं करि निज माया ॥  
 तपबल तेहि करि आपु समाना । रखिहउँ इहाँ बरष परवाना ॥  
 मैं धरि तासु बेषु सुनु राजा । सब बिधि तोर सँवारब काजा ॥  
 गै निसि बहुत सयन अब कीजे । मोहि तोहि भूप भेंट दिन तीजे ॥  
 मैं तपबल तोहि तुरग समेता । पहुँचैहउँ सोवतहि निकेता ॥  
 दो० मैं आउब सोइ बेषु धरि पहिचानेहु तब मोहि ।

जब एकांत बोलाइ सब कथा सुनावौं तोहि ॥ 169

सयन्ह कीन्ह नृप आयसु मानी । आसन जाइ बैठ छलग्यानी ॥  
श्रमित भूप निद्रा अति आई । सो किमि सोव सोच अधिकाई ॥  
कालकेतु निसिचर तहँ आवा । जेहिं सूकर होइ नृपहि भुलावा ॥  
परम मित्र तापस नृप केरा । जानइ सो अति कपट घनेरा ॥  
तेहि के सत सुत अरु दस भाई । खल अति अजय देव दुखदाई ॥  
प्रथमहिं भूप समर सब मारे । बिप्र संत सुर देखि दुखारे ॥  
तेहिं खल पाछिल बयरु सँभारा । तापस नृप मिलि मंत्र बिचारा ॥  
जेहिं रिपु छय सोइ रचेन्हि उपाऊ । भावी बस न जान कछु राऊ ॥

दो० रिपु तेजसी अकेल अपि लघु करि गनिअ न ताहु ।

अजहुँ देत दुख रबि ससिहि सिर अवसेषित राहु ॥ 170

तापस नृप निज सखहि निहारी । हरषि मिलेउ उठि भयउ सुखारी ॥  
मित्रहि कहि सब कथा सुनाई । जातुधान बोला सुख पाई ॥  
अब साधेउँ रिपु सुनहु नरेसा । जौं तुम्ह कीन्ह मोर उपदेसा ॥  
परिहरि सोच रहहु तुम्ह सोई । बिनु औषध बिआधि बिधि खोई ॥  
कुल समेत रिपु मूल बहाई । चौथेँ दिवस मिलब मैं आई ॥  
तापस नृपहि बहुत परितोषी । चला महाकपटी अतिराषी ॥  
भानुप्रतापहि बाजि समेता । पहुँचाएसि छन माझ निकेता ॥  
नृपहि नारि पहिं सयन कराई । हयगृहँ बॉधेसि बाजि बनाई ॥

दो० राजा के उपरोहितहि हरि लै गयउ बहोरि ।

लै राखेसि गिरि खोह महुँ मायौं करि मति भोरि ॥ 171

आपु बिरचि उपरोहित रूपा । परेउ जाइ तेहि सेज अनूपा ॥  
जागेउ नृप अनभएँ बिहाना । देखि भवन अति अचरजु माना ॥  
मुनि महिमा मन महुँ अनुमानी । उठेउ गवँहि जेहिं जान न रानी ॥  
कानन गयउ बाजि चढ़ि तेहीं । पुर नर नारि न जानेउ केहीं ॥  
गएँ जाम जुग भूपति आवा । घर घर उत्सव बाज बधावा ॥  
उपरोहितहि देख जब राजा । चकित बिलोक सुमिरि सोइ काजा ॥  
जुग सम नृपहि गए दिन तीनी । कपटी मुनि पद रह मति लीनी ॥  
समय जानि उपरोहित आवा । नृपहि मते सब कहि समुझावा ॥

दो० नृप हरषेउ पहिचानि गुरु भ्रम बस रहा न चेत ।

बरे तुरत सत सहस बर बिप्र कुटुंब समेत ॥ 172

उपरोहित जेवनार बनाई । छरस चारि बिधि जसि श्रुति गाई ॥  
मायामय तेहिं कीन्हि रसोई । बिंजन बहु गनि सकइ न कोई ॥  
बिबिध मृगन्ह कर आमिष रॉधा । तेहि महुँ बिप्र मॉसु खल सॉधा ॥  
भोजन कहुँ सब बिप्र बोलाए । पद पखारि सादर बैठाए ॥  
परुसन जबहिं लाग महिपाला । भै अकासबानी तेहि काला ॥  
बिप्रबृंद उठि उठि गृह जाहू । है बड़ि हानि अन्न जनि खाहू ॥  
भयउ रसोई भूसुर मॉसू । सब द्विज उठे मानि बिस्वासू ॥  
भूप बिकल मति मोहँ भुलानी । भावी बस न आव मुख बानी ॥

दो० बोले बिप्र सकोप तब नहिं कछु कीन्ह बिचार ।

जाइ निसाचर होहु नृप मूढ़ सहित परिवार ॥ 173

छत्रबंधु तैं बिप्र बोलाई । घालै लिए सहित समुदाई ॥  
ईस्वर राखा धरम हमारा । जैहसि तैं समेत परिवारा ॥  
संबत मध्य नास तव होऊ । जलदाता न रहिहि कुल कोऊ ॥

नृप सुनि श्राप बिकल अति त्रासा । भै बहोरि बर गिरा अकासा ॥  
 बिप्रहु श्राप बिचारि न दीन्हा । नहिं अपराध भूप कछु कीन्हा ॥  
 चकित बिप्र सब सुनि नभबानी । भूप गयउ जहें भोजन खानी ॥  
 तहें न असन नहिं बिप्र सुआरा । फिरेउ राउ मन सोच अपारा ॥  
 सब प्रसंग महिसुरन्ह सुनाई । त्रसित परेउ अवनीं अकुलाई ॥  
 दो० भूपति भावी मिटइ नहिं जदपि न दूषन तोर ।  
 किऐं अन्यथा होइ नहिं बिप्रश्राप अति घोर ॥ 174  
 अस कहि सब महिदेव सिधाए । समाचार पुरलोगन्ह पाए ॥  
 सोचहिं दूषन दैवहि देहीं । बिरचत हंस काग किय जेहीं ॥  
 उपरोहितहि भवन पहुँचाई । असुर तापसहि खबरि जनाई ॥  
 तेहिं खल जहें तहें पत्र पठाए । सजि सजि सेन भूप सब धाए ॥  
 घेरेन्हि नगर निसान बजाई । बिबिध भौंति नित होइ लराई ॥  
 जूझे सकल सुभट करि करनी । बंधु समेत परेउ नृप धरनी ॥  
 सत्यकेतु कुल कोउ नहि बौंचा । बिप्रश्राप किमि होइ असौंचा ॥  
 रिपु जिति सब नृप नगर बसाई । निज पुर गवने जय जसु पाई ॥  
 दो० भरद्वाज सुनु जाहि जब होइ बिधाता बाम ।  
 धूरि मेरुसम जनक जम ताहि ब्यालसम दाम ॥ 175  
 काल पाइ मुनि सुनु सोइ राजा । भयउ निसाचर सहित समाजा ॥  
 दस सिर ताहि बीस भुजदंडा । रावन नाम बीर बरिबंडा ॥  
 भूप अनुज अरिमर्दन नामा । भयउ सो कुंभकरन बलधामा ॥  
 सचिव जो रहा धरमरुचि जासू । भयउ बिमात्र बंधु लघु तासू ॥  
 नाम बिभीषन जेहि जग जाना । बिष्णुभगत बिग्यान निधाना ॥  
 रहे जे सुत सेवक नृप केरे । भए निसाचर घोर घनेरे ॥  
 कामरूप खल जिनस अनेका । कुटिल भयंकर बिगत बिबेका ॥  
 कृपा रहित हिंसक सब पापी । बरनि न जाहिं बिस्व परितापी ॥  
 दो० उपजे जदपि पुलस्त्यकुल पावन अमल अनूप ।  
 तदपि महीसुर श्राप बस भए सकल अघरूप ॥ 176  
 कीन्ह बिबिध तप तीनिहुँ भाई । परम उग्र नहिं बरनि सो जाई ॥  
 गयउ निकट तप देखि बिधाता । मागहु बर प्रसन्न मैं ताता ॥  
 करि बिनती पद गहि दससीसा । बोलेउ बचन सुनहु जगदीसा ॥  
 हम काहू के मरहिं न मारें । बानर मनुज जाति दुइ बारें ॥  
 एवमस्तु तुम्ह बड़ तप कीन्हा । मै ब्रह्माँ मिलि तेहि बर दीन्हा ॥  
 पुनि प्रभु कुंभकरन पहिं गयऊ । तेहि बिलोकि मन बिसमय भयऊ ॥  
 जौं एहिं खल नित करब अहारू । होइहि सब उजारि संसारू ॥  
 सारद प्रेरि तासु मति फेरी । मागेसि नीद मास षट केरी ॥  
 दो० गए बिभीषन पास पुनि कहेउ पुत्र बर मागु ।  
 तेहिं मागेउ भगवंत पद कमल अमल अनुरागु ॥ 177  
 तिन्हहि देइ बर ब्रह्म सिधाए । हरषित ते अपने गृह आए ॥  
 मय तनुजा मंदोदरि नामा । परम सुंदरी नारि ललामा ॥  
 सोइ मयें दीन्हि रावनहि आनी । होइहि जातुधानपति जानी ॥  
 हरषित भयउ नारि भलि पाई । पुनि दोउ बंधु बिआहेसि जाई ॥  
 गिरि त्रिकूट एक सिंधु मझारी । कनक रचित दुर्गम अति भारी ॥  
 सोइ मय दानवें बहुरि सँवारा । कनक रचित मनिभवन अपारा ॥  
 भोगावति जसि अहिकुल बासा । अमरावति जसि सकनिवासा ॥

तिन्ह तें अधिक रम्य अति बंका । जग बिख्यात नाम तेहि लंका ॥  
दो० खाई सिंधु गभीर अति चारिहुँ दिसि फिरि आव ।

कनक कोट मनि खचित दृढ़ बरनि न जाइ बनाव ॥ 178 (क)

हरि प्रेरित जेहिं कलप जोइ जातुधानपति होइ ।

सूर प्रतापी अतुलबल दल समेत बस सोइ ॥ 178 (ख)

रहे तहाँ निसिचर भट भारे । ते सब सुरन्ह समर संघारे ॥

अब तहँ रहहिं सक के प्रेरे । रच्छक कोटि जच्छपति केरे ॥

दसमुख कतहुँ खबरि असि पाई । सेन साजि गढ़ घेरेसि जाई ॥

देखि बिकट भट बड़ि कटकाई । जच्छ जीव लै गए पराई ॥

फिरि सब नगर दसानन देखा । गयउ सोच सुख भयउ बिसेषा ॥

सुंदर सहज अगम अनुमानी । कीन्हि तहाँ रावन रजधानी ॥

जेहि जस जोग बॉटि गृह दीन्हे । सुखी सकल रजनीचर कीन्हे ॥

एक बार कुबेर पर धावा । पुष्पक जान जीति लै आवा ॥

दो० कौतुकहीं कैलास पुनि लीन्हेसि जाइ उठाइ ।

मनहुँ तौलि निज बाहुबल चला बहुत सुख पाइ ॥ 179

सुख संपति सुत सेन सहाई । जय प्रताप बल बुद्धि बड़ाई ॥

नित नूतन सब बाढ़त जाई । जिमि प्रतिलाभ लोभ अधिकाई ॥

अतिबल कुंभकरन अस भ्राता । जेहि कहुँ नहिं प्रतिभट जग जाता ॥

करइ पान सोवइ षट मासा । जागत होइ तिहुँ पुर त्रासा ॥

जौं दिन प्रति अहार कर सोई । बिस्व बेगि सब चौपट होई ॥

समर धीर नहिं जाइ बखाना । तेहि सम अभित बीर बलवाना ॥

बारिदनाद जेठ सुत तासू । भट महुँ प्रथम लीक जग जासू ॥

जेहिं न होइ रन सनमुख कोई । सुरपुर नितहिं परावन होई ॥

दो० कुमुख अकंपन कुलिसरद धूमकेतु अतिकाय ।

एक एक जग जीति सक ऐसे सुभट निकाय ॥ 180

कामरूप जानहिं सब माया । सपनेहुँ जिन्ह कें धरम न दाया ॥

दसमुख बैठ सभौं एक बारा । देखि अमित आपन परिवारा ॥

सुत समूह जन परिजन नाती । गनै को पार निसाचर जाती ॥

सेन बिलोकि सहज अभिमानी । बोला बचन कोध मद सानी ॥

सुनहु सकल रजनीचर जूथा । हमरे बैरी बिबुध बरूथा ॥

ते सनमुख नहिं करहिं लराई । देखि सबल रिपु जाहिं पराई ॥

तेन्ह कर मरन एक बिधि होई । कहउं बुझाइ सुनहु अब सोई ॥

द्विजभोजन मख होम सराधा । सब कै जाइ करहु तुम्ह बाधा ॥

दा० छुधा छीन बलहीन सुर सहजेहिं मिलिहहिं आइ ।

तब मारिहउं कि छाड़िहउं भली भाँति अपनाइ ॥ 181

मेघनाद कहुँ पुनि हँकरावा । दीन्ही सिख बलु बयरु बढावा ॥

जे सुर समर धीर बलवाना । जिन्ह कें लरिबे कर अभिमाना ॥

तिन्हहि जीति रन आनेसु बाँधी । उठि सुत पित, अनुसासन कौंधी ॥

एहि बिधि सबही अग्या दीन्ही । आपुनु चलेउ गदा कर लीन्ही ॥

चलत दसानन डोलति अवनी । गर्जत गर्भ ०वहिं सुर रवनी ॥

रावन आवत सुनेउ सकोहा । देवन्ह तके मेरु गिरि खोहा ॥

दिगपालन्ह के लोक सुहाए । सूने सकल दसानन पाए ॥

पुनि पुनि सिंधनाद करि भारी । देइ देवतन्ह गारि पचारी ॥

रन मद मत्त फिरइ जग धावा । प्रतिभट खोजत कतहुँ न पावा ॥  
 रबि ससि पवन बरुन धनधारी । अग्नि काल जम सब अधिकारी ॥  
 किंनर सिद्ध मनुज सुर नागा । हठि सबही के पंथहिं लागा ॥  
 ब्रह्मसृष्टि जहँ लागि तनुधारी । दसमुख बसबर्ती नर नारी ॥  
 दो० भुजबल बिस्व बस्य करि राखेसि कोउ न सुतंत्र ।  
 मंडलीक मनि रावन राज करइ निज मंत्र ॥ 182 (क)  
 देव जच्छ गंधर्ब नर किंनर नाग कुमारि ।  
 जीति बरीं निज बाहुबल बहु सुंदर बर नारि ॥ 182 (ख)  
 इंद्रजीत सन जो कछु कहेऊ । सो सब जनु पहिलेहिं करि रहेऊ ॥  
 प्रथमहिं जिन्ह कहुँ आयसु दीन्हा । तिन्ह कर चरित सुनहु जो कीन्हा ॥  
 देखत भीमरूप सब पापी । निसिचर निकर देव परितापी ॥  
 करहिं उपद्रव असुर निकाया । नाना रूप धरहिं करि माया ॥  
 जेहि बिधि होइ धर्म निर्मूला । सो सब करहिं बेद प्रतिकूला ॥  
 जेहिं जेहिं देस धेनु द्विज पावहिं । नगर गाउँ पुर आगि लगावहिं ॥  
 सुभ आचरन कतहुँ नहिं होई । देव संत गुरु मान न कोई ॥  
 नहिं हरिभगति जग्य तप ग्याना । सपनेहुँ सुनिअ न बेद पुराना ॥  
 छ० जप जोग बिरागा तप मख भागा श्रवन सुनइ दससीसा ।  
 आपुनु उठि धावइ रहै न पावइ धरि सब घालइ खीसा ॥  
 अस भ्रष्ट अचारा भा संसारा धर्म सुनिअ नहिं काना ।  
 तेहि बहुबिधि त्रासइ देस निकासइ जो कह बेद पुराना ॥  
 सो० बरनि न जाइ अनीति घोर निसाचर जो करहिं ।  
 हिंसा पर अति प्रीति तिन्ह के पापहि कवनि मिति ॥ 183  
 मासपारायण, छठा विश्राम  
 बाढ़े खल बहु चोर जुआरा । जे लंपट परधन परदारा ॥  
 मानहिं मातु पिता नहिं देवा । साधुन्ह सन करवावहिं सेवा ॥  
 जिन्ह के यह आचरन भवानी । ते जानेहु निसिचर सब प्रानी ॥  
 अतिसय देखि धर्म कै ग्लानी । परम सभित धरा अकुलानी ॥  
 गिरि सरि सिंधु भार नहिं मोही । जस मोहि गरुअ एक परद्रोही ॥  
 सकल धर्म देखइ बिपरीता । कहि न सकइ रावन भय भीता ॥  
 धेनु रूप धरि हृदयँ बिचारी । गई तहाँ जहँ सुर मुनि झारी ॥  
 निज संताप सुनाएसि रोई । काहू तें कछु काज न होई ॥  
 छ० सुर मुनि गंधर्बा मिलि करि सर्बा गे बिरंचि के लोका ।  
 सँग गोतनुधारी भूमि बिचारी परम बिकल भय सोका ॥  
 ब्रह्मा सब जाना मन अनुमाना मोर कछू न बसाई ।  
 जा करि तें दासी सो अबिनासी हमरेउ तोर सहाई ॥  
 सो० धरनि धरहि मन धीर कह बिरंचि हरिपद सुमिरु ।  
 जानत जन की पीर प्रभु भंजिहि दारुन बिपति ॥ 184  
 बैठे सुर सब करहिं बिचारा । कहँ पाइअ प्रभु करिअ पुकारा ॥  
 पुर बैकुंठ जान कह कोई । कोउ कह पयनिधि बस प्रभु सोई ॥  
 जाके हृदयँ भगति जसि प्रीती । प्रभु तहँ प्रगट सदा तेहिं रीती ॥  
 तेहिं समाज गिरिजा मैं रहेऊँ । अवसर पाइ बचन एक कहेऊँ ॥  
 हरि व्यापक सर्वत्र समाना । प्रेम तें प्रगट होहिं मैं जाना ॥  
 देस काल दिसि बिदिसिहु माहीं । कहहु सो कहों जहाँ प्रभु नाहीं ॥  
 अग जगमय सब रहित बिरागी । प्रेम तें प्रभु प्रगटइ जिमि आगी ॥

मोर बचन सब के मन माना । साधु साधु करि ब्रह्म बखाना ॥  
 दो० सुनि बिरंचि मन हरष तन पुलकि नयन बह नीर ।  
 अस्तुति करत जोरि कर सावधान मतिधीर ॥ 185  
 छ० जय जय सुरनायक जन सुखदायक प्रनतपाल भगवंता ।  
 गो सुर हितकारी जय असुरारी सिंधुसुता प्रिय कंता ॥  
 पालन सुर धरनी अद्भुत करनी मरम न जानइ कोई ।  
 जो सहज कृपाला दीनदयाला करउ अनुग्रह सोई ॥  
 जय जय अबिनासी सब घट बासी ब्यापक परमानंदा ।  
 अबिगत गोतीतं चरित पुनीतं मायारहित मुकंदा ॥  
 जेहि लागि बिरागी अति अनुरागी बिगतमोह मुनिबुंदा ।  
 निसि बासर ध्यावहिं गुन गन गावहिं जयति सच्चिदानंदा ॥  
 जेहिं सृष्टि उपाई त्रिबिध बनाई संग सहाय न दूजा ।  
 सो करउ अधारी चिंत हमारी जानिअ भगति न पूजा ॥  
 जो भव भय भंजन मुनि मन रंजन गंजन बिपति बरूथा ।  
 मन बच कम बानी छाड़ि सयानी सरन सकल सुर जूथा ॥  
 सारद श्रुति सेषा रिषय असेषा जा कहूँ कोउ नहिं जाना ।  
 जेहि दीन पिआरे बेद पुकारे द्रवउ सो श्रीभगवाना ॥  
 भव बारिधि मंदर सब बिधि सुंदर गुनमंदिर सुखपुंजा ।  
 मुनि सिद्ध सकल सुर परम भयातुर नमत नाथ पद कंजा ॥  
 दो० जानि सभय सुरभूमि सुनि बचन समेत सनेह ।  
 गगनगिरा गंभीर भइ हरनि सोक संदेह ॥ 186  
 जनि डरपहु मुनि सिद्ध सुरेसा । तुम्हहि लागि धरिहउं नर बेसा ॥  
 अंसन्ह सहित मनुज अवतारा । लेहउं दिनकर बंस उदारा ॥  
 कस्यप अदिति महातप कीन्हा । तिन्ह कहूँ मैं पूरब बर दीन्हा ॥  
 ते दसरथ कौसल्या रूपा । कोसलपुरीं प्रगट नरभूपा ॥  
 तिन्ह केँ गृह अवतरिहउं जाई । रघुकुल तिलक सो चारिउ भाई ॥  
 नारद बचन सत्य सब करिहउं । परम सक्ति समेत अवतरिइउं ॥  
 हरिहउं सकल भूमि गरुआई । निर्भय होहु देव समुदाई ॥  
 तब ब्रह्माँ धरनिहि समुझावा । अभय भई भरोस जियेँ आवा ॥  
 दो० निज लोकहि बिरंचि गे देवन्ह इहइ सिखाइ ।  
 बानर तनु धरि धरि महि हरि पद सेवहु जाइ ॥ 187  
 गए देव सब निज निज धामा । भूमि सहित मन कहूँ विश्रामा ॥  
 जो कछु आयसु ब्रह्माँ दीन्हा । हरषे देव बिलंब न कीन्हा ॥  
 बनचर देह धरी छिति माहीं । अतुलित बल प्रताप तिन्ह पाहीं ॥  
 गिरि तरु नख आयुध सब बीरा । हरि मारग चितवहिं मतिधीरा ॥  
 गिरि कानन जहँ तहँ भरि पूरी । रहे निज निज अनीक रचि रूरी ॥  
 यह सब रुचिर चरित मैं भाषा । अब सो सुनहु जो बीचहिं राखा ॥  
 अवधपुरीं रघुकुलमनि राऊ । बेद बिदित तेहि दसरथ नाऊँ ॥  
 धरम धुरंधर गुननिधि ग्यानी । हृदयें भगति मति सारेंगपानी ॥  
 दो० कौसल्यादि नारि प्रिय सब आचरन पुनीत ।  
 पति अनुकूल प्रेम दृढ हरि पद कमल बिनीत ॥ 188  
 एक बार भूपति मन माहीं । भै गलानि मोरें सुत नाहीं ॥  
 गुर गृह गयउ तुरत महिपाला । चरन लागि करि बिनय बिसाला ॥  
 निज दुख सुख सब गुरहि सुनायउ । कहि बसिष्ठ बहुबिधि समुझायउ ॥

धरहु धीर होइहहिं सुत चारी । त्रिभुवन बिदित भगत भय हारी ॥  
 सृंगी रिषिहि बसिष्ठ बोलावा । पुत्रकाम सुभ जग्य करावा ॥  
 भगति सहित मुनि आहुति दीन्हें । प्रगटे अग्नि चरु कर लीन्हें ॥  
 जो बसिष्ठ कछु हृदयें बिचारा । सकल काजु भा सिद्ध तुम्हारा ॥  
 यह हबि बाँटि देहु नृप जाई । जथा जोग जेहि भाग बनाई ॥  
 दो० तब अदृश्य भए पावक सकल सभहि समुझाइ ।  
 परमानंद मगन नृप हरष न हृदयें समाइ ॥ 189  
 तबहिं रायें प्रिय नारि बोलाई । कौसल्यादि तहाँ चलि आई ॥  
 अर्ध भाग कौसल्यहि दीन्हा । उभय भाग आधे कर कीन्हा ॥  
 कैकेई कहें नृप सो दयऊ । रह्यो सो उभय भाग पुनि भयऊ ॥  
 कौसल्या कैकेई हाथ धरि । दीन्ह सुमित्रहि मन प्रसन्न करि ॥  
 एहि बिधि गर्भसहित सब नारी । भई हृदयें हरषित सुख भारी ॥  
 जा दिन तें हरि गर्भहिं आए । सकल लोक सुख संपति छाप ॥  
 मंदिर महें सब राजहिं रानीं । सोभा सील तेज की खानीं ॥  
 सुख जुत कछुक काल चलि गयऊ । जेहिं प्रभु प्रगट सो अवसर भयऊ ॥  
 दो० जोग लगन ग्रह बार तिथि सकल भए अनुकूल ।  
 चर अरु अचर हर्षजुत राम जनम सुखमूल ॥ 190  
 नौमी तिथि मधु मास पुनीता । सुकल पच्छ अभिजित हरिप्रीता ॥  
 मध्यदिवस अति सीत न घामा । पावन काल लोक बिश्रामा ॥  
 सीतल मंद सुरभि बह बाऊ । हरषित सुर संतन मन चाऊ ॥  
 बन कुसुमित गिरिगन मनिआरा । ०वहिं सकल सरितामृतधारा ॥  
 सो अवसर बिरंचि जब जाना । चले सकल सुर साजि बिमाना ॥  
 गगन बिमल संकुल सुर जूथा । गावहिं गुन गंधर्ब बरूथा ॥  
 बरषहिं सुमन सुअंजुलि साजी । गहगहि गगन दुंदुभी बाजी ॥  
 अस्तुति करहिं नाग मुनि देवा । बहुबिधि लावहिं निज निज सेवा ॥  
 दो० सुर समूह बिनती करि पहुँचे निज निज धाम ।  
 जगनिवास प्रभु प्रगटे अखिल लोक बिश्राम ॥ 191  
 छ० भए प्रगट कृपाला दीनदयाला कौसल्या हितकारी ।  
 हरषित महतारी मुनि मन हारी अद्भुत रूप बिचारी ॥  
 लोचन अभिरामा तनु घनस्यामा निज आयुध भुज चारी ।  
 भूषन बनमाला नयन बिसाला सोभासिंधु खरारी ॥  
 कह दुइ कर जोरी अस्तुति तोरी केहि बिधि करौं अनंता ।  
 माया गुन ग्यानातीत अमाना बेद पुरान भनंता ॥  
 करुना सुख सागर सब गुन आगर जेहि गावहिं श्रुति संता ।  
 सो मम हित लागी जन अनुरागी भयउ प्रगट श्रीकंता ॥  
 ब्रह्मांड निकाया निर्मित माया रोम रोम प्रति बेद कहै ।  
 मम उर सो बासी यह उपहासी सुनत धीर मति थिर न रहै ॥  
 उपजा जब ग्याना प्रभु मुसुकाना चरित बहुत बिधि कीन्ह चहै ।  
 कहि कथा सुहाई मातु बुझाई जेहि प्रकार सुत प्रेम लहै ॥  
 माता पुनि बोली सो मति डोली तजहु तात यह रूपा ।  
 कीजै सिसुलीला अति प्रियसीला यह सुख परम अनूपा ॥  
 सुनि बचन सुजाना रोदन ठाना होइ बालक सुरभूपा ।  
 यह चरित जे गावहिं हरिपद पावहिं ते न परहिं भवकूपा ॥

दो0 धरनि धेनु सुर संत हित लीन्ह विविध अवतार ।  
 निज इच्छा निर्मित तनु माया गुन गो पार ॥ 192  
 सुनि सिसु रुदन परम प्रिय बानी । संभ्रम चलि आई सब रानी ॥  
 हरषित जहँ तहँ धाई दासी । आनँद मगन सकल पुरबासी ॥  
 दसरथ पुत्रजन्म सुनि काना । मानहुँ ब्रह्मानंद समाना ॥  
 परम प्रेम मन पुलक सरीरा । चाहत उठन करत मति धीरा ॥  
 जाकर नाम सुनत सुभ होई । मोरें गृह आवा प्रभु सोई ॥  
 परमानंद पूरि मन राजा । कहा बोलाइ बजावहु बाजा ॥  
 गुर बसिष्ठ कहँ गयउ हँकारा । आए द्विजन सहित नृपद्वारा ॥  
 अनुपम बालक देखेन्हि जाई । रूप रासि गुन कहि न सिराई ॥

दो0 नंदीमुख सराध करि जातकरम सब कीन्ह ।  
 हाटक धेनु बसन मनि नृप बिप्रन्ह कहँ दीन्ह ॥ 193  
 ध्वज पताक तोरन पुर छावा । कहि न जाइ जेहि भॉति बनावा ॥  
 सुमनबृष्टि अकास तें होई । ब्रह्मानंद मगन सब लोई ॥  
 बृद बृद मिलि चलीं लोगाई । सहज सिंगार किँ उठि धाई ॥  
 कनक कलस मंगल भरि थारा । गावत पैठहिं भूप दुआरा ॥  
 करि आरति नेवछावरि करहीं । बार बार सिसु चरनन्हि परहीं ॥  
 मागध सूत बंदिगन गायक । पावन गुन गावहिं रघुनायक ॥  
 सर्बस दान दीन्ह सब काहू । जेहिं पावा राखा नहिं ताहू ॥  
 मृगमद चंदन कुंकुम कीचा । मची सकल बीथिन्ह बिच बीचा ॥  
 दो0 गृह गृह बाज बधाव सुभ प्रगटे सुषमा कंद ।

हरषवत सब जहँ तहँ नगर नारि नर बृद ॥ 194  
 कैकयसुता सुमित्रा दोरु । सुंदर सुत जनमत भैं ओरु ॥  
 वह सुख संपति समय समाजा । कहि न सकइ सारद अहिराजा ॥  
 अवधपुरी सोहइ एहि भॉती । प्रभुहि मिलन आई जनु राती ॥  
 देखि भानु जनु मन सकुचानी । तदपि बनी संध्या अनुमानी ॥  
 अगर धूप बहु जनु अँधिआरी । उड़इ अबीर मनहुँ अरुनारी ॥  
 मंदिर मनि समूह जनु तारा । नृप गृह कलस सो इंदु उदारा ॥  
 भवन बदधुनि अति मृदु बानी । जनु खग मुखर समर्थे जनु सानी ॥  
 कौतुक देखि पतंग भुलाना । एक मास तेई जात न जाना ॥

दो0 मास दिवस कर दिवस भा मरम न जानइ कोइ ।  
 रथ समेत रबि थाकेउ निसा कवन बिधि होइ ॥ 195  
 यह रहस्य काहूँ नहिं जाना । दिनमनि चले करत गुनगाना ॥  
 देखि महोत्सव सुर मुनि नागा । चले भवन बरनत निज भागा ॥  
 औरउ एक कहउँ निज चोरी । सुनु गिरिजा अति दृढ़ मति तोरी ॥  
 काकभुसुंछि संग हम दोरु । मनुजरूप जानइ नहिं कोरु ॥  
 परमानंद प्रेमसुख फूले । बीथिन्ह फिरहिं मगन मन भूले ॥  
 यह सुभ चरित जान पै सोई । कृपा राम कै जापर होई ॥  
 तेहि अवसर जो जेहि बिधि आवा । दीन्ह भूप जो जेहि मन भावा ॥  
 गज रथ तुरग हेम गो हीरा । दीन्हे नृप नानाबिधि चीरा ॥

दो0 मन संतोषे सबन्हि के जहँ तहँ देहिं असीस ।  
 सकल तनय चिर जीवहुँ तुलसिदास के ईस ॥ 196  
 कछुक दिवस बीते एहि भॉती । जात न जानिअ दिन अरु राती ॥  
 नामकरन कर अवसरु जानी । भूप बोलि पठए मुनि ग्यानी ॥

करि पूजा भूपति अस भाषा । धरिअ नाम जो मुनि गुनि राखा ॥  
इन्ह के नाम अनेक अनूपा । मैं नृप कहब स्वमति अनुरूपा ॥  
जो आनंद सिंधु सुखरासी । सीकर तें त्रैलोक सुपासी ॥  
सो सुख धाम राम अस नामा । अखिल लोक दायक बिश्रामा ॥  
बिस्व भरन पोषन कर जोई । ताकर नाम भरत अस होई ॥  
जाके सुभिरन तें रिपु नासा । नाम सत्रुहन बेद प्रकासा ॥

दो० लच्छन धाम राम प्रिय सकल जगत आधार ।

गुरु बसिष्ट तेहि राखा लछिमन नाम उदार ॥ 197

धरे नाम गुर हृदयें बिचारी । बेद तत्व नृप तव सुत चारी ॥  
मुनि धन जन सरबस सिव प्राणा । बाल केलि रस तेहिं सुख माना ॥  
बारेहि ते निज हित पति जानी । लछिमन राम चरन रति मानी ॥  
भरत सत्रुहन दूनउ भाई । प्रभु सेवक जसि प्रीति बड़ाई ॥  
स्याम गौर सुंदर दोउ जोरी । निरखहि छबि जननीं तृन तोरी ॥  
चारिउ सील रूप गुन धामा । तदपि अधिक सुखसागर रामा ॥  
हृदयें अनुग्रह इंदु प्रकासा । सूचत किरन मनोहर हासा ॥  
कबहुँ उछंग कबहुँ बर पलना । मातु दुलारइ कहि प्रिय ललना ॥

दो० ब्यापक ब्रह्म निरंजन निर्गुन बिगत बिनोद ।

सो अज प्रेम भगति बस कौसल्या के गोद ॥ 198

काम कोटि छबि स्याम सरीरा । नील कंज बारिद गंभीरा ॥  
अरुन चरन पंकज नख जोती । कमल दलन्हि बैठे जनु मोती ॥  
रेख कुलिस ध्वज अंकुस सोहे । नूपुर धुनि सुनि मुनि मन मोहे ॥  
कटि किंकिनी उदर त्रय रेखा । नाभि गभीर जान जेहिं देखा ॥  
भुज बिसाल भूषन जुत भूरी । हियें हरि नख अति सोभा रूरी ॥  
उर मनहार पदिक की सोभा । भार्गव पद देखत मन लोभा ॥  
कंबु कंठ अति चिबुक सुहाई । आनन अमित मदन छबि छाई ॥  
दुइ दुइ दसन अधर अरुनारे । नासा तिलक को बरनै पारे ॥  
सुंदर श्रवन सुचारु कपोला । अति प्रिय मधुर तोतरे बोला ॥  
चिक्कन कच कुंचित गभुआरे । बहु प्रकार रचि मातु सँवारे ॥  
पीत झगुलिआ तनु पहिराई । जानु पानि बिचरनि मोहि भाई ॥  
रूप सकहिं नहिं कहि श्रुति सेवा । सो जानइ सपनेहुँ जेहिं देखा ॥

दो० सुख संदोह मोहपर ग्यान गिरा गोतीत ।

दंपति परम प्रेम बस कर सिसुचरित पुनीत ॥ 199

एहि बिधि राम जगत पितु माता । कोसलपुर बासिन्ह सुखदाता ॥  
जिन्ह रघुनाथ चरन रति मानी । तिन्ह की यह गति प्रगट भवानी ॥  
रघुपति बिमुख जतन कर कोरी । कवन सकइ भव बंधन छोरी ॥  
जीव चराचर बस कै राखे । सो माया प्रभु सो भय भाखे ॥  
भकुटि बिलास नचावइ ताही । अस प्रभु छाड़ि भजिअ कहु काही ॥  
मन कम बचन छाड़ि चतुराई । भजत कृपा करिहहिं रघुराई ॥  
एहि बिधि सिसुबिनोद प्रभु कीन्हा । सकल नगरबासिन्ह सुख दीन्हा ॥  
लै उछंग कबहुँक हलरावै । कबहुँ पालनें घालि झुलावै ॥

दो० प्रेम मगन कौसल्या निसि दिन जात न जान ।

सुत सनेह बस माता बालचरित कर गान ॥ 200

एक बार जननीं अन्हवाए । करि सिंगार पलनों पौढ़ाए ॥  
निज कुल इष्टदेव भगवाना । पूजा हेतु कीन्ह अस्नाना ॥

करि पूजा नैबेद्य चढ़ावा । आपु गई जहँ पाक बनावा ॥  
बहुरि मातु तहवों चलि आई । भोजन करत देख सुत जाई ॥  
गै जननी सिसु पहिँ भयभीता । देखा बाल तहों पुनि सूता ॥  
बहुरि आइ देखा सुत सोई । हृदयें कंप मन धीर न होई ॥  
इहाँ उहाँ दुइ बालक देखा । मतिभ्रम मोर कि आन बिसेषा ॥  
देखि राम जननी अकुलानी । प्रभु हँसि दीन्ह मधुर मुसुकानी ॥

दो०— देखरावा मातहि निज अद्भुत रूप अखंड ।

रोम रोम प्रति लागे कोटि कोटि ब्रह्मंड ॥ 201

अगनित रबि ससि सिव चतुरानन । बहु गिरि सरित सिंधु महि कानन ॥  
काल कर्म गुन ग्यान सुभाऊ । सोउ देखा जो सुना न काऊ ॥  
देखी माया सब बिधि गाढ़ी । अति सभित जोरें कर ठाढ़ी ॥  
दखा जीव नचावइ जाही । देखी भगति जो छोरइ ताही ॥  
तन पुलकित मुख बचन न आवा । नयन मूदि चरननि सिरु नावा ॥  
बिसमयवंत देखि महतारी । भए बहुरि सिसुरूप खरारी ॥  
अस्तुति करि ज जाइ भय माना । जगत पिता मैं सुत करि जाना ॥  
हरि जननी बहुबिधि समुझाई । यह जनि कतहुँ कहसि सुनु माई ॥

दो० बार बार कौसल्या बिनय करइ कर जोरि ।

अब जनि कबहुँ ब्यापै प्रभु मोहि माया तोरि ॥ 202

कछुक काल बीतें सब भाई । बड़े भए परिजन सुखदाई ॥  
चूड़ाकरन कीन्ह गुरु जाई । बिप्रन्ह पुनि दछिना बहु पाई ॥  
परम मनोहर चरित अपारा । करत फिरत चारिउ सुकुमारा ॥  
मन कम बचन अगोचर जोई । दसरथ अजिर बिचर प्रभु सोई ॥  
भोजन करत बोल जब राजा । नहिँ आवत तजि बाल समाजा ॥  
कौसल्या जब बोलन जाई । ठुमुक ठुमुक प्रभु चलहिँ पराई ॥  
निगम नेति सिव अंत न पावा । ताहि धरै जननी हठि धावा ॥  
धूसर धूरि भरें तन आए । भूपति बिहसि गोद बैठाए ॥

दो० भोजन करत चपल चित इत उत अवसरु पाइ ।

भाजि चले किलकत मुख दधि ओदन लपटाइ ॥ 203

बालचरित अति सरल सुहाए । सारद सेष संभु श्रुति गाए ॥  
जिन्ह कर मन इन्ह सन नहिँ राता । ते जन बंचित किए बिधाता ॥  
भए कुमार जबहिँ सब भ्राता । दीन्ह जनेऊ गुरु पितु माता ॥  
गुरगृहँ गए पढ़न रघुराई । अल्प काल बिद्या सब आई ॥  
जाकी सहज स्वास श्रुति चारी । सो हरि पढ़ यह कौतुक भारी ॥  
बिद्या बिनय निपुन गुन सीला । खेलहिँ खेल सकल नृपलीला ॥  
करतल बान धनुष अति सोहा । देखत रूप चराचर मोहा ॥  
जिन्ह बीथिन्ह बिहरहिँ सब भाई । थकित होहिँ सब लोग लुगाई ॥

दो० कोसलपुर बासी नर नारि बृद्ध अरु बाल ।

प्रानहु ते प्रिय लागत सब कहुँ राम कृपाल ॥ 204

बंधु सखा सँग लेहिँ बोलाई । बन मृगया नित खेलहिँ जाई ॥  
पावन मृग मारहिँ जिये जानी । दिन प्रति नृपहि देखावहिँ आनी ॥  
जे मृग राम बान के मारे । ते तनु तजि सुरलोक सिधारे ॥  
अनुज सखा सँग भोजन करहीं । मातु पिता अग्या अनुसरहीं ॥  
जेहि बिधि सुखी होहिँ पुर लोगा । करहिँ कृपानिधि सोइ संजोगा ॥  
बेद पुरान सुनहिँ मन लाई । आपु कहहिँ अनुजन्ह समुझाई ॥

प्रातकाल उठि कै रघुनाथा । मातु पिता गुरु नावहिं माथा ॥  
आयसु मागि करहिं पुर काजा । देखि चरित हरषइ मन राजा ॥  
दो० ब्यापक अकल अनीह अज निर्गुन नाम न रूप ।

भगत हेतु नाना बिधि करत चरित्र अनूप ॥ 205

यह सब चरित कहा मैं गाई । आगिलि कथा सुनहु मन लाई ॥  
बिस्वामित्र महामुनि ग्यानी । बसहिं बिपिन सुभ आश्रम जानी ॥  
जहँ जप जग्य जोग मुनि करहीं । अति मारीच सुबाहुहि डरहीं ॥  
देखत जग्य निसाचर धावहिं । करहिं उपद्रव मुनि दुख पावहिं ॥  
गाधितनय मन चिंता ब्यापी । हरि बिनु मरहिं न निसिचर पापी ॥  
तब मुनिबर मन कीन्ह बिचारा । प्रभु अवतरेउ हरन महि भारा ॥  
एहँ मिस देखौं पद जाई । करि बिनती आनौं दोउ भाई ॥  
ग्यान बिराग सकल गुन अयना । सो प्रभु मैं देखब भरि नयना ॥

दो० बहुबिधि करत मनोरथ जात लागि नहिं बार ।

करि मज्जन सररु जल गए भूप दरबार ॥ 206

मुनि आगमन सुना जब राजा । मिलन गयउ लै साध, समाजा ॥  
करि दंडवत मुनिहि सनमानी । निज आसन बैठारेन्हि आनी ॥  
चरन पखारि कीन्हि अति पूजा । मो सम आजु धन्य नहिं दूजा ॥  
बिबिध भौंति भोजन करवावा । मुनिबर हृदयें हरष अति पावा ॥  
पुनि चरननि मेले सुत चारी । राम देखि मुनि देह बिसारी ॥  
भए मगन देखत मुख सोभा । जनु चकोर पूरन ससि लोभा ॥  
तब मन हरषि बचन कह राऊ । मुनि अस कृपा न कीन्हिहु काऊ ॥  
केहि कारन आगमन तुम्हारा । कहहु सो करत न लावउँ बारा ॥  
असुर समूह सतावहिं मोही । मैं जाचन आयउँ नृप तोही ॥  
अनुज समेत देहु रघुनाथा । निसिचर बध मैं होब सनाथा ॥

दो० देहु भूप मन हरषित तजहु मोह अग्यान ।

धर्म सुजस प्रभु तुम्ह कौं इन्ह कहँ अति कल्याण ॥ 207

सुनि राजा अति अप्रिय बानी । हृदय कंप मुख दुति कुमुलानी ॥  
चौथेंपन पायउँ सुत चारी । बिप्र बचन नहिं कहेहु बिचारी ॥  
मागहु भूमि धेनु धन कोसा । सर्वस देउँ आजु सहरोसा ॥  
देह प्रान तें प्रिय कछु नाहीं । सोउ मुनि देउँ निमिष एक माहीं ॥  
सब सुत प्रिय मोहि प्रान कि नाई । राम देत नहिं बनइ गोसाई ॥  
कहँ निसिचर अति घोर कठोरा । कहँ सुंदर सुत परम किसोरा ॥  
सुनि नृप गिरा प्रेम रस सानी । हृदयें हरष माना मुनि ग्यानी ॥  
तब बसिष्ट बहुबिधि समुझावा । नृप संदेह नास कहँ पावा ॥  
अति आदर दोउ तनय बोलाए । हृदयें लाइ बहु भौंति सिखाए ॥  
मेरे प्रान नाथ सुत दोऊ । तुम्ह मुनि पिता आन नहिं कोऊ ॥

दो० साँपे भूप रिषिहि सुत बहुबिधि देइ असीस ।

जननी भवन गए प्रभु चले नाइ पद सीस ॥ 208 (क)

सो० पुरुषसिंह दोउ बीर हरषि चले मुनि भय हरन ।

कृपासिंधु मतिधीर अखिल बिस्व कारन करन ॥ 208 (ख)

अरुन नयन उर बाहु बिसाला । नील जलज तनु स्याम तमाला ॥  
कटि पट पीत कसैं बर माथा । रुचिर चाप सायक दुहुँ हाथा ॥  
स्याम गौर सुंदर दोउ भाई । बिस्वामित्र महानिधि पाई ॥  
प्रभु ब्रह्मन्यदेव मैं जाना । मोहि निति पिता तजेउ भगवाना ॥

चले जात मुनि दीन्हि देखाई । सुनि ताड़का कोध करि धाई ॥  
 एकहिं बान प्रान हरि लीन्हा । दीन जानि तेहि निज पद दीन्हा ॥  
 तब रिषि निज नाथहि जिये चीन्ही । बिद्यानिधि कहं बिद्या दीन्ही ॥  
 जाते लाग न छुधा पिपासा । अतुलित बल तनु तेज प्रकासा ॥  
 दो० आयुध सर्व समर्पि कै प्रभु निज आश्रम आनि ।  
 कंद मूल फल भोजन दीन्ह भगति हित जानि ॥ 209  
 प्रात कहा मुनि सन रघुराई । निर्भय जग्य करहु तुम्ह जाई ॥  
 होम करन लागे मुनि झारी । आपु रहे मख कीं रखवारी ॥  
 सुनि मारीच निसाचर कोही । लै सहाय धावा मुनिद्रोही ॥  
 बिनु फर बान राम तेहि मारा । सत जोजन गा सागर पारा ॥  
 पावक सर सुबाहु पुनि मारा । अनुज निसाचर कटकु सँघारा ॥  
 मारि असुर मुनि निर्भयकारी । अस्तुति करहिं देव मुनि झारी ॥  
 तहँ पुनि कछुक दिवस रघुराया । रहे कीन्हि बिप्रन्ह पर दायया ॥  
 भगति हेतु बहु कथा पुराना । कहे बिप्र जद्यपि प्रभु जाना ॥  
 तब मुनि सादर कहा बुझाई । चरित एक प्रभु देखिअ जाई ॥  
 धनुषजग्य सुनि रघुकुलनाथा । हरषि चले मुनिबर के साथ्या ॥  
 आश्रम एक दीख मग माहीं । खग मृग जीव जंतु तहँ नाहीं ॥  
 पूछा मुनिहि सिला प्रभु देखी । सकल कथा मुनि कहा बिसेषी ॥  
 दो० गौतम नारि श्राप बस उपल देह धरि धीर ।

चरन कमल रज चाहति कृपा करहु रघुबीर ॥ 210  
 छं० परसत पद पावन सोक नसावन प्रगट भई तपपुंज सही ।  
 देखत रघुनायक जन सुख दायक सनमुख होइ कर जोरि रही ॥  
 अति प्रेम अधीरा पुलक सरीरा मुख नहिं आवइ बचन कही ।  
 अतिसय बड़भागी चरनन्हि लागी जुगल नयन जलधार बही ॥  
 धीरजु मन कीन्हा प्रभु कहँ चीन्हा रघुपति कृपाँ भगति पाई ।  
 अति निर्मल बानीं अस्तुति ठानी ग्यानगम्य जय रघुराई ॥  
 मैं घोर अपावन प्रभु जग पावन रावन रिपु जन सुखदाई ।  
 राजीव बिलोचन भव भय मोचन पाहि पाहि सरनहिं आई ॥  
 मुनि श्राप जो दीन्हा अति भल कीन्हा परम अनुग्रह मैं माना ।  
 देखेउँ भरि लोचन हरि भवमोचन इहइ लाभ संकर जाना ॥  
 बिनती प्रभु मोरी मैं मति भोरी नाथ न मागउँ बर आना ।  
 पद कमल परागा रस अनुरागा मम मन मधुप करै पाना ॥  
 जेहिं पद सुरसरिता परम पुनीता प्रगट भई सिव सीस धरी ।  
 सोई पद पंकज जेहि पूजत अज मम सिर धरेउ कृपाल हरी ॥  
 एहि भौंति सिधारी गौतम नारी बार बार हरि चरन परी ।  
 जो अति मन भावा सो बरु पावा गै पतिलोक अनंद भरी ॥  
 दो० अस प्रभु दीनबंधु हरि कारन रहित दयाल ।  
 तुलसिदास सठ तेहि भजु छाड़ि कपट जंजाल ॥ 211

मासपारायण, सातवों विश्राम

चले राम लछिमन मुनि संग्या । गए जहाँ जग पावनि गंग्या ॥  
 गाधिसूनु सब कथा सुनाई । जेहि प्रकार सुरसरि महि आई ॥  
 तब प्रभु रिषिन्ह समेत नहाए । बिबिध दान महिदेवन्हि पाए ॥

हरषि चले मुनि बृंद सहाया । बेगि बिदेह नगर निअराया ॥  
पुर रम्यता राम जब देखी । हरषे अनुज समेत बिसेषी ॥  
बापीं कूप सरित सर नाना । सलिल सुधासम मनि सोपाना ॥  
गुंजत मंजु मत्त रस भृंगा । कूजत कल बहुबरन बिहंगा ॥  
बरन बरन बिकसे बन जाता । त्रिबिध समीर सदा सुखदाता ॥

दो० सुमन बाटिका बाग बन बिपुल बिहंग निवास ।

फूलत फलत सुपल्लवत सोहत पुर चहुँ पास ॥ 212  
बनइ न बरनत नगर निकार्ई । जहाँ जाइ मन तहँई लोभाई ॥  
चारु बजारु बिचित्र अंबारी । मनिमय बिधि जनु स्वकर सँवारी ॥  
धनिक बनिक बर धनद समाना । बैठे सकल बस्तु लै नाना ॥  
चौहट सुंदर गलीं सुहाई । संतत रहहिं सुगंध सिंचाई ॥  
मंगलमय मंदिर सब करेँ । चित्रित जनु रतिनाथ चितेरेँ ॥  
पुर नर नारि सुभग सुचि संता । धरमसील ग्यानी गुनवंता ॥  
अति अनूप जहँ जनक निवासू । बिथकहिं बिबुध बिलोकि बिलासू ॥  
होत चकित चित कोट बिलोकी । सकल भुवन सोभा जनु रोकी ॥

दो० धवल धाम मनि पुरट पट सुघटित नाना भॉति ।

सिय निवास सुंदर सदन सोभा किमि कहि जाति ॥ 213  
सुभग द्वार सब कुलिस कपाटा । भूप भीर नट मागध भाटा ॥  
बनी बिसाल बाजि गज साला । हय गय रथ संकुल सब काला ॥  
सूर सचिव सेनप बहुतेरे । नृपगृह सरिस सदन सब करे ॥  
पुर बाहेर सर सरित समीपा । उतरे जहँ तहँ बिपुल महीपा ॥  
देखि अनूप एक अँवराई । सब सुपास सब भॉति सुहाई ॥  
कौसिक कहेउ मोर मनु माना । इहाँ रहिअ रघुबीर सुजाना ॥  
भलेहिं नाथ कहि कृपानिकेता । उतरे तहँ मुनिबृंद समेता ॥  
बिस्वामित्र महामुनि आए । समाचार मिथिलापति पाए ॥

दो० संग सचिव सुचि भूरि भट भूसुर बर गुर ग्याति ।

चले मिलन मुनिनाथकहि मुदित राउ एहि भॉति ॥ 214  
कीन्ह प्रनाम चरन धरि माथा । दीन्हि असीस मुदित मुनिनाथा ॥  
बिप्रबृंद सब सादर बंदे । जानि भाग्य बड़ राउ अनंदे ॥  
कुसल प्रस्न कहि बारहिं बारा । बिस्वामित्र नृपहि बैठारा ॥  
तेहि अवसर आए दोउ भाई । गए रहे देखन फुलवाई ॥  
स्याम गौर मृदु बयस किसोरा । लोचन सुखद बिस्व चित चोरा ॥  
उठे सकल जब रघुपति आए । बिस्वामित्र निकट बैठाए ॥  
भए सब सुखी देखि दोउ भ्राता । बारि बिलोचन पुलकित गाता ॥  
मूरति मधुर मनोहर देखी । भयउ बिदेहु बिदेहु बिसेषी ॥

दो० प्रेम मगन मनु जानि नृपु करि बिबेकु धरि धीर ।

बोलेउ मुनि पद नाइ सिरु गदगद गिरा गभीर ॥ 215  
कहहु नाथ सुंदर दोउ बालक । मुनिकुल तिलक कि नृप कुल पालक ॥  
ब्रह्म जो निगम नेति कहि गावा । उभय बेष धरि की सोइ आवा ॥  
सहज बिरागरूप मनु मोरा । थकित होत जिमि चंद चकोरा ॥  
ताते प्रभु पूछउँ सतिभाऊ । कहहु नाथ जनि करहु दुराऊ ॥  
इन्हहि बिलोकत अति अनुरागा । बरबस ब्रह्मसुखहि मन त्यागा ॥  
कह मुनि बिहसि कहेह नृप नीका । बचन तुम्हार न होइ अलीका ॥  
ए प्रिय सबहि जहाँ लागि प्रानी । मन मुसुकाहिं रामु सुनि बानी ॥

रघुकुल मनि दसरथ के जाए । मम हित लागि नरेस पठाए ॥  
 दो० रामु लखनु दोउ बंधुबर रूप सील बल धाम ।  
 मख राखेउ सबु साखि जगु जिते असुर संग्राम ॥ 216  
 मनि तव चरन देखि कह राऊ । कहि न सकउँ निज पुन्य प्रभाऊ ॥  
 सुंदर स्याम गौर दोउ भ्राता । आनँदहू के आनँद दाता ॥  
 इन्ह कै प्रीति परसपर पावनि । कहि न जाइ मन भाव सुहावनि ॥  
 सुनहु नाथ कह मुदित बिदेहू । ब्रह्म जीव इव सहज सनेहू ॥  
 पुनि पुनि प्रभुहि चितव नरनाहू । पुलक गात उर अधिक उछाहू ॥  
 मुनिहि प्रसंसि नाइ पद सीसू । चलेउ लवाइ नगर अवनीसू ॥  
 सुंदर सदन सुखद सब काला । तहाँ बासु लै दीन्ह भुआला ॥  
 करि पूजा सब बिधि सेवकाई । गयउ राउ गृह बिदा कराई ॥  
 दो० रिषय संग रघुबंस मनि करि भोजनु बिश्रामु ।  
 बैठे प्रभु भ्राता सहित दिवसु रहा भरि जामु ॥ 217  
 लखन हृदय लालसा बिसेषी । जाइ जनकपुर आइअ देखी ॥  
 प्रभु भय बहुरि मुनिहि सकुचाहीं । प्रगट न कहहिं मनहिं मुसुकाहीं ॥  
 राम अनुज मन की गति जानी । भगत बछलता हिये हुलसानी ॥  
 परम बिनीत सकुचि मुसुकाई । बोले गुर अनुसासन पाई ॥  
 नाथ लखनु पुरु देखन चहहीं । प्रभु सकोच डर प्रगट न कहहीं ॥  
 जाँ राउर आयसु मै पावौं । नगर देखाइ तुरत लै आवौं ॥  
 सुनि मुनीसु कह बचन सप्रीती । कस न राम तुम्ह राखहु नीती ॥  
 धरम सेतु पालक तुम्ह ताता । प्रेम बिबस सेवक सुखदाता ॥  
 दो० जाइ देखि आवहु नगरु सुख निधान दोउ भाइ ।  
 करहु सुफल सब के नयन सुंदर बदन देखाइ ॥ 218  
 मुनि पद कमल बंदि दोउ भ्राता । चले लोक लोचन सुख दाता ॥  
 बालक बृंद देखि अति सोभा । लगे संग लोचन मनु लोभा ॥  
 पीत बसन परिकर कटि भाथा । चारु चाप सर सोहत हाथा ॥  
 तन अनुहरत सुचंदन खोरी । स्यामल गौर मनोहर जोरी ॥  
 केहरि कंधर बाहु बिसाला । उर अति रुचिर नागमनि माला ॥  
 सुभग सोन सरसीरुह लोचन । बदन मयंक तापत्रय मोचन ॥  
 कानन्हि कनक फूल छबि देहीं । चितवत चितहि चोरि जनु लेहीं ॥  
 चितवनि चारु भृकुटि बर बाँकी । तिलक रेख सोभा जनु चाँकी ॥  
 दो० रुचिर चौतनीं सुभग सिर मेचक कुंचित केस ।  
 नख सिख सुंदर बंधु दोउ सोभा सकल सुदेस ॥ 219  
 देखन नगरु भूपसुत आए । समाचार पुरबासिन्ह पाए ॥  
 धाए धाम काम सब त्यागी । मनहुँ रंक निधि लूटन लागी ॥  
 निरखि सहज सुंदर दोउ भाई । होहिं सुखी लोचन फल पाई ॥  
 जुबतीं भवन झरोखन्हि लागीं । निरखहिं राम रूप अनुरागीं ॥  
 कहहिं परसपर बचन सप्रीती । सखि इन्ह कोटि काम छबि जीती ॥  
 सुर नर असुर नाग मुनि माहीं । सोभा असि कहुँ सुनिअति नाहीं ॥  
 बिष्नु चारि भुज बिधि मुख चारी । बिकट बेष मुख पंच पुरारी ॥  
 अपर देउ अस कोउ न आही । यह छबि सखी पटतरिअ जाही ॥  
 दो० बय किसोर सुषमा सदन स्याम गौर सुख धाम ।  
 अंग अंग पर वारिअहिं कोटि कोटि सत काम ॥ 220  
 कहहु सखी अस को तनुधारी । जो न मोह यह रूप निहारी ॥

कोउ सप्रेम बोली मृदु बानी । जो मैं सुना सो सुनहु सयानी ॥  
 ए दोऊ दसरथ के ढोटा । बाल मरालन्हि के कल जोटा ॥  
 मुनि कौसिक मख के रखवारे । जिन्ह रन अजिर निसाचर मारे ॥  
 स्याम गात कल कंज बिलोचन । जो मारीच सुभुज मदु मोचन ॥  
 कौसल्या सुत सो सुख खानी । नामु रामु धनु सायक पानी ॥  
 गौर किसोर बेषु बर काछें । कर सर चाप राम के पाछें ॥  
 लछिमनु नामु राम लघु भ्राता । सुनु सखि तासु सुमित्रा माता ॥  
 दो० बिप्रकाजु करि बंधु दोउ मग मुनिबधू उधारि ।  
 आए देखन चापमख सुनि हरषी सब नारि ॥ 221  
 देखि राम छबि कोउ एक कहई । जोगु जानकिहि यह बरु अहई ॥  
 जाँ सखि इन्हहि देख नरनाहू । पन परिहरि हठि करइ बिबाहू ॥  
 कोउ कह ए भूपति पहिचाने । मुनि समेत सादर सनमाने ॥  
 सखि परंतु पनु राउ न तजई । बिधि बस हठि अबिबेकहि भजई ॥  
 कोउ कह जाँ भल अहइ बिधाता । सब कहें सुनिअ उचित फलदाता ॥  
 तौ जानकिहि मिलिहि बरु एहू । नाहिन आलि इहाँ संदेहू ॥  
 जाँ बिधि बस अस बनै सँजोगू । तौ कृतकृत्य होइ सब लोगू ॥  
 सखि हमरें आरति अति तातें । कबहुँक ए आवहिं एहि नातें ॥  
 दो० नाहिं त हम कहूँ सुनहु सखि इन्ह कर दरसनु दूरि ।  
 यह संघटु तब होइ जब पुन्य पुराकृत भूरि ॥ 222  
 बोली अपर कहेहु सखि नीका । एहिं बिआह अति हित सबही का ॥  
 कोउ कह संकर चाप कठोरा । ए स्यामल मृदुगात किसोरा ॥  
 सबु असमंजस अहइ सयानी । यह सुनि अपर कहइ मृदु बानी ॥  
 सखि इन्ह कहें कोउ कोउ अस कहहीं । बड़ प्रभाउ देखत लघु अहहीं ॥  
 परसि जासु पद पंकज धूरी । तरी अहल्या कृत अघ भूरी ॥  
 सो कि रहिहि बिनु सिवधनु तोरें । यह प्रतीति परिहरिअ न भोरें ॥  
 जेहिं बिरंचि रचि सीय सँवारी । तेहिं स्यामल बरु रचेउ बिचारी ॥  
 तासु बचन सुनि सब हरषानी । ऐसेइ होउ कहहिं मुदु बानी ॥  
 दो० हिये हरषहिं बरषहिं सुमन सुमुखि सुलोचनि बृंद ।  
 जाहिं जहाँ जहँ बंधु दोउ तहँ तहँ परमानंद ॥ 223  
 पुर पूरब दिसि गे दोउ भाई । जहँ धनुमख हित भूमि बनाई ॥  
 अति बिस्तार चारु गच ढारी । बिमल बेदिका रुचिर सँवारी ॥  
 चहुँ दिसि कंचन मंच बिसाला । रचे जहाँ बैठहिं महिपाला ॥  
 तेहि पाछें समीप चहुँ पासा । अपर मंच मंडली बिलासा ॥  
 कछुक ऊँचि सब भाँति सुहाई । बैठहिं नगर लोग जहँ जाई ॥  
 तिन्ह के निकट बिसाल सुहाए । धवल धाम बहुबरन बनाए ॥  
 जहँ बैठें देखहिं सब नारी । जथा जोगु निज कुल अनुहारी ॥  
 पुर बालक कहि कहि मृदु बचना । सादर प्रभुहि देखावहिं रचना ॥  
 दो० सब सिसु एहि मिस प्रमबस परसि मनोहर गात ।  
 तन पुलकहिं अति हरषु हिये देखि देखि दोउ भ्रात ॥ 224  
 सिसु सब राम प्रेमबस जाने । प्रीति समेत निकेत बखाने ॥  
 निज निज रुचि सब लेहिं बोलाई । सहित सनेह जाहिं दोउ भाई ॥  
 राम देखावहिं अनुजहिं रचना । कहि मृदु मधुर मनोहर बचना ॥  
 लव निमेष महूँ भुवन निकाया । रचइ जासु अनुसासन माया ॥  
 भगति हेतु सोइ दीनदयाला । चितवत चकित धनुष मखसाला ॥

कौतुक देखि चले गुरु पाहीं । जानि बिलंबु त्रास मन माहीं ॥  
 जासु त्रास डर कहँ डर होई । भजन प्रभाउ देखावत सोई ॥  
 कहि बातें मृदु मधुर सुहाई । किए बिदा बालक बरिआई ॥  
 दो० सभय सप्रेम बिनीत अति सकुच सहित दोउ भाइ ।  
 गुर पद पंकज नाइ सिर बैठे आयसु पाइ ॥ 225  
 निसि प्रबेस मुनि आयसु दीन्हा । सबहीं संध्याबंदनु कीन्हा ॥  
 कहत कथा इतिहास पुरानी । रुचिर रजनि जुग जाम सिरानी ॥  
 मुनिबर सयन कीन्हि तब जाई । लगे चरन चापन दोउ भाई ॥  
 जिन्ह के चरन सरोरुह लागी । करत बिबिध जप जोग बिरागी ॥  
 तेइ दोउ बंधु प्रेम जनु जीते । गुर पद कमल पलोटत प्रीते ॥  
 बार बार मुनि अग्या दीन्ही । रघुबर जाइ सयन तब कीन्ही ॥  
 चापत चरन लखनु उर लाएँ । सभय सप्रेम परम सचु पाएँ ॥  
 पुनि पुनि पभु कह सोवहु ताता । पौढे धरि उर पद जलजाता ॥  
 दो० उठे लखनु निसि बिगत सुनि अरुनसिखा धुनि कान ।  
 गुर तें पहिलेहिं जगतपति जागे रामु सुजान ॥ 226  
 सकल सौच करि जाइ नहाए । नित्य निबाहि मुनिहि सिर नाए ॥  
 समय जानि गुर आयसु पाई । लेन प्रसून चले दोउ भाई ॥  
 भूप बागु बर देखेउ जाई । जहँ बसंत रितु रही लोभाई ॥  
 लागे बिटप मनोहर नाना । बरन बरन बर बेलि बिताना ॥  
 नव पल्लव फल सुमन सुहाए । निज संपति सुर रूख लजाए ॥  
 चातक कोकिल कीर चकोरा । कूजत बिहग नटत कल मोरा ॥  
 मध्य बाग सरु सोह सुहावा । मनि सोपान बिचित्र बनावा ॥  
 बिमल सलिलु सरसिज बहुरंगा । जलखग कूजत गुंजत भृंगा ॥  
 दो० बागु तड़ागु बिलोकि प्रभु हरषे बंधु समेत ।  
 परम रम्य आरामु यहु जो रामहि सुख देत ॥ 227  
 चहुँ दिसि चितइ पूँछि मालीगन । लगे लेन दल फूल मुदित मन ॥  
 तेहि अवसर सीता तहँ आई । गिरिजा पूजन जननि पढाई ॥  
 संग सखीं सब सुभग सयानी । गावहिं गीत मनोहर बानी ॥  
 सर समीप गिरिजा गृह सोहा । बरनि न जाइ देखि मनु मोहा ॥  
 मज्जनु करि सर सखिन्ह समेता । गई मुदित मन गौरि निकेता ॥  
 पूजा कीन्हि अधिक अनुरागा । निज अनुरूप सुभग बरु मागा ॥  
 एक सखी सिय संगु बिहाई । गई रही देखन फुलवाई ॥  
 तेहिं दोउ बंधु बिलोके जाई । प्रेम बिबस सीता पहिं आई ॥  
 दो० तासु दसा देखी सखिन्ह पुलक गात जलु नैन ।  
 कहु कारनु निज हरष कर पूछहिं सब मृदु बैन ॥ 228  
 देखन बागु कुअँर दुइ आए । बय किसोर सब भौँति सुहाए ॥  
 स्याम गौर किमि कहौं बखानी । गिरा अनयन नयन बिनु बानी ॥  
 सुनि हरषीं सब सखीं सयानी । सिय हियँ अति उतकंठा जानी ॥  
 एक कहइ नृपसुत तेइ आली । सुने जे मुनि सँग आए काली ॥  
 जिन्ह निज रूप मोहनी डारी । कीन्हे स्वबस नगर नर नारी ॥  
 बरनत छबि जहँ तहँ सब लोगू । अवसि देखिअहि देखन जोगू ॥  
 तासु बचन अति सियहि सोहाने । दरस लागि लोचन अकुलाने ॥  
 चली अग्र करि प्रिय सखि सोई । प्रीति पुरातन लखइ न कोई ॥  
 दो० सुमिरि सीय नारद बचन उपजी प्रीति पुनीत ।

चकित बिलोकति सकल दिसि जनु सिसु मृगी सभीत ॥ 229  
 कंकन किंकिनि नूपुर धुनि सुनि । कहत लखन सन रामु हृदयें गुनि ॥  
 मानहुँ मदन दुंदुभी दीन्ही । मनसा बिस्व बिजय कहें कीन्ही ॥  
 अस कहि फिरि चितए तेहि ओरा । सिय मुख ससि भए नयन चकोरा ॥  
 भए बिलोचन चारु अचंचल । मनहुँ सकुचि निमि तजे दिगंचल ॥  
 देखि सीय सोभा सुखु पावा । हृदयें सराहत बचनु न आवा ॥  
 जनु बिरंचि सब निज निपुनाई । बिरचि बिस्व कहें प्रगटि देखाई ॥  
 सुंदरता कहुँ सुंदर करई । छबिगृहें दीपसिखा जनु बरई ॥  
 सब उपमा कबि रहे जुठारी । केहिं पटतरौं बिदेहकुमारी ॥  
 दो० सिय सोभा हियें बरनि प्रभु आपनि दसा बिचारि ।

बोले सुचि मन अनुज सन बचन समय अनुहारि ॥ 230  
 तात जनकतनया यह सोई । धनुषजग्य जेहि कारन होई ॥  
 पूजन गौरि सखीं लै आई । करत प्रकासु फिरइ फुलवाई ॥  
 जासु बिलोकि अलौकिक सोभा । सहज पुनीत मोर मनु छोभा ॥  
 सो सबु कारन जान बिधाता । फरकहिं सुभद अंग सुनु भ्राता ॥  
 रघुबंसिन्ह कर सहज सुभारु । मनु कुपंथ पगु धरइ न कारु ॥  
 मोहि अतिसय प्रतीति मन केरी । जेहिं सपनेहुँ परनारि न हेरी ॥  
 जिन्ह कै लहहिं न रिपु रन पीठी । नहिं पावहिं परितिय मनु डीठी ॥  
 मंगन लहहिं न जिन्ह कै नाहीं । ते नरबर थोरे जग माहीं ॥

दो० करत बतकही अनुज सन मन सिय रूप लोभान ।  
 मुख सरोज मकरंद छबि करइ मधुप इव पान ॥ 231  
 चितवति चकित चहुँ दिसि सीता । कहें गए नृपकिसोर मनु चिंता ॥  
 जहें बिलोक मृग सावक नैनी । जनु तहें बरिस कमल सित श्रेनी ॥  
 लता ओट तब सखिन्ह लखाए । स्यामल गौर किसोर सुहाए ॥  
 देखि रूप लोचन ललचाने । हरषे जनु निज निधि पहिचाने ॥  
 थके नयन रघुपति छबि देखें । पलकन्हिहुँ परिहरीं निमेषें ॥  
 अधिक सनेहें देह भै भोरी । सरद ससिहि जनु चितव चकोरी ॥  
 लोचन मग रामहि उर आनी । दीन्हे पलक कपाट सयानी ॥  
 जब सिय सखिन्ह प्रेमबस जानी । कहि न सकहिं कछु मन सकुचानी ॥

दो० लताभवन तें प्रगट भे तेहि अवसर दोउ भाइ ।  
 निकसे जनु जुग बिमल बिधु जलद पटल बिलगाइ ॥ 232  
 सोभा सीवें सुभग दोउ बीरा । नील पीत जलजाभ सरीरा ॥  
 मोरपंख सिर सोहत नीके । गुच्छ बीच बिच कुसुम कली के ॥  
 भाल तिलक श्रमबिंदु सुहाए । श्रवन सुभग भूषन छबि छाए ॥  
 बिकट भृकुटि कच घूघरवारे । नव सरोज लोचन रतनारे ॥  
 चारु चिबुक नासिका कपोला । हास बिलास लेत मनु मोला ॥  
 मुखछबि कहि न जाइ मोहि पाहीं । जो बिलोकि बहु काम लजाहीं ॥  
 उर मनि माल कंबु कल गीवा । काम कलभ कर भुज बलसींवा ॥  
 सुमन समेत बाम कर दाना । सावेंर कुअेंर सखी सुठि लोना ॥

दो० केहरि कटि पट पीत धर सुषमा सील निधान ।  
 देखि भानुकुलभूषनहिं बिसरा सखिन्ह अपान ॥ 233  
 धरि धीरजु एक आलि सयानी । सीता सन बोली गहि पानी ॥  
 बहुरि गौरि कर ध्यान करेहू । भूपकिसोर देखि किन लेहू ॥  
 सकुचि सीयें तब नयन उघारे । सनमुख दोउ रघुसिंघ निहारे ॥

नख सिख देखि राम कै सोभा । सुमिरि पिता पनु मनु अति छोभा ॥  
परबस सखिन्ह लखी जब सीता । भयउ गहरु सब कहहिं समीता ॥  
पुनि आउब एहि बेरिआँ काली । अस कहि मन बिहसी एक आली ॥  
गूढ गिरा सुनि सिय सकुचानो । भयउ बिलंबु मातु भय मानी ॥  
धरि बड़ि धीर रामु उर आने । फिरी अपनपउ पितुबस जाने ॥

दो० देखन मिस मृग बिहग तरु फिरइ बहोरि बहोरि ।

निरखि निरखि रघुबीर छवि बाढ़इ प्रीति न थोरि ॥ 234  
जानि कठिन सिवचाप बिसूरति । चली राखि उर स्यामल मूरति ॥  
प्रभु जब जात जानकी जानी । सुख सनेह सोभा गुन खानी ॥  
परम प्रेममय मृदु मसि कीन्ही । चारु चित्त भीतीं लिखि लीन्ही ॥  
गई भवानी भवन बहोरी । बंदि चरन बोली कर जोरी ॥  
जय जय गिरिबरराज किसोरी । जय महेस मुख चंद चकोरी ॥  
जय गजबदन षडानन माता । जगत जननि दामिनि दुति गाता ॥  
नहिं तव आदि मध्य अवसाना । अमित प्रभाउ बेदु नहिं जाना ॥  
भव भव बिभव पराभव कारिनि । बिस्व बिमोहनि स्वबस बिहारिनि ॥

दो० पतिदेवता सुतीय महँ मातु प्रथम तव रेख ।

महिमा अमित न सकहिं कहि सहस सारदा सेष ॥ 235  
सेवत तोहि सुलभ फल चारी । बरदायनी पुरारि पिआरी ॥  
देबि पूजि पद कमल तुम्हारे सुर नर मुनि सब होहिं सुखारे ॥  
मोर मनोरथु जानहु नीकें । बसहु सदा उर पुर सबही कें ॥  
कीन्हेउँ प्रगट न कारन तेहीं । अस कहि चरन गहे बैदेहीं ॥  
बिनय प्रेम बस भई भवानी । खसी माल मूरति मुसुकानी ॥  
सादर सियें प्रसादु सिर धरेऊ । बोली गौरि हरषु हियें भरेऊ ॥  
सुनु सिय सत्य असीस हमारी । पूजिहि मन कामना तुम्हारी ॥  
नारद बचन सदा सुचि साचा । सो बरु मिलिहि जाहिं मनु राचा ॥

छं० मनु जाहिं राचेउ मिलिहि सो बरु सहज सुंदर साँवरो ।

करुना निधान सुजान सीलु सनेहु जानत रावरो ॥  
एहि भौंति गौरि असीस सुनि सिय सहित हियें हरषीं अली ।  
तुलसी भवानिहि पूजि पुनि पुनि मुदित मन मंदिर चली ॥

सो० जानि गौरि अनुकूल सिय हिय हरषु न जाइ कहि ।

मंजुल मंगल मूल बाम अंग फरकन लगे ॥ 236  
हृदयें सराहत सीय लोनाई । गुर समीप गवने दोउ भाई ॥  
राम कहा सबु कौसिक पाहीं । सरल सुभाउ छुअत छल नाहीं ॥  
सुमन पाइ मुनि पूजा कीन्ही । पुनि असीस दुहु भाइन्ह दीन्ही ॥  
सुफल मनोरथ होहुँ तुम्हारे । रामु लखनु सुनि भए सुखारे ॥  
करि भोजनु मुनिबर बिग्यानी । लगे कहन कछु कथा पुरानी ॥  
बिगत दिवसु गुरु आयसु पाई । संध्या करन चले दोउ भाई ॥  
प्राची दिसि ससि उयउ सुहावा । सिय मुख सरिस देखि सुखु पावा ॥  
बहुरि बिचारु कीन्ह मन माहीं । सीय बदन सम हिमकर नाहीं ॥

दो० जनमु सिंधु पुनि बंधु बिषु दिन मलीन सकलंक ।

सिय मुख समता पाव किमि चंदु बापुरो रंक ॥ 237  
घटइ बढइ बिरहिनि दुखदाई । ग्रसइ राहु निज संधिहिं पाई ॥  
कोक सोकप्रद पंकज द्रोही । अवगुन बहुत चंद्रमा तोही ॥  
बैदेही मुख पटतर दीन्हे । होइ दोषु बड़ अनुचित कीन्हे ॥

सिय मुख छबि बिधु ब्याज बखानी । गुर पहिं चले निसा बड़ि जानी ॥  
 करि मुनि चरन सरोज प्रनामा । आयसु पाइ कीन्ह बिश्रामा ॥  
 बिगत निसा रघुनायक जागे । बंधु बिलोकि कहन अस लागे ॥  
 उयउ अरुन अवलोकहु ताता । पंकज कोक लोक सुखदाता ॥  
 बोले लखनु जोरि जुग पानी । प्रभु प्रभाउ सूचक मृदु बानी ॥  
 दो० अरुनोदर्ये सकुचे कुमुद उडगन जोति मलीन ।

जिमि तुम्हार आगमन सुनि भए नृपति बलहीन ॥ 238  
 नृप सब नखत करहिं उजिआरी । टारि न सकहिं चाप तम भारी ॥  
 कमल कोक मधुकर खग नाना । हरषे सकल निसा अवसाना ॥  
 ऐसेहिं प्रभु सब भगत तुम्हारे । होइहहिं दूटें धनुष सुखारे ॥  
 उयउ भानु बिनु श्रम तम नासा । दुरे नखत जग तेजु प्रकासा ॥  
 रबि निज उदय ब्याज रघुराया । प्रभु प्रतापु सब नृपन्ह दिखाया ॥  
 तव भुज बल महिमा उदघाटी । प्रगटी धनु बिघटन परिपाटी ॥  
 बंधु बचन सुनि प्रभु मुसुकाने । होइ सुचि सहज पुनीत नहाने ॥  
 नित्यकिया करि गुरु पहिं आए । चरन सरोज सुभग सिर नाए ॥  
 सतानंदु तब जनक बोलाए । कासिक मुनि पहिं तुरत पठाए ॥  
 जनक बिनय तिन्ह आइ सुनाई । हरषे बोलि लिए दोउ भाई ॥  
 दो० सतानंद पद बंदि प्रभु बैठे गुर पहिं जाइ ।  
 चलहु तात मुनि कहेउ तब पठवा जनक बोलाइ ॥ 239

मासपारायण, आठवों विश्राम  
 नवान्हपारायण, दूसरा विश्राम

सीय स्वयंबरु देखिअ जाई । ईसु काहि धौं देइ बडाई ॥  
 लखन कहा जस भाजनु सोई । नाथ कृपा तव जापर होई ॥  
 हरषे मुनि सब सुनि बर बानी । दीन्हि असीस सबहिं सुखु मानी ॥  
 पुनि मुनिबृंद समेत कृपाला । देखन चले धनुषमख साला ॥  
 रंगभूमि आए दोउ भाई । असि सुधि सब पुरबासिन्ह पाई ॥  
 चले सकल गृह काज बिसारी । बाल जुबान जरठ नर नारी ॥  
 देखी जनक भीर भै भारी । सुचि सेवक सब लिए हँकारी ॥  
 तुरत सकल लोगन्ह पहिं जाहू । आसन उचित देहु सब काहू ॥  
 दो० कहि मृदु बचन बिनीत तिन्ह बैठारे नर नारि ।

उत्तम मध्यम नीच लघु निज निज थल अनुहारि ॥ 240  
 राजकुअँर तेहि अवसर आए । मनहुँ मनोहरता तन छाए ॥  
 गुन सागर नागर बर बीरा । सुंदर स्यामल गौर सरीरा ॥  
 राज समाज बिराजत रुरे । उडगन महुँ जनु जुग बिधु पूरे ॥  
 जिन्ह केँ रही भावना जैसी । प्रभु मूरति तिन्ह देखी तैसी ॥  
 देखहिं रूप महा रनधीरा । मनहुँ बीर रसु धरें सरीरा ॥  
 डरे कुटिल नृप प्रभुहि निहारी । मनहुँ भयानक मूरति भारी ॥  
 रहे असुर छल छोनिय बेषा । तिन्ह प्रभु प्रगट कालसम देखा ॥  
 पुरबासिन्ह देखे दोउ भाई । नरभूषन लोचन सुखदाई ॥

दो० नारि बिलोकहिं हरषि हियेँ निज निज रुचि अनुरूप ।  
 जनु सोहत सिंगार धरि मूरति परम अनूप ॥ 241  
 बिदुषन्ह प्रभु बिराटमय दीसा । बहु मुख कर पग लोचन सीसा ॥  
 जनक जाति अवलोकहिं कैसैं । सजन सगे प्रिय लागहिं जैसैं ॥

सहित बिदेह बिलोकहिं रानी । सिसु सम प्रीति न जाति बखानी ॥  
जोगिन्ह परम तत्वमय भासा । सांत सुद्ध सम सहज प्रकासा ॥  
हरिभगतन्ह देखे दोउ भ्राता । इष्टदेव इव सब सुख दाता ॥  
रामहि चितव भायँ जेहि सीया । सो सनेहु सुखु नहिं कथनीया ॥  
उर अनुभवति न कहि सक सोऊ । कवन प्रकार कहै कबि कोऊ ॥  
एहि बिधि रहा जाहि जस भाऊ । तेहिं तस देखेउ कोसलराऊ ॥

दो० राजत राज समाज महुँ कोसलराज किसोर ।

सुंदर स्यामल गौर तन बिस्व बिलोचन चोर ॥ 242

सहज मनोहर मूरति दोऊ । कोटि काम उपमा लघु सोऊ ॥  
सरद चंद निंदक मुख नीके । नीरज नयन भावते जी के ॥  
चितवनि चारु मार मनु हरनी । भावति हृदय जाति नहिं बरनी ॥  
कल कपोल श्रुति कुंडल लोला । चिबुक अधर सुंदर मृदु बोला ॥  
कुमुदबंधु कर निंदक हॉसा । भृकुटी बिकट मनोहर नासा ॥  
भाल बिसाल तिलक झलकाहीं । कच बिलोकि अलि अवलि लजाहीं ॥  
पीत चौतनीं सिरन्हि सुहाई । कुसुम कलीं बिच बीच बनाई ॥  
रेखें रुचिर कंबु कल गीवॉ । जनु त्रिभुवन सुषमा की सीवॉ ॥

दो० कुंजर मनि कंठा कलित उरन्हि तुलसिका माल ।

बृषभ कंध केहरि ठवनि बल निधि बाहु बिसाल ॥ 243

कटि तूनीर पीत पट बॉधें । कर सर धनुष बाम बर कॉधें ॥  
पीत जग्य उपबीत सुहाए । नख सिख मंजु महाछबि छाए ॥  
देखि लोग सब भए सुखारे । एकटक लोचन चलत न तारे ॥  
हरषे जनकु देखि दोउ भाई । मुनि पद कमल गहे तब जाई ॥  
करि बिनती निज कथा सुनाई । रंग अवनि सब मुनिहि देखाई ॥  
जहँ जहँ जाहिं कुअँर बर दोऊ । तहँ तहँ चकित चितव सबु कोऊ ॥  
निज निज रुख रामहि सबु देखा । कोउ न जान कछु मरमु बिसेषा ॥  
भलि रचना मुनि नृप सन कहेऊ । राजॉ मुदित महासुख लहेऊ ॥

दो० सब मंचन्ह तें मंचु एक सुंदर बिसद बिसाल ।

मुनि समेत दोउ बंधु तहँ बैठारे महिपाल ॥ 244

प्रभुहि देखि सब नृप हियँ हारे । जनु राकेस उदय भएँ तारे ॥  
असि प्रतीति सब के मन माहीं । राम चाप तोरब सक नाहीं ॥  
बिनु भंजेहुँ भव धनुषु बिसाला । मेलिहि सीय राम उर माला ॥  
अस बिचारि गवनहु घर भाई । जसु प्रतापु बलु तेजु गवॉई ॥  
बिहसे अपर भूप सुनि बानी । जे अबिबेक अंध अभिमानी ॥  
तोरेहुँ धनुषु ब्याहु अवगाहा । बिनु तोरें को कुअँरि बिआहा ॥  
एक बार कालउ किन होऊ । सिय हित समर जितब हम सोऊ ॥  
यह सुनि अवर महिप मुसुकाने । धरमसील हरिभगत सयाने ॥

सो० सीय बिआहबि राम गरब दूरि करि नृपन्ह के ।

जीति को सक संग्राम दसरथ के रन बॉकुरे ॥ 245

ब्यर्थ मरहु जनि गाल बजाई । मन मोदकन्हि कि भूख बुताई ॥  
सिख हमारि सुनि परम पुनीता । जगदंबा जानहु जियँ सीता ॥  
जगत पिता रघुपतिहि बिचारी । भरि लोचन छबि लेहु निहारी ॥  
सुंदर सुखद सकल गुन रासी । ए दोउ बंधु संभु उर बासी ॥  
सुधा समुद्र समीप बिहाई । मृगजल निरखि मरहु कत धाई ॥  
करहु जाइ जा कहुँ जोइ भावा । हम तौ आजु जनम फलु पावा ॥

अस कहि चले भूप अनुरागे । रूप अनूप बिलोकन लागे ॥  
देखहिं सुर नभ चढ़े बिमाना । बरषहिं सुमन करहिं कल गाना ॥  
दो० जानि सुअवसरु सीय तब पठई जनक बोलाइ ।

चतुर सखीं सुंदर सकल सादर चलीं लवाइ ॥ 246

सिय सोभा नहिं जाइ बखानी । जगदबिका रूप गुन खानी ॥  
उपमा सकल मोहि लघु लागीं । प्राकृत नारि अंग अनुरागीं ॥  
सिय बरनिअ तेइ उपमा देई । कुकबि कहाइ अजसु को लेई ॥  
जौं पटतरिअ तीय सम सीया । जग असि जुबति कहौं कमनीया ॥  
गिरा मुखर तन अरध भवानी । रति अति दुखित अतनु पति जानी ॥  
बिष बारुनी बंधु प्रिय जेही । कहिअ रमासम किमि बैदेही ॥  
जौं छबि सुधा पयोनिधि होई । परम रूपमय कच्छपु सोई ॥  
सोभा रजु मंदरु सिंगारु । मथै पानि पंकज निज मारु ॥

दो० एहि बिधि उपजै लच्छि जब सुंदरता सुख मूल ।

तदपि सकोच समेत कबि कहहिं सीय समतूल ॥ 247

चलीं संग लै सखीं सयानी । गावत गीत मनोहर बानी ॥  
सोह नवल तनु सुंदर सारी । जगत जननि अतुलित छबि भारी ॥  
भूषन सकल सुदेस सुहाए । अंग अंग रचि सखिन्ह बनाए ॥  
रंगभूमि जब सिय पगु धारी । देखि रूप मोहे नर नारी ॥  
हरषि सुरन्ह दुंदुभीं बजाई । बरषि प्रसून अपछरा गाई ॥  
पानि सरोज सोह जयमाला । अवचट चितए सकल भुआला ॥  
सीय चकित चित रामहि चाहा । भए मोहबस सब नरनाहा ॥  
मुनि समीप देखे दोउ भाई । लगे ललकि लोचन निधि पाई ॥

दो० गुरजन लाज समाजु बड़ देखि सीय सकुचानि ।

लागि बिलोकन सखिन्ह तन रघुबीरहि उर आनि ॥ 248

राम रूपु अरु सिय छबि देखें । नर नारिन्ह परिहरीं निमेषें ॥  
सोचहिं सकल कहत सकुचाहीं । बिधि सन बिनय करहिं मन माहीं ॥  
हरु बिधि बेगि जनक जड़ताई । मति हमारि असि देहि सुहाई ॥  
बिनु बिचार पनु तजि नरनाहू । सीय राम कर करै बिबाहू ॥  
जगु भल कहिहि भाव सब काहू । हठ कीन्हें अंतहुँ उर दाहू ॥  
एहिं लालसौं मगन सब लोगू । बरु सौंवरु जानकी जोगू ॥  
तब बंदीजन जनक बोलाए । बिरिदावली कहत चलि आए ॥  
कह नृपु जाइ कहहु पन मोरा । चले भाट हिये हरषु न थोरा ॥

दो० बोले बंदी बचन बर सुनहु सकल महिपाल ।

पन बिदेह कर कहहिं हम भुजा उठाइ बिसाल ॥ 249

नृप भुजबलु बिधु सिवधनु राहू । गरुअ कठोर बिदित सब काहू ॥  
रावनु बानु महाभट भारे । देखि सरासन गर्वेहि सिधारे ॥  
सोइ पुरारि कोदंडु कठोरा । राज समाज आजु जोइ तोरा ॥  
त्रिभुवन जय समेत बैदेही । बिनहिं बिचार बरइ हठि तेही ॥  
सुनि पन सकल भूप अभिलाषे । भटमानी अतिसय मन माखे ॥  
परिकर बाँधि उठे अकुलाई । चले इष्टदेवन्ह सिर नाई ॥  
तमकि ताकि तकि सिवधनु धरहीं । उठइ न कोटि भौंति बलु करहीं ॥  
जिन्ह के कछु बिचारु मन माहीं । चाप समीप महीप न जाहीं ॥

दो० तमकि धरहिं धनु मूढ़ नृप उठइ न चलहिं लजाइ ।

मनहुँ पाइ भट बाहुबलु अधिकु अधिकु गरुआइ ॥ 250

भूप सम्हरि बहु एकहि बारा । लगे उठावन टरइ न टारा ॥  
 डगइ न संभु सरासनु कैसैं । कामी बचन सती मनु जैसैं ॥  
 सब नृप भए जोगु उपहासी । जैसैं बिनु बिराग संन्यासी ॥  
 कीरति बिजय बीरता भारी । चले चाप कर बरबस हारी ॥  
 श्रीहत भए हारि हियैं राजा । बैठे निज निज जाइ समाजा ॥  
 नृपन्ह बिलोकि जनकु अकुलाने । बोले बचन रोष जनु साने ॥  
 दीप दीप के भूपति नाना । आए सुनि हम जो पनु ठाना ॥  
 देव दनुज धरि मनुज सरीरा । बिपुल बीर आए रनधीरा ॥

दो० कुअरि मनोहर बिजय बड़ि कीरति अति कमनीय ।

पावनिहार बिरंचि जनु रचेउ न धनु दमनीय ॥ 251

कहहु काहि यहु लाभु न भावा । काहुँ न संकर चाप चढावा ॥  
 रहउ चढाउब तोरब भाई । तिलु भरि भूमि न सके छड़ाई ॥  
 अब जनि कोउ माखै भट मानी । बीर बिहीन मही मैं जानी ॥  
 तजहु आस निज निज गृह जाहू । लिखा न बिधि बैदेहि बिबाहू ॥  
 सुकृतु जाइ जाँ पनु परिहरऊँ । कुअरि कुआरि रहउ का करऊँ ॥  
 जाँ जनतेउँ बिनु भट भुबि भाई । तौ पनु करि होतेउँ न हँसाई ॥  
 जनक बचन सुनि सब नर नारी । देखि जानकिहि भए दुखारी ॥  
 माखे लखनु कुटिल भइँ भौहैं । रदपट फरकत नयन रिसौहैं ॥

दो० कहि न सकत रघुबीर डर लगे बचन जनु बान ।

नाइ राम पद कमल सिरु बोले गिरा प्रमान ॥ 252

रघुबंसिन्ह महुँ जहँ कोउ होई । तेहिं समाज अस कहइ न कोई ॥  
 कही जनक जसि अनुचित बानी । बिद्यमान रघुकुल मनि जानी ॥  
 सुनहु भानुकुल पंकज भानू । कहउँ सुभाउ न कछु अभिमानू ॥  
 जाँ तुम्हारि अनुसासन पावौ । कंदुक इव ब्रह्मांड उठावौ ॥  
 काचे घट जिमि डारौं फोरी । सकउँ मेरु मूलक जिमि तोरी ॥  
 तव प्रताप महिमा भगवाना । को बापुरो पिनाक पुराना ॥  
 नाथ जानि अस आयसु होऊ । कौतुकु करौं बिलोकिअ सोऊ ॥  
 कमल नाल जिमि चाप चढावौ । जोजन सत प्रमान लै धावौ ॥

दो० तोरौं छत्रक दंड जिमि तव प्रताप बल नाथ ।

जाँ न करौं प्रभु पद सपथ कर न धरौं धनु हाथ ॥ 253

लखन सकोप बचन जब बोले । डगमगाहिं महि दिग्गज डोले ॥  
 सकल लोग सब भूप डेराने । सिय हियैं हरषु जनकु सकुचाने ॥  
 गुर रघुपति सब मुनि मन माहीं । मुदित भए पुनि पुनि पुलकाहीं ॥  
 सयनहिं रघुपति लखनु नेवारे । प्रेम समेत निकट बैठारे ॥  
 बिस्वामित्र समय सुभ जानी । बोले अति सनेहमय बानी ॥  
 उठहु राम भंजहु भवचापा । मेटहु तात जनक परितापा ॥  
 सुनि गुरु बचन चरन सिरु नावा । हरषु बिषादु न कछु उर आवा ॥  
 ठाढ़ भए उठि सहज सुभाएँ । ठवनि जुबा मृगराजु लजाएँ ॥

दो० उदित उदयगिरि मंच पर रघुबर बाल पतंग ।

बिकसे संत सरोज सब हरषे लोचन भृंग ॥ 254

नृपन्ह केरि आसा निसि नासी । बचन नखत अवली न प्रकासी ॥  
 मानी महिप कुमुद सकुचाने । कपटी भूप उलूक लुकाने ॥  
 भए बिसोक कोक मुनि देवा । बरिसहिं सुमन जनावहिं सेवा ॥  
 गुर पद बंदि सहित अनुरागा । राम मुनिन्ह सन आयसु मागा ॥

सहजहिं चले सकल जग स्वामी । मत्त मंजु बर कुंजर गामी ॥  
 चलत राम सब पुर नर नारी । पुलक पूरि तन भए सुखारी ॥  
 बंदि पितर सुर सुकृत सँभारे । जौं कछु पुन्य प्रभाउ हमारे ॥  
 तौ सिवधनु मृनाल की नाई । तोरहुँ रामु गनेस गोसाई ॥  
 दो० रामहि प्रेम समेत लखि सखिन्ह समीप बोलाइ ।  
 सीता मातु सनेह बस बचन कहइ बिलखाइ ॥ 255  
 सखि सब कौतुकु देखनिहारे । जेउ कहावत हितू हमारे ॥  
 कोउ न बुझाइ कहइ गुर पाहीं । ए बालक असि हठ भलि नाहीं ॥  
 रावन बान छुआ नहिं चापा । हारे सकल भूप करि दापा ॥  
 सो धनु राजकुअँर कर देहीं । बाल मराल कि मंदर लेहीं ॥  
 भूप सयानप सकल सिरानी । सखि बिधि गति कछु जाति न जानी ॥  
 बोली चतुर सखी मृदु बानी । तेजवंत लघु गनिअ न रानी ॥  
 कहँ कुंभज कहँ सिधु अपारा । सोषेउ सुजसु सकल संसारा ॥  
 रबि मंडल देखत लघु लागा । उदर्ये तासु तिभुवन तम भागा ॥  
 दो० मंत्र परम लघु जासु बस बिधि हरि हर सुर सर्व ।  
 महामत्त गजराज कहँ बस कर अंकुस खर्ब ॥ 256  
 काम कुसुम धनु सायक लीन्हे । सकल भुवन अपनें बस कीन्हे ॥  
 देबि तजिअ संसउ अस जानी । भंजब धनुषु राम सुनु रानी ॥  
 सखी बचन सुनि भै परतीती । मिटा बिषादु बढी अति प्रीती ॥  
 तब रामहि बिलोकि बैदेही । सभय हृदर्ये बिनवति जेहि तेही ॥  
 मनहीं मन मनाव अकुलानी । होहु प्रसन्न महेस भवानी ॥  
 करहु सफल आपनि सेवकाई । करि हितु हरहु चाप गरुआई ॥  
 गननायक बरदायक देवा । आजु लगे कीन्हिउँ तुअ सेवा ॥  
 बार बार बिनती सुनि मोरी । करहु चाप गुरुता अति थोरी ॥  
 दो० देखि देखि रघुबीर तन सुर मनाव धरि धीर ।  
 भरे बिलोचन प्रेम जल पुलकावली सरीर ॥ 257  
 नीकेँ निरखि नयन भरि सोभा । पितु पनु सुमिरि बहुरि मनु छोभा ॥  
 अहह तात दारुनि हठ ठानी । समुझत नहिं कछु लाभु न हानी ॥  
 सचिव सभय सिख देइ न कोई । बुध समाज बड़ अनुचित होई ॥  
 कहँ धनु कुलिसहु चाहि कठोरा । कहँ स्यामल मृदुगात किसोरा ॥  
 बिधि कहि भाँति धरौँ उर धीरा । सिरस सुमन कन बेधिअ हीरा ॥  
 सकल सभा कै मति भै भोरी । अब मोहि संभुचाप गति तोरी ॥  
 निज जड़ता लोगन्ह पर डारी । होहि हरुह रघुपतिहि निहारी ॥  
 अति परिताप सीय मन माहीं । लव निमेष जुग सय सम जाहीं ॥  
 दो० प्रभुहि चितइ पुनि चितव महि राजत लोचन लोल ।  
 खेलत मनसिज मीन जुग जनु बिधु मंडल डोल ॥ 258  
 गिरा अलिनि मुख पंकज रोकी । प्रगट न लाज निसा अवलोकी ॥  
 लोचन जलु रह लोचन कोना । जैसेँ परम कृपन कर सोना ॥  
 सकुची ब्याकुलता बड़ि जानी । धरि धीरजु प्रतीति उर आनी ॥  
 तन मन बचन मोर पनु साचा । रघुपति पद सरोज चितु राचा ॥  
 तौ भगवानु सकल उर बासी । करिहि मोहि रघुबर कै दासी ॥  
 जेहि केँ जेहि पर सत्य सनेहू । सो तेहि मिलइ न कछु संदेहू ॥  
 प्रभु तन चितइ प्रेम तन ठाना । कृपानिधान राम सबु जाना ॥  
 सियहि बिलोकि तकेउ धनु कैसैं । चितव गरुण लघु ब्यालहि जैसेँ ॥

दो० लखन लखेउ रघुबंसमनि ताकेउ हर कोदंडु ।  
 पुलकि गात बोले बचन चरन चापि ब्रह्मांडु ॥ 259  
 दिसिकुंजरहु कमठ अहि कोला । धरहु धरनि धरि धीर न डोला ॥  
 रामु चहहिं संकर धनु तोरा । होहु सजग सुनि आयसु मोरा ॥  
 चाप समीप रामु जब आए । नर नारिन्ह सुर सुकृत मनाए ॥  
 सब कर संसउ अरु अग्यानु । मंद महीपन्ह कर अभिमानु ॥  
 भृगुपति केरि गरब गरुआई । सुर मुनिबरन्ह केरि कदराई ॥  
 सिय कर सोचु जनक पछितावा । रानिन्ह कर दारुन दुख दावा ॥  
 संभुचाप बड बोहितु पाई । चढे जाइ सब संगु बनाई ॥  
 राम बाहुबल सिंधु अपारु । चहत पारु नहिं कोउ कड़हारु ॥

दो० राम बिलोके लोग सब चित्र लिखे से देखि ।  
 चितई सीय कृपायतन जानी बिकल बिसेषि ॥ 260  
 देखी बिपुल बिकल बैदेही । निमिष बिहात कलप सम तेही ॥  
 तृषित बारि बिनु जो तनु त्यागा । मुएँ करइ का सुधा तडागा ॥  
 का बरषा जब कृषी सुखानें । समय चूकि पुनि का पछितानें ॥  
 अस जियें जानि जानकी देखी । प्रभु पुलके लखि प्रीति बिसेषी ॥  
 गुरहि प्रनामु मनहिं मन कीन्हा । अति लाघवें उठाइ धनु लीन्हा ॥  
 दमकेउ दामिनि जिमि जब लयऊ । पुनि नभ धनु मंडल सम भयऊ ॥  
 लेत चढावत खैचत गाढ़ें । काहुँ न लखा देख सबु ठाढ़ें ॥  
 तेहि छन राम मध्य धनु तोरा । भरे भुवन धुनि घोर कठोरा ॥

छं० भरे भुवन घोर कठोर रव रबि बाजि तजि मारगु चले ।  
 चिक्करहिं दिग्गज डोल महि अहि कोल कूरुम कलमले ॥  
 सुर असुर मुनि कर कान दीन्हें सकल बिकल बिचारहीं ।  
 कोदंड खंडेउ राम तुलसी जयति बचन उचारहीं ॥

सो० संकर चापु जहाजु सागरु रघुबर बाहुबलु ।  
 बूड़ सो सकल समाजु चढा जो प्रथमहिं मोह बस ॥ 261  
 प्रभु दोउ चापखंड महि डारे । देखि लोग सब भए सुखारे ॥  
 कौंसिकरूप पयोनिधि पावन । प्रेम बारि अवगाह सुहावन ॥  
 रामरूप राकेसु निहारी । बढत बीचि पुलकावलि भारी ॥  
 बाजे नभ गहगहे निसाना । देवबधू नाचहिं करि गाना ॥  
 ब्रह्मादिक सुर सिद्ध मुनीसा । प्रभुहि प्रसंसहिं देहिं असीसा ॥  
 बरिसहिं सुमन रंग बहु माला । गावहिं किंनर गीत रसाला ॥  
 रही भुवन भरि जय जय बानी । धनुषभंग धुनि जात न जानी ॥  
 मुदित कहहिं जहें तहें नर नारी । भंजेउ राम संभुधनु भारी ॥

दो० बंदी मागध सूतगन बिरुद बदहिं मतिधीर ।  
 करहिं निछावरि लोग सब हय गय धन मनि चीर ॥ 262  
 झॉझि मृदंग संख सहनाई । भेरि ढोल दुंदुभी सुहाई ॥  
 बाजहिं बहु बाजने सुहाए । जहें तहें जुबतिन्ह मंगल गाए ॥  
 सखिन्ह सहित हरषी अति रानी । सूखत धान परा जनु पानी ॥  
 जनक लहेउ सुखु सोचु बिहाई । पैरत थकें थाह जनु पाई ॥  
 श्रीहत भए भूप धनु टूटे । जैसें दिवस दीप छबि छूटे ॥  
 सीय सुखहि बरनिअ केहि भौंती । जनु चातकी पाइ जलु स्वाती ॥  
 रामहि लखनु बिलोकत कैसें । ससिहि चकोर किसोरकु जैसें ॥  
 सतानंद तब आयसु दीन्हा । सीताँ गमनु राम पहिं कीन्हा ॥

दो० संग सखीं सुंदर चतुर गावहिं मंगलचार ।

गवनी बाल मराल गति सुषमा अंग अपार ॥ 263

सखिन्ह मध्य सिय सोहति कैसैं । छबिगन मध्य महाछबि जैसे ॥  
कर सरोज जयमाल सुहाई । बिस्व बिजय सोभा जेहिं छाई ॥  
तन सकोचु मन परम उछाहू । गूढ प्रेमु लखि परइ न काहू ॥  
जाइ समीप राम छबि देखी । रहि जनु कुअँरि चित्र अवरेशी ॥  
चतुर सखीं लखि कहा बुझाई । पहिरावहु जयमाल सुहाई ॥  
सुनत जुगल कर माल उठाई । प्रेम बिबस पहिराइ न जाई ॥  
सोहत जनु जुग जलज सनाला । ससिहि सभित देत जयमाला ॥  
गावहिं छबि अवलोकि सहेली । सियँ जयमाल राम उर मेली ॥

सो० रघुबर उर जयमाल देखि देव बरिसहिं सुमन ।

सकुचे सकल भुआल जनु बिलोकि रबि कुमुदगन ॥ 264

पुर अरु ब्योम बाजने बाजे । खल भए मलिन साधु सब राजे ॥  
सुर किंनर नर नाग मुनीसा । जय जय जय कहि देहिं असीसा ॥  
नाचहिं गावहिं बिबुध बधूटीं । बार बार कुसुमांजलि छूटीं ॥  
जहँ तहँ बिप्र बेदधुनि करहीं । बंदी बिरिदावलि उच्चरहीं ॥  
महि पाताल नाक जसु ब्यापा । राम बरी सिय भंजेउ चापा ॥  
करहिं आरतो पुर नर नारी । देहिं निछावरि बित्त बिसारी ॥  
सोहति सीय राम कै जोरी । छबि सिंगारु मनहूँ एक ठोरी ॥  
सखीं कहहिं प्रभुपद गहु सीता । करति न चरन परस अति भीता ॥

दो० गौतम तिय गति सुरति करि नहिं परसति पग पानि ।

मन बिहसे रघुबंसमनि प्रीति अलौकिक जानि ॥ 265

तब सिय देखि भूप अभिलाषे । कूर कपूत मूढ मन माखे ॥  
उठि उठि पहिरि सनाह अभागे । जहँ तहँ गाल बजावन लागे ॥  
लेहु छडाइ सीय कह कोरु । धरि बॉधहु नृप बालक दोरु ॥  
तोरे धनुषु चाड़ नहिं सरई । जीवत हमहि कुअँरि को बरई ॥  
जौं बिदेहु कछु करै सहाई । जीतहु समर सहित दोउ भाई ॥  
साधु भूप बोले सुनि बानी । राजसमाजहि लाज लजानी ॥  
बलु प्रतापु बीरता बड़ाई । नाक पिनाकहि संग सिधाई ॥  
सोइ सूरता कि अब कहूँ पाई । असि बुधि तौ बिधि मुहँ मसि लाई ॥

दो० देखहु रामहि नयन भरि तजि इरिषा महु कोहु ।

लखन रोषु पावकु प्रबल जानि सलभ जनि होहु ॥ 266

बैनतेय बलि जिमि चह कागू । जिमि ससु चहै नाग अरि भागू ॥  
जिमि चह कुसल अकारन कोही । सब संपदा चहै सिवद्रोही ॥  
लोभी लोलुप कल कीरति चहई । अकलंकता कि कामी लहई ॥  
हरि पद बिमुख परम गति चाहा । तस तुम्हार लालचु नरनाहा ॥  
कोलाहलु सुनि सीय सकानी । सखीं लवाइ गई जहँ रानी ॥  
रामु सुभायें चले गुरु पाहीं । सिय सनेहु बरनत मन माहीं ॥  
रानिन्ह सहित सोचबस सीया । अब धौं बिधिहि काह करनीया ॥  
भूप बचन सुनि इत उत तकहीं । लखनु राम डर बोलि न सकहीं ॥

दो० अरुन नयन भकुटी कुटिल चितवत नृपन्ह सकोप ।

मनहूँ मत्त गजगन निरखि सिंघकिसोरहि चोप ॥ 267

खरभरु देखि बिकल पुर नारीं । सब मिलि देहिं महीपन्ह गारीं ॥  
तेहिं अवसर सुनि सिव धनु भंगा । आयउ भृगुकुल कमल पतंगा ॥

देखि महीप सकल सकुचाने । बाज झपट जनु लवा लुकाने ॥  
 गौरि सरीर भूति भल भ्राजा । भाल बिसाल त्रिपुंड बिराजा ॥  
 सीस जटा ससिबदनु सुहावा । रिसबस कछुक अरुन होइ आवा ॥  
 भृकुटी कुटिल नयन रिस राते । सहजहुँ चितवत मनहुँ रिसाते ॥  
 बृषभ कंध उर बाहु बिसाला । चारु जनेउ माल मृगछाला ॥  
 कटि मुनिबसन तून दुइ बाँधे । धनु सर कर कुठारु कल काँधे ॥  
 दो० सात बेषु करनी कठिन बरनि न जाइ सरूप ।

धरि मुनितनु जनु बीर रसु आयउ जहँ सब भूप ॥ 268

देखत भृगुपति बेषु कराला । उठे सकल भय बिकल भुआला ॥  
 पितु समेत कहि कहि निज नामा । लगे करन सब दंड प्रनामा ॥  
 जेहि सुभायँ चितवहिं हितु जानी । सो जानइ जनु आइ खुटानी ॥  
 जनक बहोरि आइ सिरु नावा । सीय बोलाइ प्रनामु करावा ॥  
 आसिष दीन्हि सखीं हरषानीं । निज समाज लै गई सयानीं ॥  
 बिस्वामित्र मिले पुनि आई । पद सरोज मेले दोउ भाई ॥  
 रामु लखनु दसरथ के ढोटा । दीन्हि असीस देखि भल जोटा ॥  
 रामहि चितइ रहे थकि लोचन । रूप अपार मार मद मोचन ॥

दो० बहुरि बिलोकि बिदेह सन कहहु काह अति भीर ।

पूछत जानि अजान जिमि ब्यापेउ कोपु सरीर ॥ 269

समाचार कहि जनक सुनाए । जेहि कारन महीप सब आए ॥  
 सुनत बचन फिरि अनत निहारे । देखे चापखंड महि डारे ॥  
 अति रिस बोले बचन कठोरा । कहु जड़ जनक धनुष कै तोरा ॥  
 बेगि देखाउ मूढ़ न त आजू । उलटउँ महि जहँ लहि तव राजू ॥  
 अति डरु उतरु देत नृपु नाहीं । कुटिल भूप हरषे मन माहीं ॥  
 सुर मुनि नाग नगर नर नारी । सोचहिं सकल त्रास उर भारी ॥  
 मन पछिताति सीय महतारी । बिधि अब सँवरी बात बिगारी ॥  
 भृगुपति कर सुभाउ सुनि सीता । अरध निमेष कलप सम बीता ॥

दो० सभय बिलोके लोग सब जानि जानकी भीरु ।

हृदयँ न हरषु बिषादु कछु बोले श्रीरघुबीरु ॥ 270

मासपारायण, नवौं विश्राम

नाथ संभुधन भंजनिहारा । होइहि केउ एक दास तुम्हारा ॥  
 आयसु काह कहिअ किन मोही । सुनि रिसाइ बोले मुनि कोही ॥  
 सेवकु सो जो करै सेवकाई । अरि करनी करि करिअ लराई ॥  
 सुनहु राम जेहिं सिवधनु तोरा । सहसबाहु सम सो रिपु मोरा ॥  
 सो बिलगाउ बिहाइ समाजा । न त मारे जैहहिं सब राजा ॥  
 सुनि मुनि बचन लखन मुसुकाने । बोले परसुधरहि अपमाने ॥  
 बहु धनुहीं तोरीं लरिकाई । कबहुँ न असि रिस कीन्हि गोसाई ॥  
 एहि धनु पर ममता केहि हेतू । सुनि रिसाइ कह भृगुकुलकेतू ॥

दो० रे नृप बालक काल बस बोलत तोहि न सँभार ।

धनुही सम तिपुरारि धनु बिदित सकल संसार ॥ 271

लखन कहा हंसि हमरें जाना । सुनहु देव सब धनुष समाना ॥  
 का छति लाभु जून धनु तोरें । देखा राम नयन के भोरें ॥  
 छुअत टूट रघुपतिहु न दोसू । मुनि बिनु काज करिअ कत रोसू ॥  
 बोले चितइ परसु की ओरा । रे सठ सुनेहि सुभाउ न मोरा ॥

बालकु बोलि बधउँ नहिं तोही । केवल मुनि जड़ जानहि मोही ॥  
बाल ब्रह्मचारी अति कोही । बिस्व बिदित छत्रियकुल द्रोही ॥  
भुजबल भूमि भूप बिनु कीन्ही । बिपुल बार महिदेवन्ह दीन्ही ॥  
सहसबाहु भुज छेदनिहारा । परसु बिलोकु महीपकुमारा ॥

दो० मातु पितहि जनि सोचबस करसि महीसकिसोर ।

गर्भन्ह के अर्भक दलन परसु मोर अति घोर ॥ 272

बिहसि लखनु बोले मृदु बानी । अहो मुनीसु महा भटमानी ॥  
पुनि पुनि मोहि देखाव कुठारु । चहत उडावन फूँकि पहारु ॥  
इहाँ कुम्हड़बतिया कोउ नाहीं । जे तरजनी देखि डरि जाहीं ॥  
देखि कुठारु सरासन बाना । मैं कछु कहा सहित अभिमाना ॥  
भृगुसुत समुझि जनेउ बिलोकी । जो कछु कहहु सहउँ रिस रोकी ॥  
सुर महिसुर हरिजन अरु गाई । हमरें कुल इन्ह पर न सुराई ॥  
बधें पापु अपकीरति हारें । मारतहूँ पा परिअ तुम्हारें ॥

कोटि कुलिस सम बचनु तुम्हारा । ब्यर्थ धरहु धनु बान कुठारा ॥

दो० जो बिलोकि अनचित कहेउँ छमहु महामुनि धीर ।

सुनि सरोष भृगुबंसमनि बोले गिरा गभीर ॥ 273

कौसिक सुनहु मंद यहु बालकु । कुटिल कालबस निज कुल घालकु ।  
भानु बंस राकेस कलंकू । निपट निरंकुस अबुध असंकू ॥  
काल कवलु होइहि छन माहीं । कहउँ पुकारि खोरि मोहि नाहीं ॥  
तुम्ह हटकहु जौं चहहु उबारा । कहि प्रतापु बलु रोषु हमारा ॥  
लखन कहेउ मुनि सुजसु तुम्हारा । तुम्हहि अछत को बरनै पारा ॥  
अपने मुँह तुम्ह आपनि करनी । बार अनेक भौँति बहु बरनी ॥  
नहिं संतोषु त पुनि कछु कहहू । जनि रिस रोकि दुसह दुख सहहू ॥  
बीरब्रती तुम्ह धोर अछोभा । गारी देत न पावहु सोभा ॥

दो० सूर समर करनी करहिं कहि न जनावहिं आपु ।

बिद्यमान रन पाइ रिपु कायर कथहिं प्रतापु ॥ 274

तुम्ह तौ कालु हौं क जनु लावा । बार बार मोहि लागि बोलावा ॥  
सुनत लखन के बचन कठोरा । परसु सुधारि धरेउ कर घोरा ॥  
अब जनि देइ दोसु मोहि लोगू । कटुबादी बालकु बधजोगू ॥  
बाल बिलोकि बहुत मैं बाँचा । अब यहु मरनिहार भा साँचा ॥  
कौसिक कहा छमिअ अपराधू । बाल दोष गुन गनहिं न साधू ॥  
खर कुठार मैं अकरुन कोही । आगें अपराधी गुरुद्रोही ॥  
उतर देत छोड़उँ बिनु मारें । केवल कौसिक सील तुम्हारें ॥  
न त एहि काटि कुठार कठोरें । गुरहि उरिन होतेउँ श्रम थोरें ॥

दो० गाधिसूनु कह हृदयें हँसि मुनिहि हरिअरइ सूझ ।

अयमय खौँड़ न ऊखमय अजहुँ न बूझ अबूझ ॥ 275

कहेउ लखन मुनि सीलु तुम्हारा । को नहिं जान बिदित संसारा ॥  
माता पितहि उरिन भए नीकें । गुर रिनु रहा सोचु बड़ जीकें ॥  
सो जनु हमरेहि माथे काढा । दिन चलि गए ब्याज बड़ बाढा ॥  
अब आनिअ ब्यवहरिआ बोली । तुरत देउँ मैं थैली खोली ॥  
सुनि कटु बचन कुठार सुधारा । हाय हाय सब सभा पुकारा ॥  
भृगुबर परसु देखावहु मोही । बिप्र बिचारि बचउँ नृपद्रोही ॥  
मिले न कबहुँ सुभट रन गाढे । द्विज देवता धरहि के बाढे ॥  
अनुचित कहि सब लोग पुकारे । रघुपति सयनहिं लखनु नेवारे ॥

- दो० लखन उतर आहुति सरिस भुगुबर कोपु कृसानु ।  
बढ़त देखि जल सम बचन बोले रघुकुलभानु ॥ 276
- नाथ करहु बालक पर छोहू । सूध दूधमुख करिअ न कोहू ॥  
जौं पै प्रभु प्रभाउ कछु जाना । तौ कि बराबरि करत अयाना ॥  
जौं लरिका कछु अचगरि करहीं । गुर पितु मातु मोद मन भरहीं ॥  
करिअ कृपा सिसु सेवक जानी । तुम्ह सम सील धीर मुनि ग्यानी ॥  
राम बचन सुनि कछुक जुड़ाने । कहि कछु लखनु बहुरि मुसुकाने ॥  
हँसत देखि नख सिख रिस ब्यापी । राम तोर भ्राता बड़ पापी ॥  
गौर सरीर स्याम मन माहीं । कालकूटमुख पयमुख नाहीं ॥  
सहज टेढ़ अनुहरइ न तोही । नीचु मीचु सम देख न मोही ॥
- दो० लखन कहैउ हँसि सुनहु मुनि कोधु पाप कर मूल ।  
जेहि बस जन अनुचित करहिं चरहिं बिस्व प्रतिकूल ॥ 277
- मैं तुम्हार अनुचर मुनिराया । परिहरि कोपु करिअ अब दाया ॥  
टूट चाप नहिं जुरिहि रिसाने । बैठिअ होइहिं पाय पिराने ॥  
जौं अति प्रिय तौ करिअ उपाई । जोरिअ कोउ बड़ गुनी बोलाई ॥  
बोलत लखनहिं जनकु डेराहीं । मष्ट करहु अनुचित भल नाहीं ॥  
थर थर कॉपहिं पुर नर नारी । छोट कुमार खोट बड़ भारी ॥  
भृगुपति सुनि सुनि निरभय बानी । रिस तन जरइ होइ बल हानी ॥  
बोले रामहि देइ निहोरा । बचउँ बिचारि बंधु लघु तोरा ॥  
मनु मलीन तनु सुंदर कैसैं । बिष रस भरा कनक घट, जैसैं ॥
- दो० सुनि लछिमन बिहसे बहुरि नयन तरेरे राम ।  
गुर समीप गवने सकुचि परिहरि बानी बाम ॥ 278
- अति बिनीत मृदु सीतल बानी । बोले रामु जोरि जुग पानी ॥  
सुनहु नाथ तुम्ह सहज सुजाना । बालक बचनु करिअ नहिं काना ॥  
बररै बालकु एक सुभाऊ । इन्हहि न संत बिदूषहिं काऊ ॥  
तेहिं नाहीं कछु काज बिगारा । अपराधी मैं नाथ तुम्हारा ॥  
कृपा कोपु बधु बँधब गोसाईं । मो पर करिअ दास की नाई ॥  
कहिअ बेगि जेहि बिधि रिस जाई । मुनिनायक सोइ करौं उपाई ॥  
कह मुनि राम जाइ रिस कैसैं । अजहुँ अनुज तव चितव अनैसैं ॥  
एहि कें कंठ कुठारु न दीन्हा । तौ मैं काह कोपु करि कीन्हा ॥
- दो० गर्भ ठेवहिं अवनप रवनि सुनि कुठार गति घोर ।  
परसु अछत देखउँ जिअत बैरी भूपकिसोर ॥ 279
- बढ़इ न हाथु दहइ रिस छाती । भा कुठारु कुंठित नृपघाती ॥  
भयउ बाम बिधि फिरेउ सुभाऊ । मोरे हृदयें कृपा कसि काऊ ॥  
आजु दया दुखु दुसह सहावा । सुनि सौमित्रि बिहसि सिरु नावा ॥  
बाउ कृपा मूरति अनुकूला । बोलत बचन झरत जनु फूला ॥  
जौं पै कृपाँ जरिहिं मुनि गाता । कोध भएँ तनु राख बिधाता ॥  
देखु जनक हठि बालकु एहू । कीन्ह चहत जड़ जमपुर गेहू ॥  
बेगि करहु किन आखिन्ह ओटा । देखत छोट खोट नृप ढोटा ॥  
बिहसे लखनु कहा मन माहीं । मूदें आँखि कतहुँ कोउ नाहीं ॥
- दो० परसुरामु तब राम प्रति बोले उर अति कोधु ।  
संभु सरासनु तोरि सठ करसि हमार प्रबोधु ॥ 280
- बंधु कहइ कटु संमत तोरें । तू छल बिनय करसि कर जोरें ॥

करु परितोषु मोर संग्रामा । नाहिं त छाड़ कहाउब रामा ॥  
 छलु तजि करहि समरु सिवद्रोही । बंधु सहित न त मारउँ तोही ॥  
 भृगुपति बकहिं कुठार उठाएँ । मन मुसुकाहिं रामु सिर नाएँ ॥  
 गुनह लखन कर हम पर रोषू । कतहुँ सुधाइहु ते बड़ दोषू ॥  
 टेढ़ जानि सब बंदइ काहू । बक चंद्रमहि ग्रसइ न राहू ॥  
 राम कहेउ रिस तजिअ मुनीसा । कर कुठारु आगें यह सीसा ॥  
 जेहिं रिस जाइ करिअ सोइ स्वामी । मोहि जानिअ आपन अनुगामी ॥  
 दो० प्रभुहि सेवकहि समरु कस तजहु बिप्रबर रोसु ।

बेषु बिलोकें कहेसि कछु बालकहू नहिं दोसु ॥ 281

देखि कुठार बान धनु धारी । भै लरिकहि रिस बीरु बिचारी ॥  
 नामु जान पै तुम्हहि न चीन्हा । बंस सुभार्ये उतरु तेहिं दीन्हा ॥  
 जौं तुम्ह औतेहु मुनि की नाई । पद रज सिर सिसु धरत गोसाई ॥  
 छमहु चूक अनजानत केरी । चहिअ बिप्र उर कृपा घनेरी ॥  
 हमहि तुम्हहि सरिबरि कसि नाथा । कहहु न कहां चरन कहें माथा ॥  
 राम मात्र लघु नाम हमारा । परसु सहित बड़ नाम तुम्हारा ॥  
 देव एकु गुनु धनुष हमारें । नव गुन परम पुनीत तुम्हारें ॥  
 सब प्रकार हम तुम्ह सन हारे । छमहु बिप्र अपराध हमारे ॥

दो० बार बार मुनि बिप्रबर कहा राम सन राम ।

बोले भृगुपति सरुष हसि तहूँ बंधु सम बाम ॥ 282

निपटहिं द्विज करि जानहि मोही । मैं जस बिप्र सुनावउँ तोही ॥  
 चाप ०वा सर आहुति जानू । कोपु मोर अति घोर कृसानू ॥  
 समिधि सेन चतुरंग सुहाई । महा महीप भए पसु आई ॥  
 मैं एहिं परसु काटि बलि दीन्हे । समर जग्य जप कोटिन्ह कीन्हे ॥  
 मोर प्रभाउ बिदित नहिं तोरें । बोलसि निदरि बिप्र के भोरें ॥  
 भंजेउ चापु दापु बड़ बाढ़ा । अहमिति मनहुँ जीति जगु ठाढ़ा ॥  
 राम कहा मुनि कहहु बिचारी । रिस अति बड़ि लघु चूक हमारी ॥  
 छुअतहिं टूट पिनाक पुराना । मैं केहि हेतु करौं अभिमाना ॥

दो० जौं हम निदरहिं बिप्र बदि सत्य सुनहु भृगुनाथ ।

तौ अस को जग सुभटु जेहि भय बस नावहिं माथ ॥ 283

देव दनुज भूपति भट नाना । समबल अधिक होउ बलवाना ॥  
 जौं रन हमहि पचारै कोरु । लरहिं सुखेन कालु किन होरु ॥  
 छत्रिय तनु धरि समर सकाना । कुल कलंकु तेहि पावेंर आना ॥  
 कहउँ सुभाउ न कुलहि प्रसंसी । कालहु डरहिं न रन रघुबंसी ॥  
 बिप्रबंस कै असि प्रभुताई । अभय होइ जो तुम्हहि डेराई ॥  
 सुनि मृदु गूढ़ बचन रघुपति के । उघरे पटल परसुधर मति के ॥  
 राम रमापति कर धनु लेहू । खैंचहु मिटै मोर संदेहू ॥  
 देत चापु आपुहिं चलि गयऊ । परसुराम मन बिसमय भयऊ ॥

दो० जाना राम प्रभाउ तब पुलक प्रफुल्लित गात ।

जोरि पानि बोले बचन हृदयें न प्रेमु समात ॥ 284

जय रघुबंस बनज बन भानू । गहन दनुज कुल दहन कृसानू ॥  
 जय सुर संत धेनु हितकारी । जय मद मोह कोह भ्रम हारी ॥  
 बिनय सील करुना गुन सागर । जयति बचन रचना अति नागर ॥  
 सेवक सुखद सुभग सब अंगा । जय सरीर छबि कोटि अनंगा ॥

करौं काह मुख एक प्रसंसा । जय महेस मन मानस हंसा ॥  
 अनुचित बहुत कहेउँ अग्याता । छमहु छमामंदिर दोउ भ्राता ॥  
 कहि जय जय जय रघुकुलकेतू । भृगुपति गए बनहि तप हेतू ॥  
 अपभयँ कुटिल महीप डेराने । जहँ तहँ कायर गवँहिं पराने ॥  
 दो० देवन्ह दीन्हीं दुंदुभीं प्रभु पर बरषहिं फूल ।  
 हरषे पुर नर नारि सब मिटी मोहमय सूल ॥ 285  
 अति गहगहे बाजने बाजे । सबहिं मनोहर मंगल साजे ॥  
 जूथ जूथ मिलि सुमुखि सुनयनीं । करहिं गान कल कोकिलबयनीं ॥  
 सुखु बिदेह कर बरनि न जाई । जन्मदरिद्र मनहुँ निधि पाई ॥  
 बिगत त्रास भइ सीय सुखारी । जनु बिधु उदर्यँ चकोरकुमारी ॥  
 जनक कीन्ह कौसिकहि प्रनामा । प्रभु प्रसाद धनु भंजेउ रामा ॥  
 मोहि कृतकृत्य कीन्ह दुहुँ भाई । अब जो उचित सो कहिअ गोसाई ॥  
 कह मनि सुनु नरनाथ प्रबीना । रहा बिबाहु चाप आधीना ॥  
 टूटतहीं धनु भयउ बिबाहु । सुर नर नाग बिदित सब काहु ॥  
 दो० तदपि जाइ तुम्ह करहु अब जथा बंस ब्यवहारु ।  
 बूझि बिप्र कुलबृद्ध गुर बेद बिदित आचारु ॥ 286  
 दूत अवधपुर पठवहु जाई । आनहिं नृप दसरथहि बोलाई ॥  
 मुदित राउ कहि भलेहिं कृपाला । पठए दूत बोलि तेहि काला ॥  
 बहुरि महाजन सकल बोलाए । आइ सबन्हि सादर सिर नाए ॥  
 हाट बाट मंदिर सुरबासा । नगरु सँवारहु चारिहुँ पासा ॥  
 हरषि चले निज निज गृह आए । पुनि परिचारक बोलि पठाए ॥  
 रचहु बिचित्र बितान बनाई । सिर धरि बचन चले सचु पाई ॥  
 पठए बोलि गुनी तिन्ह नाना । जे बितान बिधि कुसल सुजाना ॥  
 बिधिहि बंदि तिन्ह कीन्ह अरंभा । बिरचे कनक कदलि के खंभा ॥  
 दो० हरित मनिन्ह के पत्र फल पदुमराग के फूल ।  
 रचना देखि बिचित्र अति मनु बिरंचि कर भूल ॥ 287  
 बेनु हरित मनिमय सब कीन्हे । सरल सपरब परहिं नहिं चीन्हे ॥  
 कनक कलित अहिबेलि बनाई । लखि नहिं परइ सपरन सुहाई ॥  
 तेहि के रचि पचि बंध बनाए । बिच बिच मुकुता दाम सुहाए ॥  
 मानिक मरकत कुलिस पिरोजा । चीरि कोरि पचि रचे सरोजा ॥  
 किए भृंग बहुरंग बिहंगा । गुंजहिं कूजहिं पवन प्रसंगा ॥  
 सुर प्रतिमा खंभन गढ़ि काढीं । मंगल द्रव्य लिएँ सब ठाढीं ॥  
 चौकें भौंति अनेक पुराई । सिंधुर मनिमय सहज सुहाई ॥  
 दो० सौरभ पल्लव सुभग सुठि किए नीलमनि कोरि ।  
 हेम बौर मरकत घवरि लसत पाटमय डोरि ॥ 288  
 रचे रुचिर बर बंदनिवारे । मनहुँ मनोभवेँ फंद सँवारे ॥  
 मंगल कलस अनेक बनाए । ध्वज पताक पट चमर सुहाए ॥  
 दीप मनोहर मनिमय नाना । जाइ न बरनि बिचित्र बिताना ॥  
 जेहिं मंडप दुलहिनि बैदेही । सो बरनै असि मति कबि केही ॥  
 दूलहु रामु रूप गुन सागर । सो बितानु तिहुँ लोक उजागर ॥  
 जनक भवन कै सोभा जैसी । गृह गृह प्रति पुर देखिअ तैसी ॥  
 जेहिं तेरहुति तेहि समय निहारी । तेहि लघु लगहिं भुवन दस चारी ॥  
 जो संपदा प्रजा गृह सोहा । सो बिलोकि सुरनायक मोहा ॥  
 दो० बसइ नगर जेहिं लच्छि करि कपट नारि बर बेषु ।

तेहि पुर कै सोभा कहत सकुचहिं सारद सेषु ॥ 289  
 पहुँचे दूत राम पुर पावन । हरषे नगर बिलोकि सुहावन ॥  
 भूप द्वार तिन्ह खबरि जनाई । दसरथ नृप सुनि लिए बोलाई ॥  
 करि प्रनामु तिन्ह पाती दीन्ही । मुदित महीप आपु उठि लीन्ही ॥  
 बारि बिलोचन बाँचत पाती । पुलक गात आई भरि छाती ॥  
 रामु लखनु उर कर बर चीठी । रहि गए कहत न खाटी मीठी ॥  
 पुनि धरि धीर पत्रिका बाँची । हरषी सभा बात सुनि साँची ॥  
 खेलत रहे तहाँ सुधि पाई । आए भरतु सहित हित भाई ॥  
 पूछत अति सनेहँ सकुचाई । तात कहाँ ते पाती आई ॥  
 दो० कुसल प्रानप्रिय बंधु दोउ अहहिं कहहु केहिं देस ।  
 सुनि सनेह साने बचन बाची बहुरि नरेस ॥ 290  
 सुनि पाती पुलके दोउ भ्राता । अधिक सनेहु समात न गाता ॥  
 प्रीति पुनीत भरत कै देखी । सकल सभों सुखु लहेउ बिसेषी ॥  
 तब नृप दूत निकट बैठारे । मधुर मनोहर बचन उचारे ।  
 भैया कहहु कुसल दोउ बारे । तुम्ह नीकें निज नयन निहारे ॥  
 स्यामल गौर धरें धनु भाथा । बय किसोर कौसिक मुनि साथी ॥  
 पहिचानहु तुम्ह कहहु सुभाऊ । प्रेम बिबस पुनि पुनि कह राऊ ॥  
 जा दिन तें मुनि गए लवाई । तब तें आजु साँचि सुधि पाई ॥  
 कहहु बिदेह कवन बिधि जाने । सुनि प्रिय बचन दूत मुसुकाने ॥  
 दो० सुनहु महीपति मुकुट मनि तुम्ह सम धन्य न कोउ ।  
 रामु लखनु जिन्ह के तनय बिस्व बिभूषन दोउ ॥ 291  
 पूछन जोगु न तनय तुम्हारे । पुरुषसिंघ तिहु पुर उजिआरे ॥  
 जिन्ह के जस प्रताप के आगे । ससि मलीन रबि सीतल लागे ॥  
 तिन्ह कहँ कहिअ नाथ किमि चीन्हे । देखिअ रबि कि दीप कर लीन्हे ॥  
 सीय स्वयंबर भूप अनेका । समिटे सुभट एक तें एका ॥  
 संभु सरासनु काहुँ न टारा । हारे सकल बीर बरिआरा ॥  
 तीनि लोक महँ जे भटमानी । सभ कै सकति संभु धनु भानी ॥  
 सकइ उठाइ सरासुर मेरु । सोउ हियेँ हारि गयउ करि फेरु ॥  
 जेहिं कौतुक सिवसैलु उठावा । सोउ तेहि सभों पराभउ पावा ॥  
 दो० तहाँ राम रघुबंस मनि सुनिअ महा महिपाल ।  
 भंजेउ चाप प्रयास बिनु जिमि गज पंकज नाल ॥ 292  
 सुनि सरोष भृगुनायक आए । बहुत भौंति तिन्ह आँखि देखाए ॥  
 देखि राम बलु निज धनु दीन्हा । करि बहु बिनय गवनु बन कीन्हा ॥  
 राजन रामु अतुलबल जैसे । तेज निधान लखनु पुनि तैसे ॥  
 कंपहिं भूप बिलोकत जाकें । जिमि गज हरि किसोर के ताकें ॥  
 देव देखि तव बालक दोरु । अब न आँखि तर आवत कोरु ॥  
 दूत बचन रचना प्रिय लागी । प्रेम प्रताप बीर रस पागी ॥  
 सभा समेत राउ अनुरागे । दूतन्ह देन निछावरि लागे ॥  
 कहि अनीति ते मूदहिं काना । धरमु बिचारि सबहिं सुखु माना ॥  
 दो० तब उठि भूप बसिष्ट कहुँ दीन्हि पत्रिका जाइ ।  
 कथा सुनाई गुरहि सब सादर दूत बोलाइ ॥ 293  
 सुनि बोले गुर अति सुखु पाई । पुन्य पुरुष कहुँ महि सुख छाई ॥  
 जिमि सरिता सागर महुँ जाहीं । जद्यपि ताहि कामना नाहीं ॥  
 तिमि सुख संपति बिनहिं बोलाएँ । धरमसील पहिं जाहिं सुभाएँ ॥

तुम्ह सुर सन्त धेनु गुर सेबी । तसि पुनीत कौसल्या देबी ॥  
सुकृती तुम्ह समान जग माहीं । भयउ न है कोउ होनेउ नाहीं ॥  
तुम्ह ते अधिक पुन्य बड़ काकें । राजन राम सरिस सुत जाकें ॥  
बीर बिनीत धरम ब्रत धारी । गन सागर बर बालक चारी ॥  
तुम्ह कहूँ सर्ब काल कल्याना । सजहु बरात बजाइ निसाना ॥  
दो० चलहु बेगि सुनि गुर बचन भलेहिं नाथ सिरु नाइ ।

भूपति गवने भवन तब दूतन्ह बासु देवाइ ॥ 294

राजा सबु रनिवास बोलाई । जनक पत्रिका बाचि सुनाई ॥  
सुनि संदेसु सकल हरषानीं । अपर कथा सब भूप बखानीं ॥  
प्रेम प्रफुल्लित राजहिं रानी । मनहुँ सिखिनि सुनि बारिद बानी ॥  
मुदित असीस देहिं गुर नारीं । अति आनंद मगन महतारीं ॥  
लेहिं परस्पर अति प्रिय पाती । हृदयें लगाइ जुड़ावहिं छाती ॥  
राम लखन कै कीरति करनी । बारहिं बार भूपबर बरनी ॥  
मुनि प्रसादु कहि द्वार सिधाए । रानिन्ह तब महिदेव बोलाए ॥  
दिय दान आनंद समेता । चले बिप्रबर आसिष देता ॥

दो० जाचक लिए हँकारि दीन्हि निछावरि कोटि बिधि ।

चिरु जीवहुँ सुत चारि चकबर्ति दसरथ के ॥ 295

कहत चले पहिरें पट नाना । हरषि हने गहगहे निसाना ॥  
समाचार सब लोगन्ह पाए । लागे घर घर होन बधाए ॥  
भुवन चारि दस भरा उछाहू । जनकसुता रघुबीर बिआहू ॥  
सुनि सुभ कथा लोग अनुरागे । मग गृह गलीं सँवारन लागे ॥  
जद्यपि अवध सदैव सुहावनि । राम पुरी मंगलमय पावनि ॥  
तदपि प्रीति कै प्रीति सुहाई । मंगल रचना रची बनाई ॥  
ध्वज पताक पट चामर चारु । छावा परम बिचित्र बजारु ॥  
कनक कलस तोरन मनि जाला । हरद दूब दधि अच्छत माला ॥

दो० मंगलमय निज निज भवन लोगन्ह रचे बनाइ ।

बीथीं सीचीं चतुरसम चौकें चारु पुराइ ॥ 296

जहें तहें जूथ जूथ मिलि भामिनि । सजि नव सप्त सकल दुति दामिनि ॥  
बिधुबदनी मृग सावक लोचनि । निज सरूप रति मानु बिमोचनि ॥  
गावहिं मंगल मंजुल बानीं । सुनि कल रव कलकंठि लजानीं ॥  
भूप भवन किमि जाइ बखाना । बिस्व बिमोहन रचेउ बिताना ॥  
मंगल द्रव्य मनोहर नाना । राजत बाजत बिपुल निसाना ॥  
कतहुँ बिरिद बंदी उच्चरहीं । कतहुँ बेद धुनि भसुर करहीं ॥  
गावहिं सुंदरि मंगल गीता । लै लै नामु रामु अरु सीता ॥  
बहुत उछाहु भवनु अति थोरा । मानहुँ उमगि चला चहु ओरा ॥

दो० सोभा दसरथ भवन कइ को कबि बरनै पार ।

जहाँ सकल सुर सीस मनि राम लीन्ह अवतार ॥ 297

भूप भरत पुनि लिए बोलाई । हय गय स्यंदन साजहु जाई ॥  
चलहु बेगि रघुबीर बराता । सुनत पुलक पूरे दोउ भ्राता ॥  
भरत सकल साहनी बोलाए । आयसु दीन्ह मुदित उठि धाए ॥  
रचि रुचि जीन तुरग तिन्ह साजे । बरन बरन बर बाजि बिराजे ॥  
सुभग सकल सुठि चंचल करनी । अय इव जरत धरत पग धरनी ॥  
नाना जाति न जाहिं बखाने । निदरि पवनु जनु चहत उड़ाने ॥  
तिन्ह सब छयल भए असवारा । भरत सरिस बय राजकुमारा ॥

सब सुंदर सब भूषणधारी । कर सर चाप तून कटि भारी ॥  
 दो० छरे छबीले छयल सब सूर सुजान नबीन ।  
 जुग पदचर असवार प्रति जे असिकला प्रबीन ॥ 298  
 बॉधे बिरद बीर रन गाढ़े । निकसि भए पुर बाहेर ठाढ़े ॥  
 फेरहिं चतुर तुरग गति नाना । हरषहिं सुनि सुनि पनव निसाना ॥  
 रथ सारथिन्ह बिचित्र बनाए । ध्वज पताक मनि भूषण लाए ॥  
 चवैर चारु किंकिनि धुनि करहीं । भानु जान सोभा अपहरहीं ॥  
 सार्वेकरन अगनित हय होते । ते तिन्ह रथन्ह सारथिन्ह जोते ॥  
 सुंदर सकल अलंकृत सोहे । जिन्हहि बिलोकत मुनि मन मोहे ॥  
 जे जल चलहिं थलहिं की नाई । टाप न बूड़ बेग अधिकाई ॥  
 अस्त्र सस्त्र सबु साजु बनाई । रथी सारथिन्ह लिए बोलाई ॥  
 दो० चढ़ि चढ़ि रथ बाहेर नगर लागीं जुरन बरात ।  
 होत सगुन सुंदर सबहि जो जेहि कारज जात ॥ 299  
 कलित करिबरन्हि परीं अंबारीं । कहि न जाहिं जेहि भौंति सँवारीं ॥  
 चले मत्त गज घंट बिराजी । मनहुँ सुभग सावन घन राजी ॥  
 बाहन अपर अनेक बिधाना । सिबिका सुभग सुखासन जाना ॥  
 तिन्ह चढ़ि चले बिप्रबर बृंदा । जनु तनु धरें सकल श्रुति छंदा ॥  
 मागध सूत बंदि गनगायक । चले जान चढ़ि जो जेहि लायक ॥  
 बेसर ऊँट बृषभ बहु जाती । चले बस्तु भरि अगनित भौंती ॥  
 कोटिन्ह कौवरि चले कहारा । बिबिध बस्तु को बरनै पारा ॥  
 चले सकल सेवक समुदाई । निज निज साजु समाजु बनाई ॥  
 दो० सब कें उर निर्भर हरषु पूरित पुलक सरीर ।  
 कबहिं देखिबे नयन भरि रामु लखनु दोउ बीर ॥ 300  
 गरजहिं गज घंटा धुनि घोरा । रथ रव बाजि हिंस चहु ओरा ॥  
 निदरि घनहि घुर्मरहिं निसाना । निज पराइ कछु सुनिअ न काना ॥  
 महा भीर भूपति के द्वारें । रज होइ जाइ पषान पवारें ॥  
 चढीं अटारिन्ह देखहिं नारीं । लिएं आरती मंगल थारीं ॥  
 गावहिं गीत मनोहर नाना । अति आनंदु न जाइ बखाना ॥  
 तब सुमंत्र दुइ स्यंदन साजी । जोते रबि हय निंदक बाजी ॥  
 दोउ रथ रुचिर भूप पहिं आने । नहिं सारद पहिं जाहिं बखाने ॥  
 राज समाजु एक रथ साजा । दूसर तेज पुंज अति भ्राजा ॥  
 दो० तेहिं रथ रुचिर बसिष्ठ कहुं हरषि चढाइ नरेसु ।  
 आपु चढ़ेउ स्यंदन सुमिरि हर गुर गौरि गनेसु ॥ 301  
 सहित बसिष्ठ सोह नृप कैसैं । सुर गुर संग पुरंदर जैसैं ॥  
 करि कुल रीति बेद बिधि राऊ । देखि सबहि सब भौंति बनाऊ ॥  
 सुमिरि रामु गुर आयसु पाई । चले महीपति संख बजाई ॥  
 हरषे बिबुध बिलोकि बराता । बरषहिं सुमन सुमंगल दाता ॥  
 भयउ कोलाहल हय गय बाजे । ब्योम बरात बाजने बाजे ॥  
 सुर नर नारि सुमंगल गाई । सरस राग बाजहिं सहनाई ॥  
 घंट घंटी धुनि बरनि न जाहीं । सरव करहिं पाइक फहराहीं ॥  
 करहिं बिदूषक कौतुक नाना । हास कसल कल गान सुजाना ॥  
 दो० तुरग नचावहिं कुअँर बर अकनि मृदंग निसान ।  
 नागर नट चितवहिं चकित डगहिं न ताल बँधान ॥ 302  
 बनइ न बरनत बनी बराता । होहिं सगुन सुंदर सुभदाता ॥

चारा चाषु बाम दिसि लेई । मनहुँ सकल मंगल कहि देई ॥  
 दाहिन काग सुखेत सुहावा । नकुल दरसु सब काहूँ पावा ॥  
 सानुकूल बह त्रिबिध बयारी । सघट सबाल आव बर नारी ॥  
 लोवा फिरि फिरि दरसु देखावा । सुरभी सनमुख सिसुहि पिआवा ॥  
 मृगमाला फिरि दाहिनि आई । मंगल गन जनु दीन्हि देखाई ॥  
 छेमकरी कह छेम बिसेषी । स्यामा बाम सुतरु पर देखी ॥  
 सनमुख आयउ दधि अरु मीना । कर पुस्तक दुइ विप्र प्रबीना ॥  
 दो० मंगलमय कल्याणमय अभिमत फल दातार ।

जनु सब साचे होन हित भए सगुन एक बार ॥ 303

मंगल सगुन सुगम सब तार्के । सगुन ब्रह्म सुंदर सुत जाके ॥  
 राम सरिस बरु दुलहिनि सीता । समधी दसरथु जनकु पुनीता ॥  
 सुनि अस ब्याहु सगुन सब नाचे । अब कीन्हे बिरंचि हम सौंचे ॥  
 एहि बिधि कीन्ह बरात पयाना । हय गय गाजहिं हने निसाना ॥  
 आवत जानि भानुकुल केतू । सरितन्हि जनक बँधाए सेतू ॥  
 बीच बीच बर बास बनाए । सुरपुर सरिस संपदा छाए ॥  
 असन सयन बर बसन सुहाए । पावहिं सब निज निज मन भाए ॥  
 नित नूतन सुख लखि अनुकूले । सकल बरातिन्ह मंदिर भूले ॥  
 दो० आवत जानि बरात बर सुनि गहगहे निसान ।

सजि गज रथ पदचर तुरग लेन चले अगवान ॥ 304

मासपारायण, दसवौं विश्राम

कनक कलस भरि कोपर थारा । भाजन ललित अनेक प्रकारा ॥  
 भरे सुधासम सब पकवाने । नाना भौंति न जाहिं बखाने ॥  
 फल अनेक बर बस्तु सुहाई । हरषि भेंट हित भूप पठाई ॥  
 भूषन बसन महामनि नाना । खग मृग हय गय बहुबिधि जाना ॥  
 मंगल सगुन सुगंध सुहाए । बहुत भौंति महिपाल पठाए ॥  
 दधि चिउरा उपहार अपारा । भरि भरि कौंवरि चले कहारा ॥  
 अगवानन्ह जब दीखि बराता । उर आनंदु पुलक भर गाता ॥  
 देखि बनाव सहित अगवाना । मुदित बरातिन्ह हने निसाना ।  
 दो० हरषि परसपर मिलन हित कछुक चले बगमेल ।

जनु आनंद समुद्र दुइ मिलत बिहाइ सुबेल ॥ 305

बरषि सुमन सुर सुंदरि गावहिं । मुदित देव दुंदुभीं बजावहिं ॥  
 बस्तु सकल राखीं नृप आगे । बिनय कीन्हि तिन्ह अति अनुरागे ॥  
 प्रेम समेत रायें सबु लीन्हा । भै बकसीस जाचकन्हि दीन्हा ॥  
 करि पूजा मान्यता बडाई । जनवासे कहूँ चले लवाई ॥  
 बसन बिचित्र पौंवड़े परहीं । देखि धनदु धन मनु परिहरहीं ॥  
 अति सुंदर दीन्हेउ जनवासा । जहँ सब कहूँ सब भौंति सुपासा ॥  
 जानी सियें बरात पुर आई । कछु निज महिमा प्रगटि जनाई ॥  
 हृदयें सुमिरि सब सिद्धि बोलाई । भूप पहुनई करन पठाई ॥  
 दो० सिद्धि सब सिय आयसु अकनि गई जहाँ जनवास ।

लिएँ संपदा सकल सुख सुरपुर भोग बिलास ॥ 306

निज निज बास बिलोकि बराती । सुर सुख सकल सलभ सब भौंती ॥  
 बिभव भेद कछु कोउ न जाना । सकल जनक कर करहिं बखाना ॥  
 सिय महिमा रघुनायक जानी । हरषे हृदयें हेतु पहिचानी ॥

पितु आगमनु सुनत दोउ भाई । हृदयें न अति आनंदु अमाई ॥  
 सकुचन्ह काहि न सकत गुरु पाहीं । पितु दरसन लालचु मन माहीं ॥  
 बिस्वामित्र बिनय बड़ि देखी । उपजा उर संतोषु बिसेषी ॥  
 हरषि बंधु दोउ हृदयें लगाए । पुलक अंग अंबक जल छाए ॥  
 चले जहाँ दसरथु जनवासे । मनहुँ सरोबर तकेउ पिआसे ॥  
 दो० भूप बिलोके जबहिं मुनि आवत सुतन्ह समेत ।  
 उठे हरषि सुखसिंधु महुँ चले थाह सी लेत ॥ 307  
 मुनिहि दंडवत कीन्ह महीसा । बार बार पद रज धरि सीसा ॥  
 कौसिक राउ लिए उर लाई । कहि असीस पूछी कुसलाई ॥  
 पुनि दंडवत करत दोउ भाई । देखि नृपति उर सुखु न समाई ॥  
 सुत हियें लाइ दुसह दुख मेटे । मृतक सरीर प्रान जनु भेंटे ॥  
 पुनि बसिष्ठ पद सिर तिन्ह नाए । प्रेम मुदित मुनिबर उर लाए ॥  
 बिप्र बूंद बंदे दुहुँ भाई । मनभावती असीसें पाई ॥  
 भरत सहानुज कीन्ह प्रनामा । लिए उठाइ लाइ उर रामा ॥  
 हरषे लखन देखि दोउ भ्राता । मिले प्रेम परिपूरित गाता ॥  
 दो० पुरजन परिजन जातिजन जाचक मंत्री मीत ।  
 मिले जथाबिधि सबहि प्रभु परम कृपाल बिनीत ॥ 308  
 रामहि देखि बरात जुझानी । प्रीति कि रीति न जाति बखानी ॥  
 नृप समीप सोहहिं सुत चारी । जनु धन धरमादिक तनुधारी ॥  
 सुतन्ह समेत दसरथहि देखी । मुदित नगर नर नारि बिसेषी ॥  
 सुमन बरिसि सुर हनहिं निसाना । नाकनटीं नाचहिं करि गाना ॥  
 सतानंद अरु बिप्र सचिव गन । मागध सूत बिदुष बंदीजन ॥  
 सहित बरात राउ सनमाना । आयसु मागि फिरे अगवाना ॥  
 प्रथम बरात लगन तें आई । तातें पुर प्रमोदु अधिकाई ॥  
 ब्रह्मानंद लोग सब लहहीं । बढहुँ दिवस निसि बिधि सन कहहीं ॥  
 दो० रामु सीय सोभा अवधि सुकृत अवधि दोउ राज ।  
 जहें तहें पुरजन कहहिं अस मिलि नर नारि समाज ॥ 309  
 जनक सुकृत मूरति बैदेही । दसरथ सुकृत रामु धरें देही ॥  
 इन्ह सम काहुँ न सिव अवराधे । काहुँ न इन्ह समान फल लाधे ॥  
 इन्ह सम कोउ न भयउ जग माहीं । है नहिं कतहूँ होनेउ नाहीं ॥  
 हम सब सकल सुकृत कै रासी । भए जग जनमि जनकपुर बासी ॥  
 जिन्ह जानकी राम छबि देखी । को सुकृती हम सरिस बिसेषी ॥  
 पुनि देखब रघुबीर बिआहू । लेब भली बिधि लोचन लाहू ॥  
 कहहिं परसपर कोकिलबयनीं । एहि बिआहें बड़ लाभु सुनयनीं ॥  
 बड़ें भाग बिधि बात बनाई । नयन अतिथि होइहहिं दोउ भाई ॥  
 दो० बारहिं बार सनेह बस जनक बोलाउब सीय ।  
 लेन आइहहिं बंधु दोउ कोटि काम कमनीय ॥ 310  
 बिबिध भॉति होइहि पहुनाई । प्रिय न काहि अस सासुर माई ॥  
 तब तब राम लखनहि निहारी । होइहहिं सब पुर लोग सुखारी ॥  
 सखि जस राम लखन कर जोटा । तैसेइ भूप संग दुइ ढोटा ॥  
 स्याम गौर सब अंग सुहाए । ते सब कहहिं देखि जे आए ॥  
 कहा एक मैं आजु निहारे । जनु बिरंचि निज हाथ सँवारे ॥  
 भरतु रामही की अनुहारी । सहसा लखि न सकहिं नर नारी ॥  
 लखनु सत्रुसूदन एकरूपा । नख सिख ते सब अंग अनूपा ॥

मन भावहिं मुख बरनि न जाहीं । उपमा कहुं त्रिभुवन कोउ नाही ॥  
छं० उपमा न कोउ कह दास तुलसी कतहुं कबि कोबिद कहैं ।

बल बिनय बिद्या सील सोभा सिंधु इन्ह से एइ अहैं ॥  
पुर नारि सकल पसारि अंचल बिधिहि बचन सुनावहीं ।  
ब्याहिअहुं चारिउ भाइ एहिं पुर हम सुमंगल गावहीं ॥

सो० कहहिं परस्पर नारि बारि बिलोचन पुलक तन ।

सखि सबु करब पुरारि पुन्य पयोनिधि भूप दोउ ॥ 311

एहि बिधि सकल मनोरथ करहीं । आनंद उमगि उमगि उर भरहीं ॥

जे नृप सीय स्वयंबर आए । देखि बंधु सब तिन्ह सुख पाए ॥

कहत राम जसु बिसद बिसाला । निज निज भवन गए महिपाला ॥

गए बीति कछु दिन एहि भाँती । प्रमुदित पुरजन सकल बराती ॥

मंगल मूल लगन दिनु आवा । हिम रितु अगहनु मास सुहावा ॥

ग्रह तिथि नखतु जोगु बर बारु । लगन सोधि बिधि कीन्ह बिचारु ॥

पठै दीन्ह नारद सन सोई । गनी जनक के गनकन्ह जोई ॥

सुनी सकल लोगन्ह यह बाता । कहहिं जोतिषी आहिं बिधाता ॥

दो० धेनुधूरि बेला बिमल सकल सुमंगल मूल ।

बिप्रन्ह कहेउ बिदेह सन जानि सगुन अनुकूल ॥ 312

उपरोहितहि कहेउ नरनाहा । अब बिलंब कर कारनु काहा ॥

सतानंद तब सचिव बोलाए । मंगल सकल साजि सब ल्याए ॥

संख निसान पनव बहु बाजे । मंगल कलस सगुन सभ साजे ॥

सुभग सुआसिनि गावहिं गीता । करहिं बेद धुनि बिप्र पुनीता ॥

लेन चले सादर एहि भाँती । गए जहाँ जनवास बराती ॥

कोसलपति कर देखि समाजू । अति लघु लाग तिन्हहि सुरराजू ॥

भयउ समउ अब धारिअ पाऊ । यह सुनि परा निसानहिं घाऊ ॥

गुरहि पूछि करि कुल बिधि राजा । चले संग मुनि साधु समाजा ॥

दो० भाग्य बिभव अवधेस कर देखि देव ब्रह्मादि ।

लगे सराहन सहस मुख जानि जनम निज बादि ॥ 313

सुरन्ह सुमंगल अवसरु जाना । बरषहिं सुमन बजाइ निसाना ॥

सिव ब्रह्मादिक बिबुध बरूथा । चढ़े बिमानन्हि नाना जूथा ॥

प्रेम पुलक तन हृदय उछाहू । चले बिलोकन राम बिआहू ॥

देखि जनकपुरु सुर अनुरागे । निज निज लोक सबहिं लघु लागे ॥

चितवहिं चकित बिचित्र बिताना । रचना सकल अलौकिक नाना ॥

नगर नारि नर रूप निधाना । सुघर सुधरम सुसील सुजाना ॥

तिन्हहि देखि सब सुर सुरनारी । भए नखत जनु बिधु उजिआरों ॥

बिधिहि भयउ आचरजु बिसेषी । निज करनी कछु कतहुं न देखी ॥

दो० सिवें समुझाए देव सब जनि आचरज भुलाहु ।

हृदयें बिचारहु धीर धरि सिय रघुबीर बिआहु ॥ 314

जिन्ह कर नामु लेत जग माहीं । सकल अमंगल मूल नसाहीं ॥

करतल होहिं पदारथ चारी । तेइ सिय रामु कहउ कामारी ॥

एहि बिधि संभु सुरन्ह समुझावा । पुनि आगे बर बसह चलावा ॥

देवन्ह देखे दसरथु जाता । महामोद मन पुलकित गाता ॥

साधु समाज संग महिदेवा । जनु तनु धरें करहिं सुख सेवा ॥

सोहत साथ सुभग सुत चारी । जनु अपबरग सकल तनुधारी ॥

मरकत कनक बरन बर जोरी । देखि सुरन्ह भै प्रीति न थोरी ॥

पुनि रामहि बिलोकि हिये हरषे । नूपहि सराहि सुमन तिन्ह बरषे ॥  
दो० राम रूपु नख सिख सुभग बारहिं बार निहारि ।

पुलक गात लोचन सजल उमा समेत पुरारि ॥ 315  
केकि कंठ दुति स्यामल अंगा । तड़ित बिनिंदक बसन सुरंगा ॥  
ब्याह बिभूषन बिबिध बनाए । मंगल सब सब भौंति सुहाए ॥  
सरद बिमल बिधु बदनु सुहावन । नयन नवल राजीव लजावन ॥  
सकल अलौकिक सुंदरताई । कहि न जाइ मनहीं मन भाई ॥  
बंधु मनोहर सोहहिं संगी । जात नचावत चपल तुरंगा ॥  
राजकुअँर बर बाजि देखावहिं । बंस प्रसंसक बिरिद सनावहिं ॥  
जेहि तुरंग पर रामु बिराजे । गति बिलोकि खगनायकु लाजे ॥  
कहि न जाइ सब भौंति सुहावा । बाजि बेषु जनु काम बनावा ॥

छं० जनु बाजि बेषु बनाइ मनसिजु राम हित अति सोहई ।  
आपनें बय बल रूप गुन गति सकल भुवन बिसोहई ॥  
जगमगत जीनु जराव जोति सुमोति मनि मानिक लगे ।  
किंकिनि ललाम लगामु ललित बिलोकि सुर नर मुनि ठगे ॥

दो० प्रभु मनसहिं लयलीन मनु चलत बाजि छबि पाव ।  
भूषित उड़गन तड़ित घनु जनु बर बरहि नचाव ॥ 316  
जेहिं बर बाजि रामु अवतारा । तेहि सारदउ न बरनै पारा ॥  
संकरु राम रूप अनुरागे । नयन पंचदस अति प्रिय लागे ॥  
हरि हित सहित रामु जब जोहे । रमा समेत रमापति मोहे ॥  
निरखि राम छबि बिधि हरषाने । आठइ नयन जानि पछिताने ॥  
सुर सेनप उर बहुत उछाहू । बिधि ते डेवढ लोचन लाहू ॥  
रामहि चितव सुरेस सुजाना । गौतम श्रापु परम हित माना ॥  
देव सकल सुरपतिहि सिहाहीं । आजु पुरदर सम कोउ नाही ॥  
मुदित देवगन रामहि देखी । नृपसमाज दुहुँ हरषु बिसेषी ॥

छं० अति हरषु राजसमाज दुहु दिसि दुंदुभीं बाजहिं घनी ।  
बरषहिं सुमन सुर हरषि कहि जय जयति जय रघुकुलमनी ॥  
एहि भौंति जानि बरात आवत बाजने बहु बाजहीं ।  
रानी सुआसिनि बोलि परिछनि हेतु मंगल साजहीं ॥

दो० सजि आरती अनेक बिधि मंगल सकल सँवारि ।  
चलीं मुदित परिछनि करन गजगामिनि बर नारि ॥ 317  
बिधुबदनीं सब सब मृगलोचनि । सब निज तन छबि रति मदु मोचनि ॥  
पहिरें बरन बरन बर चीरा । सकल बिभूषन सजें सरीरा ॥  
सकल सुमंगल अंग बनाएँ । करहिं गान कलकंठि लजाएँ ॥  
कंकन किंकिनि नूपुर बाजहिं । चालि बिलोकि काम गज लाजहिं ॥  
बाजहिं बाजने बिबिध प्रकारा । नभ अरु नगर सुमंगलचारा ॥  
सची सारदा रमा भवानी । जे सुरतिय सुचि सहज सयानी ॥  
कपट नारि बर बेष बनाई । मीलीं सकल रनिवासहिं जाई ॥  
करहिं गान कल मंगल बानीं । हरष बिबस सब काहुँ न जानीं ॥

छं० को जान केहि आनंद बस सब ब्रह्म बर परिछन चली ।  
कल गान मधुर निसान बरषहिं सुमन सुर सोभा भली ॥  
आनंदकंदु बिलोकि दूलहु सकल हिये हरषित भई ।  
अंभोज अंबक अंबु उमगि सुअंग पुलकावलि छई ॥

दो० जो सुखु भा सिय मातु मन देखि राम बर बेषु ।

सो न सकहिं कहि कलप सत सहस सारदा सेषु ॥ 318  
 नयन नीरु हटि मंगल जानी । परिछनि करहिं मुदित मन रानी ॥  
 बेद बिहित अरु कुल आचारु । कीन्ह भली बिधि सब ब्यवहारु ॥  
 पंच सबद धुनि मंगल गाना । पट पॉवड़े परहिं बिधि नाना ॥  
 करि आरती अरघु तिन्ह दीन्हा । राम गमनु मंडप तब कीन्हा ॥  
 रसरथु सहित समाज बिराजे । बिभव बिलोकि लोकपति लाजे ॥  
 समयें समयें सुर बरषहिं फूला । सांति पढ़हिं महिसुर अनुकूला ॥  
 नभ अरु नगर कोलाहल होई । आपनि पर कछु सुनइ न कोई ॥  
 एहि बिधि रामु मंडपहिं आए । अरघु देइ आसन बैठाए ॥  
 छं० बैठारि आसन आरती करि निरखि बरु सुखु पावहीं ।  
 मनि बसन भूषन भूरि वारहिं नारि मंगल गावहीं ॥  
 ब्रह्मादि सुरबर बिप्र बेष बनाइ कौतुक देखहीं ।  
 अवलोकि रघुकुल कमल रबि छबि सुफल जीवन लेखहीं ॥  
 दो० नाऊ बारी भाट नट राम निछावरि पाइ ।  
 मुदित असीसहिं नाइ सिर हरषु न हृदयें समाइ ॥ 319  
 मिले जनकु दसरथु अति प्रीतीं । करि बैदिक लौकिक सब रीतीं ॥  
 मिलत महा दोउ राज बिराजे । उपमा खोजि खोजि कबि लाजे ॥  
 लही न कतहुँ हारि हियें मानी । इन्ह सम एइ उपमा उर आनी ॥  
 सामध देखि देव अनुरागे । सुमन बरषि जसु गावन लागे ॥  
 जगु बिरंचि उपजावा जब तें । देखे सुने ब्याह बहु तब तें ॥  
 सकल भॉति सम साजु समाजू । सम समधी देखे हम आजू ॥  
 देव गिरा सुनि सुंदर साँची । प्रीति अलौकिक दुहु दिसि माची ॥  
 देत पॉवड़े अरघु सुहाए । सादर जनकु मंडपहिं ल्याए ॥  
 छं० मंडपु बिलोकि बिचित्र रचनों रुचिरतों मुनि मन हरे ।  
 निज पानि जनक सुजान सब कहुँ आनि सिंघासन धरे ॥  
 कुल इष्ट सरिस बसिष्ट पूजे बिनय करि आसिष लही ।  
 कौसिकहि पूजत परम प्रीति कि रीति तौ न परै कही ॥  
 दो० बामदेव आदिक रिषय पूजे मुदित महीस ।  
 दिए दिव्य आसन सबहि सब सन लही असीस ॥ 320  
 बहुरि कीन्हि कोसलपति पूजा । जानि ईस सम भाउ न दूजा ॥  
 कीन्हि जोरि कर बिनय बड़ाई । कहि निज भाग्य बिभव बहुताई ॥  
 पूजे भूपति सकल बराती । समधी सम सादर सब भॉती ॥  
 आसन उचित दिए सब काहू । कहाँ काह मुख एक उछाहू ॥  
 सकल बरात जनक सनमानी । दान मान बिनती बर बानी ॥  
 बिधि हरि हरु दिसिपति दिनराऊ । जे जानहिं रघुबीर प्रभाऊ ॥  
 कपट बिप्र बर बेष बनाएँ । कौतुक देखहिं अति सचु पाएँ ॥  
 पूजे जनक देव सम जानें । दिए सुआसन बिनु पहिचानें ॥  
 छं० पहिचान को केहि जान सबहि अपान सुधि भोरी भई ।  
 आनंद कंदु बिलोकि दूलहु उभय दिसि आनंद मई ॥  
 सुर लखे राम सुजान पूजे मानसिक आसन दए ।  
 अवलोकि सीलु सुभाउ प्रभु को बिबुध मन प्रमुदित भए ॥  
 दो० रामचंद्र मुख चंद्र छबि लोचन चारु चकोर ।  
 करत पान सादर सकल प्रेमु प्रमोदु न थोर ॥ 321  
 समउ बिलोकि बसिष्ट बोलाए । सादर सतानंदु सुनि आए ॥

- बेगि कुअँरि अब आनहु जाई । चले मुदित मुनि आयसु पाई ॥  
रानी सुनि उपरोहित बानी । प्रमुदित सखिन्ह समेत सयानी ॥  
बिप्र बधू कुलबृद्ध बोलाई । करि कुल रीति सुमंगल गाई ॥  
नारि बेष जे सुर बर बामा । सकल सुभार्य सुंदरी स्यामा ॥  
तिन्हहि देखि सुखु पावहि नारी । बिनु पहिचानि प्रानहु ते प्यारी ॥  
बार बार सनमानहि रानी । उमा रमा सारद सम जानी ॥  
सीय सँवारि समाजु बनाई । मुदित मंडपहि चली लवाई ॥
- छं० चलि ल्याइ सीतहि सखीं सादर सजि सुमंगल भामिनीं ।  
नवसप्त साजें सुंदरीं सब मत्त कुंजर गामिनीं ॥  
कल गान सुनि मुनि ध्यान त्यागहिं काम कोकिल लाजहीं ।  
मंजीर नूपुर कलित कंकन ताल गति बर बाजहीं ॥
- दो० सोहति बनिता बृद महुँ सहज सुहावनि सीय ।  
छबि ललना गन मध्य जनु सुषमा तिय कमनीय ॥ 322
- सिय सुंदरता बरनि न जाई । लघु मति बहुत मनोहरताई ॥  
आवत दीखि बरातिन्ह सीता । रूप रासि सब भौंति पुनीता ॥  
सबहि मनहिं मन किए प्रनामा । देखि राम भए पूरनकामा ॥  
हरषे दसरथ सुतन्ह समेता । कहि न जाइ उर आनँदु जेता ॥  
सुर प्रनामु करि बरिसहिं फूला । मुनि असीस धुनि मंगल मूला ॥  
गान निसान कोलाहलु भारी । प्रेम प्रमोद मगन नर नारी ॥  
एहि बिधि सीय मंडपहिं आई । प्रमुदित सांति पढ़हिं मुनिराई ॥  
तेहि अवसर कर बिधि व्यवहारु । दुहुँ कुलगुर सब कीन्ह अचारु ॥
- छं० आचारु करि गुर गौरि गनपति मुदित साधु पुजावहीं ।  
सुर प्रगटि पूजा लेहिं देहिं असीस अति सुखु पावहीं ॥  
मधुपर्क मंगल द्रव्य जो जेहि समय मुनि मन महुँ चहैं ।  
भरे कनक कोपर कलस सो तब लिएहिं परिचारक रहैं ॥ 1
- कुल रीति प्रीति समेत रबि कहि देत सबु सादर कियो ।  
एहि भौंति देव पुजाइ सीतहि सुभग सिंघासनु दियो ॥  
सिय राम अवलोकनि परसपर प्रेमु काहु न लखि परै ।  
मन बुद्धि बर बानी अगोचर प्रगट कबि कैसें करै ॥ 2
- दो० होम समय तनु धरि अनलु अति सुख आहुति लेहिं ।  
संत बेष धरि बेद सब कहि बिबाह बिधि देहिं ॥ 323
- जनक पाटमहिषी जग जानी । सीय मातु किमि जाइ बखानी ॥  
सुजसु सुकृत सुख सुंदरताई । सब समेटि बिधि रची बनाई ॥  
समउ जानि मुनिबरन्ह बोलाई । सुनत सुआसिनि सादर ल्याई ॥  
जनक बाम दिसि सोह सुनयना । हिमगिरि संग बनी जनु मयना ॥  
कनक कलस मनि कोपर रुरे । सुचि सुगंध मंगल जल पूरे ॥  
निज कर मुदित रायँ अरु रानी । धरे राम के आगें आनी ॥  
पढ़हिं बेद मुनि मंगल बानी । गगन सुमन झरि अवसरु जानी ॥  
बरु बिलोकि दंपति अनुरागे । पाय पुनीत पखारन लागे ॥
- छं० लागे पखारन पाय पंकज प्रेम तन पुलकावली ।  
नभ नगर गान निसान जय धुनि उमगि जनु चहुँ दिसि चली ॥  
जे पद सरोज मनोज अरि उर सर सदैव बिराजहीं ।  
जे सकृत सुमिरत बिमलता मन सकल कलि मल भाजहीं ॥ 1
- जे परसि मुनिबनिता लही गति रही जो पातकमई ।

मकरंदु जिन्ह को संभु सिर सुचिता अवधि सुर बरनई ॥  
 करि मधुप मन मुनि जोगिजन जे सेइ अभिमत गति लहैं ।  
 ते पद पखारत भाग्यभाजनु जनकु जय जय सब कहैं ॥ 2  
 बर कुअँरि करतल जोरि साखोचारु दोउ कुलगुर करैं ।  
 भयो पानिगहनु बिलोकि बिधि सुर मनुज मुनि आँनद भरैं ॥  
 सुखमूल दूलहु देखि दंपति पुलक तन हुलस्यो हियो ।  
 करि लोक बेद बिधानु कन्यादानु नृपभूषन कियो ॥ 3  
 हिमवंत जिमि गिरिजा महेसहि हरिहि श्री सागर दई ।  
 तिमि जनक रामहि सिय समरपी बिस्व कल कीरति नई ॥  
 क्योँ करै बिनय बिदेहु कियो बिदेहु मूरति सावँरी ।  
 करि होमु बिधिवत गाँठि जोरी होन लागीं भावँरी ॥ 4

दो० जय धुनि बंदी बेद धुनि मंगल गान निसान ।

सुनि हरषहिं बरषहिं बिबुध सुरतरु सुमन सुजान ॥ 324  
 कुअँरु कुअँरि कल भावँरि देहीं । नयन लाभु सब सादर लेहीं ॥  
 जाइ न बरनि मनोहर जोरी । जो उपमा कछु कहौं सो थोरी ॥  
 राम सीय सुंदर प्रतिछाहीं । जगमगात मनि खंभन माहीं ॥  
 मनहुँ मदन रति धरि बहु रूपा । देखत राम बिआहु अनूपा ॥  
 दरस लालसा सकुच न थोरी । प्रगटत दुरत बहोरि बहोरी ॥  
 भए मगन सब देखनिहारे । जनक समान अपान बिसारे ॥  
 प्रमुदित मुनिन्ह भौवरीं फेरीं । नेगसहित सब रीति निबेरीं ॥  
 राम सीय सिर सेंदुर देहीं । सोभा कहि न जाति बिधि केहीं ॥  
 अरुन पराग जलजु भरि नीकें । ससिहि भूष अहि लोभ अमी कें ॥  
 बहुरि बसिष्ठ दीन्हि अनुसासन । बरु दुलहिनि बैठे एक आसन ॥

छं० बैठे बरासन रामु जानकि मुदित मन दसरथु भए ।  
 तनु पुलक पुनि पुनि देखि अपने सुकृत सुरतरु फल नए ॥  
 भरि भुवन रहा उछाहु राम बिबाहु भा सबहीं कहा ।  
 केहि भौंति बरनि सिरात रसना एक यहु मंगलु महा ॥ 1  
 तब जनक पाइ बसिष्ठ आयसु ब्याह साज सँवारि कै ।  
 मांडवी श्रुतकीरति उरमिला कुअँरि लई हँकारि कै ॥  
 कुसकेतु कन्या प्रथम जो गुन सील सुख सोभामई ।  
 सब रीति प्रीति समेत करि सो ब्याहि नृप भरतहि दई ॥ 2  
 जानकी लघु भगिनी सकल सुंदरि सिरोमनि जानि कै ।  
 सो तनय दीन्ही ब्याहि लखनहि सकल बिधि सनमानि कै ॥  
 जेहि नामु श्रुतकीरति सुलोचनि सुमुखि सब गुन आगरी ।  
 सो दई रिपुसूदनहि भूपति रूप सील उजागरी ॥ 3  
 अनुरूप बर दुलहिनि परस्पर लखि सकुच हियँ हरषहीं ।  
 सब मुदित सुंदरता सराहहिं सुमन सुर गन बरषहीं ॥  
 सुंदरीं सुंदर बरन्ह सह सब एक मंडप राजहीं ।  
 जनु जीव उर चारिउ अवस्था बिभुन सहित बिराजहीं ॥ 4

दो० मुदित अवधपति सकल सुत बधुन्ह समेत निहारि ।

जनु पाए महिपाल मनि कियन्ह सहित फल चारि ॥ 325  
 जसि रघुबीर ब्याह बिधि बरनी । सकल कुँअर ब्याहे तेहिं करनी ॥  
 कहि न जाइ कछु दाइज भूरी । रहा कनक मनि मंडपु पूरी ॥  
 कंबल बसन बिचित्र पटोरे । भौंति भौंति बहु मोल न थोरे ॥

गज रथ तुरग दास अरु दासी । धेनु अलंकृत कामदुहा सी ॥  
 बस्तु अनेक करिअ किमि लेखा । कहि न जाइ जानहिं जिन्ह देखा ॥  
 लोकपाल अवलोकि सिहाने । लीन्ह अवधपति सबु सुखु माने ॥  
 दीन्ह जाचकन्हि जो जेहि भावा । उबरा सो जनवासेहिं आवा ॥  
 तब कर जोरि जनकु मृदु बानी । बोले सब बरात सनमानी ॥

- छं० सनमानि सकल बरात आदर दान बिनय बड़ाइ कै ।  
 प्रमुदित महा मुनि बृंद बंदे पूजि प्रेम लड़ाइ कै ॥  
 सिरु नाइ देव मनाइ सब सन कहत कर संपुट किएँ ।  
 सुर साधु चाहत भाउ सिंधु कि तोष जल अजलि दिएँ ॥ 1  
 कर जोरि जनकु बहोरि बंधु समेत कोसलराय सों ।  
 बोले मनोहर बयन सानि सनेह सील सुभाय सों ॥  
 संबंध राजन रावरें हम बड़े अब सब बिधि भए ।  
 एहि राज साज समेत सेवक जानिबे बिनु गथ लए ॥ 2  
 ए दारिका परिचारिका करि पालिबीं करुना नई ।  
 अपराधु छमिबो बोलि पठए बहुत हौं ढीटयो कई ॥  
 पुनि भानुकुलभूषन सकल सनमान निधि समधी किए ।  
 कहि जाति नहिं बिनती परस्पर प्रेम परिपूरन हिए ॥ 3  
 बृंदारका गन सुमन बरिसहिं राउ जनवासेहि चले ।  
 दुंदुभी जय धुनि बेद धुनि नभ नगर कौतूहल भले ॥  
 तब सखीं मंगल गान करत मुनीस आयसु पाइ कै ।  
 दूलह दुलहिनिन्ह सहित सुंदरि चलीं कोहबर ल्याइ कै ॥ 4  
 दो० पुनि पुनि रामहि चितव सिय सकुचति मनु सकुचै न ।  
 हरत मनोहर मीन छबि प्रेम पिआसे नैन ॥ 326

#### मासपारायण, ग्यारहवों विश्राम

स्याम सरीरु सुभायें सुहावन । सोभा कोटि मनोज लजावन ॥  
 जावक जुत पद कमल सुहाए । मुनि मन मधुप रहत जिन्ह छाए ॥  
 पीत पुनीत मनोहर धोती । हरति बाल रबि दामिनि जोती ॥  
 कल किंकिनि कटि सूत्र मनोहर । बाहु बिसाल बिभूषन सुंदर ॥  
 पीत जनेउ महाछबि देई । कर मुद्रिका चोरि चितु लेई ॥  
 सोहत ब्याज साज सब साजे । उर आयत उरभूषन राजे ॥  
 पिअर उपरना काखासोती । दुहुँ ऑचरन्हि लगे मनि मोती ॥  
 नयन कमल कल कुंडल काना । बदनु सकल सौंदर्ज निधाना ॥  
 सुंदर भृकुटि मनोहर नासा । भाल तिलकु रुचिरता निवासा ॥  
 सोहत मौरु मनोहर माथे । मंगलमय मुकुता मनि गाथे ॥

- छं० गाथे महामनि मौर मंजुल अंग सब चित चोरहीं ।  
 पुर नारि सुर सुंदरीं बरहि बिलोकि सब तिन तोरहीं ॥  
 मनि बसन भूषन वारि आरति करहिं मंगल गावहीं ।  
 सुर सुमन बरिसहिं सूत मागध बंदि सुजसु सुनावहीं ॥ 1  
 कोहबरहिं आने कुअँर कुअँरि सुआसिनिन्ह सुख पाइ कै ।  
 अति प्रीति लौकिक रीति लागीं करन मंगल गाइ कै ॥  
 लहकौरि गौरि सिखाव रामहि सीय सन सारद कहैं ।  
 रनिवासु हास बिलास रस बस जन्म को फलु सब लहैं ॥ 2  
 निज पानि मनि महँ देखिअति मूरति सुरुपनिधान की ।

चालति न भुजबल्ली बिलोकनि बिरह भय बस जानकी ॥  
 कौतुक बिनोद प्रमोदु प्रेमु न जाइ कहि जानहिं अली ।  
 बर कुअँरि सुंदर सकल सखीं लवाइ जनवासेहि चलीं ॥ 3  
 तेहि समय सुनिअ असीस जहँ तहँ नगर नभ आनँदु महा ।  
 चिरु जिअहुँ जोरीं चारु चारयो मुदित मन सबहीं कहा ॥  
 जोगींद्र सिद्ध मुनीस देव बिलोकि प्रभु दुंदुभि हनी ।  
 चले हरषि बरषि प्रसून निज निज लोक जय जय जय भनी ॥ 4

दो0 सहित बधूटिन्ह कुअँर सब तब आए पितु पास ।  
 सोभा मंगल मोद भरि उमगेउ जनु जनवास ॥ 327  
 पुनि जेवनार भई बहु भौंती । पठए जनक बोलाइ बराती ॥  
 परत पौवडे बसन अनूपा । सुतन्ह समेत गवन कियो भूपा ॥  
 सादर सब के पाय पखारे । जथाजोगु पीढन्ह बैठारे ॥  
 धोए जनक अवधपति चरना । सीलु सनेहु जाइ नहिं बरना ॥  
 बहुरि राम पद पंकज धोए । जे हर हृदय कमल महुँ गोए ॥  
 तीनिउ भाइ राम सम जानी । धोए चरन जनक निज पानी ॥  
 आसन उचित सबहि नृप दीन्हे । बोलि सूपकारी सब लीन्हे ॥  
 सादर लगे परन पनवारे । कनक कील मनि पान सँवारे ॥

दो0 सूपोदन सुरभी सरपि सुंदर स्वादु पुनीत ।  
 छन महुँ सब केँ परुसि गे चतुर सुआर बिनीत ॥ 328  
 पंच कवल करि जेवन लागे । गारि गान सुनि अति अनुरागे ॥  
 भौंति अनेक परे पकवाने । सुधा सरिस नहिं जाहिं बखाने ॥  
 परुसन लगे सुआर सुजाना । बिंजन बिबिध नाम को जाना ॥  
 चारि भौंति भोजन बिधि गाई । एक एक बिधि बरनि न जाई ॥  
 छरस रुचिर बिंजन बहु जाती । एक एक रस अगनित भौंती ॥  
 जेवँत देहिं मधुर धुनि गारी । लै लै नाम पुरुष अरु नारी ॥  
 समय सुहावनि गारि बिराजा । हँसत राउ सुनि सहित समाजा ॥  
 एहि बिधि सबहीं भोजनु कीन्हा । आदर सहित आचमनु दीन्हा ॥

दो0 देइ पान पूजे जनक दसरथु सहित समाज ।  
 जनवासेहि गवने मुदित सकल भूप सिरताज ॥ 329  
 नित नूतन मंगल पुर माहीं । निमिष सरिस दिन जाभिनि जाहीं ॥  
 बडे भोर भूपतिमनि जागे । जाचक गुन गन गावन लागे ॥  
 देखि कुअँर बर बधुन्ह समेता । किमि कहि जात मोदु मन जेता ॥  
 प्रातकिया करि गे गुरु पाहीं । महाप्रमोदु प्रेमु मन माहीं ॥  
 करि प्रनामु पूजा कर जोरी । बोले गिरा अमिअँ जनु बोरी ॥  
 तुम्हरी कृपाँ सुनहु मुनिराजा । भयउँ आजु मैँ पूरनकाजा ॥  
 अब सब विप्र बोलाइ गोसाईँ । देहु धेनु सब भौंति बनाईँ ॥  
 सुनि गुर करि महिपाल बड़ाई । पुनि पठए मुनि बृंद बोलाई ॥

दो0 बामदेउ अरु देवरिषि बालमीकि जाबालि ।  
 आए मुनिबर निकर तब कौसिकादि तपसालि ॥ 330  
 दंड प्रनाम सबहि नृप कीन्हे । पूजि सप्रेम बरासन दीन्हे ॥  
 चारि लच्छ बर धेनु मगाईँ । कामसुरभि सम सील सुहाईँ ॥  
 सब बिधि सकल अलंकृत कीन्हीं । मुदित महिप महिदेवन्ह दीन्हीं ॥  
 करत बिनय बहु बिधि नरनाहू । लहेउँ आजु जग जीवन लाहू ॥  
 पाइ असीस महीसु अनंदा । लिए बोलि पुनि जाचक बृंदा ॥

कनक बसन मनि हय गय स्यंदन । दिए बूझि रुचि रबिकुलनंदन ॥  
 चले पढ़त गावत गुन गाथा । जय जय जय दिनकर कुल नाथा ॥  
 एहि बिधि राम बिआह उछाहू । सकइ न बरनि सहस मुख जाहू ॥  
 दो० बार बार कौसिक चरन सीसु नाइ कह राउ ।  
 यह सबु सुखु मुनिराज तव कृपा कटाच्छ पसाउ ॥ 331  
 जनक सनेहु सीलु करतूती । नृपु सब भॉति सराह बिभूती ॥  
 दिन उठि बिदा अवधपति मागा । राखहिं जनकु सहित अनुरागा ॥  
 नित नूतन आदरु अधिकाई । दिन प्रति सहस भॉति पहुनाई ॥  
 नित नव नगर अनंद उछाहू । दसरथ गवनु सोहाइ न काहू ॥  
 बहुत दिवस बीते एहि भॉती । जनु सनेह रजु बँधे बराती ॥  
 कौसिक सतानंद तब जाई । कहा बिदेह नृपहि समुझाई ॥  
 अब दसरथ कहें आयसु देहू । जद्यपि छाड़ि न सकहु सनेहू ॥  
 भलेहिं नाथ कहि सचिव बोलाए । कहि जय जीव सीस तिन्ह नाए ॥  
 दो० अवधनाथु चाहत चलन भीतर करहु जनाउ ।  
 भए प्रेमबस सचिव सुनि बिप्र सभासद राउ ॥ 332  
 पुरबासी सुनि चलिहि बराता । बूझत बिकल परस्पर बाता ॥  
 सत्य गवनु सुनि सब बिलखाने । मनहुँ सॉझ सरसिज सकुचाने ॥  
 जहँ जहँ आवत बसे बराती । तहँ तहँ सिद्ध चला बहु भॉती ॥  
 बिबिध भॉति मेवा पकवाना । भोजन साजु न जाइ बखाना ॥  
 भरि भरि बसहँ अपार कहारा । पठई जनक अनेक सुसारा ॥  
 तुरग लाख रथ सहज पचीसा । सकल सँवारे नख अरु सीसा ॥  
 मत्त सहस दस सिंधुर साजे । जिन्हहि देखि दिसिकुंजर लाजे ॥  
 कनक बसन मनि भरि भरि जाना । महिषीं धेनु बस्तु बिधि नाना ॥  
 दो० दाइज अमित न सकिअ कहि दीन्ह बिदेहँ बहोरि ।  
 जो अवलोकत लोकपति लोक संपदा थोरि ॥ 333  
 सबु समाज एहि भॉति बनाई । जनक अवधपुर दीन्ह पठाई ॥  
 चलिहि बरात सुनत सब रानीं । बिकल मीनगन जनु लघु पानीं ॥  
 पुनि पुनि सीय गोद करि लेहीं । देइ असीस सिखावनु देहीं ॥  
 होएहु संतत पियहि पिआरी । चिरु अहिबात असीस हमारी ॥  
 सासु ससुर गुर सेवा करेहू । पति रुख लखि आयसु अनुसरेहू ॥  
 अति सनेह बस सखीं सयानी । नारि धरम सिखवहिं मृदु बानी ॥  
 सादर सकल कुअँरि समुझाई । रानिन्ह बार बार उर लाई ॥  
 बहुरि बहुरि भेटहिं महतारीं । कहहिं बिरंचि रचीं कत नारीं ॥  
 दो० तेहि अवसर भाइन्ह सहित रामु भानु कुल केतु ।  
 चले जनक मंदिर मुदित बिदा करावन हेतु ॥ 334  
 चारिउ भाइ सुभार्यँ सुहाए । नगर नारि नर देखन धाए ॥  
 कोउ कह चलन चहत हहिं आजू । कीन्ह बिदेह बिदा कर साजू ॥  
 लेहु नयन भरि रूप निहारी । प्रिय पाहुने भूप सुत चारी ॥  
 को जानै केहिं सुकृत सयानी । नयन अतिथि कीन्हे बिधि आनी ॥  
 मरनसीलु जिमि पाव पिऊषा । सुरतरु लहै जनम कर भूखा ॥  
 पाव नारकी हरिपदु जैसें । इन्ह कर दरसनु हम कहें तैसें ॥  
 निरखि राम सोभा उर धरहू । निज मन फनि मूरति मनि करहू ॥  
 एहि बिधि सबहि नयन फलु देता । गए कुअँर सब राज निकेता ॥  
 दो० रूप सिंधु सब बंधु लखि हरषि उठा रनिवासु ।

करहिं निछावरि आरती महा मुदित मन सासु ॥ 335  
 देखि राम छबि अति अनुरागीं । प्रेमबिबस पुनि पुनि पद लागीं ॥  
 रही न लाज प्रीति उर छाई । सहज सनेहु बरनि किमि जाई ॥  
 भाइन्ह सहित उबटि अन्हवाए । छरस असन अति हेतु जेवॉए ॥  
 बोले रामु सुअवसरु जानी । सील सनेह सकुचमय बानी ॥  
 राउ अवधपुर चहत सिधाए । बिदा होन हम इहाँ पटाए ॥  
 मातु मुदित मन आयसु देहू । बालक जानि करब नित नेहू ॥  
 सुनत बचन बिलखेउ रनिवासू । बोलि न सकहिं प्रेमबस सासू ॥  
 हृदयें लगाइ कुअँरि सब लीन्ही । पतिन्ह सौँपि बिनती अति कीन्ही ॥

छं० करि बिनय सिय रामहि समरपी जोरि कर पुनि पुनि कहै ।  
 बलि जाउँ तात सुजान तुम्ह कहूँ बिदित गति सब की अहै ॥  
 परिवार पुरजन मोहि राजहि प्रानप्रिय सिय जानिबी ।  
 तुलसीस सीलु सनेहु लखि निज किंकरी करि मानिबी ॥

सो० तुम्ह परिपूरन काम जान सिरोमनि भावप्रिय ।  
 जन गुन गाहक राम दोष दलन करुनायतन ॥ 336  
 अस कहि रही चरन गहि रानी । प्रेम पंक जनु गिरा समानी ॥  
 सुनि सनेहसानी बर बानी । बहुबिधि राम सासु सनमानी ॥  
 राम बिदा मागत कर जोरी । कीन्ह प्रनामु बहोरि बहोरी ॥  
 पाइ असीस बहुरि सिरु नाई । भाइन्ह सहित चले रघुराई ॥  
 मंजु मधुर मरति उर आनी । भई सनेह सिथिल सब रानी ॥  
 पुनि धीरजु धरि कुअँरि हँकारीं । बार बार भेटहिं महतारीं ॥  
 पहुँचावहिं फिरि मिलहिं बहोरी । बढी परस्पर प्रीति न थोरी ॥  
 पुनि पुनि मिलत सखिन्ह बिलगाई । बाल बच्छ जिमि धेनु लवाई ॥

दो० प्रेमबिबस नर नारि सब सखिन्ह सहित रनिवासु ।  
 मानहुँ कीन्ह बिदेहपुर करुनों बिरहँ निवासु ॥ 337  
 सुक सारिका जानकी ज्याए । कनक पिंजरन्हि राखि पढाए ॥  
 ब्याकुल कहहिं कहाँ बैदेही । सुनि धीरजु परिहरइ न केही ॥  
 भए बिकल खग मृग एहि भौंती । मनुज दसा कैसें कहि जाती ॥  
 बंधु समेत जनकु तब आए । प्रेम उमगि लोचन जल छाए ॥  
 सीय बिलोकि धीरता भागी । रहे कहावत परम बिरागी ॥  
 लीन्हि रायें उर लाइ जानकी । मिटी महामरजाद ग्यान की ॥  
 समुझावत सब सचिव सयाने । कीन्ह बिचारु न अवसर जाने ॥  
 बारहिं बार सुता उर लाई । सजि सुंदर पालकीं मगाई ॥

दो० प्रेमबिबस परिवारु सबु जानि सुलगन नरेस ।  
 कुअँरि चढाई पालकिन्ह सुमिरे सिद्धि गनेस ॥ 338  
 बहुबिधि भूप सुता समुझाई । नारिधरमु कुलरीति सिखाई ॥  
 दासीं दास दिए बहुतेरे । सुचि सेवक जे प्रिय सिय केरे ॥  
 सीय चलत ब्याकुल पुरबासी । होहिं सगुन सुभ मंगल रासी ॥  
 भूसुर सचिव समेत समाजा । संग चले पहुँचावन राजा ॥  
 समय बिलोकि बाजने बाजे । रथ गज बाजि बरातिन्ह साजे ॥  
 दसरथ विप्र बोलि सब लीन्हे । दान मान परिपूरन कीन्हे ॥  
 चरन सरोज धूरि धरि सीसा । मुदित महीपति पाइ असीसा ॥  
 सुमिरि गजाननु कीन्ह पयाना । मंगलमूल सगुन भए नाना ॥

दा० सुर प्रसून बरषहिं हरषि करहिं अपछरा गान ।

चले अवधपति अवधपुर मुदित बजाइ निसान ॥ 339  
 नृप करि बिनय महाजन फेरे । सादर सकल मागने टेरे ॥  
 भूषन बसन बाजि गज दीन्हे । प्रेम पोषि ठाढ़े सब कीन्हे ॥  
 बार बार बिरिदावलि भाषी । फिरे सकल रामहि उर राखी ॥  
 बहुरि बहुरि कोसलपति कहहीं । जनकु प्रेमबस फिरै न चहहीं ॥  
 पुनि कह भूपति बचन सुहाए । फिरिअ महीस दूरि बड़ि आए ॥  
 राउ बहोरि उतरि भए ठाढ़े । प्रेम प्रबाह बिलोचन बाढ़े ॥  
 तब बिदेह बोले कर जोरी । बचन सनेह सुधौं जनु बोरी ॥  
 करौं कवन बिधि बिनय बनाई । महाराज मोहि दीन्हे बड़ाई ॥

दो० कोसलपति समधी सजन सनमाने सब भौंति ।

मिलनि परसपर बिनय अति प्रीति न हृदयें समाति ॥ 340  
 मुनि मंडलिहि जनक सिरु नावा । आसिरबादु सबहि सन पावा ॥  
 सादर पुनि भेंटे जामाता । रूप सील गुन निधि सब भ्राता ॥  
 जोरि पंकरुह पानि सुहाए । बोले बचन प्रेम जनु जाए ॥  
 राम करौं केहि भौंति प्रसंसा । मुनि महेस मन मानस हंसा ॥  
 करहिं जोग जोगी जेहि लागी । कोहु मोहु ममता महु त्यागी ॥  
 ब्यापक ब्रह्म अलखु अबिनासी । चिदानंदु निरगुन गुनरासी ॥  
 मन समेत जेहि जान न बानी । तरकि न सकहिं सकल अनुमानी ॥  
 महिमा निगम नेति कहि कहई । जो तिहुं काल एकरस रहई ॥

दो० नयन बिषय मो कहुं भयउ सो समस्त सुख मूल ।

सबइ लाभु जग जीव कहें भएँ ईसु अनुकूल ॥ 341  
 सबहि भौंति मोहि दीन्हे बड़ाई । निज जन जानि लीन्हे अपनाई ॥  
 होहिं सहस दस सारद सेषा । करहिं कलप कोटिक भरि लेखा ॥  
 मोर भाग्य राउर गुन गाथा । कहि न सिराहिं सुनहु रघुनाथा ॥  
 मैं कछु कहउं एक बल मोरें । तुम्ह रीझहु सनेह सुठि थोरें ॥  
 बार बार मागउं कर जोरें । मनु परिहरै चरन जनि भोरें ॥  
 सुनि बर बचन प्रेम जनु पोषे । पूरनकाम रामु परितोषे ॥  
 करि बर बिनय ससर सनमाने । पितु कौसिक बसिष्ठ सम जाने ॥  
 बिनती बहुरि भरत सन कीन्ही । मिलि सप्रेमु पुनि आसिष दीन्ही ॥

दो० मिले लखन रिपुसूदनहि दीन्हे असीस महीस ।

भए परसपर प्रेमबस फिरि फिरि नावहिं सीस ॥ 342  
 बार बार करि बिनय बड़ाई । रघुपति चले संग सब भाई ॥  
 जनक गहे कासिक पद जाई । चरन रेनु सिर नयनन्ह लाई ॥  
 सुनु मुनीस बर दरसन तोरें । अगमु न कछु प्रतीति मन मोरें ॥  
 जो सुखु सुजसु लोकपति चहहीं । करत मनोरथ सकुचत अहहीं ॥  
 सो सुखु सुजसु सुलभ मोहि स्वामी । सब सिधि तव दरसन अनुगामी ॥  
 कीन्हे बिनय पुनि पुनि सिरु नाई । फिरे महीसु आसिषा पाई ॥  
 चली बरात निसान बजाई । मुदित छोट बड़ सब समुदाई ॥  
 रामहि निरखि ग्राम नर नारी । पाइ नयन फलु होहिं सुखारी ॥

दो० बीच बीच बर बास करि मग लोगन्ह सुख देत ।

अवध समीप पुनीत दिन पहुँची आइ जनेत ॥ 343  
 हने निसान पनव बर बाजे । भेरि संख धुनि हय गय गाजे ॥  
 झॉझि बिरव डिंडिमीं सुहाई । सरस राग बाजहिं सहनाई ॥  
 पुर जन आवत अकनि बराता । मुदित सकल पुलकावलि गाता ॥

निज निज सुंदर सदन सँवारे । हाट बाट चौहट पुर द्वारे ॥  
 गलीं सकल अरगजाँ सिंचाई । जहँ तहँ चौकें चारु पुराई ॥  
 बना बजारु न जाइ बखाना । तोरन केतु पताक बिताना ॥  
 सफल पूगफल कदलि रसाला । रोपे बकुल कदंब तमाला ॥  
 लगे सुभग तरु परसन धरनी । मनिमय आलबाल कल करनी ॥  
 दो० बिबिध भॉति मंगल कलस गृह गृह रचे सँवारि ।  
 सुर ब्रह्मादि सिहाहिं सब रघुबर पुरी निहारि ॥ 344  
 भूप भवनु तेहि अवसर सोहा । रचना देखि मदन मनु मोहा ॥  
 मंगल सगुन मनोहरताई । रिधि सिधि सुख संपदा सुहाई ॥  
 जनु उछाह सब सहज सुहाए । तनु धरि धरि दसरथ गृहें छाए ॥  
 देखन हेतु राम बैदेही । कहहु लालसा होहि न केही ॥  
 जूथ जूथ मिलि चलीं सुआसिनि । निज छबि निदरहिं मदन बिलासिनि ॥  
 सकल सुमंगल सजें आरती । गावहिं जनु बहु बेष भारती ॥  
 भूपति भवन कोलाहल होई । जाइ न बरनि समउ सुखु सोई ॥  
 कौसल्यादि राम महतारीं । प्रेमबिबस तन दसा बिसारीं ॥  
 दो० दिए दान बिप्रन्ह बिपुल पूजि गनेस पुरारि ।  
 प्रमुदित परम दरिद्र जनु पाइ पदारथ चारि ॥ 345  
 मोद प्रमोद बिबस सब माता । चलहिं न चरन सिथिल भए गाता ॥  
 राम दरस हित अति अनुरागीं । परिछनि साजु सजन सब लागीं ॥  
 बिबिध बिधान बाजने बाजे । मंगल मुदित सुमित्राँ साजे ॥  
 हरद दूब दधि पल्लव फूला । पान पूगफल मंगल मूला ॥  
 अच्छत अंकुर लोचन लाजा । मंजुल मंजरि तुलसि बिराजा ॥  
 छुहे पुरट घट सहज सुहाए । मदन सकुन जनु नीड़ बनाए ॥  
 सगुन सुगंध न जाहिं बखानी । मंगल सकल सजहिं सब रानी ॥  
 रचीं आरतीं बहुत बिधाना । मुदित करहिं कल मंगल गाना ॥  
 दो० कनक थार भरि मंगलन्हि कमल करन्हि लिएँ मात ।  
 चलीं मुदित परिछनि करन पुलक पल्लवित गात ॥ 346  
 धूप धूम नभु मेचक भयऊ । सावन घन घमंडु जनु ठयऊ ॥  
 सुरतरु सुमन माल सुर बरषहिं । मनहुँ बलाक अवलि मनु करषहिं ॥  
 मंजुल मनिमय बंदनिवारे । मनहुँ पाकरिपु चाप सँवारे ॥  
 प्रगटहिं दुरहिं अटन्ह पर भामिनि । चारु चपल जनु दमकहिं दामिनि ॥  
 दुंदुभि धुनि घन गरजनि घोरा । जाचक चातक दादुर मोरा ॥  
 सुर सुगंध सुचि बरषहिं बारी । सुखी सकल ससि पुर नर नारी ॥  
 समउ जानि गुर आयसु दीन्हा । पुर प्रबेसु रघुकुलमनि कीन्हा ॥  
 सुमिरि संभु गिरिजा गनराजा । मुदित महीपति सहित समाजा ॥  
 दो० होहिं सगुन बरषहि सुमन सुर दुंदुभीं बजाइ ।  
 बिबुध बधू नाचहिं मुदित मंजुल मंगल गाइ ॥ 347  
 मागध सूत बंदि नट नागर । गावहिं जसु तिहु लोक उजागर ॥  
 जय धुनि बिमल बेद बर बानी । दस दिसि सुनिअ सुमंगल सानी ॥  
 बिपुल बाजने बाजन लागे । नभ सुर नगर लोग अनुरागे ॥  
 बने बराती बरनि न जाहीं । महा मुदित मन सुख न समाहीं ॥  
 पुरबासिन्ह तब राय जोहारे । देखत रामहि भए सुखारे ॥  
 करहिं निछावरि मनिगन चीरा । बारि बिलोचन पुलक सरीरा ॥  
 आरति करहिं मुदित पुर नारी । हरषहिं निरखि कुअँर बर चारी ॥

सिबिका सुभग ओहार उघारी । देखि दुलहिनिन्ह हाहिं सुखारी ॥  
 दो० एहि बिधि सबही देत सुखु आए राजदुआर ।  
 मुदित मातु परिछनि करहिं बधुन्ह समेत कुमार ॥ 348  
 करहिं आरती बारहिं बारा । प्रेमु प्रमोदु कहै कौ पारा ॥  
 भूषन मनि पट नाना जाती । करहिं निछावरि अगनित भौंती ॥  
 बधुन्ह समेत देखि सुत चारी । परमानंद मगन महतारी ॥  
 पुनि पुनि सीय राम छबि देखी । मुदित सफल जग जीवन लेखी ॥  
 सखीं सीय मुख पुनि पुनि चाही । गान करहिं निज सुकृत सराही ॥  
 बरषहिं सुमन छनहिं छन देवा । नाचहिं गावहिं लावहिं सेवा ॥  
 देखि मनोहर चारिउ जोरीं । सारद उपमा सकल ढँढोरीं ॥  
 देत न बनहिं निपट लघु लागीं । एकटक रहीं रूप अनुरागीं ॥  
 दो० निगम नीति कुल रीति करि अरघ पौवड़े देत ।  
 बधुन्ह सहित सुत परिछि सब चलीं लवाइ निकेत ॥ 349  
 चारि सिंघासन सहज सुहाए । जनु मनोज निज हाथ बनाए ॥  
 तिन्ह पर कुअँरि कुअँर बैठारे । सादर पाय पुनीत पखारे ॥  
 धूप दीप नैबेद बेद बिधि । पूजे बर दुलहिनि मंगलनिधि ॥  
 बारहिं बार आरती करहीं । ब्यजन चारु चामर सिर ढरहीं ॥  
 बस्तु अनेक निछावरि होहीं । भरीं प्रमोद मातु सब सोहीं ॥  
 पावा परम तत्व जनु जोगीं । अमृतु लहेउ जनु संतत रोगीं ॥  
 जनम रंक जनु पारस पावा । अंधहि लोचन लाभु सुहावा ॥  
 मूक बदन जनु सारद छाई । मानहुँ समर सूर जय पाई ॥  
 दो० एहि सुख ते सत कोटि गुन पावहिं मातु अनंदु ।  
 भाइन्ह सहित बिआहि घर आए रघुकुलचंदु ॥ 350 (क)  
 लोक रीति जननीं करहिं बर दुलहिनि सकुचाहिं ।  
 मोदु बिनोदु बिलोकि बड़ रामु मनहिं मुसुकाहिं ॥ 350 (ख)  
 देव पितर पूजे बिधि नीकी । पूजीं सकल बासना जी की ॥  
 सबहि बंदि मागहिं बरदाना । भाइन्ह सहित राम कल्याना ॥  
 अंतरहित सुर आसिष देहीं । मुदित मातु अंचल भरि लेहीं ॥  
 भूपति बोलि बराती लीन्हे । जान बसन मनि भूषन दीन्हे ॥  
 आयसु पाइ राखि उर रामहि । मुदित गए सब निज निज धामहि ॥  
 पुर नर नारि सकल पहिराए । घर घर बाजन लगे बधाए ॥  
 जाचक जन जाचहिं जोइ जोई । प्रमुदित राउ देहिं सोइ सोई ॥  
 सेवक सकल बजनिआ नाना । पूरन किए दान सनमाना ॥  
 दो० देहिं असीस जोहारि सब गावहिं गुन गन गाथ ।  
 तब गुर भूसुर सहित गृहँ गवनु कीन्ह नरनाथ ॥ 351  
 जो बसिष्ट अनुसासन दीन्हीं । लोक बेद बिधि सादर कीन्ही ॥  
 भूसुर भीर देखि सब रानी । सादर उठीं भाग्य बड़ जानी ॥  
 पाय पखारि सकल अन्हवाए । पूजि भली बिधि भूप जेवोंए ॥  
 आदर दान प्रेम परिपोषे । देत असीस चले मन तोषे ॥  
 बहु बिधि कीन्हि गाधिसुत पूजा । नाथ मोहि सम धन्य न दूजा ॥  
 कीन्हि प्रसंसा भूपति भूरी । रानिन्ह सहित लीन्हि पग धूरी ॥  
 भीतर भवन दीन्ह बर बासू । मन जोगवत रह नृपु रनिवासू ॥  
 पूजे गुर पद कमल बहोरी । कीन्हि बिनय उर प्रीति न थोरी ॥  
 दो० बधुन्ह समेत कुमार सब रानिन्ह सहित महीसु ।

पुनि पुनि बंदत गुर चरन देत असीस मुनीसु ॥ 352  
 बिनय कीन्ह उर अति अनुरागे । सुत संपदा राखि सब आगे ॥  
 नेगु मागि मुनिनायक लीन्हा । आसिरबादु बहुत बिधि दीन्हा ॥  
 उर धरि रामहि सीय समेता । हरषि कीन्ह गुर गवनु निकेता ॥  
 बिप्रबधू सब भूप बोलाई । चैल चारु भूषन पहिराई ॥  
 बहुरि बोलाइ सुआसिनि लीन्हीं । रुचि बिचारि पहिरावनि दीन्हीं ॥  
 नेगी नेग जोग सब लेहीं । रुचि अनुरूप भूपमनि देहीं ॥  
 प्रिय पाहुने पूज्य जे जाने । भूपति भली भाँति सनमाने ॥  
 देव देखि रघुबीर बिबाहू । बरषि प्रसून प्रसंसि उछाहू ॥  
 दो0 चले निसान बजाइ सुर निज निज पुर सुख पाइ ।  
 कहत परसपर राम जसु प्रेम न हृदयें समाइ ॥ 353  
 सब बिधि सबहि समदि नरनाहू । रहा हृदयें भरि पूरि उछाहू ॥  
 जहँ रनिवासु तहाँ पगु धारे । सहित बहूटिन्ह कुअँर निहारे ॥  
 लिए गोद करि मोद समेता । को कहि सकइ भयउ सुखु जेता ॥  
 बधू सप्रेम गोद बैठारीं । बार बार हियँ हरषि दुलारीं ॥  
 देखि समाजु मुदित रनिवासू । सब केँ उर अनंद कियो बासू ॥  
 कहेउ भूप जिमि भयउ बिबाहू । सुनि सुनि हरषु होत सब काहू ॥  
 जनक राज गुन सीलु बड़ाई । प्रीति रीति संपदा सुहाई ॥  
 बहुबिधि भूप भाट जिमि बरनी । रानीं सब प्रमुदित सुनि करनी ॥  
 दो0 सुतन्ह समेत नहाइ नृप बोलि बिप्र गुर ग्याति ।  
 भोजन कीन्ह अनेक बिधि घरी पंच गइ राति ॥ 354  
 मंगलगान करहिं बर भामिनि । भै सुखमूल मनोहर जामिनि ॥  
 अँचइ पान सब काहूँ पाए । ०ग सुगंध भूषित छबि छाए ॥  
 रामहि देखि रजायसु पाई । निज निज भवन चले सिर नाई ॥  
 प्रेमु प्रमोदु बिनोदु बड़ाई । समउ समाजु मनोहरताई ॥  
 कहि न सकहिं सत सारद सेसू । बेद बिरंचि महेस गनेसू ॥  
 सो मैं कहीं कवन बिधि बरनी । भूमिनागु सिर धरइ कि धरनी ॥  
 नृप सब भाँति सबहि सनमानी । कहि मृदु बचन बोलाई रानी ॥  
 बधू लरिकनीं पर घर आई । राखेहु नयन पलक की नाई ॥  
 दो0 लरिका श्रमित उनीद बस सयन करावहु जाइ ।  
 अस कहि गे विश्रामगृहँ राम चरन चितु लाइ ॥ 355  
 भूप बचन सुनि सहज सुहाए । जरित कनक मनि पलँग डसाए ॥  
 सुभग सुरभि पय फेन समाना । कोमल कलित सुपेतीं नाना ॥  
 उपबरहन बर बरनि न जाहीं । ०ग सुगंध मनिमंदिर माहीं ॥  
 रतनदीप सुठि चारु चँदोवा । कहत न बनइ जान जेहिं जोवा ॥  
 सेज रुचिर रचि रामु उठाए । प्रेम समेत पलँग पौढाए ॥  
 अग्या पुनि पुनि भाइन्ह दीन्ही । निज निज सेज सयन तिन्ह कीन्ही ॥  
 दखि स्याम मृदु मंजुल गाता । कहहिं सप्रेम बचन सब माता ॥  
 मारग जात भयावनि भारी । केहि बिधि तात ताड़का मारी ॥  
 दो0 घोर निसाचर बिकट भट समर गनहिं नहिं काहु ।  
 मारे सहित सहाय किमि खल मारीच सुबाहु ॥ 356  
 मुनि प्रसाद बलि तात तुम्हारी । ईस अनेक करवरें टारी ॥  
 मख रखवारी करि दुहँ भाई । गुरु प्रसाद सब बिद्या पाई ॥

मुनितिय तरी लगत पग धूरी । कीरति रही भुवन भरि पूरी ॥  
 कमठ पीठि पबि कूट कठोरा । नृप समाज महुँ सिव धनु तोरा ॥  
 बिस्व बिजय जसु जानकि पाई । आए भवन ब्याहि सब भाई ॥  
 सकल अमानुष करम तुम्हारे । केवल कौसिक कृपाँ सुधारे ॥  
 आजु सुफल जग जनमु हमारा । देखि तात बिधुबदन तुम्हारा ॥  
 जे दिन गए तुम्हहि बिनु देखें । ते बिरचि जनि पारहिं लेखें ॥  
 दो० राम प्रतोषीं मातु सब कहि बिनीत बर बैन ।

सुमिरि संभु गुर बिप्र पद किए नीदबस नैन ॥ 357  
 नीदउँ बदन सोह सुठि लोना । मनहुँ सौँझ सरसीरुह सोना ॥  
 घर घर करहिं जागरन नारीं । देहिं परसपर मंगल गारीं ॥  
 पुरी बिराजति राजति रजनी । रानीं कहहिं बिलोकहु सजनी ॥  
 सुंदर बधुन्ह सासु लै सोई । फनिकन्ह जनु सिरमनि उर गोई ॥  
 प्रात पुनीत काल प्रभु जागे । अरुनचूड़ बर बोलन लागे ॥  
 बंदि मागधन्हि गुनगन गाए । पुरजन द्वार जोहारन आए ॥  
 बंदि बिप्र सुर गुर पितु माता । पाइ असीस मुदित सब भ्राता ॥  
 जननिन्ह सादर बदन निहारे । भूपति संग द्वार पगु धारे ॥  
 दो० कीन्हि सौच सब सहज सुचि सरित पुनीत नहाइ ।  
 प्रातकिया करि तात पहिं आए चारिउ भाइ ॥ 358

नवाहनपारायण, तीसरा विश्राम

भूप बिलोकि लिए उर लाई । बैठे हरषि रजायसु पाई ॥  
 देखि रामु सब सभा जुडानी । लोचन लाभ अवधि अनुमानी ॥  
 पुनि बसिष्टु मुनि कौसिकु आए । सुभग आसनन्हि मुनि बैठाए ॥  
 सुतन्ह समेत पूजि पद लागे । निरखि रामु दोउ गुर अनुरागे ॥  
 कहहिं बसिष्टु धरम इतिहासा । सुनहिं महीसु सहित रनिवासा ॥  
 मुनि मन अगम गाधिसुत करनी । मुदित बसिष्ट बिपुल बिधि बरनी ॥  
 बोले बामदेउ सब सौँची । कीरति कलित लोक तिहुँ माची ॥  
 सुनि आनंदु भयउ सब काहू । राम लखन उर अधिक उछाहू ॥

दो० मंगल मोद उछाह नित जाहिं दिवस एहि भौंति ।  
 उमगी अवध अनंद भरि अधिक अधिक अधिकाति ॥ 359  
 सुदिन सोधि कल कंकन छोरे । मंगल मोद बिनोद न थोरे ॥  
 नित नव सुखु सर देखि सिहाहीं । अवध जन्म जाचहिं बिधि पाहीं ॥  
 बिस्वामित्रु चलन नित चहहीं । राम सप्रेम बिनय बस रहहीं ॥  
 दिन दिन सयगुन भूपति भाऊ । देखि सराह महामुनिराऊ ॥  
 मागत बिदा राउ अनुरागे । सुतन्ह समेत ठाढ़ भे आगे ॥  
 नाथ सकल संपदा तुम्हारी । मैं सेवकु समेत सुत नारी ॥  
 करब सदा लरिकन्ह पर छोहू । दरसनु देत रहब मुनि मोहू ॥  
 अस कहि राउ सहित सुत रानी । परेउ चरन मुख आव न बानी ॥  
 दीन्हि असीस बिप्र बहु भौंती । चले न प्रीति रीति कहि जाती ॥  
 रामु सप्रेम संग सब भाई । आयसु पाइ फिरे पहुँचाई ॥

दो० राम रूपु भूपति भगति ब्याहु उछाहु अनंदु ।  
 जात सराहत मनहिं मन मुदित गाधिकुलचंदु ॥ 360  
 बामदेव रघुकुल गुर ग्यानी । बहुरि गाधिसुत कथा बखानी ॥  
 सुनि मुनि सुजसु मनहिं मन राऊ । बरनत आपन पुन्य प्रभाऊ ॥

बहुरे लोग रजायसु भयऊ । सुतन्ह समेत नृपति गृहें गयऊ ॥  
जहें तहें राम ब्याहु सबु गावा । सुजसु पुनीत लोक तिहूँ छावा ॥  
आए ब्याहि रामु घर जब तें । बसइ अनंद अवध सब तब तें ॥  
प्रभु बिबाहें जस भयउ उछाहू । सकहिं न बरनि गिरा अहिनाहू ॥  
कबिकुल जीवनु पावन जानी । राम सीय जसु मंगल खानी ॥  
तेहि तें मैं कछु कहा बखानी । करन पुनीत हेतु निज बानी ॥  
छं० निज गिरा पावनि करन कारन राम जसु तुलसीं कह्यो ।  
रघुबीर चरित अपार बारिधि पारु कबि कौनें लह्यो ॥  
उपबीत ब्याह उछाहु मंगल सुनि जे सादर गावहीं ।  
बैदेहि राम प्रसाद ते जन सर्वदा सुखु पावहीं ॥  
सो० सिय रघुबीर बिबाहु जे सप्रेम गावहिं सुनहिं ।  
तिन्ह कहें सदा उछाहु मंगलायतन राम जसु ॥ 361

मासपारायण, बारहवों विश्राम

इति श्रीमद्रामचरितमानसे सकलकलिकलुषविध्वंसने

प्रथमः सोपानः समाप्तः

(बालकाण्ड समाप्त)

## अयोध्याकाण्ड

### श्लोक

- यस्याङ्के च विभाति भूधरसुता देवापगा मस्तके  
भाले बालविधुर्गले च गरलं यस्योरसि व्यालराट् ।  
सोयं भूतिविभूषणः सुरवरः सर्वाधिपः सर्वदा  
शर्वः सर्वगतः शिवः शशिनिभः श्रीशंकरः पातु माम् ॥ 1 ॥  
प्रसन्नतां या न गताभिषेकतस्तथा न मन्ले वनवासदुःखतः ।  
मुखाम्बुजश्री रघुनन्दनस्य मे सदास्तु सा मञ्जुलमंगलप्रदा ॥ 2 ॥  
नीलाम्बुजश्यामलकोमलाङ्गम् सीतासमारोपितवामभागम् ।  
पाणौ महासायकचारुचापं नमामि रामं रघुवंशनाथम् ॥ 3 ॥
- दो०— श्रीगुरु चरन सरोज रज निज मन मुकुरु सुधारि ।  
बरनउँ रघुबर बिमल जसु जो दायकु फल चारि ॥  
जब तें रामु ब्याहि घर आए । नित नव मंगल मोद बधाए ॥  
भुवन चारिदस भूधर भारी । सुकृत मेघ बरषहिं सुख बारी ॥  
रिधि सिधि संपति नदीं सुहाई । उमगि अवध अंबुधि कहूँ आई ॥  
मनिगन पुर नर नारि सुजाती । सुचि अमोल सुंदर सब भाँती ॥  
कहि न जाइ कछु नगर बिभूती । जनु एतनिअ बिरंचि करतूती ॥  
सब बिधि सब पुर लोग सुखारी । रामचंद मुख चंदु निहारी ॥  
मुदित मातु सब सखीं सहेली । फलित बिलोकि मनोरथ बेली ॥  
राम रूपु गुन सीलु सुभाऊ । प्रमुदित होइ देखि सुनि राऊ ॥
- दो०— सब के उर अभिलाषु अस कहहिं मनाइ महेसु ।  
आप अछत जुबराज पद रामहि देउ नरेसु ॥ 1 ॥  
एक समय सब सहित समाजा । राजसभौ रघुराजु बिराजा ॥  
सकल सुकृत मूरति नरनाहू । राम सुजसु सुनि अतिहि उछाहू ॥  
नृप सब रहहिं कृपा अभिलाषे । लोकप करहिं प्रीति रुख राखे ॥  
तिभुवन तीनि काल जग माहीं । भूरि भाग दसरथ सम नाहीं ॥  
मंगलमूल रामु सुत जासू । जो कछु कहिअ थोर सबु तासू ॥  
रायें सुभायें मुकुरु कर लीन्हा । बदनु बिलोकि मुकुटु सम कीन्हा ॥  
श्रवन समीप भए सित केसा । मनहुँ जरठपनु अस उपदेसा ॥  
नृप जुबराजु राम कहूँ देहू । जीवन जनम लाह किन लेहू ॥
- दो०— यह बिचारु उर आनि नृप सुदिनु सुअवसरु पाइ ।  
प्रेम पुलकि तन मुदित मन गुरहि सुनायउ जाइ ॥ 2 ॥  
कहइ भुआलु सुनिअ मुनिनायक । भए राम सब बिधि सब लायक ॥  
सेवक सचिव सकल पुरबासी । जे हमारे अरि मित्र उदासी ॥

सबहि रामु प्रिय जेहि बिधि मोही । प्रभु असोस जनु तनु धरि सोही ॥  
 विप्र सहित परिवार गोसाईं । करहिं छोहु सब रौरिहि नाई ॥  
 जे गुर चरन रेनु सिर धरहीं । ते जनु सकल बिभव बस करहीं ॥  
 मोहि सम यहु अनुभयउ न दूजें । सबु पायउ रज पावनि पूजें ॥  
 अब अभिलाषु एकु मन मोरें । पूजिहि नाथ अनुग्रह तोरें ॥  
 मुनि प्रसन्न लखि सहज सनेहू । कहेउ नरेस रजायसु देहू ॥

दो०— राजन राउर नामु जसु सब अभिमत दातार ।

फल अनुगामी महिप मनि मन अभिलाषु तुम्हार ॥ 3

सब बिधि गुरु प्रसन्न जियें जानी । बोलेउ राउ रहेंसि मृदु बानी ॥  
 नाथ रामु करिअहिं जुबराजू । कहिअ कृपा करि करिअ समाजू ॥  
 मोहि अछत यहु होइ उछाहू । लहहिं लोग सब लोचन लाहू ॥  
 प्रभु प्रसाद सिव सबइ निबाहीं । यह लालसा एक मन माहीं ॥  
 पुनि न सोच तनु रहउ कि जाऊ । जेहिं न होइ पाछें पछिताऊ ॥  
 सुनि मुनि दसरथ बचन सुहाए । मंगल मोद मूल मन भाए ॥  
 सुनु नृप जासु बिमुख पछिताहीं । जासु भजन बिनु जरनि न जाहीं ॥

— गणपतये नमः

## अयोध्याकाण्ड

### श्लोक

यस्याङ्के च विभाति भूधरसुता देवापगा मस्तके  
 भाले बालविधुर्गले च गरलं यस्योरसि व्यालराट् ।  
 सोयं भूतिविभूषणः सुरवरः सर्वाधिपः सर्वदा  
 शर्वः सर्वगतः शिवः शशिनिभः श्रीशंकरः पातु माम् ॥ 1 ॥  
 प्रसन्नतां या न गताभिषेकतस्तथा न मन्त्रे वनवासदुःखतः ।  
 मुखाम्बुजश्री रघुनन्दनस्य मे सदास्तु सा मञ्जुलमंगलप्रदा ॥ 2 ॥  
 नीलाम्बुजश्यामलकोमलाङ्गम् सीतासमारोपितवामभागम् ।  
 पाणौ महासायकचारुचापं नमामि रामं रघुवंशनाथम् ॥ 3 ॥

दो०— श्रीगुरु चरन सरोज रज निज मन मुकुरु सुधारि ।

बरनउं रघुबर बिमल जसु जो दायकु फल चारि ॥

जब तें रामु ब्याहि घर आए । नित नव मंगल मोद बधाए ॥  
 भुवन चारिदस भूधर भारी । सुकृत मेघ बरषहिं सुख बारी ॥  
 रिधि सिधि संपति नदीं सुहाई । उमगि अवध अंबुधि कहूँ आई ॥  
 मनिगन पुर नर नारि सुजाती । सुचि अमोल सुंदर सब भौंती ॥  
 कहि न जाइ कछु नगर बिभूती । जनु एतनिअ बिरंचि करतूती ॥

सब बिधि सब पुर लोग सुखारी । रामचंद मुख चंदु निहारी ॥  
मुदित मातु सब सखीं सहेली । फलित बिलोकि मनोरथ बेली ॥  
राम रूपु गुन सीलु सुभाऊ । प्रमुदित होइ देखि सुनि राऊ ॥  
दो०— सब के उर अभिलाषु अस कहहिं मनाइ महेसु ।

आप अछत जुबराज पद रामहि देउ नरेसु ॥ 1

एक समय सब सहित समाजा । राजसभौ रघुराजु बिराजा ॥  
सकल सुकृत मूरति नरनाहू । राम सुजसु सुनि अतिहि उछाहू ॥  
नृप सब रहहिं कृपा अभिलाषे । लोकप करहिं प्रीति रुख राखे ॥  
तिभुवन तीनि काल जग माहीं । भूरि भाग दसरथ सम नाहीं ॥  
मंगलमूल रामु सुत जासू । जो कछु कहिअ थोर सबु तासू ॥  
रायें सुभार्ये मुकुरु कर लीन्हा । बदनु बिलोकि मुकुटु सम कीन्हा ॥  
श्रवन समीप भए सित केसा । मनहुं जरठपन अस उपदेसा ॥  
नृप जुबराजु राम कहूँ देहू । जीवन जनम लाहु किन लेहू ॥

दो०— यह बिचारु उर आनि नृप सुदिनु सुअवसरु पाइ ।

प्रेम पुलकि तन मुदित मन गुरहि सुनायउ जाइ ॥ 2

कहइ भुआलु सुनिअ मुनिनायक । भए राम सब बिधि सब लायक ॥  
सेवक सचिव सकल पुरबासी । जे हमारे अरि मित्र उदासी ॥  
सबहि रामु प्रिय जेहि बिधि मोही । प्रभु असीस जनु तनु धरि सोही ॥  
विप्र सहित परिवार गोसाई । करहिं छोहु सब रौरिहि नाई ॥  
जे गुर चरन रेनु सिर धरहीं । ते जनु सकल बिभव बस करहीं ॥  
मोहि सम यहु अनुभयउ न दूजे । सबु पायउ रज पावनि पूजे ॥  
अब अभिलाषु एकु मन मोरें । पूजिहि नाथ अनुग्रह तोरें ॥  
मुनि प्रसन्न लखि सहज सनेहू । कहेउ नरेस रजायसु देहू ॥

दो०— राजन राउर नामु जसु सब अभिमत दातार ।

फल अनुगामी महिप मनि मन अभिलाषु तुम्हार ॥ 3

सब बिधि गुरु प्रसन्न जिये जानी । बोलेउ राउ रहँसि मृद बानी ॥  
नाथ रामु करिअहिं जुबराजू । कहिअ कृपा करि करिअ समाजू ॥  
मोहि अछत यहु होइ उछाहू । लहहिं लोग सब लोचन लाहू ॥  
प्रभु प्रसाद सिव सबइ निबाहीं । यह लालसा एक मन माहीं ॥  
पुनि न सोच तनु रहउ कि जाऊ । जेहिं न होइ पाछे पछिताऊ ॥  
सुनि मुनि दसरथ बचन सुहाए । मंगल मोद मूल मन भाए ॥  
सुनु नृप जासु बिमुख पछिताहीं । जासु भजन बिनु जरनि न जाहीं ॥  
भयउ तुम्हार तनय सोइ स्वामी । रामु पुनीत प्रेम अनुगामी ॥

दो०— बेगि बिलंबु न करिअ नृप साजिअ सबुइ समाजु ।

सुदिन सुमंगलु तबहिं जब रामु होहिं जुबराजु ॥ 4

मुदित महीपति मंदिर आए । सेवक सचिव सुमंत्रु बोलाए ॥  
कहि जयजीव सीस तिन्ह नाए । भूप सुमंगल बचन सुनाए ॥  
जौ पौंचहि मत लागै नीका । करहु हरषि हिये रामहि टीका ॥  
मंत्री मुदित सुनत प्रिय बानी । अभिमत बिरवे परेउ जनु पानी ॥  
बिनती सचिव करहिं कर जोरी । जिअहु जगतपति बरिस करोरी ॥  
जग मंगल भल काजु बिचारा । बेगिअ नाथ न लाइअ बारा ॥  
नृपहि मोदु सुनि सचिव सुभाषा । बढ़त बाँड जनु लही सुसाखा ॥

दो०— कहेउ भूप मुनिराज कर जोइ जोइ आयसु होइ ।

राम राज अभिषेक हित बेगि करहु सोइ सोइ ॥ 5

हरषि मुनीस कहेउ मृदु बानी । आनहु सकल सुतीरथ पानी ॥  
 औषध मूल फूल फल पाना । कहे नाम गनि मंगल नाना ॥  
 चामर चरम बसन बहु भौंती । रोम पाट पट अगनित जाती ॥  
 मनिगन मंगल बस्तु अनेका । जो जग जोगु भूप अभिषेका ॥  
 बेद बिदित कहि सकल बिधाना । कहेउ रचहु पुर बिबिध बिताना ॥  
 सफल रसाल पूगफल केरा । रोपहु बीथिन्ह पुर चहुँ फेरा ॥  
 रचहु मंजु मनि चौकें चारु । कहहु बनावन बेगि बजारु ॥  
 पूजहु गनपति गुर कुलदेवा । सब बिधि करहु मुनिन्ह कर सेवा ॥  
 दो०— ध्वज पताक तोरन कलस सजहु तुरग रथ नाग ।

सिर धरि मुनिबर बचन सबु निज निज काजहिं लाग ॥ 6  
 जो मुनीस जेहि आयसु दीन्हा । सो तेहिं काजु प्रथम जनु कीन्हा ॥  
 संत साधु सुर पूजत राजा । करत राम हित मंगल काजा ॥  
 सुनत राम अभिषेक सुहावा । बाज गहागह अवध बधावा ॥  
 राम सीय तन सगुन जनाए । फरकहिं मंगल अंग सुहाए ॥  
 पुलकि सप्रेम परसपर कहहीं । भरत आगमनु सूचक अहहीं ॥  
 भए बहुत दिन अति अवसेरी । सगुन प्रतीति भेंट प्रिय केरी ॥  
 भरत सरिस प्रिय को जग माहीं । इहइ सगुन फलु दूसर नाहीं ॥  
 रामहि बंधु सोच दिन राती । अंडन्हि कमठ हृदउ जेहि भौंती ॥

दो०— एहि अवसर मंगलु परम सुनि रहैंसेउ रनिवासु ।  
 सोभत लखि बिधु बढत जनु बारिधि बीचि बिलासु ॥ 7  
 प्रथम जाइ जिन्ह बचन सुनाए । भूषन बसन भूरि तिन्ह पाए ॥  
 प्रेम पुलकि तन मन अनुरागीं । मंगल कलस सजन सब लागीं ॥  
 चौकें चारु सुमित्रौं पूरी । मनिमय बिबिध भौंति अति रुरी ॥  
 आनंद मगन राम महतारी । दिए दान बहु बिप्र हँकारी ॥  
 पूजीं ग्रामदेबि सुर नागा । कहेउ बहोरि देन बलिभागा ॥  
 जेहि बिधि होइ राम कल्यानू । देहु दया करि सो बरदानू ॥  
 गावहिं मंगल कोकिलबयनीं । बिधुबदनीं मृगसावकनयनीं ॥

दो०— राम राज अभिषेकु सुनि हियें हरषे नर नारि ।  
 लगे सुमंगल सजन सब बिधि अनुकूल बिचारि ॥ 8  
 तब नरनाहें बसिष्ठु बोलाए । रामधाम सिख देन पठाए ॥  
 गुर आगमनु सुनत रघुनाथा । द्वार आइ पद नायउ माथा ॥  
 सादर अरघ देइ घर आने । सोरह भौंति पूजि सनमाने ॥  
 गहे चरन सिय सहित बहोरी । बोले रामु कमल कर जोरी ॥  
 सेवक सदन स्वामि आगमनू । मंगल मूल अमंगल दमनू ॥  
 तदपि उचित जनु बोलि सप्रीती । पठइअ काज नाथ असि नीती ॥  
 प्रभुता तजि प्रभु कीन्ह सनेहू । भयउ पुनीत आजु यहु गेहू ॥  
 आयसु होइ सो करौं गोसाईं । सेवकु लहइ स्वामि सेवकाई ॥

दो०— सुनि सनेह साने बचन मुनि रघुबरहि प्रसंस ।  
 राम कस न तुम्ह कहहु अस हंस बंस अवतंस ॥ 9  
 बरनि राम गुन सीलु सुभाऊ । बोले प्रेम पुलकि मुनिराऊ ॥  
 भूप सजेउ अभिषेक समाजू । चाहत देन तुम्हहि जुबराजू ॥  
 राम करहु सब संजम आजू । जाँ बिधि कुसल निबाहै काजू ॥  
 गुरु सिख देइ राय पहिं गयऊ । राम हृदयें अस बिसमउ भयऊ ॥  
 जनमे एक संग सब भाई । भोजन सयन केलि लरिकाई ॥

करनबेध उपबीत बिआहा । संग संग सब भए उछाहा ॥  
बिमल बंस यहु अनुचित एकू । बंधु बिहाइ बड़ेहि अभिषेकू ॥  
प्रभु सप्रेम पछितानि सुहाई । हरउ भगत मन कै कुटलाई ॥  
दो०— तेहि अवसर आए लखन मगन प्रेम आनंद ।

सनमाने प्रिय बचन कहि रघुकुल कैरव चंद ॥ 10

बाजहिं बाजने बिबिध बिधाना । पुर प्रमोदु नहिं जाइ बखाना ॥  
भरत आगमनु सकल मनावहिं । आवहुं बेगि नयन फलु पावहिं ॥  
हाट बाट घर गलीं अथाई । कहहिं परसपर लोग लोगाई ॥  
कालि लगन भलि केतिक बारा । पूजिहि बिधि अभिलाषु हमारा ॥  
कनक सिंघासन सीय समेता । बैठहिं रामु होइ चित चेता ॥  
सकल कहहिं कब होइहि काली । बिघन मनावहिं देव कुचाली ॥  
तिन्हहि सोहाइ न अवध बधावा । चोरहि चंदिनि राति न भावा ॥  
सारद बोलि बिनय सुर करहीं । बारहिं बार पाय लै परहीं ॥

दो०— बिपति हमारि बिलोकि बड़ि मातु करिअ सोइ आजु ।

रामु जाहिं बन राजु तजि होइ सकल सुरकाजु ॥ 11

सुनि सुर बिनय ठाढ़ि पछिताती । भइउँ सरोज बिपिन हिमराती ॥  
देखि देव पुनि कहहिं निहोरी । मातु तोहि नहिं थोरिउ खोरी ॥  
बिसमय हरष रहित रघुराऊ । तुम्ह जानहु सब राम प्रभाऊ ॥  
जीव करम बस सुख दुख भागी । जाइअ अवध देव हित लागी ॥  
बार बार गहि चरन सँकोची । चली बिचारि बिबुध मति पोची ॥  
ऊँच निवासु नीचि करतूती । देखि न सकहिं पराइ बिभूती ॥  
आगिल काजु बिचारि बहोरी । करिहहिं चाह कुसल कबि मोरी ॥  
हरषि हृदयें दसरथ पुर आई । जनु ग्रह दसा दुसह दुखदाई ॥

दो०— नामु मंथरा मंदमति चेरी कैकइ केरि ।

अजस पेटारी ताहि करि गई गिरा मति फेरि ॥ 12

दीख मंथरा नगरु बनावा । मंजुल मंगल बाज बधावा ॥  
पूछेसि लोगन्ह काह उछाहू । राम तिलकु सुनि भा उर दाहू ॥  
करइ बिचारु कुबुद्धि कुजाती । होइ अकाजु कवनि बिधि राती ॥  
देखि लागि मधु कुटिल किराती । जिमि गर्व तकइ लेउँ केहि भौंती ॥  
भरत मातु पहिं गइ बिलखानी । का अनमनि हसि कह हँसि रानी ॥  
ऊतरु देइ न लेइ उसासू । कपट चरित करि ढारइ आँसू ॥  
हँसि कह रानि गालु बड़ तोरें । दीन्ह लखन सिख अस मन मोरें ॥  
तबहुँ न बोल चेरि बड़ि पापिनि । छाड़इ स्वास कारि जनु साँपिनि ॥

दो०— सभय रानि कह कहसि किन कुसल रामु महिपालु ।

लखनु भरतु रिपुदमनु सुनि भा कुबरी उर सालु ॥ 13

कत सिख देइ हमहि कोउ माई । गालु करब केहि कर बलु पाई ॥  
रामहि छाड़ि कुसल केहि आजू । जेहि जनेसु देइ जुबराजू ॥  
भयउ कासिलहि बिधि अति दाहिन । देखत गरब रहत उर नाहिन ॥  
देखहु कस न जाइ सब सोभा । जो अवलोकि मोर मनु छोभा ॥  
पूतु बिदेस न सोचु तुम्हारें । जानति हहु बस नाहु हमारें ॥  
नीद बहुत प्रिय सेज तुराई । लखहु न भूप कपट चतुराई ॥  
सुनि प्रिय बचन मलिन मनु जानी । झुको रानि अब रहु अरगानी ॥  
पुनि अस कबहुँ कहसि घरफोरी । तब धरि जीभ कढ़ावउँ तोरी ॥

दो०— प्रिय बोले परपंच करि कुटिल कुचाली जानि ।

कुबरी कस कजरी भई भरत मातु मुसुकानि ॥ 14  
 प्रियबादिनि सिख दीन्हिउँ तोही । सपनेहुँ तो पर कोपु न मोही ॥  
 सुदिनु सुमंगल दायकु सोई । तोर कहा फुर जेहि दिन होई ॥  
 जेठ स्वामि सेवक लघु भाई । यह दिनकर कुल रीति सुहाई ॥  
 राम तिलकु जौँ साँचेहुँ काली । देउँ मागु मन भावत आली ॥  
 कौसल्या सम सब महतारी । रामहि सहज सुभार्यँ पिआरी ॥  
 मो पर करहिं सनेहु बिसेषी । मैं करि प्रीति परीछा देखी ॥  
 जौँ बिधि जनमु देइ करि छोहू । होहुँ राम सिय पूत पुतोहू ॥  
 प्रान तें अधिक रामु प्रिय मोरें । तिन्ह कें तिलक छोभु कस तोरें ॥  
 दो०— भरत सपथ तोहि सत्य कहु परिहरि कपट दुराउ ।

हरष समय बिसमउ करसि कारन मोहि सुनाउ ॥ 15  
 एकहिं बार आस सब पूजी । अब कछु कहब जीभ करि दूजी ॥  
 फोरै जोगु कपारु अभागा । भलेउ कहत दुख रउरेहि लागा ॥  
 कहहिं झूठि फुरि बात बनाई । ते प्रिय तुम्हहि करुइ मैं माई ॥  
 हमहुँ कहबि अब ठकुरसोहाती । नाहिं त मौन रहब दिनु राती ॥  
 करि कुरूप बिधि परबस कीन्हा । बवा सो लुनिअ लहिअ जो दीन्हा ॥  
 कोउ नृप होउ हमहि का हानी । चेरि छाड़ि अब होब कि रानी ॥  
 जारै जोगु सुभाउ हमारा । अनभल देखि न जाइ तुम्हारा ॥  
 तातें कछुक बात अनुसारी । छमिअ देबि बड़ि चूक हमारी ॥  
 दो०— गूढ कपट प्रिय बचन सुनि जीव अधरबुधि रानि ।

सुरमाया बस बैरिनिहि सहृद जानि पतिआनि ॥ 16  
 सादर पुनि पुनि पूँछति ओही । सबरी गान मृगी जनु मोही ॥  
 तसि मति फिरी अहइ जसि भाबी । रहसी चेरि घात जनु फाबी ॥  
 तुम्ह पूँछहु मैं कहत डेराऊँ । धरेहु मोर घरफोरी नाऊँ ॥  
 सजि प्रतीति बहुबिधि गढ़ि छोली । अवध साढसाती तब बोली ॥  
 प्रिय सिय रामु कहा तुम्ह रानी । रामहि तुम्ह प्रिय सो फुरि बानी ॥  
 रहा प्रथम अब ते दिन बीते । समउ फिरें रिपु होहिं पिरीते ॥  
 भानु कमल कुल पोषनिहारा । बिनु जल जारि करइ सोइ छारा ॥  
 जरि तुम्हारि चह सवति उखारी । रूँधहु करि उपाउ बर बारी ॥  
 दो०— तुम्हहि न सोचु सोहाग बल निज बस जानहु राउ ।

मन मलीन मुह मीठ नृपु राउर सरल सुभाउ ॥ 17  
 चतुर गँभीर राम महतारी । बीचु पाइ निज बात सँवारी ॥  
 पठए भरतु भूप ननिअउरें । राम मातु मत जानब रउरें ॥  
 सेवहिं सकल सवति मोहि नीकें । गरबित भरत मातु बल पी कें ॥  
 सालु तुम्हार कौसिलहि माई । कपट चतुर नहिं होइ जनाई ॥  
 राजहि तुम्ह पर प्रेमु बिसेषी । सवति सुभाउ सकइ नहिं देखी ॥  
 रचि प्रपंचु भूपहि अपनाई । राम तिलक हित लगन धराई ॥  
 यह कुल उचित राम कहुँ टीका । सबहि सोहाइ मोहि सुठि नीका ॥  
 आगिलि बात समुझि डरु मोही । देउ दैउ फिरि सो फलु ओही ॥  
 दो०— रचि पचि कोटिक कुटिलपन कीन्हेसि कपट प्रबोधु ।

कहिसि कथा सत सवति कै जेहि बिधि बाढ बिरोधु ॥ 18  
 भावी बस प्रतीति उर आई । पूँछ रानि पुनि सपथ देवाई ॥  
 का पूँछहु तुम्ह अबहुँ न जाना । निज हित अनहित पसु पहिचाना ॥  
 भयउ पाखु दिन सजत समाजू । तुम्ह पाई सुधि मोहि सन आजू ॥

खाइअ पहिरिअ राज तुम्हारे । सत्य कहे नहिं दोषु हमारे ॥  
जौ असत्य कछु कहब बनाई । तौ बिधि देइहि हमहि सजाई ॥  
रामहि तिलक कालि जौ भयऊ । तुम्ह कहूँ बिपति बीजु बिधि बयऊ ॥  
रेख खँचाइ कहउँ बलु भाषी । भामिनि भइहु दूध कइ माखी ॥  
जौ सुत सहित करहु सेवकाई । तौ घर रहहु न आन उपाई ॥  
दो०— कद्रूँ बिनतहि दीन्ह दुखु तुम्हहि कौसिलौ देब ।

भरतु बंदिगृह सेइहहिं लखनु राम के नेब ॥ 19  
कैकयसुता सुनत कटु बानी । कहि न सकइ कछु सहमि सुखानी ॥  
तन पसेउ कदली जिमि कौपी । कुबरीं दसन जीभ तब चोपी ॥  
कहि कहि कोटिक कपट कहानी । धीरजु धरहु प्रबोधिसि रानी ॥  
फिरा करमु प्रिय लागि कुचाली । बकिहि सराहइ मानि मराली ॥  
सुनु मंथरा बात फुरि तोरी । दहिनि ओंखि नित फरकइ मोरी ॥  
दिन प्रति देखउँ राति कुसपने । कहउँ न तोहि मोह बस अपने ॥  
काह करौं सखि सूध सुभाऊ । दाहिन बाम न जानउँ काऊ ॥

दो०— अपने चलत न आजु लागि अनभल काहुक कीन्ह ।  
केहिं अघ एकहि बार मोहि दैअँ दुसह दुखु दीन्ह ॥20  
नैहर जनमु भरब बरु जाई । जिअत न करबि सवति सेवकाई ॥  
अरि बस दैउ जिआवत जाही । मरनु नीक तेहि जीवन चाही ॥  
दीन बचन कह बहुबिधि रानी । सुनि कुबरीं निजमाया ठानी ॥  
अस कस कहहु मानि मन ऊना । सुखु सोहागु तुम्ह कहूँ दिन दूना ॥  
जेहिं राउर अति अनभल ताका । सोइ पाइहि यहु फल परिपाका ॥  
जब तें कुमत सुना मैं स्वामिनि । भूख न बासर नींद न जामिनि ॥  
पूँछेउँ गुनिन्ह रेख तिन्ह खौंची । भरत भुआल होहिं यह सौंची ॥  
भामिनि करहु त कहीं उपाऊ । है तुम्हरीं सेवा बस राऊ ॥

दो०— परउँ कूप तुअ बचन पर सकउँ पूत पति त्यागि ।  
कहसि मोर दुखु देखि बड़ कस न करब हित लागि ॥ 21  
कुबरीं करि कबुली कैकई । कपट छुरी उर पाहन टेई ॥  
लखइ न रानि निकट दुखु कैसैं । चरइ हरित तिन बलिपसु जैसैं ॥  
सुनत बात मृदु अंत कठोरी । देति मनहुँ मधु माहुर घोरी ॥  
कहइ चेरि सुधि अहइ कि नाहीं । स्वामिनि कहिहु कथा मोहि पाहीं ॥  
दुइ बरदान भूप सन थाती । मागहु आजु जुड़ावह छाती ॥  
सुतहि राजु रामहि बनबासू । देहु लेहु सब सवति हुलासू ॥  
भूपति राम सपथ जब करई । तब मागेहु जेहिं बचनु न टरई ॥  
होइ अकाजु आजु निसि बीतें । बचनु मोर प्रिय मानेहु जी तें ॥

दो०— बड़ कुघातु करि पातकिनि कहेसि कोपगृहँ जाहु ।  
काजु सँवारेहु सजग सबु सहसा जनि पतिआहु ॥ 22  
कुबरिहि रानि प्रानप्रिय जानी । बार बार बड़ि बुद्धि बखानी ॥  
तोहि सम हित न मोर संसारा । बहे जात कइ भइसि अधारा ॥  
जौ बिधि पुरब मनोरथु काली । करौं तोहि चख पूतरि आली ॥  
बहुबिधि चेरिहि आदरु देई । कोपभवन गवनी कैकई ॥  
बिपति बीजु बरषा रितु चेरी । भुईं भइ कुमति कैकई केरी ॥  
पाइ कपट जलु अंकुर जामा । बर दोउ दल दुख फल परिनामा ॥  
कोप समाजु साजि सबु सोई । राजु करत निज कुमति बिगोई ॥  
राउर नगर कोलाहलु होई । यह कुचालि कछु जान न कोई ॥

दो०— प्रमुदित पुर नर नारि सब सजहिं सुमंगलचार ।

एक प्रबिसहिं एक निर्गमहिं भीर भूप दरबार ॥ 23

बाल सखा सुनि हिये हरषाहीं । मिलि दस पौंच राम पहिं जाहीं ॥  
प्रभु आदरहिं प्रेमु पहिचानी । पूँछहिं कुसल खेम मृदु बानी ॥  
फिरहिं भवन प्रिय आयसु पाई । करत परसपर राम बड़ाई ॥  
को रघुबीर सरिस संसारा । सीलु सनेहु निबाहनिहारा ॥  
जेहिं जेहिं जोनि करम बस भ्रमहीं । तहें तहें ईसु देउ यह हमहीं ॥  
सेवक हम स्वामी सियनाहू । होउ नात यह ओर निबाहू ॥  
अस अभिलाषु नगर सब काहू । कैकयसुता हृदयें अति दाहू ॥  
को न कुसंगति पाइ नसाई । रहइ न नीच मते चतुराई ॥

दो०— साँझ समय सानंद नृपु गयउ कैकई गेहें ।

गवनु नितुरता निकट किय जनु धरि देह सनेहें ॥ 24

कोपभवन सुनि सकुचेउ राऊ । भय बस अगहुड़ परइ न पाऊ ॥  
सुरपति बसइ बाहेंबल जाके । नरपति सकल रहहिं रुख ताके ॥  
सो सुनि तिय रिस गयउ सुखाई । देखहु काम प्रताप बड़ाई ॥  
सूल कुलिस असि अँगवनिहारे । ते रतिनाथ सुमन सर मारे ॥  
सभय नरेसु प्रिया पहिं गयऊ । देखि दसा दुखु दारुन भयऊ ॥  
भूमि सयन पटु मोट पुराना । दिए डारि तन भूषन नाना ॥  
कुमतिहि कसि कुबेषता फाबी । अन अहिवातु सूच जनु भाबी ॥  
जाइ निकट नृपु कह मृदु बानी । प्रानप्रिया केहि हेतु रिसानी ॥

छं०— केहि हेतु रानि रिसानि परसत पानि पतिहि नेवारई ।

मानहुँ सरोष भुअंग भामिनि बिषम भाँति निहारई ॥

दोउ बासना रसना दसन बर मरम ठाहरु देखई ।

तुलसी नृपति भवतब्यता बस काम कौतुक लेखई ॥

सो०— बार बार कह राउ सुमुखि सुलोचनि पिकबचनि ।

कारन मोहि सुनाउ गजगामिनि निज कोप कर ॥ 25

अनहित तोर प्रिया केई कौन्हा । केहि दुइ सिर केहि जमु चह लीन्हा ॥  
कहु केहि रंकहि करीं नरेसू । कहु केहि नृपहि निकासौं देसू ॥  
सकउँ तोर अरि अमरउ मारी । काह कीट बपुरे नर नारी ॥  
जानसि मोर सुभाउ बरोरु । मनु तव आनन चंद चकोरु ॥  
प्रिया प्रान सुत सरबसु मोरें । परिजन प्रजा सकल बस तोरें ॥  
जौं कछु कहीं कपटु करि तोही । भामिनि राम सपथ सत मोही ॥  
बिहसि मागु मनभावति बाता । भूषन सजहि मनोहर गाता ॥  
घरी कुघरी समुझि जियें देखू । बेगि प्रिया परिहरहि कुबेषू ॥

दो०— यह सुनि मन गुनि सपथ बड़ि बिहसि उठी मतिमंद ।

भूषन सजति बिलोकि मृगु मनहुँ किरातिनि फंद । 26

पुनि कह राउ सुहृद जियें जानी । प्रेम पुलकि मृदु मंजुल बानी ॥  
भामिनि भयउ तोर मनभावा । घर घर नगर अनंद बधावा ॥  
रामहि देउँ कालि जुबराजू । सजहि सुलोचनि मंगल साजू ॥  
दलकि उठेउ सुनि हृदउ कठोरु । जनु छुइ गयउ पाक बरतोरु ॥  
ऐसिउ पीर बिहसि तेहिं गोइ । चोर नारि जिमि प्रगटि न रोई ॥  
लखहिं न भूप कपट चतुराई । कोटि कुटिल मनि गुरु पढ़ाई ॥  
जद्यपि नीति निपुन नरनाहू । रानिचरित जलनिधि अवगाहू ॥  
कपट सनेहु बड़ाइ बहोरी । बोली बिहसि नयन मुहु मोरी ॥

दो०— मागु मागु पै कहहु पिय कबहुँ न देहु न लेहु ।

देन कहेहु बरदान दुइ तेउ पावत संदेहु ॥ 27

जानेउँ मरमु राउ हँसि कहई । तुम्हहि कोहाब परम प्रिय अहई ॥  
थाती राखि न मागिहु काऊ । बिसरि गयउ मोहि भोर सुभाऊ ॥  
झूठेहुँ हमहि दोषु जनि देहू । दुइ कै चारि मागि मकु लेहू ॥  
रघुकुल रीति सदा चलि आई । प्रान जाहुँ बरु बचनु न जाई ॥  
नहिँ असत्य सम पातक पुंजा । गिरि सम होहिँ कि कोटिक गुंजा ॥  
सत्यमूल सब सुकृत सुहाए । बेद पुरान बिदित मनु गाए ॥  
तेहि पर राम सपथ करि आई । सुकृत सनेह अवधि रघुराई ॥  
बात दृढाइ कुमति हँसि बोली । कुमत कुबिहग कुलह जनु खोली ॥

दो०— भूप मनोरथ सुभग बनु सुख सुबिहंग समाजु ।

भिल्लिनि जिमि छाड़न चहति बचनु भयंकरु बाजु ॥ 28

मासपारायण, तेरहवाँ विश्राम

सुनहु प्रानप्रिय भावत जी का । देहु एक बर भरतहि टीका ॥  
मागउँ दूसर बर कर जोरी । पुरवहु नाथ मनोरथ मोरी ॥  
तापस बेष बिसेषि उदासी । चौदह बरिस रामु बनबासी ॥  
सुनि मृदु बचन भूप हियँ सोकू । ससि कर छुअत बिकल जिमि कोकू ॥  
गयउ सहमि नहिँ कछु कहि आवा । जनु सचान बन झपटेउ लावा ॥  
बिबरन भयउ निपट नरपालू । दामिनि हनेउ मनहुँ तरु तालू ॥  
मार्थे हाथ मूदि दोउ लोचन । तनु धरि सोचु लाग जनु सोचन ॥  
अवध उजारि कीन्हि कैकेई । दीन्हिसि अचल बिपति कै नेई ॥

दो०— कवनेँ अवसर का भयउ गयउँ रानि बिस्वास ।

जोग सिद्धि फल समय जिमि जतिहि अबिद्या नास ॥ 29

एहि बिधि राउ मनहिँ मन झॉखा । देखि कुभाँति कुमति मन माखा ॥  
भरतु कि राउर पूत न होँही । आनेहु मोल बेसाहि कि मोही ॥  
जो सुनि सरु अस लाग तुम्हारेँ । काहे न बोलहु बचनु सँभारेँ ॥  
देहु उतरु अनु करहु कि नाहीं । सत्यसंध तुम्ह रघुकुल माहीं ॥  
देन कहेहु अब जनि बरु देहू । तजहु सत्य जग अपजसु लेहू ॥  
सत्य सराहि कहेहु बरु देना । जानेहु लेइहि मागि चबेना ॥  
सिबि दधीचि बलि जो कछु भाषा । तनु धनु तजेउ बचन पनु राखा ॥  
अति कटु बचन कहति कैकेई । मानहुँ लोन जरे पर देई ॥

दो०— धरम धुरधर धीर धरि नयन उघारे रायँ ।

सिरु धुनि लीन्हि उसास असि मारेसि मोहि कुठायँ ॥ 30

आगेँ दीखि जरत रिस भारी । मनहुँ रोष तरवारि उघारी ॥  
मूठि कुबुद्धि धार निठुराई । धरी कूबरीं सान बनाई ॥  
लखी महीप कराल कठोरा । सत्य कि जीवनु लेइहि मोरा ॥  
बोले राउ कठिन करि छाती । बानी सबिनय तासु सोहाती ॥  
प्रिया बचन कस कहसि कुभाँती । भीर प्रतीति प्रीति करि हॉती ॥  
मोरेँ भरतु रामु दुइ आँखी । सत्य कहउँ करि संकरु साखी ॥  
अवसि दूतु मै पठइब प्राता । ऐहहिँ बेगि सुनत दोउ भ्राता ॥  
सुदिन सोधि सबु साजु सजाई । देउँ भरत कहूँ राजु बजाई ॥

दो०— लोभु न रामहि राजु कर बहुत भरत पर प्रीति ।

मै बड़ छोट बिचारि जियँ करत रहेउँ नृपनीति ॥ 31

राम सपथ सत कहउँ सुभाऊ । राममातु कछु कहेउ न काऊ ॥  
 मैं सबु कीन्ह तोहि बिनु पूँछें । तेहि तैं परेउ मनोरथु छूँछें ॥  
 रिस परिहरु अब मंगल साजू । कछु दिन गएँ भरत जुबराजू ॥  
 एकहि बात मोहि दुखु लागा । बर दूसर असमंजस मागा ॥  
 अजहूँ हृदउ जरत तेहि आँचा । रिस परिहास कि साँचेहुँ साँचा ॥  
 कहु तजि रोषु राम अपराधू । सबु कोउ कहइ रामु सुठि साधू ॥  
 तुहूँ सराहसि करसि सनेहू । अब सुनि मोहि भयउ संदेहू ॥  
 जासु सुभाउ अरिहि अनुकूला । सो किमि करिहि मातु प्रतिकूला ॥  
 दो०— प्रिया हास रिस परिहरहि मागु बिचारि बिबेकु ।

जेहिं देखौं अब नयन भरि भरत राज अभिषेकु ॥ 32  
 जिऐ मीन बरु बारि बिहीना । मनि बिनु फनिकु जिऐ दुख दीना ॥  
 कहउँ सुभाउ न छलु मन माहीं । जीवनु मोर राम बिनु नाहीं ॥  
 समुझि देखु जियेँ प्रिया प्रबीना । जीवनु राम दरस आधीना ॥  
 सुनि मृदु बचन कुमति अति जरई । मनहु अनल आहुति घृत परई ॥  
 कहइ करहु किन कोटि उपाया । इहाँ न लागिहि राउरि माया ॥  
 देहु कि लेहु अजस करि नाहीं । मोहि न बहुत प्रपंच सोहाहीं ॥  
 रामु साधु तुम्ह साधु सयाने । राममातु भलि सब पहिचाने ॥  
 जस कौसिलौ मोर भल ताका । तस फलु उन्हहि देउँ करि साका ॥

दो०— होत प्रातु मुनिबेष धरि जौं न रामु बन जाहिं ।  
 मोर मरनु राउर अजस नृप समुझिअ मन माहिं ॥ 33  
 अस कहि कटिल भई उठि ठाढ़ी । मानहुँ रोष तरंगिनि बाढ़ी ॥  
 पाप बहार प्रगट भइ सोई । भरी क्रोध जल जाइ न जोई ॥  
 दोउ बर कूल कठिन हठ धारा । भवैर कूबरी बचन प्रचारा ॥  
 ढाहत भूपरुप तरु मूला । चली बिपति बारिधि अनुकूला ॥  
 लखी नरेस बाल फुरि साँची । तिय मिस मीचु सीस पर नाची ॥  
 गहि पद बिनय कीन्ह बैठारी । जनि दिनकर कुल होसि कुठारी ॥  
 मागु माथ अबहीं देउँ तोही । राम बिरहँ जनि मारसि मोही ॥  
 राखु राम कहूँ जेहि तेहि भौंती । नाहिं त जरिहि जनम भरि छाती ॥

दो०— देखीं ब्याधि असाध नृपु परेउ धरनि धुनि माथ ।  
 कहत परम आरत बचन राम राम रघुनाथ ॥ 34  
 ब्याकुल राउ सिथिल सब गाता । करिनि कलपतरु मनहुँ निपाता ॥  
 कंटु सूख मुख आव न बानी । जनु पाठीनु दीन बिनु पानी ॥  
 पुनि कह कटु कठोर कैकेई । मनहुँ घाय महुँ माहुर देई ॥  
 जौं अंतहुँ अस करतबु रहेऊ । मागु मागु तुम्ह केहिं बल कहेऊ ॥  
 दुइ कि होइ एक समय भुआला । हँसब उठाइ फुलाउब गाला ॥  
 दानि कहाउब अरु कृपनाई । होइ कि खेम कुसल रौताई ॥  
 छाड़हु बचनु कि धीरजु धरहू । जनि अबला जिमि करुना करहू ॥  
 तनु तिय तनय धामु धनु धरनी । सत्यसंध कहूँ तून सम बरनी ॥

दो०— मरम बचन सुनि राउ कह कहु कछु दोषु न तोर ।  
 लागेउ तोहि पिसाच जिमि कालु कहावत मोर ॥ 35  
 चहत न भरत भूप तहि भोरें । बिधि बस कुमति बसी जिय तोरें ॥  
 सो सबु मोर पाप परिनामू । भयउ कुठाहर जेहिं बिधि बामू ॥  
 सुबस बसिहि फिरि अवध सुहाई । सब गुन धाम राम प्रभुताई ॥  
 करिहहिं भाइ सकल सेवकाई । होइहि तिहुँ पुर राम बड़ाई ॥

तोर कलंकु मोर पछिताऊ । मुएहुँ न भिटिहि न जाइहि काऊ ॥  
अब तोहि नीक लाग करु सोई । लोचन ओट बैठु मुहु गोई ॥  
जब लगि जिऔं कहउँ कर जोरी । तब लगि जनि कछु कहसि बहोरी ॥  
फिरि पछितैहसि अत अभागी । मारसि गाइ नहारु लागी ॥

दो०— परेउ राउ कहि कोटि बिधि काहे करसि निदानु ।

कपट सयानि न कहति कछु जागति मनहुँ मसानु ॥ 36  
राम राम रट बिकल भुआलू । जनु बिनु पंख बिहंग बेहालू ॥  
हृदयें मनाव भोरु जनि होई । रामहि जाइ कहै जनि कोई ॥  
उदउ करहु जनि रबि रघुकुल गुर । अवध बिलोकि सूल होइहि उर ॥  
भूप प्रीति कैकइ कठिनाई । उभय अवधि बिधि रची बनाई ॥  
बिलपत नृपहि भयउ भिनुसारा । बीना बेनु संख धुनि द्वारा ॥  
पढ़हिं भाट गुन गावहिं गायक । सुनत नृपहि जनु लागहिं सायक ॥  
मंगल सकल सोहाहिं न कैसे । सहगामिनिहि बिभूषन जैसे ॥  
तेहिं निसि नीद परी नहिं काहू । राम दरस लालसा उछाहू ॥

दो०— द्वार भीर सेवक सचिव कहहिं उदित रबि देखि ।

जागेउ अजहुँ न अवधपति कारनु कवनु बिसेषि ॥ 37  
पछिले पहर भूपु नित जागा । आजु हमहि बड़ अचरजु लागा ॥  
जाहु सुमंत्र जगावहु जाइ । कीजिअ काजु रजायसु पाई ॥  
गए सुमंत्रु तब राउर माहीं । देखि भयावन जात डेराहीं ॥  
धाइ खाइ जनु जाइ न हेरा । मानहुँ बिपति बिषाद बसेरा ॥  
पूछें कोउ न ऊतरु देई । गए जेहिं भवन भूप कैकेई ॥  
कहि जयजीव बैठ सिरु नाई । देखि भूप गति गयउ सुखाई ॥  
सोच बिकल बिबरन महि परेरु । मानहुँ कमल मूलु परिहरेरु ॥  
सचिउ सभीत सकइ नहिं पूछी । बोली असुभ भरी सुभ छूछी ॥

दो०— परी न राजहि नीद निसि हेतु जान जगदीसु ।

रामु रामु रटि भोरु किय कहइ न मरमु महीसु ॥ 38  
आनहु रामहि बेगि बोलाई । समाचार तब पूँछेहु आई ॥  
चलेउ सुमंत्रु राय रुख जानी । लखी कुचालि कीन्हि कछु रानी ॥  
सोच बिकल मग परइ न पाऊ । रामहि बोलि कहिहि का राऊ ॥  
उर धरि धीरजु गयउ दुआरें । पूँछहिं सकल देखि मनु मारें ॥  
समाधानु करि सो सबही का । गयउ जहाँ दिनकर कुल टीका ॥  
राम सुमंत्रहि आवत देखा । आदरु कीन्ह पिता सम लेखा ॥  
निरखि बदनु कहि भूप रजाई । रघुकुलदीपहि चलेउ लेवाई ॥  
रामु कुभौंति सचिव सँग जाहीं । देखि लोग जहें तहें बिलखाहीं ॥

दो०— जाइ दीख रघुबंसमनि नरपति निपट कुसाजु ।

सहमि परेउ लखि सिंधिनिहि मनहुँ बृद्ध गजराजु ॥ 39  
सूखहिं अधर जरइ सबु अंगू । मनहुँ दीन मनिहीन भूअंगू ॥  
सरुष समीप दीखि कैकेई । मानहुँ मीचु घरीं गनि लेई ॥  
करुनामय मृदु राम सुभाऊ । प्रथम दीख दुखु सुना न काऊ ॥  
तदपि धीर धरि समउ बिचारी । पूँछी मधुर बचन महतारी ॥  
मोहि कहु मातु तात दुख कारन । करिअ जतन जेहिं होइ निवारन ॥  
सुनहु राम सबु कारन एहू । राजहि तुम्ह पर बहुत सनेहू ॥  
देन कहेन्हि मोहि दुइ बरदाना । मार्गेउं जो कछु मोहि सोहाना ॥  
सो सुनि भयउ भूप उर सोचू । छाड़ि न सकहिं तुम्हार सँकोचू ॥

दो०— सुत सनेहु इत बचनु उत संकट परेउ नरेसु ।  
 सकहु त आयसु धरहु सिर मेटहु कठिन कलेसु ॥ 40  
 निघरक बैठि कहइ कटु बानी । सुनत कठिनता अति अकुलानी ॥  
 जीभ कमान बचन सर नाना । मनहुँ महिप मृदु लच्छ समाना ॥  
 जनु कठोरपनु धरें सरीरु । सिखइ धनुषबिद्या बर बीरु ॥  
 सबु प्रसंगु रघुपतिहि सुनाई । बैठि मनहुँ तनु धरि निठुराई ॥  
 मन मुसुकाइ भानुकुल भानू । रामु सहज आनंद निधानू ॥  
 बोले बचन बिगत सब दूषन । मृदु मंजुल जनु बाग बिभूषन ॥  
 सुनु जननी सोइ सुतु बड़भागी । जो पितु मातु बचन अनुरागी ॥  
 तनय मातु पितु तोषनिहारा । दुर्लभ जननि सकल संसारा ॥

दो०— मुनिगन मिलनु बिसेषि बन सबहि भौंति हित मोर ।  
 तेहि महें पितु आयसु बहुरि संमत जननी तोर ॥ 41  
 भरतु प्रानप्रिय पावहिं राजू । बिधि सब बिधि मोहि सनमुख आजू ॥  
 जौं न जाउं बन ऐसेहु काजा । प्रथम गनिअ मोहि मूढ समाजा ॥  
 सेवहिं अरेंडु कलपतरु त्यागी । परिहरि अमृत लेहिं बिषु मागी ॥  
 तेउ न पाइ अस समउ चुकाहीं । देखु बिचारि मातु मन माहीं ॥  
 अंब एक दुखु मोहि बिसेषी । निपट बिकल नरनायकु देखी ॥  
 थोरिहिं बात पितहि दुख भारी । होति प्रतीति न मोहि महतारी ॥  
 राउ धीर गुन उदधि अगाधू । भा मोहि तें कछु बड़ अपराधू ॥  
 जातें मोहि न कहत कछु राऊ । मोरि सपथ तोहि कहु सतिभाऊ ॥

दो०— सहज सरल रघुबर बचन कुमति कुटिल करि जान ।  
 चलइ जाँक जल बकगति जद्यपि सलिलु समान ॥ 42  
 रहसी रानि राम रुख पाई । बोली कपट सनेहु जनाई ॥  
 सपथ तुम्हार भरत कै आना । हेतु न दूसर मै कछु जाना ॥  
 तुम्ह अपराध जोगु नहिं ताता । जननी जनक बंधु सुखदाता ॥  
 राम सत्य सबु जो कछु कहहू । तुम्ह पितु मातु बचन रत अहहू ॥  
 पितहि बुझाइ कहहु बलि सोई । चौथेंपन जेहिं अजसु न होई ॥  
 तुम्ह सम सुअन सुकृत जेहिं दीन्हे । उचित न तासु निरादरु कीन्हे ॥  
 लागहिं कुमुख बचन सुभ कैसे । मगहें गयादिक तीरथ जैसे ॥  
 रामहि मातु बचन सब भाए । जिमि सुरसरि गत सलिल सुहाए ॥

दो०— गइ मुरुछा रामहि सुमिरि नृप फिरि करवट लीन्ह ।  
 सचिव राम आगमन कहि बिनय समय सम कीन्ह ॥ 43  
 अवनिय अकनि रामु पगु धारे । धरि धीरजु तब नयन उघारे ॥  
 सचिवें सँभारि राउ बैठारे । चरन परत नृप रामु निहारे ॥  
 लिए सनेह बिकल उर लाई । गै मनि मनहुँ फनिक फिरि पाई ॥  
 रामहि चितइ रहेउ नरनाहू । चला बिलोचन बारि प्रबाहू ॥  
 सोक बिबस कछु कहै न पारा । हृदयें लगावत बारहिं बारा ॥  
 बिधिहि मनाव राउ मन माहीं । जेहिं रघुनाथ न कानन जाहीं ॥  
 सुमिरि महेसहि कहइ निहोरी । बिनती सुनहु सदासिव मोरी ॥  
 आसुतोष तुम्ह अवढर दानी । आरति हरहु दीन जनु जानी ॥

दो०— तुम्ह प्रेरक सब के हृदयें सो मति रामहि देहु ।  
 बचनु मोर तजि रहहिं घर परिहरि सीलु सनेहु ॥ 44  
 अजसु होउ जग सुजसु नसाऊ । नरक परौ बरु सुरपुरु जाऊ ॥  
 सब दुख दुसह सहावहु मोही । लोचन ओट रामु जनि होंही ॥

अस मन गुनइ राउ नहिं बोला । पीपर पात सरिस मनु डोला ॥  
रघुपति पितहि प्रेमबस जानी । पुनि कछु कहिहि मातु अनुमानी ॥  
देस काल अवसर अनुसारी । बोले बचन बिनीत बिचारी ॥  
तात कहउँ कछु करउँ ढिठाई । अनुचितु छमब जानि लरिकाई ॥  
अति लघु बात लागि दुखु पावा । काहुँ न मोहि कहि प्रथम जनावा ॥  
देखि गोसाईंहि पूँछिउँ माता । सुनि प्रसंगु भए सीतल गाता ॥

दो०— मंगल समय सनेह बस सोच परिहरिअ तात ।

आयसु देइअ हरषि हियँ कहि पुलके प्रभु गात ॥ 45

धन्य जनमु जगतीतल तासू । पितहि प्रमोदु चरित सुनि जासू ॥  
चारि पदारथ करतल ताके । प्रिय पितु मातु प्रान सम जाके ॥  
आयसु पालि जनम फलु पाई । ऐहउँ बेगिहिं होउ रजाई ॥  
बिदा मातु सन आवउँ मागी । चलिहउँ बनहि बहुरि पग लागी ॥  
अस कहि राम गवनु तब कीन्हा । भूप सोक बस उतरु न दीन्हा ॥  
नगर ब्यापि गइ बात सुतीछी । छुअत चढी जनु सब तन बीछी ॥  
सुनि भए बिकल सकल नर नारी । बेलि बिटप जिमि देखि दवारी ॥  
जो जहँ सुनइ धुनइ सिरु सोई । बड़ बिषादु नहिं धीरजु होई ॥

दो०— मुख सुखाहिं लोचन ठेवहिं सोकु न हृदयँ समाइ ।

मनहुँ करुन रस कटकई उतरी अवध बजाइ ॥ 46

मिलेहि माझ बिधि बात बेगारी । जहँ तहँ देहिं कैकइहि गारी ॥  
एहि पापिनिहि बूझि का परेरु । छाइ भवन पर पावकु धरेरु ॥  
निज कर नयन काढि चह दीखा । डारि सुधा बिषु चाहत चीखा ॥  
कुटिल कठोर कुबुद्धि अभागी । भइ रघुबंस बेनु बन आगी ॥  
पालव बठि पेडु एहिं काटा । सुख महुँ सोक ठाटु धरि ठाटा ॥  
सदा रामु एहि प्रान समाना । कारन कवन कुटिलपनु ठाना ॥  
सत्य कहहिं कबि नारि सुभाऊ । तिन्ह कर अगहु अगाध प्रभाऊ ॥  
निज प्रतिबिंबु बरुकु गहि जाई । जानि न जाइ नारि मन भाई ॥

दो०— काह न पावकु जारि सक का न समद्र समाइ ।

का न करै अबला प्रबल केहि जग कालु न खाइ ॥ 47

का सुनाइ बिधि काह सुनावा । का देखाइ चह काह देखावा ॥  
एक कहहिं भल भूप न कीन्हा । बरु बिचारि नहिं कुमतिहि दीन्हा ॥  
जो हठि भयउ सकल दुख भाजनु । अबला बिबस ग्यानु गुनु गा जनु ॥  
एक धरम परमिति पहिचाने । नृपहि दोसु नहिं देहिं सयाने ॥  
सिबि दधीचि हरिचंद कहानी । एक एक सन कहहिं बखानी ॥  
एक भरत कर संमत कहहीं । एक उदास भायँ सुनि रहहीं ॥  
कान मूदि कर रद गहि जीहा । एक कहहिं यह बात अलीहा ॥  
सुकृत जाहिं अस कहत तुम्हारे । रामु भरत कहुँ प्रानपिआरे ॥

दो०— चंदु चवै बरु अनल कन सुधा होइ बिषतूल ।

सपनेहुँ कबहुँ न करहिं किछु भरतु राम प्रतिकूल ॥ 48

एक बिधातहि दूषनु देहीं । सुधा देखाइ दीन्ह बिषु जेहीं ॥  
खरभरु नगर सोचु सब काहू । दुसह दाहु उर मिटा उछाहू ॥  
बिप्रबधू कुलमान्य जठेरी । जे प्रिय परम कैकई केरी ॥  
लगीं देन सिख सीलु सराही । बचन बानसम लागहिं ताही ॥  
भरतु न मोहि प्रिय राम समाना । सदा कहहु यहु सबु जगु जाना ॥

करहु राम पर सहज सनेहू । केहिं अपराध आजु बनु देहू ॥  
 कबहुं न कियहु सवति आरिसू । प्रीति प्रतीति जान सबु देसू ॥  
 कौसल्यो अब काह बिगारा । तुम्ह जेहि लागि बज्र पुर पारा ॥  
 दो०— सीय कि पिय सँगु परिहरिहि लखनु कि रहिहहिं धाम ।  
 राजु कि भूजब भरत पुर नृपु कि जिइहि बिनु राम ॥ 49  
 अस बिचारि उर छाड़हु कोहू । सोक कलंक कोटि जनि होहू ॥  
 भरतहि अवसि देहु जुबराजू । कानन काह राम कर काजू ॥  
 नाहिन राम राज के भूखे । धरम धुरीन बिषय रस रूखे ॥  
 गुर गृह बसहुँ रामु तजि गेहू । नृप सन अस बरु दूसर लेहू ॥  
 जौं नहिं लगिहहु कहें हमारे । नहिं लागिहि कछु हाथ तुम्हारे ॥  
 जौं परिहास कीन्हि कछु होई । तौ कहि प्रगट जनावहु सोई ॥  
 राम सरिस सुत कानन जोगू । काह कहिहि सुनि तुम्ह कहूँ लोगू ॥  
 उठहु बेगि सोइ करहु उपाई । जेहि बिधि सोकु कलंकु नसाई ॥  
 छ०— जेहि भौंति सोकु कलंकु जाइ उपाय करि कुल पालही ।  
 हठि फेरु रामहि जात बन जनि बात दूसरि चालही ॥  
 जिमि भानु बिनु दिनु प्रान बिनु तनु चंद बिनु जिमि जामिनी ।  
 तिमि अवध तुलसीदास प्रभु बिनु समुझि धौं जियेँ भामिनी ॥  
 सो०— सखिन्ह सिखावनु दीन्ह सुनत मधुर परिनाम हित ।  
 तेईं कछु कान न कीन्ह कुटिल प्रबोधी कूबरी ॥ 50  
 उतरु न देइ दुसह रिस रूखी । मृगिन्ह चितव जनु बाधिनि भूखी ॥  
 ब्याधि असाधि जानि तिन्ह त्यागी । चलीं कहत मतिमंद अभागी ॥  
 राजु करत यह दैअँ बिगोई । कीन्हेसि अस जस करइ न कोई ॥  
 एहि बिधि बिलपहिं पुर नर नारीं । देहिं कुचालिहि कोटिक गारीं ॥  
 जरहिं बिषम जर लेहिं उसासा । कवनि राम बिनु जीवन आसा ॥  
 बिपुल बियोग प्रजा अकुलानी । जनु जलचर गन सूखत पानी ॥  
 अति बिषाद बस लोग लोगार्ई । गए मातु पहिं रामु गोसाई ॥  
 मुख प्रसन्न चित चौगुन चारु । मिटा सोचु जनि राखै राऊ ॥  
 दो०— नव गयंदु रघुबीर मनु राजु अलान समान ।  
 छूट जानि बन गवनु सुनि उर अनंदु अधिकान ॥ 51  
 रघुकुलतिलक जोरि दोउ हाथा । मुदित मातु पद नायउ माथा ॥  
 दोन्हि असीस लाइ उर लीन्हे । भूषन बसन निछावरि कीन्हे ॥  
 बार बार मुख चुंबति माता । नयन नेह जलु पुलकित गाता ॥  
 गोद राखि पुनि हृदयें लगाए । ओवत प्रेमरस पयद सुहाए ॥  
 प्रेमु प्रमोदु न कछु कहि जाई । रंक धनद पदबी जनु पाई ॥  
 सादर सुंदर बदनु निहारी । बोली मधुर बचन महतारी ॥  
 कहहु तात जननी बलिहारी । कबहिं लगन मुद मंगलकारी ॥  
 सुकृत सील सुख सीवें सुहाई । जनम लाभ कइ अवधि अघाई ॥  
 दो०— जेहि चाहत नर नारि सब अति आरत एहि भौंति ।  
 जिमि चातक चातकि तृषित बृष्टि सरद रितु स्वाति ॥ 52  
 तात जाउँ बलि बेगि नहाहू । जो मन भाव मधुर कछु खाहू ॥  
 पितु समीप तब जाएहु भैआ । भइ बड़ि बार जाइ बलि मैआ ॥  
 मातु बचन सुनि अति अनुकूला । जनु सनेह सुरतरु के फूला ॥  
 सुख मकरंद भरे श्रियमूला । निरखि राम मनु भवैरु न भूला ॥

धरम धुरीन धरम गति जानी । कहेउ मातु सन अति मृदु बानी ॥  
पिताँ दीन्ह मोहि कानन राजू । जहँ सब भौँति मोर बड़ काजू ॥  
आयसु देहि मुदित मन माता । जेहिँ मुद मंगल कानन जाता ॥  
जनि सनेह बस डरपसि भोरें । आनेँदु अंब अनुग्रह तोरें ॥

दो०— बरष चारिदस बिपिन बसि करि पितु बचन प्रमान ।

आइ पाय पुनि देखिहउँ मनु जनि करसि मलान ॥ 53  
बचन बिनीत मधुर रघुबर के । सर सम लगे मातु उर करके ॥  
सहमि सूखि सुनि सीतलि बानी । जिमि जवास परें पावस पानी ॥  
कहि न जाइ कछु हृदय बिषादू । मनहुँ मृगी सुनि केहरि नादू ॥  
नयन सजल तन थर थर कौपी । माजहि खाइ मीन जनु मापी ॥  
धरि धीरजु सुत बदनु निहारी । गदगद बचन कहति महतारी ॥  
तात पितहि तुम्ह प्रानपिआरे । देखि मुदित नित चरित तुम्हारे ॥  
राजु देन कहँ सुभ दिन साधा । कहेउ जान बन केहिँ अपराधा ॥  
तात सुनावहु मोहि निदानू । को दिनकर कुल भयउ कृसानू ॥

दो०— निरखि राम रुख सचिवसुत कारनु कहेउ बुझाइ ।

सुनि प्रसंगु रहि मूक जिमि दसा बरनि नहिँ जाइ ॥ 54  
राखि न सकइ न कहि सक जाहू । दुहँ भौँति उर दारुन दाहू ॥  
लिखत सुधाकर गा लिखि राहू । बिधि गति बाम सदा सब काहू ॥  
धरम सनेह उभयँ मति घेरी । भइ गति सौँप छुछुंदरि केरी ॥  
राखउँ सुतहि करउँ अनुरोधू । धरमु जाइ अरु बधु बिरोधू ॥  
कहउँ जान बन तौ बड़ि हानी । संकट सोच बिबस भइ रानी ॥  
बहुरि समुझि तिय धरमु सयानी । रामु भरतु दोउ सुत सम जानी ॥  
सरल सुभाउ राम महतारी । बोली बचन धीर धरि भारी ॥  
तात जाउँ बलि कीन्हेहु नीका । पितु आयसु सब धरमक टीका ॥

दो०— राजु देन कहि दीन्ह बनु मोहि न सो दुख लेसु ।

तुम्ह बिनु भरतहि भूपतिहि प्रजहि प्रचंड कलेसु ॥ 55  
जौँ केवल पितु आयसु ताता । तौ जनि जाहु जानि बड़ि माता ॥  
जौँ पितु मातु कहेउ बन जाना । तौ कानन सत अवध समाना ॥  
पितु बनदेव मातु बनदेवी । खग मग चरन सरोरुह सेवी ॥  
अंतहुँ उचित नृपहि बनबासू । बय बिलोकि हियँ होइ हरौँसू ॥  
बड़भागी बनु अवध अभागी । जो रघुबंसतिलक तुम्ह त्यागी ॥  
जौँ सुत कहौँ संग मोहि लेहू । तुम्हरे हृदयँ होइ संदेहू ॥  
पूत परम प्रिय तुम्ह सबही के । प्रान प्रान के जीवन जी के ॥  
त तुम्ह कहहु मातु बन जाऊँ । मैँ सुनि बचन बैठि पछिताऊँ ॥

दो०— यह बिचारि नहिँ करउँ हठ झूठ सनेहु बढाइ ।

मानि मातु कर नात बलि सुरति बिसरि जनि जाइ ॥ 56  
देव पितर सब तुम्हहि गोसाई । राखहुँ पलक नयन की नाई ॥  
अवधि अंबु प्रिय परिजन मीना । तुम्ह करुनाकर धरम धुरीना ॥  
अस बिचारि सोइ करहु उपाई । सबहि जिअत जेहिँ भेंटहु आई ॥  
जाहु सुखेन बनहि बलि जाऊँ । करि अनाथ जन परिजन गाऊँ ॥  
सब कर आजु सुकृत फल बीता । भयउ कराल कालु बिपरीता ॥  
बहुबिधि बिलापि चरन लपटानी । परम अभागिनि आपुहि जानी ॥  
दारुन दुसह दाहु उर ब्यापा । बरनि न जाहिँ बिलाप कलापा ॥  
राम उठाइ मातु उर लाई । कहि मृदु बचन बहुरि समुझाई ॥

दो०— समाचार तेहि समय सुनि सीय उठी अकुलाइ ।

जाइ सासु पद कमल जुग बंदि बैठि सिरु नाइ ॥ 57

दीन्हि असीस सासु मृदु बानी । अति सुकुमारि देखि अकुलानी ॥  
बैठि नमितमुख सोचति सीता । रूप रासि पति प्रेम पुनीता ॥  
चलन चहत बन जीवननाथू । केहि सुकृती सन होइहि साथू ॥  
की तनु प्रान कि केवल प्राना । बिधि करतबु कछु जाइ न जाना ॥  
चारु चरन नख लेखति धरनी । नूपुर मुखर मधुर कबि बरनी ॥  
मनहुँ प्रेम बस बिनती करहीं । हमहि सीय पद जनि परिहरहीं ॥  
मंजु बिलोचन मोचति बारी । बोली देखि राम महतारी ॥  
तात सुनहु सिय अति सुकुमारी । सासु ससुर परिजनहि पिआरी ॥

दो०— पिता जनक भूपाल मनि ससुर भानुकुल भानु ।

पति रबिकुल कैरव बिपिन बिधु गुन रूप निधानु ॥ 58

मैं पुनि पुत्रवधू प्रिय पाई । रूप रासि गुन सील सुहाई ॥  
नयन पुतरि करि प्रीति बढ़ाई । राखेउँ प्रान जानकिहिं लाई ॥  
कलपबेलि जिमि बहुबिधि लाली । सींचि सनेह सलिल प्रतिपाली ॥  
फूलत फलत भयउ बिधि बामा । जानि न जाइ काह परिनामा ॥  
पलंग पीठ तजि गोद हिंडोरा । सियेँ न दीन्ह पगु अवनि कठोरा ॥  
जिअनमूरि जिमि जोगवत रहऊँ । दीप बाति नहिं टारन कहऊँ ॥  
सोइ सिय चलन चहति बन साथ्हा । आयसु काह होइ रघुनाथा ॥  
चंद किरन रस रसिक चकोरी । रबि रुख नयन सकइ किमि जोरी ॥

दो०— करि केहरि निसिचर चरहिं दुष्ट जंतु बन भूरि ।

बिष बाटिकॉ कि सोह सुत सुभग सजीवनि मूरि ॥ 59

बन हित कोल किरात किसोरी । रचीं बिरंचि बिषय सुख भोरी ॥  
पाहन कृमि जिमि कठिन सुभाऊ । तिन्हहि कलेसु न कानन काऊ ॥  
कै तापस तिय कानन जोगू । जिन्ह तप हेतु तजा सब भोगू ॥  
सिय बन बसिहि तात केहि भौंती । चित्रलिखित कपि देखि डेराती ॥  
सुरसर सुभग बनज बन चारी । डाबर जोगु कि हंसकुमारी ॥  
अस बिचारि जस आयसु होई । मैं सिख देउँ जानकिहि सोई ॥  
जौं सिय भवन रहै कह अंबा । मोहि कहँ होइ बहुत अवलंबा ॥  
सुनि रघुबीर मातु प्रिय बानी । सील सनेह सुधौं जनु सानी ॥

दो०— कहि प्रिय बचन बिबेकमय कीन्हि मातु परितोष ।

लगे प्रबोधन जानकिहि प्रगटि बिपिन गुन दोष ॥ 60

मासपारायण, चौदहवाँ विश्राम

मातु समीप कहत सकुचाहीं । बोले समउ समुझि मन माहीं ॥  
राजकुमारि सिखावनु सुनहू । आन भौंति जियेँ जनि कछु गुनहू ॥  
आपन मोर नीक जौं चहहू । बचनु हमार मानि गृह रहहू ॥  
आयसु मोर सासु सेवकाई । सब बिधि भामिनि भवन भलाई ॥  
एहि ते अधिक धरमु नहिं दूजा । सादर सासु ससुर पद पूजा ॥  
जब जब मातु करिहि सुधि भोरी । होइहि प्रेम बिकल मति भोरी ॥  
तब तब तुम्ह कहि कथा पुरानी । सुंदरि समुझाएहु मृदु बानी ॥  
कहउँ सुभार्थ सपथ सत मोही । सुमुखि मातु हित राखउँ तोही ॥

दो०— गुर श्रुति संमत धरम फलु पाइअ बिनहिं कलेस ।

हठ बस सब संकट सहे गालव नहुष नरेस ॥ 61

मैं पुनि करि प्रवान पितु बानी । बेगि फिरब सुनु सुमुखि सयानी ॥  
 दिवस जात नहिं लागिहि बारा । सुंदरि सिखवनु सुनहु हमारा ॥  
 जौं हठ करहु प्रेम बस बामा । तौ तुम्ह दुखु पाउब परिनामा ॥  
 काननु कठिन भयंकरु भारी । घोर घामु हिम बारि बयारी ॥  
 कुस कंटक मग कौंकर नाना । चलब पयादेहिं बिनु पदत्राना ॥  
 चरन कमल मृदु मंजु तुम्हारे । मारग अगम भूमिधर भारे ॥  
 कंदर खोह नदीं नद नारे । अगम अगाध न जाहिं निहारे ॥  
 भालु बाघ बृक केहिरि नागा । करहिं नाद सुनि धीरजु भागा ॥  
 दो०— भूमि सयन बलकल बसन असनु कंद फल मूल ।  
 ते कि सदा सब दिन मिलहिं सबुइ समय अनुकूल ॥ 62  
 नर अहार रजनीचर चरहीं । कपट बेष बिधि कोटिक करहीं ॥  
 लागइ अति पहार कर पानी । बिपिन बिपति नहिं जाइ बखानी ॥  
 ब्याल कराल बिहग बन घोरा । निसिचर निकर नारि नर चोरा ॥  
 डरपहिं धीर गहन सुधि आएँ । मृगलोचनि तुम्ह भीरु सुभाएँ ॥  
 हंसगवनि तुम्ह नहिं बन जोगू । सुनि अपजसु मोहि देइहि लोगू ॥  
 मानस सलिल सुधौं प्रतिपाली । जिअइ कि लवन पयोधि मराली ॥  
 नव रसाल बन बिहरनसीला । सोह कि कोकिल बिपिन करीला ॥  
 रहहु भवन अस हृदय बिचारी । चंदबदनि दुखु कानन भारी ॥  
 दो०— सहज सुहृद गुर स्वामि सिख जो न करइ सिर मानि ।  
 सो पछिताइ अघाइ उर अवसि होइ हित हानि ॥ 63  
 सुनि मृदु बचन मनोहर पिय के । लोचन ललित भरे जल सिय के ॥  
 सीतल सिख दाहक भइ कैसैं । चकइहि सरद चंद निसि जैसैं ॥  
 उतरु न आव बिकल बैदेही । तजन चहत सुचि स्वामि सनेही ॥  
 बरबस रोकि बिलोचन बारी । धरि धीरजु उर अवनिकुमारी ॥  
 लागि सासु पग कह कर जोरी । छमबि देबि बडि अबिनय मोरी ॥  
 दीन्हि प्रानपति मोहि सिख सोई । जेहि बिधि मोर परम हित होई ॥  
 मैं पुनि समुझि दीखि मन माहीं । पिय बियोग सम दुखु जग नाहीं ॥  
 दो०— प्राननाथ करुनायतन सुंदर सुखद सुजान ।  
 तुम्ह बिनु रघुकुल कुमुद बिधु सुरपुर नरक समान ॥ 64  
 मातु पिता भगिनी प्रिय भाई । प्रिय परिवारु सुहृद समुदाई ॥  
 सासु ससुर गुर सजन सहाई । सुत सुंदर सुसील सुखदाई ॥  
 जहँ लगि नाथ नेह अरु नाते । पिय बिनु तियहि तरनिहु ते ताते ॥  
 तनु धनु धामु धरनि पुर राजू । पति बिहीन सबु सोक समाजू ॥  
 भोग रोगसम भूषन भारू । जम जातना सरिस संसारू ॥  
 प्राननाथ तुम्ह बिनु जग माहीं । मो कहूँ सुखद कतहुँ कछु नाहीं ॥  
 जिय बिनु देह नदी बिनु बारी । तैसिअ नाथ पुरुष बिनु नारी ॥  
 नाथ सकल सुख साथ तुम्हारे । सरद बिमल बिधु बदनु निहारे ॥  
 दो०— खग मृग परिजन नगरु बनु बलकल बिमल दुकूल ।  
 नाथ साथ सुरसदन सम परनसाल सुख मूल ॥ 65  
 बनदेबीं बनदेव उदारा । करिहहिं सासु ससुर सम सारा ॥  
 कुस किसलय साथरी सुहाई । प्रभु सँग मंजु मनोज तुराई ॥  
 कंद मूल फल अमिअ अहारू । अवध सौध सत सरिस पहारू ॥  
 छिनु छिनु प्रभु पद कमल बिलोकी । रहिहउँ मुदित दिवस जिमि कोकी ॥  
 बन दुख नाथ कहे बहुतेरे । भय बिषाद परिताप घनेरे ॥

प्रभु बियोग लवलेस समाना । सब मिलि होहिं न कूपानिधाना ॥  
अस जियँ जानि सुजान सिरामनि । लेइअ संग मोहि छाड़िअ जनि ॥  
बिनती बहुत करौं का स्वामी । करुनामय उर अंतरजामी ॥

दो०— राखिअ अवध जो अवधि लगि रहत न जनिअहिं प्रान ।  
दीनबंधु सुंदर सुखद सील सनेह निधान ॥ 66  
मोहि मग चलत न होइहि हारी । छिनु छिनु चरन सरोज निहारी ॥  
सबहि भाँति पिय सेवा करिहौं । मारग जनित सकल श्रम हरिहौं ॥  
पाय पखारि बैठि तरु छाहीं । करिहउँ बाउ मुदित मन माहीं ॥  
श्रम कन सहित स्याम तनु देखें । कहँ दुख समउ प्रानपति पेखें ॥  
सम महि तून तरुपल्लव डासी । पाय पलोटीहि सब निसि दासी ॥  
बार बार मृदु मूरति जोही । लागिहि तात बयारि न मोही ॥  
को प्रभु संग मोहि चितवनिहारा । सिंघबधुहि जिमि ससक सिआरा ॥  
मैं सुकुमारि नाथ बन जोगू । तुम्हहि उचित तप मो कहँ भोगू ॥

दो०— ऐसैउ बचन कठोर सुनि जाँ न हृदउ बिलगान ।  
तौ प्रभु बिषम बियोग दुख सहिहहिं पावँर प्रान ॥ 67  
अस कहि सीय बिकल भइ भारी । बचन बियोगु न सकी सँभारी ॥  
देखि दसा रघुपति जियँ जाना । हठि राखें नहिं राखिहि प्राना ॥  
कहेउ कृपाल भानुकुलनाथा । परिहरि सोचु चलहु बन साथा ॥  
नहिं बिषाद कर अवसरु आजू । बेगि करहु बन गवन समाजू ॥  
कहि प्रिय बचन प्रिया समुझाई । लगे मातु पद आसिष पाई ॥  
बेगि प्रजा दुख मेटब आई । जननी नितुर बिसरि जनि जाई ॥  
फिरिहि दसा बिधि बहुरि कि मोरी । देखिहउँ नयन मनोहर जोरी ॥  
सुदिन सुघरी तात कब होइहि । जननी जिअत बदन बिधु जोइहि ॥

दो०— बहुरि बच्छ कहि लालु कहि रघुपति रघुबर तात ।  
कबहिं बोलाइ लगाइ हियँ हरषि निरखिहउँ गात ॥ 68  
लखि सनेह कातरि महतारी । बचनु न आव बिकल भइ भारी ॥  
राम प्रबोधु कीन्ह बिधि नाना । समउ सनेहु न जाइ बखाना ॥  
तब जानकी सासु पग लागी । सुनिअ माय मैं परम अभागी ॥  
सेवा समय दैअँ बनु दीन्हा । मोर मनोरथु सफल न कीन्हा ॥  
तजब छोभु जनि छाड़िअ छोहू । करमु कठिन कछु दोसु न मोहू ॥  
सुनि सिय बचन सासु अकुलानी । दसा कवनि बिधि कहौं बखानी ॥  
बारहिं बार लाइ उर लीन्ही । धरि धीरजु सिख आसिष दीन्ही ॥  
अचल होउ अहिवातु तुम्हारा । जब लगि गंग जमुन जल धारा ॥

दो०— सीतहि सासु असीस सिख दीन्हि अनेक प्रकार ।  
चली नाइ पद पदुम सिरु अति हित बारहिं बार ॥ 69  
समाचार जब लछिमन पाए । ब्याकुल बिलख बदन उठि धाए ॥  
कंप पुलक तन नयन सनीरा । गहे चरन अति प्रेम अधीरा ॥  
कहि न सकत कछु चितवत ठाढ़े । मीनु दीन जनु जल तें काढ़े ॥  
सोचु हृदयँ बिधि का होनिहारा । सबु सुखु सुकृतु सिरान हमारा ॥  
मो कहँ काह कहब रघुनाथा । रखिहहि भवन कि लेहहिं साथा ॥  
राम बिलोकि बंधु कर जोरें । देह गेह सब सन तूनु तोरें ॥  
बोले बचनु राम नय नागर । सील सनेह सरल सुख सागर ॥  
तात प्रेम बस जनि कदराहू । समुझि हृदयँ परिनाम उछाहू ॥

दो०— मातु पिता गुरु स्वामि सिख सिर धरि करहिं सुभायें ।  
 लहेउ लाभु तिन्ह जनम कर नतरु जनमु जग जायें ॥ 70  
 अस जियें जानि सुनहु सिख भाई । करहु मातु पितु पद सेवकाई ॥  
 भवन भरतु रिपुसूदनु नाही । राउ बृद्ध मम दुखु मन माहीं ॥  
 मैं बन जाउँ तुम्हहि लेइ साथी । होइ सबहि बिधि अवध अनाथा ॥  
 गुरु पितु मातु प्रजा परिवारु । सब कहूँ परइ दुसह दुख भारु ॥  
 रहहु करहु सब कर परितोषू । नतरु तात होइहि बड़ दोषू ॥  
 जासु राज प्रिय प्रजा दुखारी । सो नृपु अवसि नरक अधिकारी ॥  
 रहहु तात असि नीति बिचारी । सुनत लखनु भए ब्याकुल भारी ॥  
 सिअरें बचन सूखि गए कैसें । परसत तुहिन तामरसु जैसें ॥

दो०— उतरु न आवत प्रेम बस गहे चरन अकुलाइ ।  
 नाथ दासु मैं स्वामि तुम्ह तजहु त काह बसाइ ॥ 71  
 दीन्हि मोहि सिख नीकि गोसाई । लागि अगम अपनी कदराई ॥  
 नरबर धीर धरम धुर धारी । निगम नीति कहूँ ते अधिकारी ॥  
 मैं सिसु प्रभु सनेहें प्रतिपाला । मंदरु मेरु कि लेहिं मराला ॥  
 गुर पितु मातु न जानउँ काहू । कहउँ सुभाउ नाथ पतिआहू ॥  
 जहें लागि जगत सनेह सगाई । प्रीति प्रतीति निगम निजु गाई ॥  
 मोरे सबइ एक तुम्ह स्वामी । दीनबंधु उर अंतरजामी ॥  
 धरम नीति उपदेसिअ ताही । कीरति भूति सुगति प्रिय जाही ॥  
 मन कम बचन चरन रत होई । कृपासिंधु परिहरिअ कि सोई ॥

दो०— करुनासिंधु सुबंधु क सुनि मृदु बचन बिनीत ।  
 समुझाए उर लाइ प्रभु जानि सनेहें समीत ॥ 72  
 मागहु बिदा मातु सन जाई । आवहु बेगि चलहु बन भाई ॥  
 मुदित भए सुनि रघुबर बानी । भयउ लाभ बड़ गइ बड़ि हानी ॥  
 हरषित हृदयें मातु पहि आए । मनहुँ अंध फिरि लोचन पाए ॥  
 जाइ जननि पग नायउ माथा । मनु रघुनंदन जानकि साथी ॥  
 पूँछे मातु मलिन मन देखी । लखन कही सब कथा बिसेषी ॥  
 गई सहमि सुनि बचन कठोरा । मृगी देखि दव जनु चहु ओरा ॥  
 लखन लखेउ भा अनरथ आजू । एहिं सनेह बस करब अकाजू ॥  
 मागत बिदा सभय सकुचाहीं । जाइ संग बिधि कहिहि कि नाहीं ॥

दो०— समुझि सुमित्राँ राम सिय रूपु सुसीलु सुभाउ ।  
 नृप सनेहु लखि धुनेउ सिरु पापिनि दीन्ह कृदाउ ॥ 73  
 धीरजु धरेउ कुअवसर जानी । सहज सुहृद बोली मृदु बानी ॥  
 तात तुम्हारि मातु बैदेही । पिता रामु सब भौंति सनेही ॥  
 अवध तहाँ जहें राम निवासू । तहँई दिवसु जहें भानु प्रकासू ॥  
 जाँ पै सीय रामु बन जाहीं । अवध तुम्हार काजु कछु नाहीं ॥  
 गुर पितु मातु बंधु सुर साई । सेइअहिं सकल प्रान की नाई ॥  
 रामु प्रानप्रिय जीवन जी के । स्वारथ रहित सखा सबही के ॥  
 पूजनीय प्रिय परम जहाँ ते । सब मानिअहिं राम के नातें ॥  
 अस जियें जानि संग बन जाहू । लेहु तात जग जीवन लाहू ॥

दो०— भूरि भाग भाजनु भयहु मोहि समेत बलि जाउँ ।  
 जाँ तुम्हरें मन छाड़ि छलु कीन्ह राम पद ठाउँ ॥ 74  
 पुत्रवती जुबती जग सोई । रघुपति भगतु जासु सुतु होई ॥  
 नतरु बाँझ भलि बादि बिआनी । राम बिमुख सुत तें हित जानी ॥

तुम्हरेहिं भाग रामु बन जाहीं । दूसर हेतु तात कछु नाही ॥  
सकल सुकृत कर बड़ फलु एहू । राम सीय पद सहज सनेहू ॥  
रागु रोषु इरिषा मदु मोहू । जनि सपनेहुँ इन्ह के बस होहू ॥  
सकल प्रकार बिकार बिहाई । मन कम बचन करेहु सेवकाई ॥  
तुम्ह कहूँ बन सब भौंति सुपासू । सँग पितु मातु रामु सिय जासू ॥  
जेहिं न रामु बन लहहिं कलेसू । सुत सोइ करेहु इहइ उपदेसू ॥

छं०— उपदेसु यहु जेहिं तात तुम्हरे राम सिय सुख पावहीं ।  
पितु मातु प्रिय परिवार पुर सुख सुरति बन बिसरावहीं ॥  
तुलसी प्रभुहि सिख देइ आयसु दीन्ह पुनि आसिष दर्ई ।  
रति होउ अबिरल अमल सिय रघुबीर पद नित नित नई ॥

सो०— मातु चरन सिरु नाइ चले तुरत संकित हृदयें ।  
बागुर बिषम तोराइ मनहुँ भाग मृगु भाग बस ॥ 75  
गए लखनु जहँ जानकिनाथू । भे मन मुदित पाइ प्रिय साथू ॥  
बंदि राम सिय चरन सुहाए । चले संग नृपमंदिर आए ॥  
कहहिं परसपर पुर नर नारी । भलि बनाइ बिधि बात बिगारी ॥  
तन कृस मन दुखु बदन मलीने । बिकल मनहुँ माखी मधु छीने ॥  
कर मीजहिं सिरु धुनि पछिताहीं । जनु बिनु पंख बिहग अकुलाहीं ॥  
भइ बड़ि भीर भूप दरबारा । बरनि न जाइ बिषादु अपारा ॥  
सचिवें उठाइ राउ बैठारे । कहि प्रिय बचन रामु पगु धारे ॥  
सिय समेत दोउ तनय निहारी । ब्याकुल भयउ भूमिपति भारी ॥

दो०— सीय सहित सुत सुभग दोउ देखि देखि अकुलाइ ।  
बारहिं बार सनेह बस राउ लेइ उर लाइ ॥ 76  
सकइ न बोलि बिकल नरनाहू । सोक जनित उर दारुन दाहू ॥  
नाइ सीसु पद अति अनुरागा । उठि रघुबीर बिदा तब मागा ॥  
पितु असीस आयसु मोहि दीजै । हरष समय बिसमउ कत कीजै ॥  
तात किऐँ प्रिय प्रेम प्रमादू । जसु जग जाइ होइ अपबादू ॥  
सुनि सनेह बस उठि नरनाहौं । बैठारे रघुपति गहि बाहौं ॥  
सुनहु तात तुम्ह कहूँ मुनि कहहीं । रामु चराचर नायक अहहीं ॥  
सुभ अरु असुभ करम अनुहारी । ईसु देइ फलु हृदयें बिचारी ॥  
करइ जो करम पाव फल सोई । निगम नीति असि कह सबु कोई ॥

दो०— औरु करै अपराधु कोउ और पाव फल भोगु ।  
अति बिचित्र भगवंत गति को जग जानै जोगु ॥ 77  
रायें राम राखन हित लागी । बहत उपाय किए छलु त्यागी ॥  
लखी राम रुख रहत न जाने । धरम धुरंधर धीर सयाने ॥  
तब नृप सीय लाइ उर लीन्ही । अति हित बहुत भौंति सिख दीन्ही ॥  
कहि बन के दुख दुसह सुनाए । सासु ससुर पितु सुख समुझाए ॥  
सिय मनु राम चरन अनुरागा । घरु न सुगमु बनु बिषमु न लागा ॥  
औरउ सबहिं सीय समुझाई । कहि कहि बिपिन बिपति अधिकाई ॥  
सचिव नारि गुर नारि सयानी । सहित सनेह कहहिं मृदु बानी ॥  
तुम्ह कहूँ तौ न दीन्ह बनबासू । करहु जो कहहिं ससुर गुर सासू ॥

दो०— सिख सीतलि हित मधुर मृदु सुनि सीतहि न सोहानि ।  
सरद चंद चंदिनि लगत जनु चकई अकुलानि ॥ 78  
सीय सकुच बस उतरु न देई । सो सुनि तमकि उठी कैकेई ॥  
मुनि पट भूषन भाजन आनी । आगें धरि बोली मृदु बानी ॥

नृपहि प्रानप्रिय तुम्ह रघुबीरा । सील सनेह न छाड़िहि भीरा ॥  
 सुकृतु सुजसु परलोकु नसाऊ । तुम्हहि जान बन कहिहि न काऊ ॥  
 अस बिचारि सोइ करहु जो भावा । राम जननि सिख सुनि सुखु पावा ॥  
 भूपहि बचन बानसम लागे । करहिं न प्रान पयान अभागे ॥  
 लोग बिकल मुरुछित नरनाहू । काह करिअ कछु सूझ न काहू ॥  
 रामु तुरत मुनि बेषु बनाई । चले जनक जननिहि सिरु नाई ॥  
 दो०— सजि बन साजु समाजु सबु बनिता बंध समेत ।

बंदि बिप्र गुर चरन प्रभु चले करि सबहि अचेत ॥ 79  
 निकसि बसिष्ठ द्वार भए ठाढ़े । देखे लोग बिरह दव दाढ़े ॥  
 कहि प्रिय बचन सकल समुझाए । बिप्र बृंद रघुबीर बोलाए ॥  
 गुर सन कहि बरषासन दीन्हे । आदर दान बिनय बस कीन्हे ॥  
 जाचक दान मान संतोषे । मीत पुनीत पम परितोषे ॥  
 दासीं दास बोलाइ बहोरी । गुरहि सौंपि बोले कर जोरी ॥  
 सब कै सार सँभार गोसाईं । करबि जनक जननी की नाई ॥  
 बारहिं बार जोरि जुग पानी । कहत रामु सब सन मुदु बानी ॥  
 सोइ सब भौंति मोर हितकारी । जेहि तैं रहै भुआल सुखारी ॥  
 दो०— मात सकल मोरे बिरहें जेहिं न होहिं दुख दीन ।

सोइ उपाउ तुम्ह करेहु सब पुर जन परम प्रबीन ॥ 80  
 एहि बिधि राम सबहि समुझावा । गुर पद पदुम हरषि सिरु नावा ॥  
 गनपति गौरि गिरीसु मनाई । चले असीस पाइ रघुराई ॥  
 राम चलत अति भयउ बिषादू । सुनि न जाइ पुर आरत नादू ॥  
 कुसगुन लंक अवध अति सोकू । हरष बिषाद बिबस सुरलोकू ॥  
 गइ मुरुछा तब भूपति जागे । बोलि सुमंत्रु कहन अस लागे ॥  
 रामु चले बन प्रान न जाहीं । केहि सुख लागि रहत तन माहीं ॥  
 एहि तैं कवन ब्यथा बलवाना । जो दुखु पाइ तजहिं तनु प्राणा ॥  
 पुनि धरि धीर कहइ नरनाहू । लै रथु संग सखा तुम्ह जाहू ॥

दो०— सुठि सुकुमार कुमार दोउ जनकसुता सुकुमारि ।  
 रथ चढाइ देखराइ बनु फिरेहु गएँ दिन चारि ॥ 81  
 जौं नहिं फिरहिं धीर दोउ भाई । सत्यसंध दृढ़ब्रत रघुराई ॥  
 तौ तुम्ह बिनय करेहु कर जोरी । फेरिअ प्रभु मिथिलेसकिसारी ॥  
 जब सिय कानन देखि डेराई । कहेहु मोरि सिख अवसरु पाई ॥  
 सासु ससुर अस कहेउ सँदेसू । पुत्रि फिरिअ बन बहुत कलेसू ॥  
 पितुगृह कबहुँ कबहुँ ससुरारी । रहेहु जहाँ रुचि होइ तुम्हारी ॥  
 एहि बिधि करेहु उपाय कदंबा । फिरइ त होइ प्रान अवलंबा ॥  
 नाहिं त मोर मरन परिनामा । कछु न बसाइ भएँ बिधि बामा ॥  
 अस कहि मुरुछि परा महि राऊ । रामु लखन सिय आनि देखाऊ ॥

दो०— पाइ रजायसु नाइ सिरु रथु अति बेग बनाइ ।  
 गयउ जहाँ बाहेर नगर सीय सहित दोउ भाइ ॥ 82  
 तब सुमंत्र नृप बचन सुनाए । करि बिनती रथ रामु चढाए ॥  
 चढ़ि रथ सीय सहित दोउ भाई । चले हृदयँ अवधहि सिरु नाई ॥  
 चलत रामु लखि अवध अनाथा । बिकल लोग सब लागे साथ्था ॥  
 कृपासिंधु बहुबिधि समुझावहिं । फिरहिं प्रेम बस पुनि फिरि आवहिं ॥  
 लागति अवध भयावनि भारी । मानहुँ कालराति अँधिआरी ॥  
 घोर जंतु सम पुर नर नारी । डरपहिं एकहि एक निहारी ॥

घर मसान परिजन जनु भूता । सुत हित मीत मनहुँ जमदूता ॥  
 बागन्ह बिटप बेलि कुम्हिलाहीं । सरित सरोवर देखि न जाहीं ॥  
 दो०— हय गय कोटिन्ह केलिमृग पुरपसु चातक मोर ।  
 पिक रथांग सुक सारिका सारस हंस चकोर ॥ 83  
 राम बियोग बिकल सब ठाढ़े । जहँ तहँ मनहुँ चित्र लिखि काढ़े ॥  
 नगरु सफल बनू गहबर भारी । खग मृग बिपुल सकल नर नारी ॥  
 बिधि कैकई किरातिनि कीन्ही । जेहिं दव दुसह दसहुँ दिसि दीन्ही ॥  
 सहि न सके रघुबर बिरहागी । चले लोग सब ब्याकुल भागी ॥  
 सबहिं बिचारु कीन्ह मन माहीं । राम लखन सिय बिनु सुखु नाहीं ॥  
 जहाँ रामु तहँ सबुइ समाजू । बिनु रघुबीर अवध नहिं काजू ॥  
 चले साथ अस मंत्रु दृढ़ाई । सुर दुर्लभ सुख सदन बिहाई ॥  
 राम चरन पंकज प्रिय जिन्हही । बिषय भोग बस करहिं कि तिन्हही ॥  
 दो०— बालक बृद्ध बिहाइ गृहँ लगे लोग सब साथ ।  
 तमसा तीर निवासु किय प्रथम दिवस रघुनाथ ॥ 84  
 रघुपति प्रजा प्रेमबस देखी । सदय हृदयँ दुखु भयउ बिसेषी ॥  
 करुनामय रघुनाथ गोसॉई । बेगि पाइअहिं पीर पराई ॥  
 कहि सप्रेम मृदु बचन सुहाए । बहुबिधि राम लोग समुझाए ॥  
 किए धरम उपदेस घनेरे । लोग प्रेम बस फिरहिं न फेरे ॥  
 सील सनेहु छाड़ि नहिं जाई । असमंजस बस भे रघुराई ॥  
 लोग सोग श्रम बस गए सोई । कछुक देवमायों मति मोई ॥  
 जबहिं जाम जुग जामिनि बीती । राम सचिव सन कहेउ सप्रीती ॥  
 खोज मारि रथु हॉकहु ताता । आन उपायँ बनिहि नहिं बाता ॥  
 दो०— राम लखन सिय जान चढ़ि संभु चरन सिरु नाइ ।  
 सचिवँ चलायउ तुरत रथु इत उत खोज दुराई ॥ 85  
 जागे सकल लोग भएँ भोरु । गे रघुनाथ भयउ अति सोरु ॥  
 रथ कर खोज कतहुँ नहिं पावहिं । राम राम कहि चहु दिसि धावहिं ॥  
 मनहुँ बारिनिधि बूड़ जहाजू । भयउ बिकल बड़ बनिक समाजू ॥  
 एकहि एक देहि उपदेसू । तजे राम हम जानि कलेसू ॥  
 निंदहिं आपु सराहहिं मीना । धिग जीवनु रघुबीर बिहीना ॥  
 जौँ पै प्रिय बियोगु बिधि कीन्हा । तौँ कस मरनु न मार्गे दीन्हा ॥  
 एहि बिधि करत प्रलाप कलापा । आए अवध भरे परितापा ॥  
 बिषम बियोगु न जाइ बखाना । अवधि आस सब राखहिं प्राणा ॥  
 दो०— राम दरस हित नेम ब्रत लगे करन नर नारि ।  
 मनहुँ कोक कोकी कमल दीन बिहीन तमारि ॥ 86  
 सीता सचिव सहित दोउ भाई । सुंगबेरपुर पहुँचे जाई ॥  
 उतरे राम देवसरि देखी । कीन्ह दंडवत हरषु बिसेषी ॥  
 लखन सचिवँ सियँ किए प्रनामा । सबहि सहित सुखु पायउ रामा ॥  
 गंग सकल मुद मंगल मूला । सब सुख करनि हरनि सब सूला ॥  
 कहि कहि कोटिक कथा प्रसंगा । रामु बिलोकहिं गंग तरंगा ॥  
 सचिवहि अनुजहि प्रियहि सुनाई । बिबुध नदी महिमा अधिकाई ॥  
 मज्जनु कीन्ह पंथ श्रम गयऊ । सुचि जलु पिअत मुदित मन भयऊ ॥  
 सुमिरत जाहि मिटइ श्रम भारु । तेहि श्रम यह लौकिक ब्यवहारु ॥  
 दो०— सुद्ध सच्चिदानंदमय कंद भानुकूल केतु ।  
 चरित करत नर अनुहरत संसृति सागर सेतु ॥ 87

यह सुधि गुहें निषाद जब पाई । मुदित लिए प्रिय बंधु बोलाई ॥  
 लिए फल मूल भेंट भरि भारा । मिलन चलेउ हियँ हरषु अपारा ॥  
 करि दंडवत भेंट धरि आगें । प्रभुहि बिलोकत अति अनुरागें ॥  
 सहज सनेह बिबस रघुराई । पूँछी कुसल निकट बैठाई ॥  
 नाथ कुसल पद पंकज देखें । भयउँ भागभाजन जन लेखें ॥  
 देव धरनि धनु धामु तुम्हारा । मैं जनु नीचु सहित परिवारा ॥  
 कृपा करिअ पुर धारिअ पाऊ । थापिअ जनु सबु लोगु सिहाऊ ॥  
 कहेहु सत्य सबु सखा सुजाना । मोहि दीन्ह पितु आयसु आना ॥  
 दो०— बरष चारिदस बासु बन मुनि ब्रत बेषु अहारु ।

ग्राम बासु नहिँ उचित सुनि गुहहि भयउ दुखु भारु ॥ 88  
 राम लखन सिय रूप निहारी । कहहिँ सप्रेम ग्राम नर नारी ॥  
 ते पितु मातु कहहु सखि कैसे । जिन्ह पठए बन बालक ऐसे ॥  
 एक कहहिँ भल भूपति कीन्हा । लोयन लाहु हमहि बिधि दीन्हा ॥  
 तब निषादपति उर अनुमाना । तरु सिंसुपा मनोहर जाना ॥  
 लै रघुनाथहि ठाउँ देखावा । कहेउ राम सब भौँति सुहावा ॥  
 पुरजन करि जोहारु घर आए । रघुबर संध्या करन सिधाए ॥  
 गुहें सँवारि सौँथरी डसाई । कुस किसलयमय मृदुल सुहाई ॥  
 सुचि फल मूल मधुर मृदु जानी । दोना भरि भरि राखेसि पानी ॥

दो०— सिय सुमंत्र भ्राता सहित कंद मूल फल खाइ ।  
 सयन कीन्ह रघुबंसमनि पाय पलोत्त भाइ ॥ 89  
 उठे लखनु प्रभु सोवत जानी । कहि सचिवहि सोवन मृदु बानी ॥  
 कछुक दूरि सजि बान सरासन । जागन लगे बैठि बीरासन ॥  
 गुहें बोलाई पाहरू प्रतीती । ठावें ठावें राखे अति प्रीती ॥  
 आपु लखन पहिँ बैठेउ जाई । कटि भाथी सर चाप चढ़ाई ॥  
 सोवत प्रभुहि निहारि निषादू । भयउ प्रेम बस हृदयें बिषादू ॥  
 तनु पुलकित जलु लोचन बहई । बचन सप्रेम लखन सन कहई ॥  
 भूपति भवन सुभार्ये सुहावा । सुरपति सदन न पटतर पावा ॥  
 मनिमय रचित चारु चौबारे । जनु रतिपति निज हाथ सँवारे ॥

दो०— सुचि सुबिचित्र सुभोगमय सुमन सुगंध सुबास ।  
 पलँग मंजु मनिदीप जहँ सब बिधि सकल सुपास ॥ 90  
 बिबिध बसन उपधान तुराई । छीर फेन मृदु बिसद सुहाई ॥  
 तहँ सिय रामु सयन निसि करहीं । निज छबि रति मनोज मदु हरहीं ॥  
 ते सिय रामु साथरीं सोए । श्रमित बसन बिनु जाहिँ न जोए ॥  
 मातु पिता परिजन पुरबासी । सखा सुसील दास अरु दासी ॥  
 जोगवहिँ जिन्हहि प्रान की नाई । महि सोवत तेइ राम गोसाई ॥  
 पिता जनक जग बिदित प्रभाऊ । ससुर सुरेस सखा रघुराऊ ॥  
 रामचंदु पति सो बैदेही । सोवत महि बिधि बाम न केही ॥  
 सिय रघुबीर कि कानन जोगू । करम प्रधान सत्य कह लोगू ॥

दो०— कैकयनंदिनि मंदमति कठिन कुटिलपनु कीन्ह ।  
 जेहिँ रघुनंदन जानकिहि सुख अवसर दुखु दीन्ह ॥ 91  
 भइ दिनकर कुल बिटप कुठारी । कुमति कीन्ह सब बिस्व दुखारी ॥  
 भयउ बिषादु निषादहि भारी । राम सीय महि सयन निहारी ॥  
 बोले लखन मधुर मृदु बानी । ग्यान बिराग भगति रस सानी ॥  
 काहु न कोउ सुख दुख कर दाता । निज कृत करम भोग सबु भ्राता ॥

जोग बियोग भोग भल मंदा । हित अनहित मध्यम भ्रम फंदा ॥  
जनमु मरनु जहँ लगि जग जालू । संपति बिपति करमु अरु कालू ॥  
धरनि धामु धनु पुर परिवारू । सरगु नरकु जहँ लगि ब्यवहारू ॥  
देखिअ सुनिअ गुनिअ मन माहीं । मोह मूल परमारथु नाहीं ॥  
दो०— सपनें होइ भिखारि नृपु रंकु नाकपति होइ ।

जागें लाभु न हानि कछु तिमि प्रपंच जियँ जोइ ॥ 92  
अस बिचारि नहिं कीजिअ रोसू । काहुहि बादि न देइअ दोसू ॥  
मोह निसाँ सबु सोवनिहारा । देखिअ सपन अनेक प्रकारा ॥  
एहिं जग जामिनि जागहिं जोगी । परमारथी प्रपंच बियोगी ॥  
जानिअ तबहिं जीव जग जागा । जब सब बिषय बिलास बिरागा ॥  
होइ बिबेकु मोह भ्रम भागा । तब रघुनाथ चरन अनुरागा ॥  
सखा परम परमारथु एहू । मन कम बचन राम पद नेहू ॥  
राम ब्रह्म परमारथ रूपा । अबिगत अलख अनादि अनूपा ॥  
सकल बिकार रहित गतभेदा । कहि नित नेति निरूपहि बेदा ॥

दो०— भगत भूमि भूसुर सुरभि सुर हित लागि कृपाल ।  
करत चरित धरि मनुज तनु सुनत मिटहिं जग जाल ॥ 93

मासपारायण, पंद्रहवाँ विश्राम

सखा समुझि अस परिहरि मोहू । सिय रघुबीर चरन रत होहू ॥  
कहत राम गुन भा भिनुसारा । जागे जग मंगल सुखदारा ॥  
सकल सौच करि राम नहावा । सुचि सुजान बट छीर मगावा ॥  
अनुज सहित सिर जटा बनाए । देखि सुमंत्र नयन जल छाए ॥  
हृदयँ दाहु अति बदन मलीना । कह कर जोरि बचन अति दीना ॥  
नाथ कहेउ अस कोसलनाथा । लै रथु जाहु राम केँ साथा ॥  
बनु देखाइ सुरसरि अन्हवाई । आनेहु फेरि बेगि दोउ भाई ॥  
लखनु रामु सिय आनेहु फेरी । संसय सकल सँकोच निबेरी ॥  
दो०— नृप अस कहेउ गोसाईँ जस कहइ करौँ बलि सोइ ।

करि बिनती पायन्ह परेउ दीन्ह बाल जिमि रोइ ॥ 94  
तात कृपा करि कीजिअ सोई । जातें अवध अनाथ न होई ॥  
मंत्रिहि राम उठाइ प्रबोधा । तात धरम मतु तुम्ह सबु सोधा ॥  
सिबि दधीच हरिचंद नरेसा । सहे धरम हित कोटि कलेसा ॥  
रंतिदेव बलि भूप सुजाना । धरमु धरेउ सहि संकट नाना ॥  
धरमु न दूसर सत्य समाना । आगम निगम पुरान बखाना ॥  
मैं सोइ धरमु सुलभ करि पावा । तजें तिहूँ पुर अपजसु छावा ॥  
संभावित कहूँ अपजस लाहू । मरन कोटि सम दारुन दाहू ॥  
तुम्ह सन तात बहुत का कहऊँ । दिऐँ उतरु फिरि पातकु लहऊँ ॥

दो०— पितु पद गहि कहि कोटि नति बिनय करब कर जोरि ।

चिंता कवनिहु बात कै तात करिअ जनि मोरि ॥ 95  
तुम्ह पुनि पितु सम अति हित मोरें । बिनती करउँ तात कर जोरें ॥  
सब बिधि सोइ करतब्य तुम्हारें । दुख न पाव पितु सोच हमारें ॥  
सुनि रघुनाथ सचिव संबादू । भयउ सपरिजन बिकल निषादू ॥  
पुनि कछु लखन कही कटु बानी । प्रभु बरजे बड़ अनुचित जानी ॥  
कह सुमंत्रु पुनि भूप सँदेसू । सहि न सकिहि सिय बिपिन कलेसू ॥  
जेहि बिधि अवध आव फिरि सीया । सोइ रघुबरहि तुम्हहि करनीया ॥

नतरु निपट अवलंब बिहीना । मैं न जिअब जिमि जल बिनु मीना ॥  
दो०— मइकेँ ससुरें सकल सुख जबहिं जहाँ मनु मान ।

तहें तब रहिहि सुखेन सिय जब लागि बिपति बिहान ॥ 96  
बिनती भूप कीन्ह जेहि भौंती । आरति प्रीति न सो कहि जाती ॥  
पितु सँदेसु सुनि कृपानिधाना । सियहि दीन्ह सिख कोटि बिधाना ॥  
सासु ससुर गुर प्रिय परिवारु । फिरहु त सब कर मिटै खभारु ॥  
सुनि पति बचन कहति बैदेही । सुनहु प्रानपति परम सनेही ॥  
प्रभु करुनामय परम बिबेकी । तनु तजि रहति छौंह किमि छेंकी ॥  
प्रभा जाइ कहें भानु बिहाई । कहें चंद्रिका चंदु तजि जाई ॥  
पतिहि प्रेममय बिनय सुनाई । कहति सचिव सन गिरा सुहाई ॥  
तुम्ह पितु ससुर सरिस हितकारी । उतरु देउँ फिरि अनुचित भारी ॥  
दो०— आरति बस सनमुख भइउँ बिलगु न मानब तात ।

आरजसुत पद कमल बिनु बादि जहाँ लागि नात ॥ 97  
पितु बैभव बिलास मैं डीठा । नृप मनि मुकुट मिलित पद पीठा ॥  
सुखनिधान अस पितु गृह मोरें । पिय बिहीन मन भाव न भोरें ॥  
ससुर चक्कवइ कोसलराऊ । भुवन चारिदस प्रगट प्रभाऊ ॥  
आगें होइ जेहि सुरपति लेई । अरघ सिंघासन आसनु देई ॥  
ससुर एतादस अवध निवासू । प्रिय परिवारु मातु सम सासू ॥  
बिनु रघुपति पद पदुम परागा । मोहि केउ सपनेहुँ सुखद न लागा ॥  
अगम पंथ बनभूमि पहारा । करि केहरि सर सरित अपारा ॥  
कोल किरात कुरंग बिहंगा । मोहि सब सुखद प्रानप्रति संग्गा ॥

दो०— सासु ससुर सन मोरि हुँति बिनय करबि परि पायें ।  
मोर सोचु जनि करिअ कछु मैं बन सुखी सुभायें ॥ 98  
प्राननाथ प्रिय देवर साथ्था । बीर धुरीन धरें धनु भाथा ॥  
नहिं मग श्रमु भ्रमु दुख मन मोरें । मोहि लागि सोचु करिअ जनि भोरें ॥  
सुनि सुमंत्रु सिय सीतलि बानी । भयउ बिकल जनु फनि मनि हानी ॥  
नयन सूझ नहिं सुनइ न काना । कहि न सकइ कछु अति अकुलाना ॥  
राम प्रबोधु कीन्ह बहु भौंती । तदपि होति नहिं सीतलि छाती ॥  
जतन अनेक साथ् हित कीन्हे । उचित उतर रघुनंदन दीन्हे ॥  
मेटि जाइ नहिं राम रजाई । कठिन करम गति कछु न बसाई ॥  
राम लखन सिय पद सिरु नाई । फिरेउ बनिक जिमि मूर गवाँई ॥

दो०— रथु हौंकेउ हय राम तन हेरि हेरि हिहिनाहिं ।  
देखि निषाद बिषादबस धुनहिं सीस पछिताहिं ॥ 99  
जासु बियोग बिकल पसु ऐसैं । प्रजा मातु पितु जिइहहिं कैसैं ॥  
बरबस राम सुमंत्रु पठाए । सुरसरि तीर आपु तब आए ॥  
मागी नाव न केवटु आना । कहइ तुम्हार मरमु मैं जाना ॥  
चरन कमल रज कहुँ सबु कहई । मानुष करनि मूरि कछु अहई ॥  
छुअत सिला भइ नारि सुहाई । पाहन तें न काठ कठिनाई ॥  
तरनिउ मुनि घरिनी होइ जाई । बाट परइ मोरि नाव उड़ाई ॥  
एहिं प्रतिपालउँ सबु परिवारु । नहिं जानउँ कछु अउर कबारु ॥  
जौं प्रभु पार अवसि गा चहहू । मोहि पद पदुम पखारन कहहू ॥

छं०— पद कमल धोइ चढ़ाइ नाव न नाथ उतराई चहौं ।  
मोहि राम राउरि आन दसरथ सपथ सब साची कहौं ॥  
बरु तीर मारहुँ लखनु पै जब लागि न पाय पखारिहौं ।

तब लगि न तुलसीदास नाथ कृपाल पारु उतारिहौं ॥  
 सो०— सुनि केवट के बैन प्रेम लपेटे अटपटे ।  
 बिहसे करुनाऐन चितइ जानकी लखन तन ॥ 100  
 कृपासिंधु बोले मुसुकाई । सोइ करु जेहिं तव नाव ना जाई ॥  
 बेगि आनु जल पाय पखारु । होत बिलंबु उतारहि पारु ॥  
 जासु नाम सुभिरत एक बारा । उतरहिं नर भवसिंधु अपारा ॥  
 सोइ कृपालु केवटहि निहोरा । जेहिं जगु किय तिहु पगहु ते थोरा ॥  
 पद नख निरखि देवसरि हरषी । सुनि प्रभु बचन मोहें मति करषी ॥  
 केवट राम रजायसु पावा । पानि कठवता भरि लेइ आवा ॥  
 अति आनंद उमगि अनुरागा । चरन सरोज पखारन लागा ॥  
 बरषि सुमन सुर सकल सिहाहीं । एहि सम पुन्यपुंज कोउ नाही ॥

दो०— पद पखारि जलु पान करि आपु सहित परिवार ।  
 पितर पारु करि प्रभुहि पुनि मुदित गयउ लेइ पार ॥ 101  
 उतरि ठाढ़ भए सुरसरि रेता । सीय रामु गुह लखन समेता ॥  
 केवट उतरि दंडवत कीन्हा । प्रभुहि सकुच एहि नहिं कछु दीन्हा ॥  
 पिय हिय की सिय जाननिहारी । मनि मुदरी मन मुदित उतारी ॥  
 कहेउ कृपाल लेहि उतराई । केवट चरन गहे अकुलाई ॥  
 नाथ आजु मैं काह न पावा । मिटे दोष दुख दारिद दावा ॥  
 बहुत काल मैं कीन्हि मजूरी । आजु दीन्ह बिधि बनि भलि भूरी ॥  
 अब कछु नाथ न चाहिअ मोरें । दीनदयाल अनुग्रह तारें ॥  
 फिरती बार मोहि जो देबा । सो प्रसादु मैं सिर धरि लेबा ॥

दो०— बहुत कीन्ह प्रभु लखन सियें नहिं कछु केवटु लेइ ।  
 बिदा कीन्ह करुनायतन भगति बिमल बरु देइ ॥ 102  
 तब मज्जनु करि रघुकुलनाथा । पूजि पारथिव नायउ माथा ॥  
 सियें सुरसरिहि कहेउ कर जोरी । मातु मनोरथ पुरउबि मोरी ॥  
 पति देवर सँग कुसल बहोरी । आइ करौं जेहिं पूजा तोरी ॥  
 सुनि सिय बिनय प्रेम रस सानी । भइ तब बिमल बारि बर बानी ॥  
 सुनु रघुबीर प्रिया बैदेही । तव प्रभाउ जग बिदित न केही ॥  
 लोकप होहिं बिलोकत तोरें । तोहि सेवहिं सब सिधि कर जोरें ॥  
 तुम्ह जो हमहि बड़ि बिनय सुनाई । कृपा कीन्हि मोहि दीन्हि बड़ाई ॥  
 तदपि देबि मैं देबि असीसा । सफल होन हित निज बागीसा ॥

दो०— प्राननाथ देवर सहित कुसल कोसला आइ ।  
 पूजिहि सब मनकामना सुजसु रहिहि जग छाइ ॥ 103  
 गंग बचन सुनि मंगल मूला । मुदित सीय सुरसरि अनुकूला ॥  
 तब प्रभु गुहहि कहेउ घर जाहू । सुनत सूख मुखु भा उर दाहू ॥  
 दीन बचन गुह कह कर जोरी । बिनय सुनहु रघुकुलमनि मोरी ॥  
 नाथ साथ रहि पंथु देखाई । करि दिन चारि चरन सेवकाई ॥  
 जेहिं बन जाइ रहब रघुराई । परनकुटी मैं करबि सुहाई ॥  
 तब मोहि कहें जसि देब रजाई । सोइ करिहउं रघुबीर दोहाई ॥  
 सहज सनेह राम लखि तासू । संग लीन्ह गुह हृदय हुलासू ॥  
 पुनि गुहें ग्याति बोलि सब लीन्हे । करि परितोषु बिदा तब कीन्हे ॥

दो०— तब गनपति सिव सुभिरि प्रभु नाइ सुरसरिहि माथ ।  
 सखा अनुज सिय सहित बन गवनु कीन्ह रघुनाथ ॥ 104

तेहि दिन भयउ बिटप तर बासू । लखन सखों सब कीन्ह सुपासू ॥  
 प्रात प्रातकृत करि रघुराई । तीरथराजु दीख प्रभु जाई ॥  
 सचिव सत्य श्रद्धा प्रिय नारी । माधव सरिस मीतु हितकारी ॥  
 चारि पदारथ भरा भँडारू । पुन्य प्रदेस देस अति चारू ॥  
 छेत्रु अगम गढु गाढ सुहावा । सपनेहुँ नहिं प्रतिपच्छिन्ह पावा ॥  
 सेन सकल तीरथ बर बीरा । कलुष अनीक दलन रनधीरा ॥  
 संगमु सिंहासनु सुठि सोहा । छत्रु अखयबटु मुनि मनु मोहा ॥  
 चवैर जमुन अरु गंग तरंगा । देखि होहिं दुख दारिद भंगा ॥  
 दो०— सेवहिं सुकृती साधु सुचि पावहिं सब मनकाम ।

बंदी बेद पुरान गन कहहिं बिमल गुन ग्राम ॥ 105

को कहि सकइ प्रयाग प्रभाऊ । कलुष पुंज कुंजर मृगराऊ ॥  
 अस तीरथपति देखि सुहावा । सुख सागर रघुबर सुखु पावा ॥  
 कहि सिय लखनहि सखहि सुनाई । श्रीमुख तीरथराज बड़ाई ॥  
 करि प्रनामु देखत बन बागा । कहत महातम अति अनुरागा ॥  
 एहि बिधि आइ बिलोकी बेनी । सुमिरत सकल सुमंगल देनी ॥  
 मुदित नहाइ कीन्हि सिय सेवा । पूजि जथाबिधि तीरथ देवा ॥  
 तब प्रभु भरद्वाज पहिं आए । करत दंडवत मुनि उर लाए ॥  
 मुनि मन मोद न कछु कहि जाई । ब्रह्मानंद रासि जनु पाई ॥

दो०— दीन्हि असीस मुनीस उर अति अनंदु अस जानि ।

लोचन गोचर सुकृत फल मनहुँ किए बिधि आनि ॥ 106

कुसल प्रस्न करि आसन दीन्हे । पूजि प्रेम परिपूरन कीन्हे ॥  
 कंद मूल फल अंकुर नीके । दिए आनि मुनि मनहुँ अमी के ॥  
 सीय लखन जन सहित सुहाए । अति रुचि राम मूल फल खाए ॥  
 भए बिगतश्रम रामु सुखारे । भरद्वाज मृदु बचन उचारे ॥  
 आजु सुफल तपु तीरथ त्यागू । आजु सुफल जप जोग बिरागू ॥  
 सफल सकल सुभ साधन साजू । राम तुम्हहि अवलोकत आजू ॥  
 लाभ अवधि सुख अवधि न दूजी । तुम्हरे दरस आस सब पूजी ॥  
 अब करि कृपा देहु बर एहू । निज पद सरसिज सहज सनेहू ॥

दो०— करम बचन मन छाड़ि छलु जब लागि जनु न तुम्हार ।

तब लागि सुखु सपनेहुँ नहीं किऐं कोटि उपचार ॥ 107

सुनि मुनि बचन रामु सकुचाने । भाव भगति आनंद अघाने ॥  
 तब रघुबर मुनि सुजसु सुहावा । कोटि भौंति कहि सबहि सुनावा ॥  
 सो बड़ सो सब गुन गन गेहू । जेहि मुनीस तुम्ह आदर देहू ॥  
 मुनि रघुबीर परसपर नवहीं । बचन अगोचर सुखु अनुभवहीं ॥  
 यह सुधि पाइ प्रयाग निवासी । बटु तापस मुनि सिद्ध उदासी ॥  
 भरद्वाज आश्रम सब आए । देखन दसरथ सुअन सुहाए ॥  
 राम प्रनाम कीन्ह सब काहू । मुदित भए लहि लोयन लाहू ॥  
 देहिं असीस परम सुखु पाई । फिरे सराहत सुंदरताई ॥

दो०— राम कीन्ह बिश्राम निसि प्रात प्रयाग नहाइ ।

चले सहित सिय लखन जन मुदित मुनिहि सिरु नाइ ॥ 108

राम सप्रेम कहेउ मुनि पाहीं । नाथ कहिअ हम केहि मग जाहीं ॥  
 मुनि मन बिहसि राम सन कहहीं । सुगम सकल मग तुम्ह कहूँ अहहीं ॥  
 साथ लागि मुनि सिष्य बोलाए । सुनि मन मुदित पचासक आए ॥  
 सबन्हि राम पर प्रेम अपारा । सकल कहहिं मगु दीख हमारा ॥

मुनि बटु चारि संग तब दीन्हे । जिन्ह बहु जनम सुकृत सब कीन्हे ॥  
 करि प्रनामु रिषि आयसु पाई । प्रमुदित हृदयँ चले रघुराई ॥  
 ग्राम निकट जब निकसहिं जाई । देखहिं दरसु नारि नर धाई ॥  
 होहिं सनाथ जनम फलु पाई । फिरहिं दुखित मनु संग पठाई ॥  
 दो०— बिदा किए बटु बिनय करि फिरे पाइ मन काम ।

उतरि नहाए जमुन जल जो सरीर सम स्याम ॥ 109  
 सुनत तीरबासी नर नारी । धाए निज निज काज बिसारी ॥  
 लखन राम सिय सुंदरताई । देखि करहिं निज भाग्य बडाई ॥  
 अति लालसा बसहिं मन माहीं । नाउँ गाउँ बूझत सकुचाहीं ॥  
 जे तिन्ह महुँ बयबिरिध सयाने । तिन्ह करि जुगुति रामु पहिचाने ॥  
 सकल कथा तिन्ह सबहि सुनाई । बनहि चले पितु आयसु पाई ॥  
 सुनि सबिषाद सकल पछिताहीं । रानी रायँ कीन्ह भल नाहीं ॥  
 तेहि अवसर एक तापसु आवा । तेजपुंज लघुबयस सुहावा ॥  
 कबि अलखित गति बेषु बिरागी । मन कम बचन राम अनुरागी ॥

दो०— सजल नयन तन पुलकि निज इष्टदेउ पहिचानि ।  
 परेउ दंड जिमि धरनितल दसा न जाइ बखानि ॥ 110  
 राम सप्रेम पुलकि उर लावा । परम रंकं जनु पारसु पावा ॥  
 मनहुँ प्रेमु परमारथु दोऊ । मिलत धरें तन कह सबु कोऊ ॥  
 बहुरि लखन पायन्ह सोइ लागा । लीन्ह उठाइ उमगि अनुरागा ॥  
 पुनि सिय चरन धूरि धरि सीसा । जननि जानि सिसु दीन्ह असीसा ॥  
 कीन्ह निषाद दंडवत तेही । मिलेउ मुदित लखि राम सनेही ॥  
 पिअत नयन पुट रूपु पियूषा । मुदित सुअसनु पाइ जिमि भूखा ॥  
 ते पितु मातु कहहु सखि कैसे । जिन्ह पठए बन बालक ऐसे ॥  
 राम लखन सिय रूपु निहारी । होहिं सनेह बिकल नर नारी ॥

दो०— तब रघुबीर अनेक बिधि सखहि सिखावनु दीन्ह ।  
 राम रजायसु सीस धरि भवन गवनु तेई कीन्ह ॥ 111  
 पुनि सियँ राम लखन कर जोरी । जमुनहि कीन्ह प्रनामु बहोरी ॥  
 चले ससीय मुदित दोउ भाई । रबितनुजा कइ करत बडाई ॥  
 पथिक अनेक मिलहिं मग जाता । कहहिं सप्रेम देखि दोउ भ्राता ॥  
 राज लखन सब अंग तुम्हारें । देखि सोचु अति हृदय हमारें ॥  
 मारग चलहु पयादेहि पाएँ । ज्योतिषु झूठ हमारें भाएँ ॥  
 अगमु पंथु गिरि कानन भारी । तेहि महुँ साथ नारि सुकुमारी ॥  
 करि केहरि बन जाइ न जोई । हम सँग चलहिं जो आयसु होई ॥  
 जाब जहाँ लगि तहें पहुँचाई । फिरब बहोरि तुम्हहि सिरु नाई ॥

दो०— एहि बिधि पूँछहिं प्रेम बस पुलक गात जलु नैन ।  
 कृपासिंधु फेरहिं तिन्हहि कहि बिनीत मृदु बैन ॥ 112  
 जे पुर गाँव बसहिं मग माहीं । तिन्हहि नाग सुर नगर सिहाहीं ॥  
 केहि सुकृतीं केहि घरीं बसाए । धन्य पुन्यमय परम सुहाए ॥  
 जहँ जहँ राम चरन चलि जाहीं । तिन्ह समान अमरावति नाहीं ॥  
 पुन्यपुंज मग निकट निवासी । तिन्हहि सराहहिं सुरपुरबासी ॥  
 ज भरि नयन बिलोकहिं रामहि । सीता लखन सहित घनस्यामहि ॥  
 जे सर सरित राम अवगाहहिं । तिन्हहि देव सर सरित सराहहिं ॥  
 जेहि तरु तर प्रभु बैठहिं जाई । करहिं कलपतरु तासु बडाई ॥  
 परसि राम पद पदुम परागा । मानति भूमि भूरि निज भागा ॥

दो०— छॉह करहिं घन बिबुधगन बरषहिं सुमन सिहाहिं ।  
 देखत गिरि बन बिहग मृग रामु चले मग जाहिं ॥ 113  
 सीता लखन सहित रघुराई । गॉव निकट जब निकसहिं जाई ॥  
 सुनि सब बाल वृद्ध नर नारी । चलहिं तुरत गृहकाजु बिसारी ॥  
 राम लखन सिय रूप निहारी । पाइ नयनफलु होहिं सुखारी ॥  
 सजल बिलोचन पुलक सरीरा । सब भए मगन देखि दोउ बीरा ॥  
 बरनि न जाइ दसा तिन्ह केरी । लहि जनु रंकन्ह सुरमनि ढेरी ॥  
 एकन्ह एक बोलि सिख देहीं । लोचन लाहु लेहु छन एहीं ॥  
 रामहि देखि एक अनुरागे । चितवत चले जाहिं सँग लागे ॥  
 एक नयन मग छबि उर आनी । होहिं सिथिल तन मन बर बानी ॥

दो०— एक देखि बट छॉह भलि डासि मृदुल तून पात ।  
 कहहिं गवॉइअ छिनुकु श्रमु गवनब अबहिं कि प्रात ॥ 114  
 एक कलस भरि आनहिं पानी । अँचइअ नाथ कहहिं मृदु बानी ॥  
 सुनि प्रिय बचन प्रीति अति देखी । राम कृपाल सुसील बिसेषी ॥  
 जानी श्रमित सीय मन माहीं । घरिक बिलंबु कीन्ह बट छाहीं ॥  
 मुदित नारि नर देखहिं सोभा । रूप अनूप नयन मनु लोभा ॥  
 एकटक सब सोहहिं चहुँ ओरा । रामचंद्र मुख चंद चकोरा ॥  
 तरुन तमाल बरन तनु सोहा । देखत कोटि मदन मनु मोहा ॥  
 दामिनि बरन लखन सुठि नीके । नख सिख सुभग भावते जी के ॥  
 मुनिपट कटिन्ह कसैं तूनीरा । सोहहिं कर कमलनि धनु तीरा ॥

दो०— जटा मुकुट सीसनि सुभग उर भुज नयन बिसाल ।  
 सरद परब बिधु बदन बर लसत स्वेद कन जाल ॥ 115  
 बरनि न जाइ मनोहर जोरी । सोभा बहुत थोरि मति मोरी ॥  
 राम लखन सिय सुंदरताई । सब चितवहिं चित मन मति लाई ॥  
 थके नारि नर प्रेम पिआसे । मनहुँ मृगी मृग देखि दिआ से ॥  
 सीय समीप ग्रामतिय जाहीं । पूँछत अति सनेहँ सकुचाहीं ॥  
 बार बार सब लागहिं पाएँ । कहहिं बचन मृदु सरल सुभाएँ ॥  
 राजकुमारि बिनय हम करहीं । तिय सुभार्ये कछु पूँछत डरहीं ॥  
 स्वामिनि अबिनय छमबि हमारी । बिलगु न मानब जानि गवॉरी ॥  
 राजकुअँर दोउ सहज सलोने । इन्ह तैं लही दुति मरकत सोने ॥

दो०— स्यामल गौर किसोर बर सुंदर सुषमा ऐन ।  
 सरद सर्बरीनाथ मुखु सरद सरोरुह नैन ॥ 116  
 कोटि मनोज लजावनिहारे । सुमुखि कहहु को आहिं तुम्हारे ॥  
 सुनि सनेहमय मंजुल बानी । सकुची सिय मन महुँ मुसुकानी ॥  
 तिन्हहि बिलोकि बिलोकति धरनी । दुहुँ सकोच सकुचति बरबरनी ॥  
 सकुचि सप्रेम बाल मृग नयनी । बोली मधुर बचन पिकबयनी ॥  
 सहज सुभाय सुभग तन गोरे । नामु लखनु लघु देवर मोरे ॥  
 बहुरि बदनु बिधु अंचल ढॉकी । पिय तन चितइ भौँह करि बाँकी ॥  
 खंजन मंजु तिरीछे नयननि । निज पति कहेउ तिन्हहि सियँ सयननि ॥  
 भई मुदित सब ग्रामबधूटीं । रंकन्ह राय रासि जनु लूटीं ॥

दो०— अति सप्रेम सिय पायें परि बहुबिधि देहिं असीस ।  
 सदा सोहागिनि होहु तुम्ह जब लगि महि अहि सीस ॥ 117  
 पारबती सम पतिप्रिय होहू । देबि न हम पर छाड़ब छोहू ॥  
 पुनि पुनि बिनय करिअ कर जोरी । जाँ एहि मारग फिरिअ बहोरी ॥

दरसनु देब जानि निज दासी । लखीं सीर्ये सब प्रेम पिआसी ॥  
 मधुर बचन कहि कहि परितोषीं । जनु कुमुदिनीं कौमुदीं पोषीं ॥  
 तबहिं लखन रघुबर रुख जानी । पूंछेउ मगु लोगन्हि मृदु बानी ॥  
 सुनत नारि नर भए दुखारी । पुलकित गात बिलोचन बारी ॥  
 मिटा मोदु मन भए मलीने । बिधि निधि दीन्ह लेत जनु छीने ॥  
 समुझि करम गति धीरजु कीन्हा । सोधि सुगम मगु तिन्ह कहि दीन्हा ॥

दो०— लखन जानकी सहित तब गवनु कीन्ह रघुनाथ ।

फेरे सब प्रिय बचन कहि लिए लाइ मन साथ ॥ 118

फिरत नारि नर अति पछिताहीं । दैअहि दोषु देहिं मन माहीं ॥  
 सहित बिषाद परसपर कहहीं । बिधि करतब उलटे सब अहहीं ॥  
 निपट निरंकुस निठुर निसंकू । जेहिं ससि कीन्ह सरुज सकलंकू ॥  
 रूख कलपतरु सागरु खारा । तेहिं पठए बन राजकुमारा ॥  
 जाँ पै इन्हहि दीन्ह बनबासू । कीन्ह बादि बिधि भोग बिलासू ॥  
 ए बिचरहिं मग बिनु पदत्राना । रचे बादि बिधि बाहन नाना ॥  
 ए महि परहिं डासि कुस पाता । सुभग सेज कत सृजत बिधाता ॥  
 तरुबर बास इन्हहि बिधि दीन्हा । धवल धाम रचि रचि श्रमु कीन्हा ॥

दो०— जाँ ए मुनि पट धर जटिल सुंदर सुठि सुकुमार ।

बिबिध भॉति भूषन बसन बादि किए करतार ॥ 119

जाँ ए कंद मूल फल खाहीं । बादि सुधादि असन जग माहीं ॥  
 एक कहहिं ए सहज सुहाए । आपु प्रगट भए बिधि न बनाए ॥  
 जहँ लागि बेद कही बिधि करनी । श्रवन नयन मन गोचर बरनी ॥  
 देखहु खोजि भुअन दस चारी । कहँ अस पुरुष कहॉ असि नारी ॥  
 इन्हहि देखि बिधि मनु अनुरागा । पटतर जोग बनावै लागा ॥  
 कीन्ह बहुत श्रम ऐक न आए । तेहिं इरिषा बन आनि दुराए ॥  
 एक कहहिं हम बहुत न जानहिं । आपुहि परम धन्य करि मानहिं ॥  
 ते पुनि पुन्यपुंज हम लेखे । जे देखहिं देखिहहिं जिन्ह देखे ॥

दो०— एहि बिधि कहि कहि बचन प्रिय लेहिं नयन भरि नीर ।

किमि चलिहहिं मारग अगम सुठि सुकुमार सरीर ॥ 120

नारि सनेह बिकल बस होहीं । चकई साँझ समय जनु सोहीं ॥  
 मृदु पद कमल कठिन मगु जानी । गहबरि हृदयें कहहिं बर बानी ॥  
 परसत मृदुल चरन अरुनार । सकुचति महि जिमि हृदय हमारे ॥  
 जाँ जगदीस इन्हहि बनू दीन्हा । कस न सुमनमय मारगु कीन्हा ॥  
 जाँ मागा पाइअ बिधि पाहीं । ए रखिअहिं सखि आँखिन्ह माहीं ॥  
 जे नर नारि न अवसर आए । तिन्ह सिय रामु न देखन पाए ॥  
 सुनि सुरुपु बूझहिं अकुलाई । अब लागि गए कहॉ लागि भाई ॥  
 समरथ धाइ बिलोकहिं जाई । प्रमुदित फिरहिं जनमफलु पाई ॥

दो०— अबला बालक वृद्ध जन कर मीजहिं पछिताहिं ।

होहिं प्रेमबस लोग इमि रामु जहॉ जहँ जाहिं ॥ 121

गावँ गावँ अस होइ अनंदू । देखि भानुकुल कैरव चंदू ॥  
 जे कछु समाचार सुनि पावहिं । ते नृप रानिहि दोसु लगावहिं ॥  
 कहहिं परसपर लोग लोगाई । बातें सरल सनेह सुहाई ॥  
 ते पितु मातु धन्य जिन्ह जाए । धन्य सो नगरु जहॉ तें आए ॥  
 धन्य सो देसु सैलु बन गाऊँ । जहँ जहँ जाहिं धन्य सोइ ठाऊँ ॥  
 सुखु पायउ बिरंचि रचि तेही । ए जेहि के सब भॉति सनेही ॥

राम लखन पथि कथा सुहाई । रही सकल मग कानन छाई ॥

दो0— एहि बिधि रघुकुल कमल रबि मग लोगन्ह सुख देत ।  
जाहिं चले देखत बिपिन सिय सौमित्रि समेत ॥ 122  
आगें रामु लखनु बने पाछें । तापस बेष बिराजत काछें ॥  
उभय बीच सिय सोहति कैसी । ब्रह्म जीव बिच माया जैसी ॥  
बहुरि कहउँ छबि जसि मन बसई । जनु मधु मदन मध्य रति लसई ॥  
उपमा बहुरि कहउँ जियें जोही । जनु बुध बिधु बिच रोहिनि सोही ॥  
प्रभु पद रेख बीच बिच सीता । धरति चरन मग चलति सभिता ॥  
सीय राम पद अंक बराएँ । लखन चलहिं मगु दाहिन लाएँ ॥  
राम लखन सिय प्रीति सुहाई । बचन अगोचर किमि कहि जाई ॥  
खग मृग मगन देखि छबि होहीं । लिए चोरि चित राम बटोहीं ॥

दो0— जिन्ह जिन्ह देखे पथिक प्रिय सिय समेत दोउ भाइ ।  
भव मगु अगमु अनंदु तेइ बिनु श्रम रहे सिराइ ॥ 123  
अजहुँ जासु उर सपनेहुँ काऊ । बसहुँ लखनु सिय रामु बटाऊ ॥  
राम धाम पथ पाइहि सोई । जो पथ पाव कबहुँ मुनि कोई ॥  
तब रघुबीर श्रमित सिय जानी । देखि निकट बटु सीतल पानी ॥  
तहँ बसि कंद मूल फल खाई । प्रात नहाइ चले रघुराई ॥  
देखत बन सर सैल सुहाए । बालमीकि आश्रम प्रभु आए ॥  
राम दीख मुनि बासु सुहावन । सुंदर गिरि काननु जलु पावन ॥  
सरनि सरोज बिटप बन फूले । गुंजत मंजु मधुप रस भूले ॥  
खग मृग बिपुल कोलाहल करहीं । बिरहित बैर मुदित मन चरहीं ॥

दो0— सुचि सुंदर आश्रमु निरखि हरषे राजिवनेन ।  
सुनि रघुबर आगमनु मुनि आगें आयउ लेन ॥ 124  
मासपारायण, सोलहवों विश्राम  
नवान्हपारायण, चौथा विश्राम  
मुनि कहुँ राम दंडवत कीन्हा । आसिरबादु बिप्रबर दीन्हा ॥  
देखि राम छबि नयन जुड़ाने । करि सनमानु आश्रमहिं आने ॥  
मुनिबर अतिथि प्रानप्रिय पाए । कंद मूल फल मधुर मगाए ॥  
सिय सौमित्रि राम फल खाए । तब मुनि आश्रम दिए सुहाए ॥  
बालमीकि मन आनंदु भारी । मंगल मूरति नयन निहारी ॥  
तब कर कमल जोरि रघुराई । बोले बचन श्रवन सुखदाई ॥  
तुम्ह त्रिकाल दरसी मुनिनाथा । बिस्व बदर जिमि तुम्हरेँ हाथा ॥  
अस कहि प्रभु सब कथा बखानी । जेहि जेहि भौंति दीन्ह बनु रानी ॥

दो0— तात बचन पुनि मातु हित भाइ भरत अस राउ ।  
मो कहुँ दरस तुम्हार प्रभु सबु मम पुन्य प्रभाउ ॥ 125  
देखि पाय मुनिराय तुम्हारे । भए सुकृत सब सुफल हमारे ॥  
अब जहँ राउर आयसु होई । मुनि उदबेगु न पावै कोई ॥  
मुनि तापस जिन्ह तें दुखु लहहीं । ते नरेस बिनु पावक दहहीं ॥  
मंगल मूल संत परितोषू । दहइ कोटि कुल तापस रोषू ॥  
अस जियें जानि कहिअ सोइ ठाऊँ । सिय सौमित्रि सहित जहँ जाऊँ ॥  
तहँ रचि रुचिर परन तून साला । बासु करौ कछु काल कृपाला ॥  
सहज सरल सुनि रघुबर बानी । साधु साधु बोले मुनि ग्यानी ॥  
कस न कहहु अस रघुकुलकेतू । तुम्ह पालक संतत श्रुति सेतू ॥

छं0- श्रुति सेतु पालक राम तुम्ह जगदीस माया जानकी ।  
जो सृजति जगु पालति हरति रुख पाइ कृपानिधान की ॥  
जो सहससीसु अहीसु महिधरु लखनु सचराचर धनी ।  
सुर काज धरि नरराज तनु चले दलन खल निसिचर अनी ॥

सो0- राम सरूप तुम्हार बचन अगोचर बुद्धिपर ।  
अबिगत अकथ अपार नेति नेति नित निगम कह ॥ 126  
जगु पेखन तुम्ह देखनिहारे । बिधि हरि संभु नचावनिहारे ॥  
तेउ न जानहिं मरमु तुम्हारा । औरु तुम्हहि को जाननिहारा ॥  
सोइ जानइ जेहि देहु जनाई । जानत तुम्हहि तुम्हइ होइ जाई ॥  
तुम्हरिहि कृपाँ तुम्हहि रघुनंदन । जानहिं भगत भगत उर चंदन ॥  
चिदानंदमय देह तुम्हारी । बिगत बिकार जान अधिकारी ॥  
नर तनु धरेहु संत सुर काजा । कहहु करहु जस प्राकृत राजा ॥  
राम देखि सुनि चरित तुम्हारे । जड़ मोहहि बुध होहि सुखारे ॥  
तुम्ह जो कहहु करहु सबु सॉचा । जस काछिअ तस चाहिअ नाचा ॥

दो0- पूँछेहु मोहि कि रहौं कहैं मैं पूँछत सकुचाउँ ।  
जहैं न होहु तहैं देहु कहि तुम्हहि देखावौं ठाउँ ॥ 127  
सुनि मुनि बचन प्रेम रस साने । सकुचि राम मन महुँ मुसुकाने ॥  
बालमीकि हँसि कहहिं बहोरी । बानी मधुर अमिअ रस बोरी ॥  
सुनहु राम अब कहउँ निकेता । जहाँ बसहु सिय लखन समेता ॥  
जिन्ह के श्रवन समुद्र समाना । कथा तुम्हारि सुभग सरि नाना ॥  
भरहिं निरंतर होहिं न पूरे । तिन्ह के हिय तुम्ह कहुँ गृह रूरे ॥  
लोचन चातक जिन्ह करि राखे । रहहिं दरस जलधर अभिलाषे ॥  
निदरहिं सरित सिंधु सर भारी । रूप बिंदु जल होहिं सुखारी ॥  
तिन्ह के हृदय सदन सुखदायक । बसहु बंधु सिय सह रघुनायक ॥

दो0- जसु तुम्हार मानस बिमल हंसिनि जीहा जासु ।  
मुकताहल गुन गन चुनइ राम बसहु हियेँ तासु ॥ 128  
प्रभु प्रसाद सुचि सुभग सुबासा । सादर जासु लहइ नित नासा ॥  
तुम्हहि निबेदित भोजन करहीं । प्रभु प्रसाद पट भूषन धरहीं ॥  
सीस नवहिं सुर गुरु मुनि देखी । प्रीति सहित करि बिनय बिसेषी ॥  
कर नित करहिं राम पद पूजा । राम भरोस हृदयेँ नहिं दूजा ॥  
चरन राम तीरथ चलि जाहीं । राम बसहु तिन्ह के मन माहीं ॥  
मंत्रराजु नित जपहिं तुम्हारा । पूजहिं तुम्हहि सहित परिवारा ॥  
तरपन होम करहिं बिधि नाना । विप्र जेवाँइ देहिं बहु दाना ॥  
तुम्ह तेँ अधिक गुरहि जियेँ जानी । सकल भार्येँ सेवहिं सनमानी ॥

दो0- सबु करि मागहिं एक फलु राम चरन रति होउ ।  
तिन्ह केँ मन मंदिर बसहु सिय रघुनंदन दोउ ॥ 129  
काम कोह मद मान न मोहा । लाभ न छोभ न राग न द्रोहा ॥  
जिन्ह केँ कपट दंभ नहिं माया । तिन्ह केँ हृदय बसहु रघुराया ॥  
सब के प्रिय सब के हितकारी । दुख सुख सरिस प्रसंसा गारी ॥  
कहहिं सत्य प्रिय बचन बिचारी । जागत सोवत सरन तुम्हारी ॥  
तुम्हहि छाड़ि गति दूसरि नाहीं । राम बसहु तिन्ह के मन माहीं ॥  
जननी सम जानहिं परनारी । धनु पराव बिष तेँ बिष भारी ॥  
जे हरषहिं पर संपति देखी । दुखित होहिं पर बिपति बिसेषी ॥  
जिन्हहि राम तुम्ह प्रानपिआरे । तिन्ह के मन सुभ सदन तुम्हारे ॥

दो०— स्वामि सखा पितु मातु गुर जिन्ह के सब तुम्ह तात ।  
 मन मंदिर तिन्ह के बसहु सीय सहित दोउ भ्रात ॥ 130  
 अवगुन तजि सब के गुन गहहीं । संत धेनु हित संकट सहहीं ॥  
 नीति निपुन जिन्ह कइ जग लीका । घर तुम्हार तिन्ह कर मनु नीका ॥  
 गुन तुम्हार समुझइ निज दोसा । जेहि सब भौंति तुम्हार भरोसा ॥  
 राम भगत प्रिय लागहिं जेही । तेहि उर बसहु सहित बैदेही ॥  
 जाति पौंति धनु धरमु बड़ाई । प्रिय परिवार सदन सुखदाई ॥  
 सब तजि तुम्हहि रहइ उर लाई । तेहि के हृदय रहहु रघुराई ॥  
 सरगु नरकु अपबरगु समाना । जहँ तहँ देख धरें धनु बाना ॥  
 करम बचन मन राउर चेरा । राम करहु तेहि के उर डेरा ॥

दो०— जाहि न चाहिअ कबहुँ कछु तुम्ह सन सहज सनेहु ।  
 बसहु निरंतर तासु मन सो राउर निज गेहु ॥ 131  
 एहि बिधि मुनिबर भवन देखाए । बचन सप्रेम राम मन भाए ॥  
 कह मुनि सुनहु भानुकुलनायक । आश्रम कहउँ समय सुखदायक ॥  
 चित्रकूट गिरि करहु निवासू । तहँ तुम्हार सब भौंति सुपासू ॥  
 सलु सुहावन कानन चारू । करि केहरि मृग बिहग बिहारू ॥  
 नदी पुनीत पुरान बखानी । अत्रिप्रिया निज तपबल आनी ॥  
 सुरसरि धार नाउँ मंदाकिनि । जो सब पातक पोतक डाकिनि ॥  
 अत्रि आदि मुनिबर बहु बसहीं । करहिं जोग जप तप तन कसहीं ॥  
 चलहु सफल श्रम सब कर करहू । राम देहु गौरव गिरिबरहू ॥

दो०— चित्रकूट महिमा अमित कही महामुनि गाइ ।  
 आइ नहाए सरित बर सिय समेत दोउ भाइ ॥ 132  
 रघुबर कहेउ लखन भल घाटू । करहु कतहुँ अब ठाहर ठाटू ॥  
 लखन दीख पय उतर करारा । चहुँ दिसि फिरेउ धनुष जिमि नारा ॥  
 नदी पनच सर सम दम दाना । सकल कलुष कलि साउज नाना ॥  
 चित्रकूट जनु अचल अहेरी । चुकइ न घात मार मुठभेरी ॥  
 अस कहि लखन ठाउँ देखरावा । थलु बिलोकि रघुबर सुखु पावा ॥  
 रमेउ राम मनु देवन्ह जाना । चले सहित सुर थपति प्रधाना ॥  
 कोल किरात बेष सब आए । रचे परन तून सदन सुहाए ॥  
 बरनि न जाहिं मंजु दुइ साला । एक ललित लघु एक बिसाला ॥

दो०— लखन जानकी सहित प्रभु राजत रुचिर निकेत ।  
 सोह मदनु मुनि बेष जनु रति रितुराज समेत ॥ 133  
 अमर नाग किनर दिसिपाला । चित्रकूट आए तेहि काला ॥  
 राम प्रनामु कीन्ह सब काहू । मुदित देव लहि लोचन लाहू ॥  
 बरषि सुमन कह देव समाजू । नाथ सनाथ भए हम आजू ॥  
 करि बिनती दुख दुसह सुनाए । हरषित निज निज सदन सिधाए ॥  
 चित्रकूट रघुनंदनु छाए । समाचार सुनि सुनि मुनि आए ॥  
 आवत देखि मुदित मुनिबुंदा । कीन्ह दंडवत रघुकुल चंदा ॥  
 मुनि रघुबरहि लाइ उर लेहीं । सुफल होन हित आसिष देहीं ॥  
 सिय सामित्रि राम छबि देखहिं । साधन सकल सफल करि लेखहिं ॥

दो०— जथाजोग सनमानि प्रभु बिदा किए मुनिबुंद ।  
 करहिं जोग जप जाग तप निज आश्रमन्हि सुछंद ॥ 134  
 यह सुधि कोल किरातन्ह पाई । हरषे जनु नव निधि घर आई ॥  
 कंद मूल फल भरि भरि दोना । चले रंक जनु लूटन साना ॥

तिन्ह महेँ जिन्ह देखे दोउ भ्राता । अपर तिन्हहि पूँछहिं मगु जाता ॥  
 कहत सुनत रघुबीर निकाई । आइ सबन्हि देखे रघुराई ॥  
 करहिं जोहारु भेंट धरि आगे । प्रभुहि बिलोकहिं अति अनुरागे ॥  
 चित्र लिखे जनु जहेँ तहेँ ठाढ़े । पुलक सरीर नयन जल बाढ़े ॥  
 राम सनेह मगन सब जाने । कहि प्रिय बचन सकल सनमाने ॥  
 प्रभुहि जोहारि बहोरि बहोरी । बचन बिनीत कहहिं कर जोरी ॥

दो०— अब हम नाथ सनाथ सब भए देखि प्रभु पाय ।

भाग हमारेँ आगमनु राउर कोसलराय ॥ 135

धन्य भूमि बन पंथ पहारा । जहेँ जहेँ नाथ पाउ तुम्ह धारा ॥  
 धन्य बिहग मृग काननचारी । सफल जनम भए तुम्हहि निहारी ॥  
 हम सब धन्य सहित परिवारा । दीख दरसु भरि नयन तुम्हारा ॥  
 कीन्ह बासु भल ठाउँ बिचारी । इहाँ सकल रितु रहब सुखारी ॥  
 हम सब भौँति करब सेवकाई । करि केहरि अहि बाघ बराई ॥  
 बन बेहड़ गिरि कंदर खोहा । सब हमार प्रभु पग पग जोहा ॥  
 तहेँ तहेँ तुम्हहि अहेर खेलाउब । सर निरझर जलठाउँ देखाउब ॥  
 हम सेवक परिवार समेता । नाथ न सकुचब आयसु देता ॥

दो०— बेद बचन मुनि मन अगम ते प्रभु करुना ऐन ।

बचन किरातन्ह के सुनत जिमि पितु बालक बैन ॥ 136

रामहि केवल प्रेमु पिआरा । जानि लेउ जो जाननिहारा ॥  
 राम सकल बनचर तब तोषे । कहि मृदु बचन प्रेम परिपोषे ॥  
 बिदा किए सिर नाइ सिधाए । प्रभु गुन कहत सुनत घर आए ॥  
 एहि बिधि सिय समेत दोउ भाई । बसहिं बिपिन सुर मुनि सुखदाई ॥  
 जब तेँ आइ रहे रघुनायकु । तब तेँ भयउ बनु मंगलदायकु ॥  
 फूलहिं फलहिं बिटप बिधि नाना । मंजु बलित बर बेलि बिताना ॥  
 सुरतरु सरिस सुभायें सुहाए । मनहुँ बिबुध बन परिहरि आए ॥  
 गुंज मंजुतर मधुकर श्रेनी । त्रिबिध बयारि बहइ सुख देनी ॥

दो०— नीलकंठ कलकंठ सुक चातक चक्क चकोर ।

भौँति भौँति बोलहिं बिहग श्रवन सुखद चित चोर ॥ 137

करि केहरि कपि कोल कुरंगा । बिगतबैर बिचरहिं सब संगी ॥  
 फिरत अहेर राम छबि देखी । होहिं मुदित मृगबृंद बिसेषी ॥  
 बिबुध बिपिन जहेँ लगी जग माहीं । देखि राम बनु सकल सिहाहीं ॥  
 सुरसरि सरसइ दिनकर कन्या । मेकलसुता गोदावरि धन्या ॥  
 सब सर सिंधु नदीं नद नाना । मंदाकिनि बर करहिं बखाना ॥  
 उदय अस्त गिरि अरु कैलासू । मंदर मेरु सकल सुरबासू ॥  
 सैल हिमाचल आदिक जेते । चित्रकूट जसु गावहिं तेते ॥  
 बिधि मुदित मन सुखु न समाई । श्रम बिनु बिपुल बड़ाई पाई ॥

दो०— चित्रकूट के बिहग मृग बेलि बिटप तून जाति ।

पुन्य पुंज सब धन्य अस कहहिं देव दिन राति ॥ 138

नयनवंत रघुबरहि बिलोकी । पाइ जनम फल होहिं बिसोकी ॥  
 परसि चरन रज अचर सुखारी । भए परम पद के अधिकारी ॥  
 सो बनु सैलु सुभायें सुहावन । मंगलमय अति पावन पावन ॥  
 महिमा कहिअ कवनि बिधि तासू । सुखसागर जहेँ कीन्ह निवासू ॥  
 पय पयोधि तजि अवध बिहाई । जहेँ सिय लखनु रामु रहे आई ॥  
 कहि न सकहिं सुषमा जसि कानन । जाँ सत सहस होहिं सहसानन ॥

सो मैं बरनि कहौं बिधि केहीं । डाबर कमठ कि मंदर लेहीं ॥  
 सेवहिं लखनु करम मन बानी । जाइ न सीलु सनेहु बखानी ॥  
 दो०— छिनु छिनु लखि सिय राम पद जानि आपु पर नेहु ।  
 करत न सपनेहुँ लखनु चितु बंधु मातु पितु गेहु ॥ 139  
 राम संग सिय रहति सुखारी । पुर परिजन गृह सुरति बिसारी ॥  
 छिनु छिनु पिय बिधु बदनु निहारी । प्रमुदित मनहुँ चकोरकुमारी ॥  
 नाह नेहु नित बढत बिलोकी । हरषित रहति दिवस जिमि कोकी ॥  
 सिय मनु राम चरन अनुरागा । अवध सहस सम बनु प्रिय लागा ॥  
 परनकुटी प्रिय प्रियतम संगी । प्रिय परिवारु कुरंग बिहंगा ॥  
 सासु ससुर सम मुनितिय मुनिबर । असनु अमिअ सम कंद मूल फर ॥  
 नाथ साथ साँथरी सुहाई । मयन सयन सय सम सुखदाई ॥  
 लोकप होहिं बिलोकत जासू । तेहि कि मोहि सक बिषय बिलासू ॥  
 दो०— सुमिरत रामहि तजहिं जन तृन सम बिषय बिलासु ।  
 रामप्रिया जग जननि सिय कछु न आचरजु तासु ॥ 140  
 सीय लखन जेहि बिधि सुखु लहहीं । सोइ रघुनाथ करहिं सोइ कहहीं ॥  
 कहहिं पुरातन कथा कहानी । सुनहिं लखनु सिय अति सुखु मानी ॥  
 जब जब रामु अवध सुधि करहीं । तब तब बारि बिलोचन भरहीं ॥  
 सुमिरि मातु पितु परिजन भाई । भरत सनेहु सीलु सेवकाई ॥  
 कृपासिंधु प्रभु होहिं दुखारी । धीरजु धरहिं कुसमउ बिचारी ॥  
 लखि सिय लखनु बिकल होइ जाहीं । जिमि पुरुषहिं अनुसर परिछाहीं ॥  
 प्रिया बंधु गति लखि रघुनंदनु । धीर कृपाल भगत उर चंदनु ॥  
 लगे कहन कछु कथा पुनीता । सुनि सुखु लहहिं लखनु अरु सीता ॥  
 दो०— रामु लखन सीता सहित सोहत परन निकेत ।  
 जिमि बासव बस अमरपुर सची जयंत समेत ॥ 141  
 मासपारायण, सत्रहवाँ विश्राम  
 जोगवहिं प्रभु सिय लखनहिं कैसैं । पलक बिलोचन गोलक जैसैं ॥  
 सेवहिं लखनु सीय रघुबीरहि । जिमि अबिबेकी पुरुष सरीरहि ॥  
 एहि बिधि प्रभु बन बसहिं सुखारी । खग मृग सुर तापस हितकारी ॥  
 कहेउँ राम बन गवनु सुहावा । सुनहु सुमंत्र अवध जिमि आवा ॥  
 फिरेउ निषादु प्रभुहि पहुँचाई । सचिव सहित रथ देखेसि आई ॥  
 मंत्री बिकल बिलोकि निषादु । कहि न जाइ जस भयउ बिषादु ॥  
 राम राम सिय लखन पुकारी । परेउ धरनितल ब्याकुल भारी ॥  
 देखि दखिन दिसि हय हिहिनाहीं । जनु बिनु पंख बिहग अकुलाहीं ॥  
 दो०— नहिं तृन चरहिं न पिअहिं जलु मोचहिं लोचन बारि ।  
 ब्याकुल भए निषाद सब रघुबर बाजि निहारि ॥ 142  
 धरि धीरजु तब कहइ निषादु । अब सुमंत्र परिहरहु बिषादु ॥  
 तुम्ह पंडित परमारथ ग्याता । धरहु धीर लखि बिमुख बिधाता ॥  
 बिबिध कथा कहि कहि मृदु बानी । रथ बैठारेउ बरबस आनी ॥  
 सोक सिथिल रथ सकइ न हॉकी । रघुबर बिरह पीर उर बाँकी ॥  
 चरफराहिं मग चलहिं न घोरे । बन मृग मनहुँ आनि रथ जोरे ॥  
 अढुकि परहिं फिरि हेरहिं पीछें । राम बियोगि बिकल दुख तीछें ॥  
 जो कह रामु लखनु बैदेही । हिंकरि हिंकरि हित हेरहिं तेही ॥  
 बाजि बिरह गति कहि किमि जाती । बिनु मनि फनिक बिकल जेहि भॉती ॥  
 दो०— भयउ निषादु बिषादबस देखत सचिव तुरंग ।

बोलि सुसेवक चारि तब दिए सारथी संग ॥ 143

गुह सारथिहि फिरेउ पहुँचाई । बिरहु बिषादु बरनि नहिं जाई ॥  
चले अवध लेइ रथहि निषादा । होहिं छनहिं छन मगन बिषादा ॥  
सोच सुमंत्र बिकल दुख दीना । धिग जीवन रघुबीर बिहीना ॥  
रहिहि न अंतहु अधम सरीरु । जसु न लहेउ बिछुरत रघुबीरु ॥  
भए अजस अघ भाजन प्राणा । कवन हेतु नहिं करत पयाना ॥  
अहह मंद मनु अवसर चूका । अजहुँ न हृदय होत दुइ टूका ॥  
मीजि हाथ सिरु धुनि पछिताई । मनहुँ कृपन धन रासि गवॉई ॥  
बिरिद बाँधि बर बीरु कहाई । चलेउ समर जनु सुभट पराई ॥

दो०— बिप्र बिबेकी बेदबिद संमत साधु सुजाति ।

जिमि धोखें मदमान कर सचिव सोच तेहि भॉति ॥ 144

जिमि कुलीन तिय साधु सयानी । पतिदेवता करम मन बानी ॥  
रहै करम बस परिहरि नाहू । सचिव हृदयें तिमि दारुन दाहू ॥  
लोचन सजल डीठि भइ थोरी । सुनइ न श्रवन बिकल मति भोरी ॥  
सूखहिं अधर लागि मुँह लाटी । जिउ न जाइ उर अवधि कपाटी ॥  
बिबरन भयउ न जाइ निहारी । मारेसि मनहुँ पिता महतारी ॥  
हानि गलानि बिपुल मन ब्यापी । जमपुर पंथ सोच जिमि पापी ॥  
बचनु न आव हृदयें पछिताई । अवध काह मैं देखब जाई ॥  
राम रहित रथ देखिहि जोई । सकुचिहि मोहि बिलोकत सोई ॥

दो०— धाइ पूँछिहहिं मोहि जब बिकल नगर नर नारि ।

उतरु देब मैं सबहि तब हृदयें बज्जु बैठारि ॥ 145

पुछिहहिं दीन दुखित सब माता । कहब काह मैं तिन्हहि बिधाता ॥  
पूछिहि जबहिं लखन महतारी । कहिहउँ कवन सँदेस सुखारी ॥  
राम जननि जब आइहि धाई । सुमिरि बच्छु जिमि धेनु लवाई ॥  
पूँछत उतरु देब मैं तेही । गे बनु राम लखनु बैदेही ॥  
जोइ पूँछिहि तेहि उतरु देबा । जाइ अवध अब यहु सुखु लेबा ॥  
पूँछिहि जबहिं राउ दुख दीना । जिवनु जासु रघुनाथ अधीना ॥  
देहउँ उतरु कौनु मुहु लाई । आयउँ कुसल कुअँर पहुँचाई ॥  
सुनत लखन सिय राम सँदेसू । तून जिमि तनु परिहरिहि नरेसू ॥

दो०— हृदउ न बिदरेउ पंक जिमि बिछुरत प्रीतमु नीरु ।

जानत हौं मोहि दीन्ह बिधि यहु जातना सरीरु ॥ 146

एहि बिधि करत पंथ पछितावा । तमसा तीर तुरत रथु आवा ॥  
बिदा किए करि बिनय निषादा । फिरे पायँ परि बिकल बिषादा ॥  
पैठत नगर सचिव सकुचाई । जनु मारेसि गुर बाँभन गाई ॥  
बैठि बिटप तर दिवसु गवॉवा । साँझ समय तब अवसरु पावा ॥  
अवध प्रबेसु कीन्ह अँधिआरें । पैठ भवन रथु राखि दुआरें ॥  
जिन्ह जिन्ह समाचार सुनि पाए । भूप द्वार रथु देखन आए ॥  
रथु पहिचानि बिकल लखि घोरे । गरहिं गात जिमि आतप ओरे ॥  
नगर नारि नर ब्याकुल कैसैं । निघटत नीर मीनगन जैसैं ॥

दो०— सचिव आगमनु सुनत सबु बिकल भयउ रनिवासु ।

भवनु भयंकरु लाग तेहि मानहुँ प्रेत निवासु ॥ 147

अति आरति सब पूँछहिं रानी । उतरु न आव बिकल भइ बानी ॥  
सुनइ न श्रवन नयन नहिं सूझा । कहहु कहाँ नृपु तेहि तेहि बूझा ॥  
दासिन्ह दीख सचिव बिकलाई । कौसल्या गृहँ गई लवाई ॥

जाइ सुमंत्र दीख कस राजा । अमिअ रहित जनु चंदु बिराजा ॥  
आसन सयन बिभूषन हीना । परेउ भूमितल निपट मलीना ॥  
लेइ उसासु सोच एहि भौंती । सुरपुर तें जनु खेंसेउ जजाती ॥  
लेत सोच भरि छिनु छिनु छाती । जनु जरि पंख परेउ संपाती ॥  
राम राम कह राम सनेही । पुनि कह राम लखन बैदेही ॥

दो०— देखि सचिवें जय जीव कहि कीन्हेउ दंड प्रनामु ।

सुनत उठेउ ब्याकुल नृपति कहु सुमंत्र कहें रामु ॥ 148  
भूप सुमंत्रु लीन्ह उर लाई । बूड़त कछु अधार जनु पाई ॥  
सहित सनेह निकट बैठारी । पूँछत राउ नयन भरि बारी ॥  
राम कुसल कहु सखा सनेही । कहें रघुनाथु लखनु बैदेही ॥  
आने फेरि कि बनहि सिधाए । सुनत सचिव लोचन जल छाए ॥  
सोक बिकल पुनि पूँछ नरेसू । कहु सिय राम लखन संदेसू ॥  
राम रूप गुन सील सुभाऊ । सुमिरि सुमिरि उर सोचत राऊ ॥  
राउ सुनाइ दीन्ह बनबासू । सुनि मन भयउ न हरषु हरौंसू ॥  
सो सुत बिछुरत गए न प्राणा । को पापी बड़ मोहि समाना ॥

दो०— सखा रामु सिय लखनु जहें तहौं मोहि पहुँचाउ ।

नाहिं त चाहत चलन अब प्राण कहउँ सतिभाउ ॥ 149  
पुनि पुनि पूँछत मंत्रिहि राऊ । प्रियतम सुअन संदेस सुनाऊ ॥  
करहि सखा सोइ बेगि उपाऊ । रामु लखनु सिय नयन देखाऊ ॥  
सचिव धीर धरि कह मृदु बानी । महाराज तम्ह पंडित ग्यानी ॥  
बीर सुधीर धुरंधर देवा । साधु समाजु सदा तुम्ह सेवा ॥  
जनम मरन सब दुख सुख भोगा । हानि लाभु प्रिय मिलन बियोगा ॥  
काल करम बस होहिं गोसाईं । बरबस राति दिवस की नाई ॥  
सुख हरषहिं जड़ दुख बिलखाहीं । दोउ सम धीर धरहिं मन माहीं ॥  
धीरज धरहु बिबेकु बिचारी । छाड़िअ सोच सकल हितकारी ॥

दो०— प्रथम बासु तमसा भयउ दूसर सुरसरि तीर ।

न्हाइ रहे जलपानु करि सिय समेत दोउ बीर ॥ 150  
केवट कीन्हि बहुत सेवकाई । सो जामिनि सिंगरौर गवौंई ॥  
होत प्रात बट छोरु मगावा । जटा मुकुट निज सीस बनावा ॥  
राम सखौं तब नाव मगाई । प्रिया चढाइ चढे रघुराई ॥  
लखन बान धनु धरे बनाई । आपु चढे प्रभु आयसु पाई ॥  
बिकल बिलोकि मोहि रघुबीरा । बोले मधुर बचन धरि धीरा ॥  
तात प्रनामु तात सन कहेहू । बार बार पद पंकज गहेहू ॥  
करबि पायें परि बिनय बहोरी । तात करिअ जनि चिंता मोरी ॥  
बन मग मंगल कुसल हमारें । कृपा अनुग्रह पुन्य तुम्हारें ॥

छं०— तुम्हरें अनुग्रह तात कानन जात सब सुखु पाइहौं ।

प्रतिपालि आयसु कुसल देखन पाय पुनि फिरि आइहौं ॥  
जननीं सकल परितोषि परि परि पायें करि बिनती घनी ।  
तुलसी करेहु सोइ जतनु जेहिं कुसली रहहिं कोसल घनी ॥

सो०— गुर सन कहब संदेसु बार बार पद पदुम गहि ।

करब सोइ उपदेसु जेहिं न सोच मोहि अवधपति ॥ 151  
पुरजन परिजन सकल निहोरी । तात सुनाएहु बिनती मोरी ॥  
सोइ सब भौंति मोर हितकारी । जातें रह नरनाहु सुखारी ॥  
कहब संदेसु भरत के आएँ । नीति न तजिअ राजपदु पाएँ ॥

पालेहु प्रजहि करम मन बानी । सेएहु मातु सकल सम जानी ॥  
 ओर निबाहेहु राखब राऊ । सोच मोर जेहिं करै न काऊ ॥  
 लखन कहे कछु बचन कठोरा । बरजि राम पुनि मोहि निहोरा ॥  
 बार बार निज सपथ देवाई । कहबि न तात लखन लरिकाई ॥  
 दो०— कहि प्रनामु कछु कहन लिय सिय भइ सिथिल सनेह ।  
 थकित बचन लोचन सजल पुलक पल्लवित देह ॥ 152  
 तेहि अवसर रघुबर रुख पाई । केवट पारहि नाव चलाई ॥  
 रघुकुलतिलक चले एहि भौंती । देखउँ ठाढ़ कुलिस धरि छाती ॥  
 मैं आपन किमि कहौं कलेसू । जिअत फिरेउँ लेइ राम सँदेसू ॥  
 अस कहि सचिव बचन गहि गयऊ । हानि गलानि सोच बस भयऊ ॥  
 सूत बचन सुनतहिं नरनाहू । परेउ धरनि उर दारुन दाहू ॥  
 तलफत बिषम मोह मन पापा । माजा मनहुँ मीन कहूँ ब्यापा ॥  
 करि बिलाप सब रोवहिं रानी । महा बिपति किमि जाइ बखानी ॥  
 सुनि बिलाप दुखहू दुखु लागा । धीरजहू कर धीरजु भागा ॥  
 दो०— भयउ कोलाहल अवध अति सुनि नृप राउर सोरु ।  
 बिपुल बिहग बन परेउ निसि मानहुँ कुलिस कठोरु ॥ 153  
 प्रान कंठगत भयउ भुआलू । मनि बिहीन जनु ब्याकुल ब्यालू ॥  
 इद्रीं सकल बिकल भइँ भारी । जनु सर सरसिज बनु बिनु बारी ॥  
 कौसल्यो नृपु दीख मलाना । रबिकुल रबि अँथयउ जियँ जाना ॥  
 उर धरि धीर राम महतारी । बोली बचन समय अनुसारी ॥  
 नाथ समुझि मन करिअ बिचारू । राम बियोग पयोधि अपारू ॥  
 करनधार तुम्ह अवध जहाजू । चढ़ेउ सकल प्रिय पथिक समाजू ॥  
 धीरजु धरिअ त पाइअ पारू । नाहिं त बूड़िहि सबु परिवारू ॥  
 जौं जियँ धरिअ बिनय पिय मोरी । रामु लखनु सिय मिलहिं बहोरी ॥  
 दो०— प्रिया बचन मृदु सुनत नृपु चितयउ आँखि उधारि ।  
 तलफत मीन मलीन जनु सींचत सीतल बारि ॥ 154  
 धरि धीरजु उठि बैठ भुआलू । कहु सुमंत्र कहँ राम कृपालू ॥  
 कहौं लखनु कहँ रामु सनेही । कहँ प्रिय पुत्रबधू बैदेही ॥  
 बिलपत राउ बिकल बहु भौंती । भइ जुग सरिस सिराति न राती ॥  
 तापस अंध साप सुधि आई । कौसल्यहि सब कथा सुनाई ॥  
 भयउ बिकल बरनत इतिहासा । राम रहित धिग जीवन आसा ॥  
 सो तनु राखि करब मैं काहा । जेहिं न प्रेम पनु मोर निबाहा ॥  
 हा रघुनंदन प्रान पिरीते । तुम्ह बिनु जिअत बहुत दिन बीते ॥  
 हा जानकी लखन हा रघुबर । हा पितु हित चित चातक जलधर ॥  
 दो०— राम राम कहि राम कहि राम राम कहि राम ।  
 तनु परिहरि रघुबर बिरहँ राउ गयउ सुरधाम ॥ 155  
 जिअन मरन फलु दसरथ पावा । अंड अनेक अमल जसु छावा ॥  
 जिअत राम बिधु बदनु निहारा । राम बिरह करि मरनु सँवारा ॥  
 सोक बिकल सब रोवहिं रानी । रूपु सीलु बलु तेजु बखानी ॥  
 करहिं बिलाप अनेक प्रकारा । परहिं भूमितल बारहिं बारा ॥  
 बिलपहिं बिकल दास अरु दासी । घर घर रुदनु करहिं पुरबासी ॥  
 अँथयउ आजु भानुकुल भानू । धरम अवधि गुन रूप निधानू ॥  
 गारीं सकल कैकइहि देहीं । नयन बिहीन कीन्ह जग जेहीं ॥  
 एहि बिधि बिलपत रैनि बिहानी । आए सकल महामुनि ग्यानी ॥

दो०— तब बसिष्ठ मुनि समय सम कहि अनेक इतिहास ।

सोक नेवारेउ सबहि कर निज बिग्यान प्रकास ॥ 156

तेल नावें भरि नृप तनु राखा । दूत बोलाइ बहुरि अस भाषा ॥  
धावहु बेगि भरत पहिं जाहू । नृप सुधि कतहुँ कहहु जनि काहू ॥  
एतनेइ कहेहु भरत सन जाई । गुर बोलाइ पठयउ दोउ भाई ॥  
सुनि मुनि आयसु धावन धाए । चले बेग बर बाजि लजाए ॥  
अनरथु अवघ अरंभेउ जब तें । कुसगुन होहिं भरत कहुँ तब तें ॥  
देखहिं राति भयानक सपना । जागि करहिं कटु कोटि कलपना ॥  
बिप्र जेवाँइ देहिं दिन दाना । सिव अभिषेक करहिं बिधि नाना ॥  
मागहिं हृदयें महेस मनाई । कुसल मातु पितु परिजन भाई ॥

दो०— एहि बिधि सोचत भरत मन धावन पहुँचे आइ ।

गुर अनुसासन श्रवन सुनि चले गनेसु मनाइ ॥ 157

चले समीर बेग हय होंके । नाघत सरित सैल बन बाँके ॥  
हृदयें सोचु बड़ कछु न सोहाई । अस जानहिं जियें जाउँ उड़ाई ॥  
एक निमेष बरष सम जाई । एहि बिधि भरत नगर निअराई ॥  
असगुन होहिं नगर पैठारा । रटहिं कुभौंति कुखेत करारा ॥  
खर सिआर बोलहिं प्रतिकूला । सुनि सुनि होइ भरत मन सूला ॥  
श्रीहत सर सरिता बन बागा । नगरु बिसेषि भयावनु लागा ॥  
खग मृग हय गय जाहिं न जोए । राम बियोग कुरोग बिगोए ॥  
नगर नारि नर निपट दुखारी । मनहुँ सबन्हि सब संपति हारी ॥

दो०— पुरजन मिलहिं न कहहिं कछु गर्वेंहिं जोहारहिं जाहिं ।

भरत कुसल पूँछि न सकहिं भय बिषाद मन माहिं ॥ 158

हाट बाट नहिं जाइ निहारी । जनु पुर दहें दिसि लागि दवारी ॥  
आवत सुत सुनि कैकयनंदिनि । हरषी रबिकुल जलरुह चंदिनि ॥  
सजि आरती मुदित उठि धाई । द्वारेहिं भेंटि भवन लेइ आई ॥  
भरत दुखित परिवारु निहारा । मानहुँ तुहिन बनज बनु मारा ॥  
कैकेई हरषित एहि भौंती । मनहुँ मुदित दव लाइ किराती ॥  
सुतहि ससोच देखि मनु मारें । पूँछति नैहर कुसल हमारें ॥  
सकल कुसल कहि भरत सुनाई । पूँछी निज कुल कुसल भलाई ॥  
कहु कहें तात कहां सब माता । कहें सिय राम लखन प्रिय भ्राता ॥

दो०— सुनि सुत बचन सनेहमय कपट नीर भरि नैन ।

भरत श्रवन मन सूल सम पापिनि बोली बैन ॥ 151

तात बात मैं सकल सँवारी । भै मंथरा सहाय बिचारी ॥  
कछुक काज बिधि बीच बिगारेउ । भूपति सुरपति पुर पगु धारेउ ॥  
सुनत भरतु भए बिबस बिषादा । जनु सहमेउ करि केहरि नादा ॥  
तात तात हा तात पुकारी । परे भूमितल ब्याकुल भारी ॥  
चलत न देखन पायउँ तोही । तात न रामहि सौँपेहु मोही ॥  
बहुरि धीर धरि उठे सँभारी । कहु पितु मरन हेतु महतारी ॥  
सुनि सुत बचन कहति कैकेई । मरमु पौँछि जनु माहुर देई ।  
आदिहु तें सब आपनि करनी । कुटिल कठोर मुदित मन बरनी ॥

दो०— भरतहि बिसरेउ पितु मरन सुनत राम बन गौनु ।

हेतु अपनपउ जानि जियें थकित रहे धरि मौनु ॥ 160

बिकल बिलोकि सुतहि समुझावति । मनहुँ जरे पर लोनु लगावति ॥  
तात राउ नहिं सोचै जोगू । बिढ़इ सुकृत जसु कीन्हेउ भोगू ॥

जीवत सकल जनम फल पाए । अंत अमरपति सदन सिधाए ॥  
अस अनुमानि सोच परिहरहू । सहित समाज राज पुर करहू ॥  
सुनि सुठि सहमेउ राजकुमारू । पाकेँ छत जनु लाग अँगारू ॥  
धीरज धरि भरि लेहिँ उसासा । पापिनि सबहिँ भौँति कुल नासा ॥  
जौँ पै कुरुचि रही अति तोही । जनमत काहे न मारे मोही ॥  
पेड़ काटि तैं पालउ सींचा । मीन जिअन निति बारि उलीचा ॥

दो० हंसबंसु दसरथु जनकु राम लखन से भाइ ।

जननी तूँ जननी भई बिधि सन कछु न बसाइ ॥ 161

जब तैं कुमति कुमत जियेँ ठयऊ । खंड खंड होइ हृदउ न गयऊ ॥  
बर मागत मन भइ नहिँ पीरा । गरि न जीह मुहँ परेउ न कीरा ॥  
भूपेँ प्रतीति तोरि किमि कीन्ही । मरन काल बिधि मति हरि लीन्ही ॥  
बिधिहुँ न मातु तोर गति जानी । सकल कपट अघ अवगुन खानी ॥  
सरल सुसील धरम रत राऊ । सो किमि जानै तोर सुभाऊ ॥  
अस का जीव जंतु जग माहीं । जेहि रघुनाथ प्रानप्रिय नाहीं ॥  
मे अति अहित रामु तेउ तोही । को तू अहसि सत्य कहु मोही ॥  
जो हसि सो हसि मुहँ मसि लाई । आँखि ओट उठि बैठहि जाई ॥

दो०— राम बिरোধी हृदय तैं प्रगट कीन्ह बिधि मोहि ।

मो समान को पातकी बादि कहउं कछु तोहि ॥ 162

सुनि सत्रुघुन मातु कुटिलाई । जरहिँ गात रिस कछु न बसाई ॥  
तेहि अवसर कुबरी तहँ आई । बसन बिभूषन बिबिध बनाई ॥  
लखि रिस भरेउ लखन लघु भाई । बरत अनल घृत आहुति पाई ॥  
हुमगि लात तकि कूबर मारा । परि मुह भर महि करत पुकारा ॥  
कूबर टूटेउ फूट कपारू । दलित दसन मुख रुधिर प्रचारू ॥  
आह दइअ मैं काह नसावा । करत नीक फलु अनइस पावा ॥  
सुनि रिपुहन लखि नख सिख खोटी । लगे घसीटन धरि धरि झोंटी ॥  
भरत दयानिधि दीन्हि छड़ाई । कौसल्या पहिँ गे दोउ भाई ॥

दो०— मलिन बसन बिबरन बिकल कृस सरीर दुख भार ।

कनक कलप बर बेलि बन मानहुँ हनी तुसार ॥ 163

भरतहि देखि मातु उठि धाई । मुरुछित अवनि परी झई आई ॥  
देखत भरतु बिकल भए भारी । परे चरन तन दसा बिसारी ॥  
मातु तात कहँ देहि देखाई । कहँ सिय रामु लखनु दोउ भाई ॥  
कैकइ कत जनमी जग माझा । जौँ जनमि त भइ काहे न बौँझा ॥  
कुल कलंकु जेहिँ जनमेउ मोही । अपजस भाजन प्रियजन द्रोही ॥  
को तिभुवन मोहि सरिस अभागी । गति असि तोरि मातु जेहि लागी ॥  
पितु सुरपुर बन रघुबर केतू । मैं केवल सब अनरथ हेतू ॥  
धिग मोहि भयउँ बेनु बन आगी । दुसह दाह दुख दूषन भागी ॥

दो०— मातु भरत के बचन मृदु सुनि पुनि उठी सँभारि ।

लिए उठाइ लगाइ उर लोचन मोचति बारि ॥ 164

सरल सुभाय मायें हियेँ लाए । अति हित मनहुँ राम फिरि आए ॥  
भंटेउ बहुरि लखन लघु भाई । सोकु सनेहु न हृदयें समाई ॥  
देखि सुभाउ कहत सबु काई । राम मातु अस काहे न होई ॥  
माताँ बच्छ बलि धीरज धरहू । कुसमउ समुझि सोक परिहरहू ॥  
जनि मानहु हियेँ हानि गलानी । काल करम गति अघटित जानी ॥  
काहुहि दोसु देहु जनि ताता । भा मोहि सब बिधि बाम बिधाता ॥

जो एतेहुँ दुख मोहि जिआवा । अजहुँ को जानइ का तेहि भावा ॥  
दो०— पितु आयस भूषन बसन तात तजे रघुबीर ।

बिसमउ हरषु न हृदयें कछु पहिरे बलकल चीर ॥ 165

मुख प्रसन्न मन रंग न रोषू । सब कर सब बिधि करि परितोषू ॥  
चले बिपिन सुनि सिय सँग लागी । रहइ न राम चरन अनुरागी ॥  
सुनतहिं लखनु चले उठि साथा । रहहिं न जतन किए रघुनाथा ॥  
तब रघुपति सबही सिरु नाई । चले संग सिय अरु लघु भाई ॥  
रामु लखनु सिय बनहि सिधाए । गइउँ न संग न प्रान पठाए ॥  
यहु सबु भा इन्ह आँखिन्ह आगें । तउ न तजा तनु जीव अभागें ॥  
मोहि न लाज निज नेहु निहारी । राम सरिस सुत मैं महतारी ॥  
जिए मरै भल भूपति जाना । मोर हृदय सत कुलिस समाना ॥

दो०— कौसल्या के बचन सुनि भरत सहित रनिवासु ।

ब्याकुल बिलपत राजगृह मानहुँ सोक नेवासु ॥ 166

बिलपहिं बिकल भरत दोउ भाई । कौसल्योँ लिए हृदयें लगाई ॥  
भाँति अनेक भरतु समुझाए । कहि बिबेकमय बचन सुनाए ॥  
भरतहुँ मातु सकल समुझाई । कहि पुरान श्रुति कथा सुहाई ॥  
छल बिहीन सुचि सरल सुबानी । बोले भरत जोरि जुग पानी ॥  
जे अघ मातु पिता सुत मारें । गाइ गोठ महिसुर पुर जारें ॥  
जे अघ तिय बालक बध कीन्हें । मीत महीपति माहुर दीन्हें ॥  
जे पातक उपपातक अहहीं । करम बचन मन भव कबि कहहीं ॥  
ते पातक मोहि होहुँ बिधाता । जाँ यहु होइ मोर मत माता ॥

दो०— जे परिहरि हरि हर चरन भजहिं भूतगन घोर ।

तेहि कइ गति मोहि देउ बिधि जाँ जननी मत मोर ॥ 167

बेचहिं बेदु धरमु दुहि लेहीं । पिसुन पराय पाप कहि दहीं ॥  
कपटी कुटिल कलहप्रिय कोधी । बेद बिदूषक बिस्व बिरोधी ॥  
लोभी लपट लोलुपचारा । जे ताकहिं परधनु परदारा ॥  
पावोँ मैं तिन्ह कै गति घोरा । जाँ जननी यहु संमत मोरा ॥  
जे नहिं साधुसंग अनुरागे । परमारथ पथ बिमुख अभागे ॥  
जे न भजहिं हरि नरतनु पाई । जिन्हहि न हरि हर सुजसु सोहाई ॥  
तजि श्रुतिपंथु बाम पथ चलहीं । बंचक बिरचि बेष जगु छलहीं ॥  
तिन्ह कै गति मोहि संकर देऊ । जननी जाँ यहु जानौं भेऊ ॥

दो०— मातु भरत के बचन सुनि साँचे सरल सुभार्ये ।

कहति राम प्रिय तात तुम्ह सदा बचन मन कार्ये ॥ 168

राम प्रानहु तें प्रान तुम्हारे । तुम्ह रघुपतिहि प्रानहु तें प्यारे ॥  
बिधु बिष चवै ०वै हिमु आगी । होइ बारिचर बारि बिरागी ॥  
भएँ ग्यानु बरु मिटै न मोहू । तुम्ह रामहि प्रतिकूल न होहू ॥  
मत तुम्हार यहु जो जग कहहीं । सो सपनेहुँ सुख सुगति न लहहीं ॥  
अस कहि मातु भरतु हियेँ लाए । थन पय ०वहिं नयन जल छाए ॥  
करत बिलाप बहुत यहि भाँती । बैठेहिं बीति गई सब राती ॥  
बामदेउ बसिष्ठ तब आए । सचिव महाजन सकल बोलाए ॥  
मुनि बहु भाँति भरत उपदेसे । कहि परमारथ बचन सुदेसे ॥

दो०— तात हृदयें धीरजु धरहु करहु जो अवसर आजु ।

उठे भरत गुर बचन सुनि करन कहेउ सबु साजु ॥ 169

नृपतनु बेद बिदित अन्हवावा । परम बिचित्र बिमानु बनावा ॥  
 गहि पद भरत मातु सब राखी । रहीं रानि दरसन अभिलाषी ॥  
 चंदन अगर भार बहु आए । अमित अनेक सुगंध सुहाए ॥  
 सरजु तीर रचि चिता बनाई । जनु सुरपुर सोपान सुहाई ॥  
 एहि बिधि दाह किया सब कीन्ही । बिधिवत न्हाइ तिलांजुलि दीन्ही ॥  
 सोधि सुमृति सब बेद पुराना । कीन्ह भरत दसगात बिधाना ॥  
 जहँ जस मुनिबर आयसु दीन्हा । तहँ तस सहस भौंति सबु कीन्हा ॥  
 भए बिसुद्ध दिए सब दाना । धेनु बाजि गज बाहन नाना ॥

दो०— सिंघासन भूषन बसन अन्न धरनि धन धाम ।

दिए भरत लहि भूमिसुर भे परिपूरन काम ॥ 170

पितु हित भरत कीन्हि जसि करनी । सो मुख लाख जाइ नहिं बरनी ॥  
 सुदिनु सोधि मुनिबर तब आए । सचिव महाजन सकल बोलाए ॥  
 बैठे राजसभौ सब जाई । पठए बोलि भरत दोउ भाई ॥  
 भरतु बसिष्ठ निकट बैठारे । नीति धरममय बचन उचारे ॥  
 प्रथम कथा सब मुनिबर बरनी । कैकइ कुटिल कीन्हि जसि करनी ॥  
 भूप धरमब्रतु सत्य सराहा । जेहिं तनु परिहरि प्रेमु निबाहा ॥  
 कहत राम गुन सील सुभाऊ । सजल नयन पुलकेउ मुनिराऊ ॥  
 बहुरि लखन सिय प्रीति बखानी । सोक सनेह मगन मुनि ग्यानी ॥

दो०— सुनहु भरत भावी प्रबल बिलखि कहेउ मुनिनाथ ।

हानि लाभु जीवनु मरनु जसु अपजसु बिधि हाथ ॥ 171

अस बिचारि केहि देइअ दोसू । ब्यरथ काहि पर कीजिअ रोसू ॥  
 तात बिचारु करहु मन माहीं । सोच जोगु दसरथु नृपु नाहीं ॥  
 सोचिअ बिप्र जो बेद बिहीना । तजि निज धरमु बिषय लयलीना ॥  
 सोचिअ नृपति जो नीति न जाना । जेहि न प्रजा प्रिय प्रान समाना ॥  
 सोचिअ बयसु कृपन धनवानू । जो न अतिथि सिव भगति सुजानू ॥  
 सोचिअ सूद्र साधु अवमानी । मुखर मानप्रिय ग्यान गुमानी ॥  
 सोचिअ पुनि पति बंचक नारी । कुटिल कलहपिय इच्छाचारी ॥  
 सोचिअ बटु निज ब्रतु परिहरई । जो नहिं गुर आयसु अनुसरई ॥

दो०— सोचिअ गृही जो मोह बस करइ करम पथ त्याग ।

सोचिअ जती प्रपंच रत बिगत बिबेक बिराग ॥ 172

बैखानस सोइ सोचै जोगू । तपु बिहाइ जेहि भावइ भोगू ॥  
 सोचिअ पिसुन अकारन कोधी । जननि जनक गुर बंधु बिरोधी ॥  
 सब बिधि सोचिअ पर अपकारी । निज तनु पोषक निरदय भारी ॥  
 सोचनीय सबहीं बिधि सोई । जो न छाडि छलु हरि जन होई ॥  
 सोचनीय नहिं कोसलराऊ । भुवन चारिदस प्रगट प्रभाऊ ॥  
 भयउ न अहइ न अब होनिहारा । भूप भरत जस पिता तुम्हारा ॥  
 बिधि हरि हरु सुरपति दिसिनाथा । बरनहिं सब दसरथ गुन गाथा ॥

दो०— कहहु तात केहि भौंति कोउ करिहि बड़ाई तासु ।

राम लखन तुम्ह सत्रुहन सरिस सुअन सुचि जासु ॥ 173

सब प्रकार भूपति बड़भागी । बादि बिषादु करिअ तेहि लागी ॥  
 यहु सुनि समुझि सोचु परिहरहू । सिर धरि राज रजायसु करहू ॥  
 रायँ राजपदु तुम्ह कहँ दीन्हा । पिता बचनु फुर चाहिअ कीन्हा ॥  
 तजे रामु जेहिं बचनहि लागी । तनु परिहरेउ राम बिरहागी ॥  
 नृपहि बचन प्रिय नहिं प्रिय प्राना । करहु तात पितु बचन प्रवाना ॥

करहु सीस धरि भूप रजाई । हइ तुम्ह कहँ सब भॉति भलाई ॥  
 परसुराम पितु अग्या राखी । मारी मातु लोक सब साखी ॥  
 तनय जजातिहि जौबनु दयऊ । पितु अग्यो अघ अजसु न भयऊ ॥  
 दो०— अनुचित उचित बिचारु तजि जे पालहिं पितु बैन ।  
 ते भाजन सुख सुजस के बसहिं अमरपति ऐन ॥ 174  
 अवसि नरेस बचन फुर करहू । पालहु प्रजा सोकु परिहरहू ॥  
 सुरपुर नृपु पाइहि परितोषू । तुम्ह कहँ सुकृत सुजसु नहिं दोषू ॥  
 बेद बिदित संमत सबही का । जेहि पितु देइ सो पावइ टीका ॥  
 करहु राजु परिहरहु गलानी । मानहु मोर बचन हित जानी ॥  
 सुनि सुखु लहब राम बैदेहीं । अनुचित कहब न पंडित केहीं ॥  
 कौसल्यादि सकल महतारीं । तेउ प्रजा सुख होहिं सुखारीं ॥  
 परम तुम्हार राम कर जानिहि । सो सब बिधि तुम्ह सन भल मानिहि ॥  
 सौंपेहु राजु राम के आएँ । सेवा करेहु सनेह सुहाएँ ॥

दो०— कीजिअ गुर आयसु अवसि कहहिं सचिव कर जोरि ।  
 रघुपति आएँ उचित जस तस तब करब बहोरि ॥ 175  
 कौसल्या धरि धीरजु कहई । पूत पथ्य गुर आयसु अहई ॥  
 सो आदरिअ करिअ हित मानी । तजिअ बिषादु काल गति जानी ॥  
 बन रघुपति सुरपति नरनाहू । तुम्ह एहि भॉति तात कदराहू ॥  
 परिजन प्रजा सचिव सब अंबा । तुम्हही सुत सब कहँ अवलंबा ॥  
 लखि बिधि बाम कालु कठिनाई । धीरजु धरहु मातु बलि जाई ॥  
 सिर धरि गुर आयसु अनुसरहू । प्रजा पालि परिजन दुखु हरहू ॥  
 गुर के बचन सचिव अभिनंदनु । सुने भरत हिय हित जनु चंदनु ॥  
 सुनी बहोरि मातु मृदु बानी । सील सनेह सरल रस सानी ॥

छ०— सानी सरल रस मातु बानी सुनि भरतु ब्याकुल भए ।  
 लोचन सरोरुह ठेवत सींचत बिरह उर अंकुर नए ॥  
 सो दसा देखत समय तेहि बिसरी सबहि सुधि देह की ।  
 तुलसी सराहत सकल सादर सीवें सहज सनेह की ॥

सो०— भरतु कमल कर जोरि धीर धुरंधर धीर धरि ।  
 बचन अमिअँ जनु बोरि देत उचित उत्तर सबहि ॥ 176  
 मोहि उपदेसु दीन्ह गुर नीका । प्रजा सचिव संमत सबही का ॥  
 मातु उचित धरि आयसु दीन्हा । अवसि सीस धरि चाहउँ कीन्हा ॥  
 गुर पितु मातु स्वाभि हित बानी । सुनि मन मुदित करिअ भलि जानी ॥  
 उचित कि अनुचित किऐँ बिचारु । धरमु जाइ सिर पातक भारु ॥  
 तुम्ह तौ देहु सरल सिख सोई । जो आचरत मोर भल होई ॥  
 जद्यपि यह समुझत हउँ नीकें । तदपि होत परितोषु न जी कें ॥  
 अब तुम्ह बिनय मोरि सुनि लेहू । मोहि अनुहरत सिखावनु देहू ॥  
 उतरु देउँ छमब अपराधू । दुखित दोष गुन गनहिं न साधू ॥

दो०— पितु सुरपुर सिय रामु बन करन कहहु मोहि राजु ।  
 एहि तँ जानहु मोर हित कै आपन बड़ काजु ॥ 177  
 हित हमार सियपति सेवकाई । सो हरि लीन्ह मातु कुटिलाई ॥  
 मैं अनुमानि दीख मन माहीं । आन उपायँ मोर हित नाहीं ॥  
 सोक समाजु राजु केहि लेखें । लखन राम सिय बिनु पद देखें ॥  
 बादि बसन बिनु भूषन भारु । बादि बिरति बिनु ब्रह्म बिचारु ॥

सरुज सरीर बादि बहु भोगा । बिनु हरिभगति जायँ जप जोगा ॥  
जायँ जीव बिनु देह सुहाई । बादि मोर सबु बिनु रघुराई ॥  
जाउँ राम पहिँ आयसु देहू । एकहिँ आँक मोर हित एहू ॥  
मोहि नृप करि भल आपन चहहू । सोउ सनेह जड़ता बस कहहू ॥  
दो०— कैकई सुअ कुटिलमति राम बिमुख गतलाज ।

तुम्ह चाहत सुखु मोहबस मोहि से अधम कें राज ॥ 178  
कहउँ साँचु सब सुनि पतिआहू । चाहिअ धरमसील नरनाहू ॥  
मोहि राजु हठि देइहहु जबहीं । रसा रसातल जाइहि तबहीं ॥  
मोहि समान को पाप निवासू । जेहि लागि सीय राम बनबासू ॥  
रायँ राम कहँ काननु दीन्हा । बिछुरत गमनु अमरपुर कीन्हा ॥  
मैं सटु सब अनरथ कर हेतू । बैठ बात सब सुनउँ सचेतू ॥  
बिनु रघुबीर बिलोकि अबासू । रहे प्रान सहि जग उपहासू ॥  
राम पुनीत बिषय रस रूखे । लोलुप भूमि भोग के भूखे ॥  
कहँ लागि कहीं हृदय कठिनाई । निदरि कलिसु जेहिँ लही बड़ाई ॥

दो०— कारन तें कारजु कठिन होइ दोसु नहिँ मोर ।  
कुलिस अरिथ तें उपल तें लोह कराल कठोर ॥ 179  
कैकई भव तनु अनुरागे । पावँर प्रान अघाइ अभागे ॥  
जाँ प्रिय बिरहँ प्रान प्रिय लागे । देखब सुनब बहुत अब आगे ॥  
लखन राम सिय कहँ बनू दीन्हा । पठइ अमरपुर पति हित कीन्हा ॥  
लीन्ह बिधवपन अपजसु आपू । दीन्हेउ प्रजहि सोकु संतापू ॥  
मोहि दीन्ह सुखु सुजसु सुराजू । कीन्ह कैकई सब कर काजू ॥  
एहि तें मोर काह अब नीका । तेहि पर देन कहहु तुम्ह टीका ॥  
कैकइ जठर जनमि जग माहीं । यह मोहि कहँ कछु अनुचित नाहीं ॥  
मोरि बात सब बिधिहिँ बनाई । प्रजा पाँच कत करहु सहाई ॥

दो०— ग्रह ग्रहीत पुनि बात बस तेहि पुनि बीछी मार ।  
तेहि पिआइअ बारुनी कहहु काह उपचार ॥ 180  
कैकइ सुअन जोगु जग जोई । चतुर बिरंचि दीन्ह मोहि सोई ।  
दसरथ तनय राम लघु भाई । दीन्ह मोहि बिधि बादि बड़ाई ॥  
तुम्ह सब कहहु कढ़ावन टीका । राय रजायसु सब कहँ नीका ॥  
उतरु देउँ केहि बिधि केहि केही । कहहु सुखेन जथा रुचि जेही ॥  
मोहि कुमातु समेत बिहाई । कहहु कहिहि के कीन्ह भलाई ॥  
मो बिनु को सचराचर माहीं । जेहि सिय रामु प्रानप्रिय नाहीं ॥  
परम हानि सब कहँ बड़ लाहू । अदिनु मोर नहिँ दूषन काहू ॥  
संसय सील प्रेम बस अहहू । सबुइ उचित सब जो कछु कहहू ॥

दो०— राम मातु सुठि सरलचित मो पर प्रेमु बिसेषि ।  
कहइ सुभाय सनेह बस मोरि दीनता देखि ॥ 181  
गुर बिबेक सागर जगु जाना । जिन्हहि बिस्व कर बदर समाना ॥  
मो कहँ तिलक साज सज सोऊ । भएँ बिधि बिमुख बिमुख सबु कोऊ ॥  
परिहरि रामु सीय जग माहीं । कोउ न कहिहि मोर मत नाहीं ॥  
सो मैं सुनब सहब सुखु मानी । अंतहुँ कीच तहाँ जहँ पानी ॥  
डरु न मोहि जग कहिहि कि पोचू । परलोकहु कर नाहिन सोचू ॥  
एकइ उर बस दसह दवारी । मोहि लागि भे सिय रामु दुखारी ॥  
जीवन लाहु लखन भल पावा । सबु तजि राम चरन मनु लावा ॥  
मोर जनम रघुबर बन लागी । झूठ काह पछिताउँ अभागी ॥

दो०— आपनि दारुन दीनता कहउँ सबहि सिरु नाइ ।

देखें बिनु रघुनाथ पद जिय कै जरनि न जाइ ॥ 182

आन उपाउ मोहि नहिं सूझा । को जिय कै रघुबर बिनु बूझा ॥  
एकहिं ओँक इहइ मन माहीं । प्रातकाल चलिहउँ प्रभु पाहीं ॥  
जद्यपि मैं अनभल अपराधी । भै मोहि कारन सकल उपाधी ॥  
तदपि सरन सनमुख मोहि देखी । छमि सब करिहहिं कृपा बिसेषी ॥  
सील सकुच सुठि सरल सुभाऊ । कृपा सनह सदन रघुराऊ ॥  
अरिहुक अनभल कीन्ह न रामा । मैं सिसु सेवक जद्यपि बामा ॥  
तुम्ह पै पाँच मोर भल मानी । आयसु आसिष देहु सुबानी ॥  
जेहिं सुनि बिनय मोहि जनु जानी । आवहिं बहुरि रामु रजधानी ॥

दो०— जद्यपि जनमु कुमातु तैं मैं सतु सदा सदोस ।

आपन जानि न त्यागिहहिं मोहि रघुबीर भरोस ॥ 183

भरत बचन सब कहँ प्रिय लागे । राम सनेह सुधौं जनु पागे ॥  
लोग बियोग बिषम बिष दागे । मंत्र सबीज सुनत जनु जागे ॥  
मातु सचिव गुर पुर नर नारी । सकल सनेहँ बिकल भए भारी ॥  
भरतहि कहहिं सराहि सराही । राम प्रेम मूरति तनु आही ॥  
तात भरत अस काहे न कहहू । प्रान समान राम प्रिय अहहू ॥  
जो पावँरु अपनी जड़ताई । तुम्हहि सुगाइ मातु कुटिलाई ॥  
सो सतु कोटिक पुरुष समेता । बसिहि कलप सत नरक निकेता ॥  
अहि अघ अवगुन नहिं मनि गहई । हरइ गरल दुख दारिद दहई ॥

दो०— अवसि चलिअ बन रामु जहँ भरत मंत्रु भल कीन्ह ।

सोक सिंधु बूड़त सबहि तुम्ह अवलंबनु दीन्ह ॥ 184

भा सब कें मन मोदु न थोरा । जनु घन धुनि सुनि चातक मोरा ॥  
चलत प्रात लखि निरनउ नीके । भरतु प्रानप्रिय भे सबही के ॥  
एक सराहहिं भरत सनेहू । कोइ कह नृपति निबाहेउ नेहू ॥  
मुनिहि बंदि भरतहि सिरु नाई । चले सकल घर बिदा कराई ॥  
धन्य भरत जीवनु जग माहीं । सीलु सनेहु सराहत जाहीं ॥  
कहहिं परसपर भा बड़ काजू । सकल चलै कर साजहिं साजू ॥  
जेहि राखहिं रहु घर रखवारी । सो जानइ जनु गरदनि मारी ॥  
कोउ कह रहन कहिअ नहिं काहू । को न चहइ जग जीवन लाहू ॥

दो०— जरउ सो संपति सदन सुखु सुहृद मातु पितु भाइ ।

सनमुख होत जो राम पद करै न सहस सहाइ ॥ 185

घर घर साजहिं बाहन नाना । हरषु हृदयँ परभात पयाना ॥  
भरत जाइ घर कीन्ह बिचारू । नगरु बाजि गज भवन भँडारू ॥  
संपति सब रघुपति कै आही । जाँ बिनु जतन चलोँ तजि ताही ॥  
तौ परिनाम न मोरि भलाई । पाप सिरोमनि साईँ दोहाई ॥  
करइ स्वामि हित सेवकु सोई । दूषन कोटि देइ किन कोई ॥  
अस बिचारि सुचि सेवक बोले । जे सपनेहुँ निज धरम न डोले ॥  
कहि सबु मरमु धरमु भल भाषा । जो जेहि लायक सो तेहिं राखा ॥  
करि सबु जतनु राखि रखवारे । राम मातु पहिं भरतु सिधारे ॥

दो०— आरत जननी जानि सब भरत सनेह सुजान ।

कहेउ बनावन पालकीं सजन सुखासन जान ॥ 186

चक्क चक्कि जिमि पुर नर नारी । चहत प्रात उर आरत भारी ॥  
जागत सब निसि भयउ बिहाना । भरत बोलाए सचिव सुजाना ॥

कहउ लेहु सबु तिलक समाजू । बनहिं देब मुनि रामहिं राजू ॥  
 बेगि चलहु सुनि सचिव जोहारै । तुरत तुरग रथ नाग सँवारै ॥  
 अरुंधती अरु अगिनि समाऊ । रथ चढ़ि चले प्रथम मुनिराऊ ॥  
 बिप्र बृंद चढ़ि बाहन नाना । चले सकल तप तेज निधाना ॥  
 नगर लोग सब सजि सजि जाना । चित्रकूट कहँ कीन्ह पयाना ॥  
 सिबिका सुभग न जाहिं बखानी । चढ़ि चढ़ि चलत भई सब रानी ॥

दो०— सौंपि नगर सुचि सेवकनि सादर सकल चलाइ ।

सुमिरि राम सिय चरन तब चले भरत दोउ भाइ ॥ 187

राम दरस बस सब नर नारी । जनु करि करिनि चले तकि बारी ॥  
 बन सिय रामु समुझि मन माहीं । सानुज भरत पयादेहिं जाहीं ॥  
 देखि सनेहु लोग अनुरागे । उतरि चले हय गय रथ त्यागे ॥  
 जाइ समीप राखि निज डोली । राम मातु मृदु बानी बोली ॥  
 तात चढ़हु रथ बलि महतारी । होइहि प्रिय परिवारु दुखारी ॥  
 तुम्हरें चलत चलिहि सबु लोगू । सकल सोक कृस नहिं मग जोगू ॥  
 सिर धरि बचन चरन सिरु नाई । रथ चढ़ि चलत भए दोउ भाई ॥  
 तमसा प्रथम दिवस करि बासू । दूसर गोमति तीर निवासू ॥

दो०— पय अहार फल असन एक निसि भोजन एक लोग ।

करत राम हित नेम ब्रत परिहरि भूषन भोग ॥ 188

सई तीर बसि चले बिहाने । सुंगबेरपुर सब निअराने ॥  
 समाचार सब सुने निषादा । हृदयें बिचार करइ सबिषादा ॥  
 कारन कवन भरतु बन जाहीं । है कछु कपट भाउ मन माहीं ॥  
 जौं पै जियें न होति कुटिलाई । तौ कत लीन्ह संग कटकाई ॥  
 जानहिं सानुज रामहि मारी । करउँ अकंटक राजु सुखारी ॥  
 भरत न राजनीति उर आनी । तब कलंकु अब जीवन हानी ॥  
 सकल सुरासुर जुरहिं जुझारा । रामहि समर न जीतनिहारा ॥  
 का आचरजु भरतु अस करहीं । नहिं बिष बेलि अमिअ फल फरहीं ॥

दो०— अस बिचारि गुहँ ग्याति सन कहेउ सजग सब होहु ।

हथवाँसहु बोरहु तरनि कीजिअ घाटारोहु ॥ 189

होहु सँजोइल रोकहु घाटा । ठाटहु सकल मरै के ठाटा ॥  
 सनमुख लोह भरत सन लेऊँ । जिअत न सुरसरि उतरन देऊँ ॥  
 समर मरनु पुनि सुरसरि तीरा । राम काजु छनभंगु सरीरा ॥  
 भरत भाइ नृपु मै जन सोचू । बड़ें भाग असि पाइअ मीचू ॥  
 स्वामि काज करिहउँ रन रारी । जस धवलिहउँ भुवन दस चारी ॥  
 तजउँ प्रान रघुनाथ निहोरें । दुहँ हाथ मुद मोदक मोरें ॥  
 साधु समाज न जाकर लेखा । राम भगत महुँ जासु न रेखा ॥  
 जार्ये जिअत जग सो महि भारू । जननी जौबन बिटप कुठारू ॥

दो०— बिगत बिषाद निषादपति सबहि बढाइ उछाहु ।

सुमिरि राम मागेउ तुरत तरकस धनुष सनाहु ॥ 190

बेगहु भाइहु सजहु सँजोऊ । सुनि रजाइ कदराइ न कोऊ ॥  
 भलेहिं नाथ सब कहहिं सहरषा । एकहिं एक बढावइ करषा ॥  
 चले निषाद जोहारि जोहारी । सूर सकल रन रूचइ रारी ॥  
 सुमिरि राम पद पंकज पनहीं । भाथीं बाँधि चढाइन्हि धनहीं ॥  
 अँगरी पहिरि कूँड़ि सिर धरहीं । फरसा बाँस सेल सम करहीं ॥  
 एक कुसल अति ओड़न खौंड़े । कूदहिं गगन मनहुँ छिति छौंड़े ॥

निज निज साजु समाजु बनाई । गुह राउतहि जोहारे जाई ॥  
देखि सुभट सब लायक जाने । लै लै नाम सकल सनमाने ॥

दो०— भाइहु लावहु धोख जनि आजु काज बड़ मोहि ।

सुनि सरोष बोले सुभट बीर अधीर न होहि ॥ 191

राम प्रताप नाथ बल तोरे । करहि कटकु बिनु भट बिनु घोरे ॥

जीवत पाउ न पाछें धरहीं । रुंड मुंडमय मेदिनि करहीं ॥

दीख निषादनाथ भल टोलू । कहेउ बजाउ जुझाऊ ढोलू ॥

एतना कहत छीक भइ बाँए । कहेउ सगुनिअन्ह खेत सुहाए ॥

बूढु एकु कह सगुन बिचारी । भरतहि मिलिअ न होइहि रारी ॥

रामहि भरतु मनावन जाहीं । सगुन कहइ अस बिग्रहु नाही ॥

सुनि गुह कहइ नीक कह बूढा । सहसा करि पछिताहिं बिमूढा ॥

भरत सुभाउ सीलु बिनु बूझें । बड़ि हित हानि जानि बिनु जूझें ॥

दो०— गहह घाट भट समिटि सब लेउं मरम मिलि जाइ ।

बूझि मित्र अरि मध्य गति तस तब करिहउं आइ ॥ 192

लखब सनेहु सुभायें सुहाएँ । बैरु प्रीति नहिं दुरईं दुराएँ ॥

अस कहि भेंट सँजोवन लागे । कंद मूल फल खग मृग मागे ॥

मीन पीन पाठीन पुराने । भरि भरि भार कहारन्ह आने ॥

मिलन साजु सजि मिलन सिधाए । मंगल मूल सगुन सुभ पाए ॥

देखि दूरि तें कहि निज नामू । कीन्ह मुनीसहि दंड प्रनामू ॥

जानि रामप्रिय दीन्हि असीसा । भरतहि कहेउ बुझाइ मुनीसा ॥

राम सखा सुनि संदनु त्यागा । चले उतरि उमगत अनुरागा ॥

गाउं जाति गुहँ नाउं सुनाई । कोन्ह जोहारु माथ महि लाई ॥

दो०— करत दंडवत देखि तेहि भरत लीन्ह उर लाइ ।

मनहुँ लखन सन भेंट भइ प्रेमु न हृदयें समाइ ॥ 193

भेंटत भरतु ताहि अति प्रीती । लोग सिहाहिं प्रेम कै रीती ॥

धन्य धन्य धुनि मंगल मूला । सुर सराहि तेहि बरिसहिं फूला ॥

लोक बेद सब भौंति समाना । नहिं जप तप अरु बेद पुराना ॥

तेहि भरि अंक राम लघु भ्राता । मिलत पुलक परिपूरित गाता ॥

राम राम कहि जे जमुहाहीं । तिन्हहि न पाप पुंज समुहाहीं ॥

यह तौ राम लाइ उर लीन्हा । कुल समेत जगु पावन कीन्हा ॥

करमनास जलु सुरसरि परई । तेहि को कहहु सीस नहिं धरई ॥

उलटा नामु जपत जगु जाना । बालमीकि भए ब्रह्म समाना ॥

दो०— स्वपच सबर खस जमन बहु कनरा कोल किरात ।

रामु कहत पावन परम होत भुवन बिख्यात ॥ 194

नहिं अचिरिजु जुग जुग चलि आई । केहि न दीन्हि रघुबीर बड़ाई ॥

राम नाम महिमा सुर कहहीं । सुनि सुनि अवधलोग सुखु लहहीं ॥

रामसखहि मिलि भरत सप्रेमा । पूँछी कुसल सुमंगल खेमा ॥

देखि भरत कर सीलु सनेहू । भा निषाद तेहि समय बिदेहू ॥

सकुच सनेहु मोदु मन बाढा । भरतहि चितवत एकटक ठाढा ॥

धरि धीरजु पद बंदि बहोरी । बिनय सप्रेम करत कर जोरी ॥

कुसल मूल पद पंकज पेखी । मैं तिहुँ काल कुसल निज लेखी ॥

अब प्रभु परम अनुग्रह तोरें । सहित कोटि कुल मंगल मोरें ॥

दो०— समुझि मोरि करतूति कुलु प्रभु महिमा जियें जोइ ।

जो न भजइ रघुबीर पद जग बिधि बंचित सोइ ॥ 195

कपटी कायर कुमति कुजाती । लोक बेद बाहेर सब भौंती ॥  
 राम कीन्ह आपन जबही तें । भयउँ भुवन भूषण तबही तें ॥  
 देखि प्रीति सुनि बिनय सुहाई । मिलेउ बहोरि भरत लघु भाई ॥  
 कहि निषाद निज नाम सुबानी । सादर सकल जोहारी रानी ॥  
 जानि लखन सम देहिं असीसा । जिअहु सुखी सय लाख बरीसा ॥  
 निरखि निषादु नगर नर नारी । भए सुखी जनु लखनु निहारी ॥  
 कहहिं लहेउ एहिं जीवन लाहू । भेंटेउ रामभद्र भरि बाहू ॥  
 सुनि निषादु निज भाग बड़ाई । प्रमुदित मन लइ चलेउ लेवाई ॥  
 दो०— सनकारे सेवक सकल चले स्वामि रुख पाइ ।

घर तरु तर सर बाग बन बास बनाएन्हि जाइ ॥ 196

मासपारायण, अठारवौं विश्राम

सूंगबेरपुर भरत दीख जब । भे सनेहें सब अंग सिथिल तब ॥  
 सोहत दिऐं निषादहि लागू । जनु तनु धरें बिनय अनुरागू ॥  
 एहि बिधि भरत सेनु सबु संगी । दीखि जाइ जग पावनि गंगा ॥  
 रामघाट कहें कीन्ह प्रनामू । भा मनु मगनु मिले जनु रामू ॥  
 करहिं प्रनाम नगर नर नारी । मुदित ब्रह्ममय बारि निहारी ॥  
 करि मज्जनु मागहिं कर जोरी । रामचंद्र पद प्रीति न थोरी ॥  
 भरत कहेउ सुरसरि तव रेनू । सकल सुखद सेवक सुरधेनू ॥  
 जोरि पानि बर मागउँ एहू । सीय राम पद सहज सनेहू ॥

दो०— एहि बिधि मज्जनु भरतु करि गुर अनुसासन पाइ ।

मातु नहानीं जानि सब डेरा चले लवाई ॥ 197

जहें तहें लोगन्ह डेरा कीन्हा । भरत सोधु सबही कर लीन्हा ॥  
 सुर सेवा करि आयसु पाई । राम मातु पहिं गे दोउ भाई ॥  
 चरन चौंपि कहि कहि मृदु बानी । जननीं सकल भरत सनमानी ॥  
 भाइहि सौंपि मातु सेवकाई । आपु निषादहिं लीन्ह बोलाई ॥  
 चले सखा कर सौं कर जोरें । सिथिल सरीरु सनेह न थोरें ॥  
 पूँछत सखहि सो ठाउँ देखाऊ । नेकु नयन मन जरनि जुडाऊ ॥  
 जहें सिय रामु लखनु निसि सोए । कहत भरे जल लोचन कोए ॥  
 भरत बचन सुनि भयउ बिषादू । तुरत तहाँ लइ गयउ निषादू ॥

दो०— जहें सिंसुपा पुनीत तर रघुबर किय विश्रामु ।

अति सनेहें सादर भरत कीन्हेउ दंड प्रनामु ॥ 198

कुस सौंथरी निहारि सुहाई । कीन्ह प्रनामु प्रदच्छिन जाई ॥  
 चरन रेख रज आँखिन्ह लाई । बनइ न कहत प्रीति अधिकाई ॥  
 कनक बिंदु दुइ चारिक देखे । राखे सीस सीय सम लेखे ॥  
 सजल बिलोचन हृदय गलानी । कहत सखा सन बचन सुबानी ॥  
 श्रीहत सीय बिरहें दुतिहीना । जथा अवध नर नारि बिलीना ॥  
 पिता जनक देउं पटतर केही । करतल भोगु जोगु जग जेही ॥  
 ससुर भानुकुल भानु भुआलू । जेहि सिहात अमरावतिपालू ॥  
 प्राननाथ रघुनाथ गोसाई । जो बड होत सो राम बड़ाई ॥

दो०— पति देवता सुतीय मनि सीय सौंथरी देखि ।

बिहरत हृदउ न हहरि हर पबि तें कठिन बिसेषि ॥ 199

लालन जोगु लखन लघु लोने । भे न भाइ अस अहहिं न होने ॥  
 पुरजन प्रिय पितु मातु दुलारे । सिय रघुबीरहि प्रानपिआरे ॥  
 मृदु मूरति सुकुमार सुभाऊ । तात बाउ तन लाग न काऊ ॥

ते बन सहहिं बिपति सब भौंती । निदरे कोटि कुलिस एहिं छाती ॥  
राम जनमि जगु कीन्ह उजागर । रूप सील सुख सब गुन सागर ॥  
पुरजन परिजन गुर पितु माता । राम सुभाउ सबहि सुखदाता ॥  
बैरिउ राम बड़ाई करहीं । बोलनि मिलनि बिनय मन हरहीं ॥  
सारद कोटि कोटि सत सेवा । करि न सकहिं प्रभु गुन गन लेखा ॥

दो०— सुखस्वरूप रघुबंसमनि मंगल मोद निधान ।

ते सोवत कुस डासि महि बिधि गति अति बलवान ॥ 200  
राम सुना दुखु कान न काऊ । जीवनतरु जिमि जोगवइ राऊ ॥  
पलक नयन फनि मनि जेहि भौंती । जोगवहिं जननि सकल दिन राती ॥  
ते अब फिरत बिपिन पदचारी । कंद मूल फल फूल अहारी ॥  
धिग कैकई अमंगल मूला । भइसि प्रान प्रियतम प्रतिकूला ॥  
मैं धिग धिग अघ उदधि अभागी । सबु उतपातु भयउ जेहि लागी ॥  
कुल कलंकु करि सृजेउ बिधातौ । साईदोह मोहि कीन्ह कुमातौ ॥  
सुनि सप्रेम समुझाव निषादू । नाथ करिअ कत बादि बिषादू ॥  
राम तुम्हहि प्रिय तुम्ह प्रिय रामहि । यह निरजोसु दोसु बिधि बामहि ॥

छं०— बिधि बाम की करनी कठिन जेहिं मातु कीन्ही बावरी ।

तेहि राति पुनि पुनि करहिं प्रभु सादर सरहना रावरी ॥  
तुलसी न तुम्ह सो राम प्रीतमु कहतु हौं सौंहें किएँ ।  
परिनाम मंगल जानि अपने आनिए धीरजु हिएँ ॥

सो०— अंतरजामी रामु सकुच सप्रेम कृपायतन ।

चलिअ करिअ बिश्रामु यह बिचारि दृढ़ आनि मन ॥ 201  
सखा बचन सुनि उर धरि धीरा । बास चले सुमिरत रघुबीरा ॥  
यह सुधि पाइ नगर नर नारी । चले बिलोकन आरत भारी ॥  
परदखिना करि करहिं प्रनामा । देहिं कैकइहि खोरि निकामा ॥  
भरि भरि बारि बिलोचन लेहीं । बाम बिधातहि दूषन देहीं ॥  
निंदहिं आपु सराहि निषादहि । को कहि सकइ बिमोह बिषादहि ॥  
एहि बिधि राति लोगु सबु जागा । भा भिनुसार गुदारा लागा ॥  
गुरहि सुनावे चढाइ सुहाई । नई नाव सब मातु चढाई ॥  
दंड चारि महँ भा सबु पारा । उतरि भरत तब सबहि सँभारा ॥

दो०— प्रातकिया करि मातु पद बंदि गुरहि सिरु नाइ ।

आगें किए निषाद गन दीन्हेउ कटकु चलाइ ॥ 202  
कियउ निषादनाथु अगुआई । मातु पालकीं सकल चलाई ॥  
साथ बोलाइ भाइ लघु दीन्हा । बिप्रन्ह सहित गवनु गुर कीन्हा ॥  
आपु सुरसरिहि कीन्ह प्रनामू । सुमिरे लखन सहित सिय रामू ॥  
गवने भरत पयादेहिं पाए । कोतल संग जाहिं डोरिआए ॥  
कहहिं सुसेवक बारहिं बारा । होइअ नाथ अस्व असवारा ॥  
रामु पयादेहि पायें सिधाए । हम कहँ रथ गज बाजि बनाए ॥  
सिर भर जाउँ उचित अस मोरा । सब तें सेवक धरमु कठोरा ॥  
देखि भरत गति सुनि मृदु बानी । सब सेवक गन गरहिं गलानी ॥

दो०— भरत तीसरे पहर कहँ कीन्ह प्रबेसु प्रयाग ।

कहत राम सिय राम सिय उमगि उमगि अनुराग ॥ 203  
झलका झलकत पायन्ह कैसैं । पंकज कोस ओस कन जैसैं ॥  
भरत पयादेहिं आए आजू । भयउ दुखित सुनि सकल समाजू ॥  
खबरि लीन्ह सब लोग नहाए । कीन्ह प्रनामू त्रिबेनिहिं आए ॥

सबिधि सितासित नीर नहाने । दिए दान महिसुर सनमाने ॥  
 देखत स्यामल धवल हलोरे । पुलकि सरीर भरत कर जोरे ॥  
 सकल काम प्रद तीरथराऊ । बेद बिदित जग प्रगट प्रभाऊ ॥  
 मागउँ भीख त्यागि निज धरमू । आरत काह न करइ कुकरमू ॥  
 अस जिये जानि सुजान सुदानी । सफल करहिं जग जाचक बानी ॥

दो०— अरथ न धरम न काम रुचि गति न चहउँ निरबान ।

जनम जनम रति राम पद यह बरदानु न आन ॥ 204  
 जानहुँ राम कटिल करि मोही । लोग कहउ गुर साहिब द्रोही ॥  
 सीता राम चरन रति मोरें । अनुदिन बढ़उ अनुग्रह तोरें ॥  
 जलदु जनम भरि सुरति बिसारउ । जाचत जलु पबि पाहन डारउ ॥  
 चातकु रटनि घटें घटि जाई । बढें प्रेमु सब भौति भलाई ॥  
 कनकहिं बान चढइ जिमि दाहें । तिमि प्रियतम पद नेम निबाहें ॥  
 भरत बचन सुनि माझ त्रिबेनी । भइ मृदु बानि सुमंगल देनी ॥  
 तात भरत तुम्ह सब बिधि साधू । राम चरन अनुराग अगाधू ॥  
 बादि गलानि करहु मन माहीं । तुम्ह सम रामहि कोउ प्रिय नाही ॥

दो०— तनु पुलकेउ हिये हरषु सुनि बेनि बचन अनुकूल ।

भरत धन्य कहि धन्य सुर हरषित बरषहिं फूल ॥ 205  
 प्रमुदित तीरथराज निवासी । बैखानस बटु गृही उदासी ॥  
 कहहिं परसपर मिलि दस पाँचा । भरत सनेहु सीलु सुचि साँचा ॥  
 सुनत राम गुन ग्राम सुहाए । भरद्वाज मुनिबर पहिं आए ॥  
 दंड प्रनामु करत मुनि देखे । मूरतिमंत भाग्य निज लेखे ॥  
 धाइ उठाइ लाइ उर लीन्हे । दीन्हि असीस कृतारथ कीन्हे ॥  
 आसनु दीन्ह नाइ सिरु बैठे । चहत सकुच गृहें जनु भजि पैठे ॥  
 मुनि पूँछब कछु यह बड़ सोचू । बोले रिषि लखि सीलु सँकोचू ॥  
 सुनहु भरत हम सब सुधि पाई । बिधि करतब पर किछु न बसाई ॥

दो०— तुम्ह गलानि जिये जनि करहु समुझि मातु करतूति ।

तात कैकइहि दोसु नहिं गई गिरा मति धूति ॥ 206  
 यहउ कहत भल कहिहि न कोऊ । लोकु बेदु बुध संमत दोऊ ॥  
 तात तुम्हार बिमल जसु गाई । पाइहि लोकउ बेदु बड़ाई ॥  
 लोक बेद संमत सबु कहई । जेहि पितु देइ राजु सो लहई ॥  
 राउ सत्यब्रत तुम्हहि बोलाई । देत राजु सुखु धरमु बड़ाई ॥  
 राम गवनु बन अनरथ मूला । जो सुनि सकल बिस्व भइ सूला ॥  
 सो भावी बस रानि अयानी । करि कुचालि अंतहुँ पछितानी ॥  
 तहँउँ तुम्हार अलप अपराधू । कहै सो अधम अयान असाधू ॥  
 करतेहु राजु त तुम्हहि न दोषू । रामहि होत सुनत संतोषू ॥

दो०— अब अति कीन्हेहु भरत भल तुम्हहि उचित मत एहु ।

सकल सुमंगल मूल जग रघुबर चरन सनेहु ॥ 207  
 सो तुम्हार धनु जीवनु प्राना । भूरिभाग को तुम्हहि समाना ॥  
 यह तुम्हार आचरजु न ताता । दसरथ सुअन राम प्रिय भ्राता ॥  
 सुनहु भरत रघुबर मन माहीं । पेम पात्रु तुम्ह सम कोउ नाही ॥  
 लखन राम सीतहि अति प्रीती । निसि सब तुम्हहि सराहत बीती ॥  
 जाना मरमु नहात प्रयागा । मगन होहिं तुम्हरे अनुरागा ॥  
 तुम्ह पर अस सनेहु रघुबर केँ । सुख जीवन जग जस जड़ नर केँ ॥

यह न अधिक रघुबीर बड़ाई । प्रनत कुटुंब पाल रघुराई ॥  
 तुम्ह तौ भरत मोर मत एहू । धरें देह जनु राम सनेहू ॥  
 दो0— तुम्ह कहें भरत कलंक यह हम सब कहें उपदेसु ।  
 राम भगति रस सिद्धि हित भा यह समउ गनेसु ॥ 208  
 नव बिधु बिमल तात जसु तोरा । रघुबर किंकर कुमुद चकोरा ॥  
 उदित सदा अँथइहि कबहूँ ना । घटिहि न जग नभ दिन दिन दूना ॥  
 कोक तिलोक प्रीति अति करिही । प्रभु प्रताप रबि छबिहि न हरिही ॥  
 निसि दिन सुखद सदा सब काहू । ग्रसिहि न कैकइ करतबु राहू ॥  
 पूरन राम सुपेम पियूषा । गुर अवमान दोष नहिं दूषा ॥  
 राम भगत अब अमिअँ अघाहू । कीन्हेहु सुलभ सुधा बसुधाहूँ ॥  
 भूप भगीरथ सुरसरि आनी । सुमिरत सकल सुमंगल खानी ॥  
 दसरथ गुन गन बरनि न जाहीं । अधिकु कहा जेहि सम जग नाहीं ॥

दो0— जासु सनेह सकोच बस राम प्रगट भए आइ ।  
 जे हर हिय नयननि कबहूँ निरखे नहीं अघाइ ॥ 209  
 कीरति बिधु तुम्ह कीन्ह अनूपा । जहें बस राम पेम मृगरूपा ॥  
 तात गलानि करहु जियें जाएँ । डरहु दरिद्रहि पारसु पाएँ ॥  
 सुनहु भरत हम झूठ न कहहीं । उदासीन तापस बन रहहीं ॥  
 सब साधन कर सुफल सुहावा । लखन राम सिय दरसनु पावा ॥  
 तेहि फल कर फलु दरस तुम्हारा । सहित पयाग सुभाग हमारा ॥  
 भरत धन्य तुम्ह जसु जगु जयऊ । कहि अस पेम मगन मुनि भयऊ ॥  
 सुनि मुनि बचन सभासद हरषे । साधु सराहि सुमन सुर बरषे ॥  
 धन्य धन्य धुनि गगन पयागा । सुनि सुनि भरतु मगन अनुरागा ॥

दो0— पुलक गात हियें रामु सिय सजल सरोरुह नैन ।  
 करि प्रनामु मुनि मंडलिहि बोले गदगद बैन ॥ 210  
 मुनि समाजु अरु तीरथराजू । सौँचिहूँ सपथ अघाइ अकाजू ॥  
 एहिं थल जाँ किछु कहिअ बनाई । एहि सम अधिक न अघ अधमाई ॥  
 तुम्ह सर्बग्य कहउँ सतिभाऊ । उर अंतरजामी रघुराऊ ॥  
 मोहि न मातु करतब कर सोचू । नहिं दुखु जियें जगु जानिहि पोचू ॥  
 नाहिन डरु बिगरिहि परलोकू । पितहु मरन कर मोहि न सोकू ॥  
 सुकृत सुजस भरि भुअन सुहाए । लछिमन राम सरिस सुत पाए ॥  
 राम बिरहें तजि तनु छनभंगू । भूप सोच कर कवन प्रसंगू ॥  
 राम लखन सिय बिनु पग पनहीं । करि मुनि बेष फिरहिं बन बनहीं ॥

दो0— अजिन बसन फल असन महि सयन डासि कुस पात ।  
 बसि तरु तर नित सहत हिम आतप बरषा बात ॥ 211  
 एहि दुख दाहें दहइ दिन छाती । भूख न बासर नीद न राती ॥  
 एहि कुरोग कर औषधु नाहीं । सोधेउँ सकल बिस्व मन माहीं ॥  
 मातु कुमत बढई अघ मूला । तेहिं हमार हित कीन्ह बँसूला ॥  
 कलि कुकाठ कर कीन्ह कुजंत्रू । गाड़ि अवधि पढ़ि कठिन कुमंत्रू ॥  
 मोहि लगि यहु कुठाटु तेहिं ठाटा । घालेसि सब जगु बारहबाटा ॥  
 मिटइ कुजोगु राम फिरि आएँ । बसइ अवध नहिं आन उपाएँ ॥  
 भरत बचन सुनि मुनि सुखु पाई । सबहिं कीन्हि बहु भौँति बड़ाई ॥  
 तात करहु जनि सोचु बिसेषी । सब दुखु मिटिहि राम पग देखी ॥

दो0— करि प्रबोधु मुनिबर कहेउ अतिथि पेमप्रिय होहु ।  
 कंद मूल फल फूल हम देहिं लेहु करि छोहु ॥ 212

सुनि मुनि बचन भरत हियेँ सोचू । भयउ कुअवसर कठिन सँकोचू ॥  
जानि गरुड़ गुर गिरा बहोरी । चरन बंदि बोले कर जोरी ॥  
सिर धरि आयसु करिअ तुम्हारा । परम धरम यहु नाथ हमारा ॥  
भरत बचन मुनिबर मन भाए । सुचि सेवक सिष निकट बोलाए ॥  
चाहिअ कीन्हि भरत पहुनाई । कंद मूल फल आनहु जाई ॥  
भलेहिं नाथ कहि तिन्ह सिर नाए । प्रमुदित निज निज काज सिधाए ॥  
मुनिहि सोच पाहुन बड़ नेवता । तसि पूजा चाहिअ जस देवता ॥  
सुनि रिधि सिधि अनिमादिक आई । आयसु होइ सो करहिं गोसाई ॥  
दो०— राम बिरह ब्याकुल भरतु सानुज सहित समाज ।

पहुनाई करि हरहु श्रम कहा मुदित मुनिराज ॥ 213  
रिधि सिधि सिर धरि मुनिबर बानी । बड़भागिनि आपुहि अनुमानी ॥  
कहहिं परसपर सिधि समुदाई । अतुलित अतिथि राम लघु भाई ॥  
मुनि पद बंदि करिअ सोइ आजू । होइ सुखी सब राज समाजू ॥  
अस कहि रचेउ रुचिर गृह नाना । जेहि बिलोकि बिलखाहिं बिमाना ॥  
भोग बिभूति भूरि भरि राखे । देखत जिन्हहि अमर अभिलाषे ॥  
दासीं दास साजु सब लीन्हें । जोगवत रहहिं मनहि मनु दीन्हें ॥  
सब समाजु सजि सिधि पल माहीं । जे सुख सुरपुर सपनेहुं नाहीं ॥  
प्रथमहिं बास दिए सब केही । सुंदर सुखद जथा रुचि जेही ॥

दो०— बहुरि सपरिजन भरत कहुँ रिषि अस आयसु दीन्ह ।  
बिधि बिसमय दायकु बिभव मुनिबर तपबल कीन्ह ॥ 214  
मुनि प्रभाउ जब भरत बिलोका । सब लघु लगे लोकपति लोका ॥  
सुख समाजु नहिं जाइ बखानी । देखत बिरति बिसारहिं ग्यानी ॥  
आसन सयन सुबसन बिताना । बन बाटिका बिहग मृग नाना ॥  
सुरभि फूल फल अमिअ समाना । बिमल जलासय बिबिध बिधाना ॥  
असन पान सुचि अमिअ अमी से । देखि लोग सकुचात जमी से ॥  
सुर सुरभी सुरतरु सबही कें । लखि अभिलाषु सुरेस सची कें ॥  
रितु बसंत बह त्रिबिध बयारी । सब कहें सुलभ पदारथ चारी ॥  
०क चंदन बनितादिक भोगा । देखि हरष बिसमय बस लोगा ॥

दो०— संपति चकई भरतु चक मुनि आयस खेलवार ।  
तेहि निसि आश्रम पिंजरोँ राखे भा भिनुसार ॥ 215  
कीन्ह निमज्जनु तीरथराजा । नाइ मुनिहि सिरु सहित समाजा ॥  
रिषि आयसु असीस सिर राखी । करि दंडवत बिनय बहु भाषी ॥  
पथ गति कुसल साथ सब लीन्हें । चले चित्रकूटहिं चितु दीन्हें ॥  
रामसखा कर दीन्हें लागू । चलत देह धरि जनु अनुरागू ॥  
नहिं पद त्रान सीस नहिं छाया । पेमु नेमु ब्रतु धरमु अमाया ॥  
लखन राम सिय पंथ कहानी । पूँछत सखहि कहत मृदु बानी ॥  
राम बास थल बिटप बिलोकें । उर अनुराग रहत नहिं रोकेँ ॥  
देखि दसा सुर बरिसहिं फूला । भइ मृदु महि मगु मंगल मूला ॥  
दो०— किऐँ जाहिं छाया जलद सुखद बहइ बर बात ।

तस मगु भयउ न राम कहें जस भा भरतहि जात ॥ 216  
जड़ चेतन मग जीव घनेरे । जे चितए प्रभु जिन्ह प्रभु हेरे ॥  
ते सब भए परम पद जोगू । भरत दरस मेटा भव रोगू ॥  
यह बड़ि बात भरत कइ नाहीं । सुमिरत जिनहि रामु मन माहीं ॥

बारक राम कहत जग जेरु । होत तरन तारन नर तेरु ॥  
भरतु राम प्रिय पुनि लघु भ्राता । कस न होइ मगु मंगलदाता ॥  
सिद्ध साधु मुनिबर अस कहहीं । भरतहि निरखि हरषु हिये लहहीं ॥  
देखि प्रभाउ सुरेसहि सोचू । जगु भल भलेहि पोच कहूँ पोचू ॥  
गुर सन कहेउ करिअ प्रभु सोई । रामहि भरतहि भेट न होई ॥

दो०— रामु सँकोची प्रेम बस भरत सपेम पयोधि ।

बनी बात बेगरन चहति करिअ जतनु छलु सोधि ॥ 217  
बचन सुनत सुरगुरु मुसुकाने । सहसनयन बिनु लोचन जाने ॥  
मायापति सेवक सन माया । करइ त उलटि परइ सुरराया ॥  
तब किछु कीन्ह राम रुख जानी । अब कुचालि करि होइहि हानी ॥  
सुनु सुरेस रघुनाथ सुभाऊ । निज अपराध रिसाहिं न काऊ ॥  
जो अपराधु भगत कर करई । राम रोष पावक सो जरई ॥  
लोकहुँ बेद बिदित इतिहासा । यह महिमा जानहिं दुरबासा ॥  
भरत सरिस को राम सनेही । जगु जप राम रामु जप जेही ॥

दो०— मनहुँ न आनिअ अमरपति रघुबर भगत अकाजु ।

अजसु लोक परलोक दुख दिन दिन सोक समाजु ॥ 218  
सुनु सुरेस उपदेसु हमारा । रामहि सेवकु परम पिआरा ॥  
मानत सुखु सेवक सेवकाई । सेवक बैर बैरु अधिकाई ॥  
जद्यपि सम नहिं राग न रोषू । गहहिं न पाप पूनु गुन दोषू ॥  
करम प्रधान बिस्व करि राखा । जो जस करइ सो तस फलु चाखा ॥  
तदपि करहिं सम बिषम बिहारा । भगत अभगत हृदय अनुसारा ॥  
अगुन अलेप अमान एकरस । रामु सगुन भए भगत पेम बस ॥  
राम सदा सेवक रुचि राखी । बेद पुरान साधु सुर साखी ॥  
अस जिये जानि तजहु कुटिलाई । करहु भरत पद प्रीति सुहाई ॥

दो०— राम भगत परहित निरत पर दुख दुखी दयाल ।

भगत सिरोमनि भरत तेँ जनि डरपहु सुरपाल ॥ 219  
सत्यसंध प्रभु सुर हितकारी । भरत राम आयस अनुसारी ॥  
स्वारथ बिबस बिकल तुम्ह होहू । भरत दोसु नहिं राउर मोहू ॥  
सुनि सुरबर सुरगुर बर बानी । भा प्रमोदु मन मिटी गलानी ॥  
बरषि प्रसून हरषि सुरराऊ । लगे सराहन भरत सुभाऊ ॥  
एहि बिधि भरत चले मग जाहीं । दसा देखि मुनि सिद्ध सिहाहीं ॥  
जबहिं रामु कहि लेहिं उसासा । उमगत पेमु मनहुँ चहु पासा ॥  
द्रवहिं बचन सुनि कुलिस पषाना । पुरजन पेमु न जाइ बखाना ॥  
बीच बास करि जमुनहिं आए । निरखि नीरु लोचन जल छाए ॥

दो०— रघुबर बरन बिलोकि बर बारि समेत समाज ।

होत मगन बारिधि बिरह चढ़े बिबेक जहाज ॥ 220  
जमुन तीर तेहि दिन करि बासू । भयउ समय सम सबहि सुपासू ॥  
रातिहिं घाट घाट की तरनी । आई अगनित जाहिं न बरनी ॥  
प्रात पार भए एकहि खेवों । तोषे रामसखा की सेवों ॥  
चले नहाइ नदिहि सिर नाई । साथ निषादनाथ दोउ भाई ॥  
आगें मुनिबर बाहन आछें । राजसमाज जाइ सबु पाछें ॥  
तेहि पाछें दोउ बंधु पयादें । भूषन बसन बेष सुटि सादें ॥  
सेवक सुहृद सचिवसुत साथा । सुमिरत लखनु सीय रघुनाथा ॥

जहँ जहँ राम बास बिश्रामा । तहँ तहँ करहिं सप्रेम प्रनामा ॥  
दो०— मगबासी नर नारि सुनि धाम काम तजि धाइ ।

देखि सरूप सनेह सब मुदित जनम फलु पाइ ॥ 221  
कहहिं सपेम एक एक पाहीं । रामु लखनु सखि होहिं कि नाही ॥  
बय बपु बरन रूपु सोइ आली । सीलु सनेहु सरिस सम चाली ॥  
बेषु न सो सखि सीय न संगी । आगे अनी चली चतुरंगा ॥  
नहिं प्रसन्न मुख मानस खेदा । सखि संदेहु होइ एहिं भेदा ॥  
तासु तरक तियगन मन मानी । कहहिं सकल तेहि सम न सयानी ॥  
तेहि सराहि बानी फुरि पूजी । बोली मधुर बचन तिय दूजी ॥  
कहि सपेम सब कथाप्रसंगू । जेहि बिधि राम राज रस भंगू ॥  
भरतहि बहुरि सराहन लागी । सील सनेह सुभाय सुभागी ॥  
दो०— चलत पयादें खात फल पिता दीन्ह तजि राजु ।

जात मनावन रघुबरहि भरत सरिस को आजु ॥ 222  
भायप भगति भरत आचरनू । कहत सुनत दुख दूषन हरनू ॥  
जो किछु कहब थोर सखि सोई । राम बंधु अस काहे न होई ॥  
हम सब सानुज भरतहि देखें । भइन्ह धन्य जुबती जन लेखें ॥  
सुनि गुनि देखि दसा पछिताहीं । कैकइ जननि जोगु सुतु नाही ॥  
कोउ कह दूषनु रानिहि नाहिन । बिधि सबु कीन्ह हमहि जो दाहिन ॥  
कहें हम लोक बेद बिधि हीनी । लघु तिय कुल करतूति मलीनी ॥  
बसहिं कुदेस कुगाँव कुबामा । कहें यह दरसु पुन्य परिनामा ॥  
अस अनंदु अचिरिजु प्रति ग्रामा । जनु मरुभूमि कलपतरु जामा ॥  
दो०— भरत दरसु देखत खुलेउ मग लोगन्ह कर भागु ।

जनु सिंघलबासिन्ह भयउ बिधि बस सुलभ प्रयागु ॥ 223  
निज गुन सहित राम गुन गाथा । सुनत जाहिं सुमिरत रघुनाथा ॥  
तीरथ मुनि आश्रम सुरधामा । निरखि निमज्जहिं करहिं प्रनामा ॥  
मनहीं मन मागहिं बरु एहू । सीय राम पद पदुम सनेहू ॥  
मिलहिं किरात कोल बनबासी । बैखानस बटु जती उदासी ॥  
करि प्रनामु पूँछहिं जेहि तेही । केहि बन लखनु रामु बैदेहो ॥  
ते प्रभु समाचार सब कहहीं । भरतहि देखि जनम फलु लहहीं ॥  
जे जन कहहिं कुसल हम देखे । ते प्रिय राम लखन सम लेखे ॥  
एहि बिधि बूझत सबहि सुबानी । सुनत राम बनबास कहानी ॥  
दो०— तेहि बासर बसि प्रातहीं चले सुमिरि रघुनाथ ।

राम दरस की लालसा भरत सरिस सब साथ ॥ 224  
मंगल सगुन होहिं सब काहू । फरकहिं सुखद बिलोचन बाहू ॥  
भरतहि सहित समाज उछाहू । मिलिहहिं रामु मिटिहि दुख दाहू ॥  
करत मनोरथ जस जिये जाके । जाहिं सनेह सुराँ सब छाके ॥  
सिथिल अंग पग मग डगि डोलहिं । बिहबल बचन पेम बस बोलहिं ॥  
रामसखौं तेहि समय देखावा । सैल सिरोमनि सहज सुहावा ॥  
जासु समीप सरित पय तीरा । सीय समेत बसहिं दोउ बीरा ॥  
देखि करहिं सब दंड प्रनामा । कहि जय जानकि जीवन रामा ॥  
प्रेम मगन अस राज समाजू । जनु फिरि अवध चले रघुराजू ॥  
दो०— भरत प्रेमु तेहि समय जस तस कहि सकइ न सेषु ।

कबिहि अगम जिमि ब्रह्मसुखु अह मम मलिन जनेषु ॥ 225  
सकल सनेह सिथिल रघुबर केँ । गए कोस दुइ दिनकर ढरकेँ ॥

जलु थलु देखि बसे निसि बीतें । कीन्ह गवन रघुनाथ पिरीतें ॥  
उहाँ रामु रजनी अवसेषा । जागे सीर्ये सपन अस देखा ॥  
सहित समाज भरत जनु आए । नाथ बियोग ताप तन ताए ॥  
सकल मलिन मन दीन दुखारी । देखीं सासु आन अनुहारी ॥  
सुनि पिय सपन भरे जल लोचन । भए सोचबस सोच बिमोचन ॥  
लखन सपन यह नीक न होई । कठिन कुचाह सुनाइहि कोई ॥  
अस कहि बंधु समेत नहाने । पूजि पुरारि साधु सनमाने ॥  
छं०— सनमानि सुर मुनि बंदि बैठे उतर दिसि देखत भए ।  
नभ धूरि खग मृग भूरि भागे बिकल प्रभु आश्रम गए ॥  
तुलसी उठे अवलोकि कारनु काह चित सचकित रहे ।  
सब समाचार किरात कोलन्हि आइ तेहि अवसर कहे ॥  
सो०— सुनत सुमंगल बैन मन प्रमोद तन पुलक भर ।  
सरद सरोरुह नैन तुलसी भरे सनेह जल ॥ 226  
बहुरि सोचबस भे सियरवनू । कारन कवन भरत आगवनू ॥  
एक आइ अस कहा बहोरी । सेन संग चतुरंग न थोरी ॥  
सो सुनि रामहि भा अति सोचू । इत पितु बच इत बंधु सकोचू ॥  
भरत सुभाउ समुझि मन माहीं । प्रभु चित हित थिति पावत नाहीं ॥  
समाधान तब भा यह जाने । भरत कहे महुँ साधु सयाने ॥  
लखन लखेउ प्रभु हृदयें खभारू । कहत समय सम नीति बिचारू ॥  
बिनु पूछें कछु कहउँ गोसाई । सेवकु समयें न ढीठ ढिठाई ॥  
तुम्ह सर्बग्य सिरोमनि स्वामी । आपनि समुझि कहउँ अनुगामी ॥  
दो०— नाथ सुहृद सुठि सरल चित सील सनेह निधान ।  
सब पर प्रीति प्रतीति जियें जानिअ आपु समान ॥ 227  
बिषई जीव पाइ प्रभुताई । मूढ मोह बस होहिं जनाई ॥  
भरतु नीति रत साधु सुजाना । प्रभु पद प्रेमु सकल जगु जाना ॥  
तेऊ आजु राम पदु जाई । चले धरम मरजाद मेटाई ॥  
कुटिल कुबंधु कुअवसरु ताकी । जानि राम बनबास एकाकी ॥  
करि कुमंत्रु मन साजि समाजू । आए करै अकंटक राजू ॥  
कोटि प्रकार कलपि कुटिलाई । आए दल बटोरि दोउ भाई ॥  
जौं हियें होति न कपट कुचाली । केहि सोहाति रथ बाजि गजाली ॥  
भरतहि दोसु देइ को जाएँ । जग बौराइ राज पदु पाएँ ॥  
दो०— ससि गुर तिय गामी नहुषु चढेउ भूमिसुर जान ।  
लोक बेद तें बिमुख भा अधम न बेन समान ॥ 228  
सहसबाहु सुरनाथु त्रिसंकू । केहि न राजमद दीन्ह कलंकू ॥  
भरत कीन्ह यह उचित उपाऊ । रिपु रिन रंच न राखब काऊ ॥  
एक कीन्हि नहिं भरत भलाई । निदरे रामु जानि असहाई ॥  
समुझि परिहि सोउ आजु बिसेषी । समर सरोष राम मुखु पेखी ॥  
एतना कहत नीति रस भूला । रन रस बिटपु पुलक मिस फूला ॥  
प्रभु पद बंदि सीस रज राखी । बोले सत्य सहज बलु भाषी ॥  
अनुचित नाथ न मानब मोरा । भरत हमहि उपचार न थोरा ॥  
कहँ लागि सहिअ रहिअ मनु मारें । नाथ साथ धनु हाथ हमारें ॥  
दो०— छत्रि जाति रघुकुल जनमु राम अनुग जगु जान ।  
लातहुँ मारें चढति सिर नीच को धूरि समान ॥ 229  
उठि कर जोरि रजायसु मागा । मनहुँ बीर रस सोवत जागा ॥

बॉधि जटा सिर कसि कटि भाथा । साजि सरासनु सायकु हाथा ॥  
 आजु राम सेवक जसु लेऊँ । भरतहि समर सिखावन देऊँ ॥  
 राम निरादर कर फलु पाई । सोवहुँ समर सेज दोउ भाई ॥  
 आइ बना भल सकल समाजू । प्रगट करउँ रिस पाछिल आजू ॥  
 जिमि करि निकर दलइ मृगराजू । लेइ लपेटि लवा जिमि बाजू ॥  
 तैसेहिं भरतहि सेन समेता । सानुज निदरि निपातउँ खेता ॥  
 जाँ सहाय कर संकरु आई । तौ मारउँ रन राम दोहाई ॥  
 दो०— अति सरोष माखे लखनु लखि सुनि सपथ प्रवान ।  
 सभय लोक सब लोकपति चाहत भभरि भगान ॥ 230  
 जगु भय मगन गगन भइ बानी । लखन बाहुबलु बिपुल बखानी ॥  
 तात प्रताप प्रभाउ तुम्हारा । को कहि सकइ को जाननिहारा ॥  
 अनुचित उचित काजू किछु होऊ । समुझि करिअ भल कह सबु कोऊ ॥  
 सहसा करि पाछें पछिताही । कहहिं बेद बुध ते बुध नाही ॥  
 सुनि सुर बचन लखन सकुचाने । राम सीर्ये सादर सनमाने ॥  
 कही तात तुम्ह नीति सुहाई । सब तें कठिन राजमदु भाई ॥  
 जो अचवैत नृप मातहिं तेई । नाहिन साधुसभा जेहिं सेई ॥  
 सुनहु लखन भल भरत सरीसा । बिधि प्रपंच महुँ सुना न दीसा ॥  
 दो०— भरतहि होइ न राजमदु बिधि हरि हर पद पाइ ।  
 कबहुँ कि कौंजी सीकरनि छीरसिंधु बिनसाइ ॥ 231  
 तिमिरु तरुन तरनिहि मकु गिलई । गगनु मगन मकु मेघहिं मिलई ॥  
 गोपद जल बूड़हिं घटजोनी । सहज छमा बरु छाडै छोनी ॥  
 मसक फूँक मकु मेरु उड़ाई । होइ न नृपमदु भरतहि भाई ॥  
 लखन तुम्हार सपथ पितु आना । सुचि सुबंधु नहिं भरत समाना ॥  
 सगुनु खीरु अवगुन जलु ताता । मिलइ रचइ परपंचु बिधाता ॥  
 भरतु हंस रबिबंस तड़ागा । जनमि कीन्ह गुन दोष बिभागा ॥  
 गहि गुन पय तजि अवगुन बारी । निज जस जगत कीन्हि उजिआरी ॥  
 कहत भरत गुन सीलु सुभाऊ । पेम पयोधि मगन रघुराऊ ॥  
 दो०— सुनि रघुबर बानी बिबुध देखि भरत पर हेतु ।  
 सकल सराहत राम सो प्रभु को कृपानिकेतु ॥ 232  
 जाँ न होत जग जनम भरत को । सकल धरम धुर धरनि धरत को ॥  
 कबि कुल अगम भरत गुन गाथा । को जानइ तुम्ह बिनु रघुनाथा ॥  
 लखन राम सिये सुनि सुर बानी । अति सुखु लहेउ न जाइ बखानी ॥  
 इहाँ भरतु सब सहित सहाए । मंदाकिनीं पुनीत नहाए ॥  
 सरित समीप राखि सब लोगा । मागि मातु गुर सचिव नियोगा ॥  
 चले भरतु जहँ सिय रघुराई । साथ निषादनाथु लघु भाई ॥  
 समुझि मातु करतब सकुचाहीं । करत कुतरक कोटि मन माहीं ॥  
 रामु लखनु सिय सुनि मम नाऊँ । उठि जनि अनत जाहिं तजि ठाऊँ ॥  
 दो०— मातु मते महुँ मानि मोहि जो कछु करहिं सो थोर ।  
 अघ अवगुन छमि आदरहिं समुझि आपनी ओर ॥ 233  
 जाँ परिहरहिं मलिन मनु जानी । जाँ सनमानहिं सेवकु मानी ॥  
 मोरें सरन रामहि की पनही । राम सुस्वामि दोसु सब जनही ॥  
 जग जस भाजन चातक मीना । नेम पेम निज निपुन नबीना ॥  
 अस मन गुनत चले मग जाता । सकुच सनेहें सिथिल सब गाता ॥  
 फरति मनहुँ मातु कृत खोरी । चलत भगति बल धीरज धोरी ॥

जब समुझत रघुनाथ सुभाऊ । तब पथ परत उताइल पाऊ ॥  
भरत दसा तेहि अवसर कैसी । जल प्रबाहँ जल अलि गति जैसी ॥  
देखि भरत कर सोचु सनेहू । भा निषाद तेहि समयँ बिदेहू ॥  
दो०— लगे होन मंगल सगुन सुनि गुनि कहत निषादु ।

मिटिहि सोचु होइहि हरषु पुनि परिनाम बिषादु ॥ 234  
सेवक बचन सत्य सब जाने । आश्रम निकट जाइ निअराने ॥  
भरत दीख बन सैल समाजू । मुदित छुधित जनु पाइ सुनाजू ॥  
ईति भीति जनु प्रजा दुखारी । त्रिबिध ताप पीड़ित ग्रह मारी ॥  
जाइ सुराज सुदेस सुखारी । होहिं भरत गति तेहि अनुहारी ॥  
राम बास बन संपति भ्राजा । सुखी प्रजा जनु पाइ सुराजा ॥  
सचिव बिरागु बिबेकु नरेसू । बिपिन सुहावन पावन देसू ॥  
भट जम नियम सैल रजधानी । सांति सुमति सुचि सुंदर रानी ॥  
सकल अंग संपन्न सुराऊ । राम चरन आश्रित चित चाऊ ॥

दो०— जीति मोह महिपालु दल सहित बिबेक भुआलु ।  
करत अकंटक राजु पुरँ सुख संपदा सुकालु ॥ 235  
बन प्रदेस मुनि बास घनेरे । जनु पुर नगर गाउँ गन खेरे ॥  
बिपुल बिचित्र बिहग मृग नाना । प्रजा समाजु न जाइ बखाना ॥  
खगहा करि हरि बाघ बराहा । देखि महिष बृष साजु सराहा ॥  
बयरु बिहाइ चरहिं एक संगी । जहँ तहँ मनहुँ सेन चतुरंगा ॥  
झरना झरहिं मत्त गज गाजहिं । मनहुँ निसान बिबिध बिधि बाजहिं ॥  
चक चकोर चातक सुक पिक गन । कूजत मंजु मराल मुदित मन ॥  
अलिगन गावत नाचत मोरा । जनु सुराज मंगल चहु ओरा ॥  
बेलि बिटप तृन सफल सफूला । सब समाजु मुद मंगल मूला ॥

दो०— राम सैल सोभा निरखि भरत हृदयँ अति पेमु ।  
तापस तप फलु पाइ जिमि सुखी सिरानेँ नेमु ॥ 236  
मासपारायण, उन्नीसवाँ विश्राम  
नवान्हपारायण, पाँचवाँ विश्राम  
तब केवट ऊँचें चढि धाई । कहेउ भरत सन भुजा उठाई ॥  
नाथ देखिअहिं बिटप बिसाला । पाकरि जंबु रसाल तमाला ॥  
जिन्ह तरुबरन्ह मध्य बटु सोहा । मंजु बिसाल देखि मनु मोहा ॥  
नील सघन पल्लव फल लाला । अबिरल छाँह सुखद सब काला ॥  
मानहुँ तिमिर अरुनमय रासी । बिरची बिधि सँकेलि सुषमा सी ॥  
ए तरु सरित समीप गोसाँई । रघुबर परनकुटी जहँ छाई ॥  
तुलसी तरुबर बिबिध सुहाए । कहँ कहँ सियँ कहँ लखन लगाए ॥  
बट छायाँ बेदिका बनाई । सियँ निज पानि सरोज सुहाई ॥

दो०— जहाँ बैठि मुनिगन सहित नित सिय रामु सुजान ।  
सुनहिं कथा इतिहास सब आगम निगम पुरान ॥ 237  
सखा बचन सुनि बिटप निहारी । उमगे भरत बिलोचन बारी ॥  
करत प्रनाम चले दोउ भाई । कहत प्रीति सारद सकुचाई ॥  
हरषहिं निरखि राम पद अंका । मानहुँ पारसु पायउ रंका ॥  
रज सिर धरि हियँ नयनन्हि लावहिं । रघुबर मिलन सरिस सुख पावहिं ॥  
देखि भरत गति अकथ अतीवा । प्रेम मगन मृग खग जड़ जीवा ॥  
सखहि सनेह बिबस मग भूला । कहि सुपंथ सुर बरषहिं फूला ॥  
निरखि सिद्ध साधक अनुरागे । सहज सनेहु सराहन लागे ॥

होत न भूतल भाउ भरत को । अचर सचर चर अचर करत को ॥  
दो०— पेम अमिअ मंदरु बिरहु भरतु पयोधि गँभीर ।

मथि प्रगटेउ सुर साधु हित कृपासिंधु रघुबीर ॥ 238

सखा समेत मनोहर जोटा । लखेउ न लखन सघन बन ओटा ॥  
भरत दीख प्रभु आश्रमु पावन । सकल सुमंगल सदन सुहावन ॥  
करत प्रबेस मिटे दुख दावा । जनु जोगीं परमारथु पावा ॥  
देखे भरत लखन प्रभु आगे । पूँछे बचन कहत अनुरागे ॥  
सीस जटा कटि मुनि पट बौधे । तून कसें कर सरु धनु कौधे ॥  
बेदी पर मुनि साधु समाजू । सीय सहित राजत रघुराजू ॥  
बलकल बसन जटिल तनु स्यामा । जनु मुनि बेष कीन्ह रति कामा ॥  
कर कमलनि धनु सायकु फेरत । जिय की जरनि हरत हँसि हेरत ॥

दो०— लसत मंजु मुनि मंडली मध्य सीय रघुचंदु ।

ग्यान सभाँ जनु तनु धरें भगति सच्चिदानंदु ॥ 239

सानुज सखा समेत मगन मन । बिसरे हरष सोक सुख दुख गन ॥  
पाहि नाथ कहि पाहि गोसाईं । भूतल परे लकुट की नाई ॥  
बचन सपेम लखन पहिचाने । करत प्रनामु भरत जिये जाने ॥  
बंधु सनेह सरस एहि ओरा । उत साहिब सेवा बस जोरा ॥  
मिलि न जाइ नहि गुदरत बनई । सुकबि लखन मन की गति भनई ॥  
रहे राखि सेवा पर भारू । चढी चंग जनु खैच खेलारू ॥  
कहत सप्रेम नाइ महि माथा । भरत प्रनाम करत रघुनाथा ॥  
उठे रामु सुनि पेम अधीरा । कहुँ पट कहुँ निषंग धनु तीरा ॥

दो०— बरबस लिए उठाइ उर लाए कृपानिधान ।

भरत राम की मिलनि लखि बिसरे सबहि अपान ॥ 240

मिलनि प्रीति किमि जाइ बखानी । कबिकुल अगम करम मन बानी ॥  
परम पेम पूरन दोउ भाई । मन बुधि चित अहमिति बिसराई ॥  
कहहु सुपेम प्रगट को करई । केहि छाया कबि मति अनुसरई ॥  
कबिहि अरथ आखर बलु सौँचा । अनुहरि ताल गतिहि नटु नाचा ॥  
अगम सनेह भरत रघुबर को । जहँ न जाइ मनु बिधि हरि हर को ॥  
सो मैं कुमति कहौं केहि भौँती । बाज सुराग कि गौँडर तौँती ॥  
मिलनि बिलोकि भरत रघुबर की । सुरगन सभय धकधकी धरकी ॥  
समुझाए सुरगुरु जड़ जागे । बरषि प्रसून प्रसंसन लागे ॥

दो०— मिलि सपेम रिपुसूदनहि केवटु भेंटेउ राम ।

भूरि भायें भेंटे भरत लछिमन करत प्रनाम ॥ 241

भेंटेउ लखन ललकि लघु भाई । बहुरि निषादु लीन्ह उर लाई ॥  
पुनि मुनिगन दुहुँ भाइन्ह बंदे । अभिमत आसिष पाइ अनंदे ॥  
सानुज भरत उमगि अनुरागा । धरि सिर सिय पद पदुम परागा ॥  
पुनि पुनि करत प्रनाम उठाए । सिर कर कमल परसि बैठाए ॥  
सीयें असीस दीन्हि मन माहीं । मगन सनेहें देह सुधि नाहीं ॥  
सब बिधि सानुकूल लखि सीता । भे निसोच उर अपडर बीता ॥  
कोउ किछु कहइ न कोउ किछु पूँछा । प्रेम भरा मन निज गति छूँछा ॥  
तेहि अवसर केवटु धीरजु धरि । जोरि पानि बिनवत प्रनामु करि ॥

दो०— नाथ साथ मुनिनाथ के मातु सकल पुर लोग ।

सेवक सेनप सचिव सब आए बिकल बियोग ॥ 242

सीलसिंधु सुनि गुर आगवनू । सिय समीप राखे रिपुदवनू ॥

चले सबेग रामु तेहि काला । धीर धरम धुर दीनदयाला ॥  
 गुरहि देखि सानुज अनुरागे । दंड प्रनाम करन प्रभु लागे ॥  
 मुनिबर धाइ लिए उर लाई । प्रेम उमगि भेंटे दोउ भाई ॥  
 प्रेम पुलकि केवट कहि नामू । कीन्ह दूरि तें दंड प्रनामू ॥  
 रामसखा रिषि बरबस भेंटा । जनु महि लुठत सनेह समेटा ॥  
 रघुपति भगति सुमंगल मूला । नभ सराहि सुर बरिसहिं फूला ॥  
 एहि सम निपट अज्ञ कोउ नाही । गुरु बसिष्ठ सम को जग माहीं ॥  
 दो०— जेहि लखि लखनहु तें अधिक मिले मुदित मुनिराउ ।

सो सीतापति भजन को प्रगट प्रताप प्रभाउ ॥ 243

आरत लोग राम सबु जाना । करुनाकर सुजान भगवाना ॥  
 जो जेहि भायें रहा अभिलाषी । तेहि तेहि कै तसि तसि रुख राखी ॥  
 सानुज मिलि पल महुँ सब काहू । कीन्ह दूरि दुखु दारुन दाहू ॥  
 यह बड़ि बात राम कै नाही । जिमि घट कोटि एक रबि छाहीं ॥  
 मिलि केवटहि उमगि अनुरागा । पुरजन सकल सराहहिं भागा ॥  
 देखीं राम दुखित महतारीं । जनु सुबेलि अवलीं हिम मारीं ॥  
 प्रथम राम भेंटी कैकेई । सरल सुभायें भगति मति भेई ॥  
 पग परि कीन्ह प्रबोधु बहोरी । काल करम बिधि सिर धरि खोरी ॥  
 दो०— भेटीं रघुबर मातु सब करि प्रबोधु परितोषु ।

अंब ईस आधीन जगु काहु न देइअ दोषु ॥ 244

गुरतिय पद बंदे दुहु भाई । सहित बिप्रतिय जे सँग आई ॥  
 गंग गौरि सम सब सनमानीं । देहिं असीस मुदित मृदु बानीं ॥  
 गहि पद लगे सुमित्रा अंका । जनु भेंटी संपति अति रंका ॥  
 पुनि जननी चरननि दोउ भ्राता । परे पेम ब्याकुल सब गाता ॥  
 अति अनुराग अंब उर लाए । नयन सनेह सलिल अन्हवाए ॥  
 तेहि अवसर कर हरष बिषादू । किमि कबि कहै मूक जिमि स्वादू ॥  
 मिलि जननिहि सानुज रघुराऊ । गुर सन कहेउ कि धारिअ पाऊ ॥  
 पुरजन पाइ मुनीस नियोगू । जल थल तकि तकि उतरेउ लोगू ॥  
 दो०— महिसुर मंत्री मातु गुर गने लोग लिए साथ ।

पावन आश्रम गवनु किय भरत लखन रघुनाथ ॥ 245

सीय आइ मुनिबर पग लागी । उचित असीस लही मन मागी ॥  
 गुरपतिनिहि मुनितियन्ह समेटा । मिली पेमु कहि जाइ न जेता ॥  
 बंदि बंदि पग सिय सबही के । आसिरबचन लहे प्रिय जी के ॥  
 सासु सकल जब सीयें निहारीं । मूदे नयन सहमि सुकुमारीं ॥  
 परीं बधिक बस मनहुँ मरालीं । काह कीन्ह करतार कुचालीं ॥  
 तिन्ह सिय निरखि निपट दुखु पावा । सो सबु सहिअ जो दैउ सहावा ॥  
 जनकसुता तब उर धरि धीरा । नील नलिन लोयन भरि नीरा ॥  
 मिली सकल सासुन्ह सिय जाई । तेहि अवसर करुना महि छाई ॥  
 दो०— लागि लागि पग सबनि सिय भेंटति अति अनुराग ।

हृदयें असीसहिं पेम बस रहिअहु भरी सोहाग ॥ 246

बिकल सनेहें सीय सब रानीं । बैठन सबहि कहेउ गुर ग्यानीं ॥  
 कहि जग गति मायिक मुनिनाथा । कहे कछुक परमारथ गाथा ॥  
 नृप कर सुरपुर गवनु सुनावा । सुनि रघुनाथ दुसह दुखु पावा ॥  
 मरन हेतु निज नेहु बिचारी । भे अति बिकल धीर धुर धारी ॥  
 कुलिस कठोर सुनत कटु बानी । बिलपत लखन सीय सब रानी ॥

सोक बिकल अति सकल समाजू । मानहुँ राजु अकाजेउ आजू ॥  
मुनिबर बहुरि राम समुझाए । सहित समाज सुसरित नहाए ॥  
ब्रतु निरंबु तेहि दिन प्रभु कीन्हा । मुनिहु कहें जलु काहुँ न लीन्हा ॥  
दो०— भोरु भएँ रघुनंदनहि जो मुनि आयसु दीन्ह ।

श्रद्धा भगति समेत प्रभु सो सबु सादरु कीन्ह ॥ 247  
करि पितु किया बेद जसि बरनी । भे पुनीत पालक तम तरनी ॥  
जासु नाम पावक अघ तूला । सुमिरत सकल सुमंगल मूला ॥  
सुद्ध भएँ दुइ बासर बीते । बोले गुर सन राम पिरीते ॥  
नाथ लोग सब निपट दुखारी । कंद मूल फल अंबु अहारी ॥  
सानुज भरतु सचिव सब माता । देखि मोहि पल जिमि जुग जाता ॥  
सब समेत पुर धारिअ पाऊ । आपु इहाँ अमरावति राऊ ॥  
बहुत कहेउँ सब कियउँ ढिठाई । उचित होइ तस करिअ गोसाँई ॥

दो०— धर्म सेतु करुनायतन कस न कहहु अस राम ।  
लोग दुखित दिन दुइ दरस देखि लहहुँ बिश्राम ॥ 248  
राम बचन सुनि सभय समाजू । जनु जलनिधि महुँ बिकल जहाजू ॥  
सुनि गुर गिरा सुमंगल मूला । भयउ मनहुँ मारुत अनुकूला ॥  
पावन पर्ये तिहुँ काल नहाहीं । जो बिलोकि अघ ओघ नसाहीं ॥  
मंगलमूरति लोचन भरि भरि । निरखहिं हरषि दंडवत करि करि ॥  
राम सैल बन देखन जाहीं । जहँ सुख सकल सकल दुख नाही ॥  
झरना झरहिं सुधासम बारी । त्रिबिध तापहर त्रिबिध बयारी ॥  
बिटप बेलि तून अगनित जाती । फल प्रसून पल्लव बहु भौंती ॥  
सुंदर सिला सुखद तरु छाहीं । जाइ बरनि बन छबि कहि पाहीं ॥

दो०— सरनि सरोरुह जल बिहग कूजत गुंजत भुंग ।  
बैर बिगत बिहरत बिपिन मृग बिहंग बहुरंग ॥ 249  
कोल किरात भिल्ल बनबासी । मधु सुचि सुंदर स्वादु सुधा सी ॥  
भरि भरि परन पुटीं रचि रुरी । कंद मूल फल अंकुर जूरी ॥  
सबहि देहिं करि बिनय प्रनामा । कहि कहि स्वाद भेद गुन नामा ॥  
देहिं लोग बहु मोल न लेहीं । फेरत राम दोहाई देहीं ॥  
कहहिं सनेह मगन मृदु बानी । मानत साधु पेम पहिचानी ॥  
तुम्ह सुकृती हम ग्राम्य निषादा । पावा दरसनु राम प्रसादा ॥  
हमहि अगम अति दरसु तुम्हारा । जस मरु धरनि दवधुनि धारा ॥  
राम कृपाल निषाद नेवाजा । परिजन प्रजउ चहिअ जस राजा ॥

दो०— यह जियेँ जानि सँकोचु तजि करिअ छोहु लखि नेहु ।  
हमहि कृतारथ करन लागि फल तून अंकुर लेहु ॥ 250  
तुम्ह प्रिय पाहुने बन पगु धारे । सेवा जोगु न भाग हमारे ॥  
देब काह हम तुम्हहि गोसाँई । ईधनु पात किरात मिताई ॥  
यह हमारि अति बड़ि सेवकाई । लेहिं न बासन बसन चोराई ॥  
हम जड़ जीव जीव गन घाती । कहहिं लोग हम कुमति कुजाती ॥  
घात करत निसि बासर जाहीं । नहिं पट कटि नहिं पेट अघाहीं ॥  
सपनेहुँ धरम बुद्धि कस काऊ । यह रघुनंदन दरस प्रभाऊ ॥  
जब तेँ प्रभु पद पदुम निहारे । मिटे दुसह दुख दोष हमारे ॥  
बचन सुनत पुरजन अनुरागे । तिन्ह केँ भाग सराहन लागे ॥

छ०— लागे सराहन भाग सब अनुराग बचन सुनावहीं ।  
बोलनि मिलनि सिय राम चरन सनेहु लखि सुखु पावहीं ॥

नर नारि निदरहिं नेहु निज सुनि कोल भिल्लनि की गिरा ।  
तुलसी कृपा रघुबंसमनि की लोह लै लौका तिरा ॥

सो०— बिहरहिं बन चहु ओर प्रतिदिन प्रमुदित लोग सब ।

जल ज्यों दादुर मोर भए पीन पावस प्रथम ॥ 251

पुर जन नारि मगन अति प्रीती । बासर जाहिं पलक सम बीती ॥

सीय सासु प्रति बेष बनाई । सादर करइ सरिस सेवकाई ॥

लखा न मरमु राम बिनु काहूँ । माया सब सिय माया माहूँ ॥

सीयें सासु सेवा बस कीन्हीं । तिन्ह लहि सुख सिख आसिष दीन्हीं ॥

लखि सिय सहित सरल दोउ भाई । कुटिल रानि पछितानि अघाई ॥

अवनि जमहि जाचति कैकेई । महि न बीचु बिधि मीचु न देई ॥

लोकहुँ बेद बिदित कबि कहहीं । राम बिमुख थलु नरक न लहहीं ॥

यहु संसउ सब के मन माहीं । राम गवनु बिधि अवध कि नाही ॥

दो०— निसि न नीद नहिं भूख दिन भरतु बिकल सुचि सोच ।

नीच कीच बिच मगन जस मीनहि सलिल सँकोच ॥ 252

कीन्हि मातु मिस काल कुचाली । ईति भीति जस पाकत साली ॥

केहि बिधि होइ राम अभिषेकू । मोहि अवकलत उपाउ न एकू ॥

अवसि फिरहिं गुर आयसु मानी । मुनि पुनि कहब राम रुचि जानी ॥

मातु कहेहुँ बहुरहिं रघुराऊ । राम जननि हठ करबि कि काऊ ॥

मोहि अनुचर कर केतिक बाता । तेहि महेँ कुसमउ बाम बिधाता ॥

जौँ हठ करउं त निपट कुकरमू । हरगिरि तें गुरु सेवक धरमू ॥

एकउ जुगुति न मन ठहरानी । सोचत भरतहि रैनि बिहानी ॥

प्रात नहाइ प्रभुहि सिर नाई । बैठत पठए रिषयें बोलाई ॥

दो०— गुर पद कमल प्रनामु करि बैठे आयसु पाइ ।

बिप्र महाजन सचिव सब जुरे सभासद आइ ॥ 253

बोले मुनिबरु समय समाना । सुनहु सभासद भरत सुजाना ॥

धरम धुरीन भानुकुल भानू । राजा रामु स्वबस भगवानू ॥

सत्यसंध पालक श्रुति सेतू । राम जनमु जग मंगल हेतू ॥

गुर पितु मातु बचन अनुसारी । खल दलु दलन देव हितकारी ॥

नीति प्रीति परमारथ स्वारथु । कोउ न राम सम जान जथारथु ॥

बिधि हरि हरु ससि रबि दिसिपाला । माया जीव करम कुलि काला ॥

अहिप महिप जहँ लगि प्रभुताई । जोग सिद्धि निगमागम गाई ॥

करि बिचार जियें देखहु नीकें । राम रजाइ सीस सबही कें ॥

दो०— राखें राम रजाइ रुख हम सब कर हित होइ ।

समुझि सयाने करहु अब सब मिलि संमत सोइ ॥ 254

सब कहूँ सुखद राम अभिषेकू । मंगल मोद मूल मग एकू ॥

केहि बिधि अवध चलहिं रघुराऊ । कहहु समुझि सोइ करिअ उपाऊ ॥

सब सादर सुनि मुनिबर बानी । नय परमारथ स्वारथ सानी ॥

उतरु न आव लोग भए भोरे । तब सिरु नाइ भरत कर जोरे ॥

भानुबंस भए भूप घनेरे । अधिक एक तें एक बड़ेरे ॥

जनम हेतु सब कहँ पितु माता । करम सुभासुभ देइ बिधाता ॥

दलि दुख सजइ सकल कल्याना । अस असीस राउरि जगु जाना ॥

सो गोसाईँ बिधि गति जेहिं छेंकी । सकइ को टारि टेक जो टेकी ॥

दो०— बूझिअ मोहि उपाउ अब सो सब मोर अभागु ।

सुनि सनेहमय बचन गुर उर उमगा अनुरागु ॥ 255  
तात बात फुरि राम कृपाहीं । राम बिमुख सिधि सपनेहुँ नाहीं ॥  
सकुचउँ तात कहत एक बाता । अरध तजहिं बुध सरबस जाता ॥  
तुम्ह कानन गवनहु दोउ भाई । फेरिअहिं लखन सीय रघुराई ॥  
सुनि सुबचन हरषे दोउ भ्राता । भे प्रमोद परिपूरन गाता ॥  
मन प्रसन्न तन तेजु बिराजा । जनु जिय राउ रामु भए राजा ॥  
बहुत लाभ लोगन्ह लघु हानी । सम दुख सुख सब रोवहिं रानी ॥  
कहहिं भरतु मुनि कहा सो कीन्हें । फलु जग जीवन्ह अभिमत दीन्हें ॥  
कानन करउँ जनम भरि बासू । एहिं तें अधिक न मोर सुपासू ॥

दो०— अंतरजामी रामु सिय तुम्ह सरबग्य सुजान ।

जाँ फुर कहहु त नाथ निज कीजिअ बचनु प्रवान ॥ 256  
भरत बचन सुनि देखि सनेहू । सभा सहित मुनि भए बिदेहू ॥  
भरत महा महिमा जलरासी । मुनि मति ठाढ़ि तीर अबला सी ॥  
गा चह पार जतनु हिये हेरा । पावति नाव न बोहितु बेरा ॥  
औरु करिहि को भरत बड़ाई । सरसी सीपि कि सिंधु समाई ॥  
भरतु मुनिहि मन भीतर भाए । सहित समाज राम पहिं आए ॥  
प्रभु प्रनामु करि दीन्ह सुआसनु । बैठे सब सुनि मुनि अनुसासनु ॥  
बोले मुनिबरु बचन बिचारी । देस काल अवसर अनुहारी ॥  
सुनहु राम सरबग्य सुजाना । धरम नीति गुन ग्यान निधाना ॥

दो०— सब के उर अंतर बसहु जानहु भाउ कुभाउ ।

पुरजन जननी भरत हित होइ सो कहिअ उपाउ ॥ 257  
आरत कहहिं बिचारि न काऊ । सूझ जुआरिहि आपन दाऊ ॥  
सुनि मुनि बचन कहत रघुराऊ । नाथ तुम्हारेहि हाथ उपाऊ ॥  
सब कर हित रुख राउरि राखें । आयसु किऐँ मुदित फुर भाषें ॥  
प्रथम जो आयसु मो कहँ होई । माथें मानि करौँ सिख सोई ॥  
पुनि जेहि कहँ जस कहब गोसाई । सो सब भाँति घटिहि सेवकाई ॥  
कह मुनि राम सत्य तुम्ह भाषा । भरत सनेहँ बिचारु न राखा ॥  
तेहिं तें कहउँ बहोरि बहोरी । भरत भगति बस भइ मति मोरी ॥  
मोरें जान भरत रुचि राखी । जो कीजिअ सो सुभ सिव साखी ॥

दो०— भरत बिनय सादर सुनिअ करिअ बिचारु बहोरि ।

करब साधुमत लोकमत नृपनय निगम निचोरि ॥ 258  
गुर अनुरागु भरत पर देखी । राम हृदयें आनंदु बिसेषी ॥  
भरतहि धरम धुरंधर जानी । निज सेवक तन मानस बानी ॥  
बोले गुर आयस अनुकूला । बचन मंजु मृदु मंगलमूला ॥  
नाथ सपथ पितु चरन दोहाई । भयउ न भुअन भरत सम भाई ॥  
जे गुर पद अंबुज अनुरागी । ते लोकहुँ बेदहुँ बड़भागी ॥  
राउर जा पर अस अनुरागू । को कहि सकइ भरत कर भागू ॥  
लखि लघु बंधु बुद्धि सकुचाई । करत बदन पर भरत बड़ाई ॥  
भरतु कहहिं सोइ किऐँ भलाई । अस कहि राम रहे अरगाई ॥

दो०— तब मुनि बोले भरत सन सब सँकोचु तजि तात ।

कृपासिंधु प्रिय बंधु सन कहहु हृदय कै बात ॥ 259  
सुनि मुनि बचन राम रुख पाई । गुरु साहिब अनुकूल अघाई ॥  
लखि अपनैं सिर सबु छरु भारु । कहि न सकहिं कछु करहिं बिचारु ॥  
पुलकि सरीर सभौँ भए ठाढ़े । नीरज नयन नेह जल बाढ़े ॥

कहब मोर मुनिनाथ निबाहा । एहि तें अधिक कहौं मैं काहा ॥  
मैं जानउँ निज नाथ सुभाऊ । अपराधिहु पर कोह न काऊ ॥  
मो पर कृपा सनेहु बिसेषी । खेलत खुनिस न कबहूँ देखी ॥  
सिसुपन तें परिहरेउँ न संगू । कबहूँ न कीन्ह मोर मन भंगू ॥  
मैं प्रभु कृपा रीति जियें जोही । हारेहुँ खेल जितावहिं मोही ॥

दो०— महूँ सनेह सकोच बस सनमुख कही न बैन ।

दरसन तृपित न आजु लागि पेम पिआसे नैन ॥ 260

बिधि न सकेउ सहि मोर दुलारा । नीच बीचु जननी मिस पारा ॥  
यहउ कहत मोहि आजु न सोभा । अपनी समुझि साधु सुचि को भा ॥  
मातु मंदि मैं साधु सुचाली । उर अस आनत कोटि कुचाली ॥  
फरइ कि कोदव बालि सुसाली । मुकता प्रसव कि संबुक काली ॥  
सपनेहुँ दोसक लेसु न काहू । मोर अभाग उदधि अवगाहू ॥  
बिनु समुझें निज अघ परिपाकू । जारिउँ जायें जननि कहि काकू ॥  
हृदयें हेरि हारेउँ सब ओरा । एकहि भौंति भलेहिं भल मोरा ॥  
गुर गोसाईं साहिब सिय रामू । लागत मोहि नीक परिनामू ॥

दो०— साधु सभौं गुर प्रभु निकट कहउँ सुथल सति भाउ ।

प्रेम प्रपंचु कि झूठ फुर जानहिं मुनि रघुराउ ॥ 261

भूपति मरन पेम पनु राखी । जननी कुमति जगतु सबु साखी ॥  
देखि न जाहिं बिकल महतारीं । जरहिं दुसह जर पुर नर नारीं ॥  
महीं सकल अनरथ कर मूला । सो सुनि समुझि सहिउँ सब सूला ॥  
सुनि बन गवनु कीन्ह रघुनाथा । करि मुनि बेष लखन सिय साथा ॥  
बिनु पानहिन्ह पयादेहि पाएँ । संकरु साखि रहेउँ एहि धाएँ ॥  
बहुरि निहारि निषाद सनेहू । कुलिस कठिन उर भयउ न बेहू ॥  
अब सबु आँखिन्ह देखेउँ आई । जिअत जीव जड़ सबइ सहाई ॥  
जिन्हहि निरखि मग साँपिनि बीछी । तजहिं बिषम बिषु तामस तीछी ॥

दो०— तेइ रघुनंदनु लखनु सिय अनहित लागे जाहि ।

तासु तनय तजि दुसह दुख दैउ सहावइ काहि ॥ 262

सुनि अति बिकल भरत बर बानी । आरति प्रीति बिनय नय सानी ॥  
सोक मगन सब सभौं खभारू । मनहुँ कमल बन परेउ तुसारू ॥  
कहि अनेक बिधि कथा पुरानी । भरत प्रबोधु कीन्ह मुनि ग्यानी ॥  
बोले उचित बचन रघुनंदू । दिनकर कुल कैरव बन चंदू ॥  
तात जायें जियें करहु गलानी । ईस अधीन जीव गति जानी ॥  
तीनि काल तिभुअन मत मोरें । पुन्यसिलोक तात तर तोरें ॥  
उर आनत तुम्ह पर कुटिलाई । जाइ लोकु परलोकु नसाई ॥  
दोसु देहिं जननिहि जड़ तेई । जिन्ह गुर साधु सभा नहिं सेई ॥

दो०— मिटिहहिं पाप प्रपंच सब अखिल अमंगल भार ।

लोक सुजसु परलोक सुखु सुमिरत नामु तुम्हार ॥ 263

कहउँ सुभाउ सत्य सिव साखी । भरत भूमि रह राउरि राखी ॥  
तात कुतरक करहु जनि जाएँ । बैर पेम नहिं दुरइ दुराएँ ॥  
मुनि गन निकट बिहग मृग जाहीं । बाधक बधिक बिलोकि पराहीं ॥  
हित अनहित पसु पच्छिउ जाना । मानुष तनु गुन ग्यान निधाना ॥  
तात तुम्हहि मैं जानउँ नीकें । करौं काह असमंजस जीकें ॥  
राखेउ रायें सत्य मोहि त्यागी । तनु परिहरेउ पेम पन लागी ॥  
तासु बचन मेटत मन सोचू । तेहि तें अधिक तुम्हार सँकोचू ॥

ता पर गुर मोहि आयसु दीन्हा । अवसि जो कहहु चहउँ सोइ कीन्हा ॥  
दो०— मनु प्रसन्न करि सकुच तजि कहहु करौं सोइ आजु ।

सत्यसंध रघुबर बचन सुनि भा सुखी समाजु ॥ 264

सुर गन सहित सभय सुरराजू । सोचहिं चाहत होन अकाजू ॥  
बनत उपाउ करत कछु नाहीं । राम सरन सब गे मन माहीं ॥  
बहुरि बिचारि परस्पर कहहीं । रघुपति भगत भगति बस अहहीं ॥  
सुधि करि अंबरीष दुरबासा । भे सुर सुरपति निपट निरासा ॥  
सहे सुरन्ह बहु काल बिषादा । नरहरि किए प्रगट प्रहलादा ॥  
लगि लगि कान कहहिं धुनि माथा । अब सुर काज भरत के हाथा ॥  
आन उपाउ न देखिअ देवा । मानत रामु सुसेवक सेवा ॥  
हियँ सपेम सुमिरहु सब भरतहि । निज गुन सील राम बस करतहि ॥

दो०— सुनि सुर मत सुरगुर कहेउ भल तुम्हार बड़ भागु ।

सकल सुमंगल मूल जग भरत चरन अनुरागु ॥ 265

सीतापति सेवक सेवकाई । कामधेनु सय सरिस सुहाई ॥  
भरत भगति तुम्हरें मन आई । तजहु सोचु बिधि बात बनाई ॥  
देखु देवपति भरत प्रभाऊ । सहज सुभार्ये बिबस रघुराऊ ॥  
मन थिर करहु देव डरु नाहीं । भरतहि जानि राम परिछाहीं ॥  
सुनि सुरगुर सुर संमत सोचू । अंतरजामी प्रभुहि सकोचू ॥  
निज सिर भारु भरत जियँ जाना । करत कोटि बिधि उर अनुमाना ॥  
करि बिचारु मन दीन्ही ठीका । राम रजायस आपन नीका ॥  
निज पन तजि राखेउ पनु मोरा । छोहु सनेहु कीन्ह नहिं थोरा ॥

दो०— कीन्ह अनुग्रह अमित अति सब बिधि सीतानाथ ।

करि प्रनामु बोले भरतु जोरि जलज जुग हाथ ॥ 266

कहाँ कहावौं का अब स्वामी । कृपा अंबुनिधि अंतरजामी ॥  
गुर प्रसन्न साहिब अनुकूला । मिटी मलिन मन कलपित सूला ॥  
अपडर डरेउँ न सोच समूलें । रबिहि न दोसु देव दिसि भूलें ॥  
मोर अभागु मातु कटिलाई । बिधि गति बिषम काल कठिनाई ॥  
पाउ रोपि सब मिलि मोहि घाला । प्रनतपाल पन आपन पाला ॥  
यह नइ रीति न राउरि होई । लोकहुँ बेद बिदित नहिं गोई ॥  
जगु अनभल भल एकु गोसाई । कहिअ होइ भल कासु भलाई ॥  
देउ देवतरु सरिस सुभाऊ । सनमुख बिमुख न काहुहि काऊ ॥

दो०— जाइ निकट पहिचानि तरु छाहँ समनि सब सोच ।

मागत अभिमत पाव जग राउ रंकु भल पोच ॥ 267

लखि सब बिधि गुर स्वामि सनेहू । मिटेउ छोभु नहिं मन संदेहू ॥  
अब करुनाकर कीजिअ सोई । जन हित प्रभु चित छोभु न होई ॥  
जो सेवकु साहिबहि सँकोची । निज हित चहइ तासु मति पोची ॥  
सेवक हित साहिब सेवकाई । करै सकल सुख लोभ बिहाई ॥  
स्वारथ नाथ फिरें सबही का । किऐँ रजाइ कोटि बिधि नीका ॥  
यह स्वारथ परमारथ सारु । सकल सुकृत फल सुगति सिंगारु ॥  
देव एक बिनती सुनि मोरी । उचित होइ तस करब बहोरी ॥  
तिलक समाजु साजि सब आना । करिअ सुफल प्रभु जौं मनु माना ॥

दो०— सानुज पठइअ मोहि बन कीजिअ सबहि सनाथ ।

नतरु फेरिअहिं अंधु दोउ नाथ चलौं मैं साथ ॥ 268

नतरु जाहिं बन तीनिउ भाई । बहुरिअ सीय सहित रघुराई ॥

जेहि बिधि प्रभु प्रसन्न मन होई । करुना सागर कीजिअ सोई ॥  
 देवें दीन्ह सबु मोहि अमारु । मोरें नीति न धरम बिचारु ॥  
 कहउँ बचन सब स्वारथ हेतू । रहत न आरत कें चित चेतू ॥  
 उतरु देइ सुनि स्वामि रजाई । सो सेवकु लखि लाज लजाई ॥  
 अस मैं अवगुन उदधि अगाधू । स्वामि सनेहें सराहत साधू ॥  
 अब कृपाल मोहि सो मत भावा । सकुच स्वामि मन जाई न पावा ॥  
 प्रभु पद सपथ कहउँ सति भाऊ । जग मंगल हित एक उपाऊ ॥  
 दो०— प्रभु प्रसन्न मन सकुच तजि जो जेहि आयसु देब ।  
 सो सिर धरि धरि करिहि सबु मिटिहि अनट अवरैब ॥ 261  
 भरत बचन सुचि सुनि सुर हरषे । साधु सराहि सुमन सुर बरषे ॥  
 असमंजस बस अवध नेवासी । प्रमुदित मन तापस बनबासी ॥  
 चुपहिं रहे रघुनाथ सँकोची । प्रभु गति देखि सभा सब सोची ॥  
 जनक दूत तेहि अवसर आए । मुनि बसिष्ठें सुनि बेगि बोलाए ॥  
 करि प्रनाम तिन्ह रामु निहारे । बेषु देखि भए निपट दुखारे ॥  
 दूतन्ह मुनिबर बूझी बाता । कहहु बिदेह भूप कुसलाता ॥  
 सुनि सकुचाइ नाइ महि माथा । बोले चर बर जोरें हाथा ॥  
 बूझब राउर सादर साई । कुसल हेतु सो भयउ गोसाई ॥  
 दो०— नाहिं त कोसल नाथ कें साथ कुसल गइ नाथ ।  
 मिथिला अवध बिसेष तें जगु सब भयउ अनाथ ॥ 270  
 कोसलपति गति सुनि जनकौरा । भे सब लोक सोक बस बौरा ॥  
 जेहिं देखे तेहि समय बिदेहू । नामु सत्य अस लाग न केहू ॥  
 रानि कुचालि सुनत नरपालहि । सूझ न कछु जस मनि बिनु ब्यालहि ॥  
 भरत राज रघुबर बनबासू । भा मिथिलेसहि हृदयें हराँसू ॥  
 नृप बूझे बुध सचिव समाजू । कहहु बिचारि उचित का आजू ॥  
 समुझि अवध असमंजस दोरु । चलिअ कि रहिअ न कह कछु कोरु ॥  
 नृपहिं धीर धरि हृदयें बिचारी । पठए अवध चतुर चर चारी ॥  
 बूझि भरत सति भाउ कुभाऊ । आएहु बेगि न होइ लखाऊ ॥  
 दो०— गए अवध चर भरत गति बूझि देखि करतूति ।  
 चले चित्रकूटहि भरतु चार चले तेरहूति ॥ 271  
 दूतन्ह आइ भरत कइ करनी । जनक समाज जथामति बरनी ॥  
 सुनि गुर परिजन सचिव महीपति । भे सब सोच सनेहें बिकल अति ॥  
 धरि धीरजु करि भरत बडाई । लिए सुभट साहनी बोलाई ॥  
 घर पुर देस राखि रखवारे । हय गय रथ बहु जान सँवारे ॥  
 दुधरी साधि चले ततकाला । किए विश्राम न मग महिपाला ॥  
 भोरहिं आजु नइइ प्रयागा । चले जमुन उतरन सबु लागा ॥  
 खबरि लेन हम पठए नाथा । तिन्ह कहि अस महि नायउ माथा ॥  
 साथ किरात छ सातक दीन्हे । मुनिबर तुरत बिदा चर कीन्हे ॥  
 दो०— सुनत जनक आगवनु सबु हरषेउ अवध समाजु ।  
 रघुनंदनहि सकोचु बड़ सोच बिबस सुरराजु ॥ 272  
 गरइ गलानि कुटिल कैकेई । काहि कहै केहि दूषनु देई ॥  
 अस मन आनि मुदित नर नारी । भयउ बहोरि रहब दिन चारी ॥  
 एहि प्रकार गत बासर सोऊ । प्रात नहान लाग सबु कोऊ ॥  
 करि मज्जनु पूजहिं नर नारी । गनप गौरि तिपुरारि तमारी ॥  
 राम रमन पद बंदि बहोरी । बिनवहिं अंजुलि अंचल जोरी ॥

राजा रामु जानकी रानी । आनंद अवधि अवध रजधानी ॥  
 सुबस बसउ फिरि सहित समाजा । भरतहि रामु करहुँ जुबराजा ॥  
 एहि सुख सुधौ सींचि सब काहू । देव देहु जग जीवन लाहू ॥  
 दो०— गुर समाज भाइन्ह सहित राम राजु पुर होउ ।  
 अछत राम राजा अवध मरिअ माग सबु कोउ ॥ 273  
 सुनि सनेहमय पुरजन बानी । निंदहिं जोग बिरति मुनि ग्यानी ॥  
 एहि बिधि नित्यकरम करि पुरजन । रामहि करहिं प्रनाम पुलकि तन ॥  
 ऊँच नीच मध्यम नर नारी । लहहिं दरसु निज निज अनुहारी ॥  
 सावधान सबही सनमानहिं । सकल सराहत कृपानिधानहिं ॥  
 लरिकाइहि तें रघुबर बानी । पालत नीति प्रीति पहिचानी ॥  
 सील सकोच सिंधु रघुराऊ । सुमुख सुलोचन सरल सुभाऊ ॥  
 कहत राम गुन गन अनुरागे । सब निज भाग सराहन लागे ॥  
 हम सम पुन्य पुंज जग थोरे । जिन्हहि रामु जानत करि मोरे ॥  
 दो०— प्रेम मगन तेहि समय सब सुनि आवत मिथिलेसु ।  
 सहित सभा सभ्रम उठेउ रबिकुल कमल दिनेसु ॥ 274  
 भाइ सचिव गुर पुरजन साथी । आगें गवनु कीन्ह रघुनाथा ॥  
 गिरिबरु दीख जनकपति जबहीं । करि प्रनामु रथ त्यागेउ तबहीं ॥  
 राम दरस लालसा उछाहू । पथ श्रम लेसु कलेसु न काहू ॥  
 मन तहें जहें रघुबर बैदेही । बिनु मन तन दुख सुख सुधि केही ॥  
 आवत जनकु चले एहि भौंती । सहित समाज प्रेम मति माती ॥  
 आए निकट देखि अनुरागे । सादर मिलन परसपर लागे ॥  
 लगे जनक मुनिजन पद बंदन । रिषिन्ह प्रनामु कीन्ह रघुनंदन ॥  
 भाइन्ह सहित रामु मिलि राजहि । चले लवाइ समेत समाजहि ॥  
 दो०— आश्रम सागर सांत रस पूरन पावन पाथु ।  
 सेन मनहुँ करुना सरित लिऐं जाहिं रघुनाथ ॥ 275  
 बोरति ग्यान बिराग करारे । बचन ससोक मिलत नद नारे ॥  
 सोच उसास समीर तरंगा । धीरज तट तरुबर कर भंगा ॥  
 बिषम बिषाद तोरावति धारा । भय भ्रम भवेंर अबर्त अपारा ॥  
 केवट बुध बिद्या बडि नावा । सकहिं न खेइ ऐक नहिं आवा ॥  
 बनचर कोल किरात बिचारे । थके बिलोकि पथिक हियें हारे ॥  
 आश्रम उदधि मिली जब जाई । मनहुँ उठेउ अंबुधि अकुलाई ॥  
 सोक बिकल दोउ राज समाजा । रहा न ग्यानु न धीरजु लाजा ॥  
 भूप रूप गुन सील सराही । रोवहिं सोक सिंधु अवगाही ॥  
 छ०— अवगाहि सोक समुद्र सोचहिं नारि नर ब्याकुल महा ।  
 दै दोष सकल सरोष बोलहिं बाम बिधि कीन्हो कहा ॥  
 सुर सिद्ध तापस जोगिजन मुनि देखि दसा बिदेह की ।  
 तुलसी न समरथु कोउ जो तरि सकै सरित सनेह की ॥  
 सो०— किए अमित उपदेस जहें तहें लोगन्ह मुनिबरन्ह ॥  
 धीरजु धरिअ नरेस कहेउ बसिष्ठ बिदेह सन ॥ 276  
 जासु ग्यानु रबि भव निसि नासा । बचन किरन मुनि कमल बिकासा ॥  
 तेहि कि मोह ममता निअराई । यह सिय राम सनेह बड़ाई ॥  
 बिषई साधक सिद्ध सयाने । त्रिबिध जीव जग बेद बखाने ॥  
 राम सनेह सरस मन जासू । साधु सभौ बड़ आदर तासू ॥  
 सोह न राम पेम बिनु ग्यानु । करनधार बिनु जिमि जलजानू ॥

मुनि बहुबिधि बिदेहु समुझाए । रामघाट सब लोग नहाए ॥  
सकल सोक संकुल नर नारी । सो बासरु बीतेउ बिनु बारी ॥  
पसु खग मृगन्ह न कीन्ह अहारु । प्रिय परिजन कर कौन बिचारु ॥  
दो०— दोउ समाज निमिराजु रघुराजु नहाने प्रात ।

बैठे सब बट बिटप तर मन मलीन कृस गात ॥ 277

जे महिसुर दसरथ पुर बासी । जे मिथिलापति नगर निवासी ॥  
हंस बंस गुर जनक पुरोधा । जिन्ह जग मगु परमारथु सोधा ॥  
लगे कहन उपदेस अनेका । सहित धरम नय बिरति बिबेका ॥  
कौसिक कहि कहि कथा पुरानी । समुझाई सब सभा सुबानी ॥  
तब रघुनाथ कौसिकहि कहेऊ । नाथ कालि जल बिनु सबु रहेऊ ॥  
मुनि कह उचित कहत रघुराई । गयउ बीति दिन पहर अढ़ाई ॥  
रिषि रुख लखि कह तेरहुतिराजू । इहों उचित नहिं असन अनाजू ॥  
कहा भूप भल सबहि सोहाना । पाइ रजायसु चले नहाना ॥

दो०— तेहि अवसर फल फूल दल मूल अनेक प्रकार ।

लइ आए बनचर बिपुल भरि भरि कौवरि भार ॥ 278

कामद भे गिरि राम प्रसादा । अवलोकत अपहरत बिषादा ॥  
सर सरिता बन भूमि बिभागा । जनु उमगत आनंद अनुरागा ॥  
बेलि बिटप सब सफल सफूला । बोलत खग मृग अलि अनुकूला ॥  
तेहि अवसर बन अधिक उछाहू । त्रिबिध समीर सुखद सब काहू ॥  
जाइ न बरनि मनोहरताई । जनु महि करति जनक पहुनाई ॥  
तब सब लोग नहाइ नहाई । राम जनक मुनि आयसु पाई ॥  
देखि देखि तरुबर अनुरागे । जहँ तहँ पुरजन उत्तरन लागे ॥  
दल फल मूल कंद बिधि नाना । पावन सुंदर सुधा समाना ॥

दो०— सादर सब कहें रामगुर पठए भरि भरि भार ।

पूजि पितर सुर अतिथि गुर लगे करन फरहार ॥ 279

मासपारायण, बीसवाँ विश्राम

एहि बिधि बासर बीते चारी । रामु निरखि नर नारि सुखारी ॥  
दुहु समाज असि रुचि मन माहीं । बिनु सिय राम फिरब भल नाहीं ॥  
सीता राम संग बनबासू । कोटि अमरपुर सरिस सुपासू ॥  
परिहरि लखन रामु बैदेही । जेहि घरु भाव बाम बिधि तेही ॥  
दाहिन दइउ होइ जब सबही । राम समीप बसिअ बन तबही ॥  
मंदाकिनि मज्जनु तिहु काला । राम दरसु मुद मंगल माला ॥  
अटनु राम गिरि बन तापस थल । असनु अमिअ सम कंद मूल फल ॥  
सुख समेत संबत दुइ साता । पल सम होहिं न जनिअहिं जाता ॥

दो०— एहि सुख जोग न लोग सब कहहि कहां अस भागु ।

सहज सुभार्ये समाज दुहु राम चरन अनुरागु ॥ 280

एहि बिधि सकल मनोरथ करहीं । बचन सप्रेम सुनत मन हरहीं ॥  
सीय मातु तेहि समय पठाई । दासीं देखि सुअवसरु आई ॥  
सावकास सुनि सब सिय सासू । आयउ जनकराज रनिवासू ॥  
कौसल्यो सादर सनमानी । आसन दिए समय सम आनी ॥  
सीलु सनेहु सकल दुहु ओरा । द्रवहिं देखि सुनि कुलिस कठोरा ॥  
पुलक सिथिल तन बारि बिलोचन । महि नख लिखन लगीं सब सोचन ॥  
सब सिय राम प्रीति कि सि मूरति । जनु करुना बहु बेष बिसूरति ॥  
सीय मातु कह बिधि बुधि बाँकी । जो पय फेनु फोर पबि टाँकी ॥

दो०— सुनिअ सुधा देखिअहिं गरल सब करतूति कराल ।

जहँ तहँ काक उलूक बक मानस सकृत मराल ॥ 281

सुनि ससोच कह देबि सुमित्रा । बिधि गति बड़ि बिपरीत बिचित्रा ॥

जो सृजि पालइ हरइ बहोरी । बाल केलि सम बिधि मति भोरी ॥

कौसल्या कह दोसु न काहू । करम बिबस दुख सुख छति लाहू ॥

कठिन करम गति जान बिधाता । जो सुभ असुभ सकल फल दाता ॥

ईस रजाइ सीस सबही केँ । उतपति थिति लय बिषहु अमी केँ ॥

देबि मोह बस सोचिअ बादी । बिधि प्रपंचु अस अचल अनादी ॥

भूपति जिअब मरब उर आनी । सोचिअ सखि लखि निज हित हानी ॥

सीय मातु कह सत्य सुबानी । सुकृती अवधि अवधपति रानी ॥

दो०— लखनु रामु सिय जाहुँ बन भल परिनाम न पोचु ।

गहबरि हियेँ कह कौसिला मोहि भरत कर सोचु ॥ 282

ईस प्रसाद असीस तुम्हारी । सुत सुतबधू देवसरि बारी ॥

राम सपथ मैँ कीन्हि न काऊ । सो करि कहउँ सखी सति भाऊ ॥

भरत सील गुन बिनय बड़ाई । भायप भगति भरोस भलाई ॥

कहत सारदहु कर मति हीचे । सागर सीप कि जाहिँ उलीचे ॥

जानउँ सदा भरत कुलदीपा । बार बार मोहि कहेउ महीपा ॥

कसेँ कनकु मनि पारिखि पाएँ । पुरुष परिखिअहिँ समयेँ सुभाएँ ॥

अनुचित आजु कहब अस मोरा । सोक सनेहँ सयानप थोरा ॥

सुनि सुरसरि सम पावनि बानी । भई सनेह बिकल सब रानी ॥

दो०— कौसल्या कह धीर धरि सुनहु देबि मिथिलेसि ।

को बिबेकनिधि बल्लभहि तुम्हहि सकइ उपदेसि ॥ 283

रानि राय सन अवसरु पाई । अपनी भौँति कहब समुझाई ॥

रखिअहिँ लखनु भरतु गवनहिँ बन । जौँ यह मत मानै महीप मन ॥

तौ भल जतनु करब सुबिचारी । मोरें सोचु भरत कर भारी ॥

गूढ सनेह भरत मन माहीं । रहें नीक मोहि लागत नाहीं ॥

लखि सुभाउ सुनि सरल सुबानी । सब भइ मगन करुन रस रानी ॥

नभ प्रसून झरि धन्य धन्य धुनि । सिथिल सनेहँ सिद्ध जोगी मुनि ॥

सबु रनिवासु बिथकि लखि रहेऊ । तब धरि धीर सुमित्राँ कहेऊ ॥

देबि दंड जुग जामिनि बीती । राम मातु सुनि उठी सप्रीती ॥

दो०— बेगि पाउ धारिअ थलहि कह सनेहँ सतिभाय ।

हमरें तौ अब ईस गति कै मिथिलेस सहाय ॥ 284

लखि सनेह सुनि बचन बिनीता । जनकप्रिया गह पाय पुनीता ॥

देबि उचित असि बिनय तुम्हारी । दसरथ धरिनि राम महतारी ॥

प्रभु अपने नीचहु आदरहीं । अगिनि धूम गिरि सिर तिनु धरहीं ॥

सेवकु राउ करम मन बानी । सदा सहाय महेसु भवानी ॥

रउरे अंग जोगु जग को है । दीप सहाय कि दिनकर सोहै ॥

रामु जाइ बनु करि सुर काजू । अचल अवधपुर करिहहिँ राजू ॥

अमर नाग नर राम बाहुबल । सुख बसिहहिँ अपनेँ अपनेँ थल ॥

यह सब जागबलिक कहि राखा । देबि न होइ मुधा मुनि भाषा ॥

दो०— अस कहि पग परि पेम अति सिय हित बिनय सुनाइ ।

सिय समेत सियमातु तब चली सुआयसु पाइ ॥ 285

प्रिय परिजनहि मिली बैदेही । जो जेहि जोगु भौँति तेहि तेही ॥

तापस बेष जानकी देखी । भा सबु बिकल बिषाद बिसेषी ॥

जनक राम गुर आयसु पाई । चले थलहि सिय देखी आई ॥  
लीन्हि लाइ उर जनक जानकी । पाहुनि पावन पेम प्रान की ॥  
उर उमगेउ अंबुधि अनुरागू । भयउ भूप मनु मनहुँ पयागू ॥  
सिय सनेह बटु बाढत जोहा । ता पर राम पेम सिसु सोहा ॥  
चिरजीवी मुनि ग्यान बिकल जनु । बूडत लहेउ बाल अवलंबनु ॥  
मोह मगन मति नहिं बिदेह की । महिमा सिय रघुबर सनेह की ॥  
दो०— सिय पितु मातु सनेह बस बिकल न सकी सँभारि ।

धरनिसुताँ धीरजु धरेउ समउ सुधरमु बिचारि ॥ 286  
तापस बेष जनक सिय देखी । भयउ पेमु परितोषु बिसेषी ॥  
पुत्रि पबित्र किए कुल दोऊ । सुजस धवल जगु कह सबु कोऊ ॥  
जिति सुरसरि कीरति सरि तोरी । गवनु कीन्ह बिधि अंड करोरी ॥  
गंग अवनि थल तीनि बड़ेरे । एहिं किए साधु समाज घनेरे ॥  
पितु कह सत्य सनेहँ सुबानी । सीय सकुच महुँ मनहुँ समानी ॥  
पुनि पितु मातु लीन्हि उर लाई । सिख आसिष हित दीन्हि सुहाई ॥  
कहति न सीय सकुचि मन माहीं । इहाँ बसब रजनीं भल नाहीं ॥  
लखि रुख रानि जनायउ राऊ । हृदयँ सराहत सीलु सुभाऊ ॥

दो०— बार बार मिलि भेंटि सिय बिदा कीन्हि सनमानि ।  
कही समय सिर भरत गति रानि सुबानि सयानि ॥ 287  
सुनि भूपाल भरत ब्यवहारू । सोन सुगंध सुधा ससि सारू ॥  
मूदे सजल नयन पुलके तन । सुजसु सराहन लगे मुदित मन ॥  
सावधान सुनु सुमुखि सुलोचनि । भरत कथा भव बंध बिमोचनि ॥  
धरम राजनय ब्रह्मबिचारू । इहाँ जथामति मोर प्रचारू ॥  
सो मति मोरि भरत महिमाही । कहै काह छलि छुअति न छॉही ॥  
बिधि गनपति अहिपति सिव सारद । कबि कोबिद बुध बुद्धि बिसारद ॥  
भरत चरित कीरति करतूती । धरम सील गुन बिमल बिभूती ॥  
समुझत सुनत सुखद सब काहू । सुचि सुरसरि रुचि निदर सुधाहू ॥

दो०— निरवधि गुन निरुपम पुरुषु भरतु भरत सम जानि ।  
कहिअ सुमेरु कि सेर सम कबिकुल मति सकुचानि ॥ 288  
अगम सबहि बरनत बरबरनी । जिमि जलहीन मीन गमु धरनी ॥  
भरत अमित महिमा सुनु रानी । जानहिं रामु न सकहिं बखानी ॥  
बरनि सप्रेम भरत अनुभाऊ । तिय जिय की रुचि लखि कह राऊ ॥  
बहुरहिं लखनु भरतु बन जाहीं । सब कर भल सब के मन माहीं ॥  
देबि परंतु भरत रघुबर की । प्रीति प्रतीति जाइ नहिं तरकी ॥  
भरतु अवधि सनेह ममता की । जद्यपि रामु सीम समता की ॥  
परमारथ स्वारथ सुख सारे । भरत न सपनेहुँ मनहुँ निहारे ॥  
साधन सिद्धि राम पग नेहू । मोहि लखि परस भरत मत एहू ॥

दो०— भोरेहुँ भरत न पेलिहहिं मनसहुँ राम रजाइ ।  
करिअ न सोचु सनेह बस कहेउ भूप बिलखाइ ॥ 289  
राम भरत गुन गनत सप्रीती । निसि दंपतिहि पलक सम बीती ॥  
राज समाज प्रात जुग जागे । न्हाइ न्हाइ सुर पूजन लागे ॥  
गे नहाइ गुर पहिं रघुराई । बंदि चरन बोले रुख पाई ॥  
नाथ भरतु पुरजन महतारी । सोक बिकल बनबास दुखारी ॥  
सहित समाज राउ मिथिलेसू । बहुत दिवस भए सहत कलेसू ॥  
उचित होइ सोइ कीजिअ नाथा । हित सबही कर रौंरे हाथा ॥

अस कहि अति सकुचे रघुराऊ । मुनि पुलके लखि सीलु सुभाऊ ॥  
 तुम्ह बिनु राम सकल सुख साजा । नरक सरिस दुहु राज समाजा ॥  
 दो०— प्रान प्रान के जीव के जिव सुख के सुख राम ।  
 तुम्ह तजि तात सोहात गृह जिन्हहि तिन्हहि बिधि बाम ॥ 290  
 सो सुखु करमु धरमु जरि जाऊ । जहँ न राम पद पंकज भाऊ ॥  
 जोगु कुजोगु ग्यानु अग्यानु । जहँ नहिं राम पेम परधानु ॥  
 तुम्ह बिनु दुखी सुखी तुम्ह तेहीं । तुम्ह जानहु जिय जो जेहि केहीं ॥  
 राउर आयसु सिर सबही केँ । बिदित कृपालहि गति सब नीकेँ ॥  
 आपु आश्रमहिं धारिअ पाऊ । भयउ सनेह सिथिल मुनिराऊ ॥  
 करि प्रनामु तब रामु सिधाए । रिषि धरि धीर जनक पहिं आए ॥  
 राम बचन गुरु नृपहि सुनाए । सील सनेह सुभार्यो सुहाए ॥  
 महाराज अब कीजिअ सोई । सब कर धरम सहित हित हाई ॥  
 दो०— ग्यान निधान सुजान सुचि धरम धीर नरपाल ।  
 तुम्ह बिनु असमंजस समन को समरथ एहि काल ॥ 291  
 सुनि मुनि बचन जनक अनुरागे । लखि गति ग्यानु बिरागु बिरागे ॥  
 सिथिल सनेहँ गुनत मन माहीं । आए इहाँ कीन्ह भल नाहीं ॥  
 रामहि रायँ कहेउ बन जाना । कीन्ह आपु प्रिय प्रेम प्रवाना ॥  
 हम अब बन तँ बनहि पढाई । प्रमुदित फिरब बिबेक बड़ाई ॥  
 तापस मुनि महिसुर सुनि देखी । भए प्रेम बस बिकल बिसेषी ॥  
 समउ समुझि धरि धीरजु राजा । चले भरत पहिं सहित समाजा ॥  
 भरत आइ आगें भइ लीन्हे । अवसर सरिस सुआसन दीन्हे ॥  
 तात भरत कह तेरहुति राऊ । तुम्हहि बिदित रघुबीर सुभाऊ ॥  
 दो०— राम सत्यब्रत धरम रत सब कर सीलु सनेहु ।  
 संकट सहत सकोच बस कहिअ जो आयसु देहु ॥ 292  
 सुनि तन पुलकि नयन भरि बारी । बोले भरतु धीर धरि भारी ॥  
 प्रभु प्रिय पूज्य पिता सम आपू । कुलगुरु सम हित माय न बापू ॥  
 कौसिकादि मुनि सचिव समाजू । ग्यान अंबुनिधि आपुनु आजू ॥  
 सिसु सेवकु आयसु अनुगामी । जानि मोहि सिख देइअ स्वामी ॥  
 एहिं समाज थल बूझब राउर । मौन मलिन मैं बोलब बाउर ॥  
 छोटे बदन कहउँ बड़ि बाता । छमब तात लखि बाम बिधाता ॥  
 आगम निगम प्रसिद्ध पुराना । सेवाधरमु कठिन जगु जाना ॥  
 स्वामि धरम स्वारथहि बिरोधू । बैरु अंध प्रेमहि न प्रबोधू ॥  
 दो०— राखि राम रुख धरमु ब्रतु पराधीन मोहि जानि ।  
 सब केँ संमत सर्व हित करिअ पेमु पहिचानि ॥ 293  
 भरत बचन सुनि देखि सुभाऊ । सहित समाज सराहत राऊ ॥  
 सुगम अगम मृदु मंजु कठोर । अरथु अमित अति आखर थोरे ॥  
 ज्यों मुखु मुकुर मुकुरु निज पानी । गहि न जाइ अस अदभुत बानी ॥  
 भूप भरतु मुनि सहित समाजू । गे जहँ बिबुध कुमुद द्विजराजू ॥  
 सुनि सुधि सोच बिकल सब लोगा । मनहुँ मीनगन नव जल जोगा ॥  
 देवें प्रथम कुलगुर गति देखी । निरखि बिदेह सनेह बिसेषी ॥  
 राम भगतिमय भरतु निहारे । सुर स्वारथी हहरि हियँ हारे ॥  
 सब कोउ राम पेममय पेखा । भए अलेख सोच बस लेखा ॥  
 दो०— रामु सनेह सकोच बस कह ससोच सुरराजु ।  
 रचहु प्रपंचहि पंच मिलि नाहिं त भयउ अकाजु ॥ 294

सुरन्ह सुमिरि सारदा सराही । देबि देव सरनागत पाही ॥  
 फेरि भरत मति करि निज माया । पालु बिबुध कुल करि छल छाया ॥  
 बिबुध बिनय सुनि देबि सयानी । बोली सुर स्वारथ जड जानी ॥  
 मो सन कहहु भरत मति फेरु । लोचन सहस न सूझ सुमेरु ॥  
 बिधि हरि हर माया बडि भारी । सोउ न भरत मति सकइ निहारी ॥  
 सो मति मोहि कहत करु भोरी । चंदिनि कर कि चंडकर चोरी ॥  
 भरत हृदयें सिय राम निवासू । तहें कि तिमिर जहें तरनि प्रकासू ॥  
 अस कहि सारद गइ बिधि लोका । बिबुध बिकल निसि मानहुँ कोका ॥

दो०— सुर स्वारथी मलीन मन कीन्ह कुमंत्र कुठाटु ।

रचि प्रपंच माया प्रबल भय भम अरति उचाटु ॥ 295

करि कुचालि सोचत सुरराजू । भरत हाथ सबु काजु अकाजू ॥  
 गए जनकु रघुनाथ समीपा । सनमाने सब रबिकुल दीपा ॥  
 समय समाज धरम अबिरोधा । बोले तब रघुबंस पुरोधा ॥  
 जनक भरत संबादु सुनाई । भरत कहाउति कही सुहाई ॥  
 तात राम जस आयसु देहू । सो सबु करै मोर मत एहू ॥  
 सुनि रघुनाथ जोरि जुग पानी । बोले सत्य सरल मृदु बानी ॥  
 बिद्यमान आपुनि मिथिलेसू । मोर कहब सब भौंति भदेसू ॥  
 राउर राय रजायसु होई । राउरि सपथ सही सिर सोई ॥

दो०— राम सपथ सुनि मुनि जनकु सकुचे सभा समेत ।

सकल बिलोकत भरत मुखु बनइ न ऊतरु देत ॥ 296

सभा सकुच बस भरत निहारी । रामबंधु धरि धीरजु भारी ॥  
 कुसमउ देखि सनेहु सँभारा । बढत बिधि जिमि घटज निवारा ॥  
 सोक कनकलोचन मति छोनी । हरी बिमल गुन गन जगजोनी ॥  
 भरत बिबेक बराहँ बिसाला । अनायास उधरी तेहि काला ॥  
 करि प्रनामु सब कहँ कर जोरे । रामु राउ गुर साधु निहारे ॥  
 छमब आजु अति अनुचित मोरा । कहउँ बदन मृदु बचन कठोरा ॥  
 हियँ सुमिरी सारदा सुहाई । मानस तें मुख पंकज आई ॥  
 बिमल बिबेक धरम नय साली । भरत भारती मंजु मराली ॥

दो०— निरखि बिबेक बिलोचनन्हि सिथिल सनेहँ समाजु ।

करि प्रनामु बोले भरतु सुमिरि सीय रघुराजु ॥ 297

प्रभु पितु मातु सुहृद गुर स्वामी । पूज्य परम हित अंतरजामी ॥  
 सरल सुसाहिबु सील निधानू । प्रनतपाल सर्वग्य सुजानू ॥  
 समरथ सरनागत हितकारी । गुनगाहकु अवगुन अघ हारी ॥  
 स्वामि गोसॉइहि सरिस गासाई । मोहि समान मैं साई दोहाई ॥  
 प्रभु पितु बचन मोह बस पेली । आयउँ इहाँ समाजु सकेली ॥  
 जग भल पोच ऊँच अरु नीचू । अमिअ अमरपद माहुरु मीचू ॥  
 राम रजाइ मेट मन माहीं । देखा सुना कतहुँ कोउ नाहीं ॥  
 सो मैं सब बिधि कीन्हि ढिठाई । प्रभु मानी सनेह सेवकाई ॥

दो०— कृपों भलाई आपनी नाथ कीन्ह भल मोर ।

दूषन भे भूषन सरिस सुजसु चारु चहु ओर ॥ 298

राउरि रीति सुबानि बडाई । जगत बिदित निगमागम गाई ॥  
 कूर कुटिल खल कुमति कलंकी । नीच निसील निरीस निसंकी ॥  
 तेउ सुनि सरन सामुहें आए । सकृत प्रनामु किहें अपनाए ॥  
 देखि दोष कबहुँ न उर आने । सुनि गुन साधु समाज बखाने ॥

को साहिब सेवकहि नेवाजी । आपु समाज साज सब साजी ॥  
निज करतूति न समुझिअ सपनें । सेवक सकुच सोचु उर अपनें ॥  
सो गोसाईं नहिं दूसर कोपी । भुजा उठाइ कहउं पन रोपी ॥  
पसु नाचत सुक पाठ प्रबीना । गुन गति नट पाठक आधीना ॥  
दो०— यों सुधारि सनमानि जन किए साधु सिरमोर ।

को कृपाल बिनु पालिहै बिरिदावलि बरजोर ॥ 299  
सोक सनेहैं कि बाल सुभाएँ । आयउं लाइ रजायसु बाएँ ॥  
तबहुँ कृपाल हेरि निज ओरा । सबहि भौंति भल मानेउ मोरा ॥  
देखेउं पाय सुमंगल मूला । जानेउं स्वामि सहज अनुकूला ॥  
बड़ें समाज बिलोकेउं भागू । बड़ीं चूक साहिब अनुरागू ॥  
कृपा अनुग्रहु अंग अघाई । कीन्हि कृपानिधि सब अधिकारी ॥  
राखा मोर दुलार गोसाईं । अपनें सील सुभार्ये भलाई ॥  
नाथ निपट में कीन्हि ढिठाई । स्वामि समाज सकोच बिहाई ॥  
अबिनय बिनय जथारुचि बानी । छमिहि देउ अति आरति जानी ॥

दो०— सुहृद सुजान सुसाहिबहि बहुत कहब बड़ि खोरि ।  
आयसु देइअ देव अब सबइ सुधारी मोरि ॥ 300  
प्रभु पद पदुम पराग दोहाई । सत्य सुकृत सुख सीवें सुहाई ॥  
सो करि कहउं हिए अपन की । रुचि जागत सोवत सपने की ॥  
सहज सनेहैं स्वामि सेवकाई । स्वारथ छल फल चारि बिहाई ॥  
अग्या सम न सुसाहिब सेवा । सो प्रसादु जन पावै देवा ॥  
अस कहि प्रेम बिबस भए भारी । पुलक सरीर बिलोचन बारी ॥  
प्रभु पद कमल गहे अकुलाई । समउ सनेहु न सो कहि जाई ॥  
कृपासिंधु सनमानि सुबानी । बैठाए समीप गहि पानी ॥  
भरत बिनय सुनि देखि सुभाऊ । सिथिल सनेहैं सभा रघुराऊ ॥

छं०— रघुराउ सिथिल सनेहैं साधु समाज मुनि मिथिला धनी ।  
मन महुँ सराहत भरत भायप भगति की महिमा घनी ॥  
भरतहि प्रसंसत बिबुध बरषत सुमन मानस मलिन स ।  
तुलसी बिकल सब लोग सुनि सकुचे निसागम नलिन से ॥

सो०— देखि दुखारी दीन दुहु समाज नर नारि सब ।  
मघवा महा मलीन मुए मारि मंगल चहत ॥ 301  
कपट कुचालि सीवें सुरराजू । पर अकाज प्रिय आपन काजू ॥  
काक समान पाकरिपु रीती । छली मलीन कतहुँ न प्रतीती ॥  
प्रथम कुमत करि कपटु सँकेला । सो उचाटु सब कें सिर मेला ॥  
सुरमार्याँ सब लोग बिमोहे । राम पेम अतिसय न बिछोहे ॥  
भय उचाट बस मन थिर नाहीं । छन बन रुचि छन सदन सोहाहीं ॥  
दुबिध मनोगति प्रजा दुखारी । सरित सिंधु संगम जनु बारी ॥  
दुचित कतहुँ परितोषु न लहहीं । एक एक सन मरमु न कहहीं ॥  
लखि हियें हंसि कह कृपानिधानू । सरिस स्वान मघवान जुबानू ॥

दो०— भरतु जनकु मुनिजन सचिव साधु सचेत बिहाइ ।  
लागि देवमाया सबहि जथाजोगु जनु पाइ ॥ 302  
कृपासिंधु लखि लोग दुखारे । निज सनेहैं सुरपति छल भारे ॥  
सभा राउ गुर महिसुर मंत्री । भरत भगति सब कै मति जंत्री ॥  
रामहि चितवत चित्र लिखे से । सकुचत बोलत बचन सिखे से ॥  
भरत प्रीति नति बिनय बड़ाई । सुनत सुखद बरनत कठिनाई ॥

जासु बिलोकि भगति लवलेसू । प्रेम मगन मुनिगन मिथिलेसू ॥  
महिमा तासु कहै किमि तुलसी । भगति सुभार्य सुमति हिर्य हुलसी ॥  
आपु छोटि महिमा बडि जानी । कबिकुल कानि मानि सकुचानी ॥  
कहि न सकति गुन रुचि अधिकाई । मति गति बाल बचन की नाई ॥  
दो०— भरत बिमल जसु बिमल बिधु सुमति चकोरकुमारि ।

उदित बिमल जन हृदय नभ एकटक रही निहारि ॥ 303  
भरत सुभाउ न सुगम निगमहूँ । लघु मति चापलता कबि छमहूँ ॥  
कहत सुनत सति भाउ भरत को । सीय राम पद होइ न रत को ॥  
सुमिरत भरतहि प्रेम राम को । जेहि न सुलभु तेहि सरिस बाम को ॥  
देखि दयाल दसा सबही की । राम सुजान जानि जन जी की ॥  
धरम धुरीन धीर नय नागर । सत्य सनेह सील सुख सागर ॥  
देसु कालु लखि समउ समाजू । नीति प्रीति पालक रघुराजू ॥  
बोले बचन बानि सरबसु से । हित परिनाम सुनत ससि रसु से ॥  
तात भरत तुम्ह धरम धुरीना । लोक बेद बिद प्रेम प्रबीना ॥

दो०— करम बचन मानस बिमल तुम्ह समान तुम्ह तात ।  
गुर समाज लघु बंधु गुन कुसमय्ये किमि कहि जात ॥ 304  
जानहु तात तरनि कुल रीती । सत्यसंध पितु कीरति प्रीती ॥  
समउ समाजु लाज गुरजन की । उदासीन हित अनहित मन की ॥  
तुम्हहि बिदित सबही कर करमू । आपन मोर परम हित धरमू ॥  
मोहि सब भाँति भरोस तुम्हारा । तदपि कहउँ अवसर अनुसारा ॥  
तात तात बिनु बात हमारी । केवल गुरकुल कृपाँ सँभारी ॥  
नतरु प्रजा परिजन परिवारु । हमहि सहित सबु होत खुआरु ॥  
जौ बिनु अवसर अथवँ दिनेसू । जग केहि कहहु न होइ कलेसू ॥  
तस उतपातु तात बिधि कीन्हा । मुनि मिथिलेसु राखि सबु लीन्हा ॥

दो०— राज काज सब लाज पति धरम धरनि धन धाम ।  
गुर प्रभाउ पालिहि सबहि भल होइहि परिनाम ॥ 305  
सहित समाज तुम्हार हमारा । घर बन गुर प्रसाद रखवारा ॥  
मातु पिता गुर स्वामि निदेसू । सकल धरम धरनीधर सेसू ॥  
सो तुम्ह करहु करावहु मोहू । तात तरनिकुल पालक होहू ॥  
साधक एक सकल सिधि देनी । कीरति सुगति भूतिमय बेनो ॥  
सो बिचारि सहि संकटु भारी । करहु प्रजा परिवारु सुखारी ॥  
बॉटी बिपति सबहिं मोहि भाई । तुम्हहि अवधि भरि बडि कठिनाई ॥  
जानि तुम्हहि मृदु कहउँ कठोरा । कुसमय्ये तात न अनुचित मोरा ॥  
होहिं कुठायें सुबंधु सहाए । ओडिअहिं हाथ असनिहु के घाए ॥

दो०— सेवक कर पद नयन से मुख सो साहिबु होइ ।  
तुलसी प्रीति कि रीति सुनि सुकबि सराहहिं सोइ ॥ 306  
सभा सकल सुनि रघुबर बानी । प्रेम पयोधि अमिअँ जनु सानी ॥  
सिथिल समाज सनेह समाधी । देखि दसा चुप सारद साधी ॥  
भरतहि भयउ मन मिटा बिषादू । भा जनु गूँगेहि गिरा प्रसादू ॥  
कीन्हा सप्रेम प्रनामु बहोरी । बोले पानि पंकरुह जोरी ॥  
नाथ भयउ सुखु साथ गए को । लहेउँ लाहु जग जनमु भए को ॥  
अब कृपाल जस आयसु होई । करौं सीस धरि सादर सोई ॥  
सो अवलंब देव मोहि देई । अवधि पारु पावौं जेहि सेई ॥

दो०— देव देव अभिषेक हित गुर अनुसासनु पाइ ।

आनेउँ सब तीरथ सलिलु तेहि कहँ काह रजाइ ॥ 307

एकु मनोरथु बड़ मन माहीं । सभयँ सकोच जात कहि नाही ॥

कहहु तात प्रभु आयसु पाई । बोले बानि सनेह सुहाई ॥

चित्रकूट सुचि थल तीरथ बन । खग मृग सर सरि निर्झर गिरिगन ॥

प्रभु पद अंकित अवनि बिसेषी । आयसु होइ त आवौ देखी ॥

अवसि अत्रि आयसु सिर धरहू । तात बिगतभय कानन चरहू ॥

मुनि प्रसाद बनु मंगल दाता । पावन परम सुहावन भ्राता ॥

रिषिनायकु जहँ आयसु देहीं । राखेहु तीरथ जलु थल तेहीं ॥

सुनि प्रभु बचन भरत सुखु पावा । मुनि पद कमल मुदित सिरु नावा ॥

दो०— भरत राम संबादु सुनि सकल सुमंगल मूल ।

सुर स्वारथी सराहि कुल बरषत सुरतरु फूल ॥ 308

धन्य भरत जय राम गोसाई । कहत देव हरषत बरिआई ॥

मुनि मिथिलेस सभौ सब काहू । भरत बचन सुनि भयउ उछाहू ॥

भरत राम गुन ग्राम सनेहू । पुलकि प्रसंसत राउ बिदेहू ॥

सेवक स्वामि सुभाउ सुहावन । नेमु पेमु अति पावन पावन ॥

मति अनुसार सराहन लागे । सचिव सभासद सब अनुरागे ॥

सुनि सुनि राम भरत संबादू । दुहु समाज हियँ हरषु बिषादू ॥

राम मातु दुखु सुखु सम जानी । कहि गुन राम प्रबोधी रानी ॥

एक कहहिं रघुबीर बड़ाई । एक सराहत भरत भलाई ॥

दो०— अत्रि कहेउ तब भरत सन सैल समीप सुकूप ।

राखिअ तीरथ तोय तहँ पावन अमिअ अनूप ॥ 309

भरत अत्रि अनुसासन पाई । जल भाजन सब दिए चलाई ॥

सानुज आपु अत्रि मुनि साधू । सहित गए जहँ कूप अगाधू ॥

पावन पाथ पुन्यथल राखा । प्रमुदित प्रेम अत्रि अस भाषा ॥

तात अनादि सिद्ध थल एहू । लोपेउ काल बिदित नहिं केहू ॥

तब सेवकन्ह सरस थलु देखा । कीन्ह सुजल हित कूप बिसेषा ॥

बिधि बस भयउ बिस्व उपकारु । सुगम अगम अति धरम बिचारु ॥

भरतकूप अब कहिहहिं लोगा । अति पावन तीरथ जल जोगा ॥

प्रेम सनेम निमज्जत प्राणी । होइहहिं बिमल करम मन बानी ॥

दो०— कहत कूप महिमा सकल गए जहाँ रघुराउ ।

अत्रि सुनायउ रघुबरहि तीरथ पुन्य प्रभाउ ॥ 310

कहत धरम इतिहास सप्रीती । भयउ भोरु निसि सो सुख बीती ॥

नित्य निबाहि भरत दोउ भाई । राम अत्रि गुर आयसु पाई ॥

सहित समाज साज सब सादें । चले राम बन अटन पयादें ॥

कोमल चरन चलत बिनु पनहीं । भइ मृदु भूमि सकुचि मन मनहीं ॥

कुस कंटक कौंकरि कुराई । कटुक कठोर कुबस्तु दुराई ॥

महि मंजुल मृदु मारग कीन्हे । बहत समीर त्रिबिध सुख लीन्हे ॥

सुमन बरषि सुर घन करि छाहीं । बिटप फूल फलि तून मृदुताहीं ॥

मृग बिलोकि खग बोलि सुबानी । सेवहिं सकल राम प्रिय जानी ॥

दो०— सुलभ सिद्धि सब प्राकृतहु राम कहत जमुहात ।

राम प्रान प्रिय भरत कहँ यह न होइ बड़ि बात ॥ 311

एहि बिधि भरतु फिरत बन माहीं । नेमु प्रेमु लखि मुनि सकुचाहीं ॥

पुन्य जलाश्रय भूमि बिभागा । खग मृग तरु तून गिरि बन बागा ॥

चारु बिचित्र पबित्र बिसेषी । बूझत भरतु दिव्य सब देखी ॥  
 सुनि मन मुदित कहत रिषिराऊ । हेतु नाम गुन पुन्य प्रभाऊ ॥  
 कतहुँ निमज्जन कतहुँ प्रनामा । कतहुँ बिलोकत मन अभिरामा ॥  
 कतहुँ बैठि मुनि आयसु पाई । सुमिरत सीय सहित दोउ भाई ॥  
 देखि सुभाउ सनेहु सुसेवा । देहिँ असीस मुदित बनदेवा ॥  
 फिरहिँ गएँ दिनु पहर अढाई । प्रभु पद कमल बिलोकहिँ आई ॥

दो०— देखे थल तीरथ सकल भरत पाँच दिन माझ ।

कहत सुनत हरि हर सुजसु गयउ दिवसु भइ सौँझ ॥ 312  
 भोर न्हाइ सबु जुरा समाजू । भरत भूमिसुर तेरहुति राजू ॥  
 भल दिन आजु जानि मन माहीं । रामु कृपाल कहत सकुचाहीं ॥  
 गुर नृप भरत सभा अवलोकी । सकुचि राम फिरि अविनि बिलोकी ॥  
 सील सराहि सभा सब सोची । कहुँ न राम सम स्वामि सँकोची ॥  
 भरत सुजान राम रुख देखी । उठि सप्रेम धरि धीर बिसेषी ॥  
 करि दंडवत कहत कर जोरी । राखीं नाथ सकल रुचि मोरी ॥  
 मोहि लागि सहेउ सबहिँ संतापू । बहुत भौँति दुखु पावा आपू ॥  
 अब गोसाईं मोहि देउ रजाई । सेवौं अवध अवधि भरि जाई ॥

दो०— जेहिँ उपाय पुनि पाय जनु देखै दीनदयाल ।

सो सिख देइअ अवधि लागि कोसलपाल कृपाल ॥ 313  
 पुरजन परिजन प्रजा गोसाईं । सब सुचि सरस सनेहँ सगाईं ॥  
 राउर बदि भल भव दुख दाहू । प्रभु बिनु बादि परम पद लाहू ॥  
 स्वामि सुजानु जानि सब ही की । रुचि लालसा रहनि जन जी की ॥  
 प्रनतपालु पालिहि सब काहू । देउ दुहू दिसि ओर निबाहू ॥  
 अस मोहि सब बिधि भूरि भरोसो । किएँ बिचारु न सोचु खरो सो ॥  
 आरति मोर नाथ कर छोहू । दुहूँ मिलि कीन्ह ढीठु हठि मोहू ॥  
 यह बड़ दोषु दूरि करि स्वामी । तजि सकोच सिखइअ अनुगामी ॥  
 भरत बिनय सुनि सबहिँ प्रसंसी । खीर नीर बिबरन गति हंसी ॥

दो०— दीनबंधु सुनि बंधु के बचन दीन छलहीन ।

देस काल अवसर सरिस बोले रामु प्रबीन ॥ 314  
 तात तुम्हारि मोरि परिजन की । चिंता गुरहि नृपहि घर बन की ॥  
 माथे पर गुर मुनि मिथिलेसू । हमहि तुम्हहि सपनेहुँ न कलेसू ॥  
 मोर तुम्हार परम पुरुषारथु । स्वारथु सुजसु धरमु परमारथु ॥  
 पितु आयसु पालिहिँ दुहु भाई । लोक बेद भल भूप भलाई ॥  
 गुरु पितु मातु स्वामि सिख पालें । चलेहुँ कुमग पग परहिँ न खालें ॥  
 अस बिचारि सब सोच बिहाई । पालहु अवध अवधि भरि जाई ॥  
 देसु कोसु परिजन परिवारु । गुर पद रजहिँ लाग छरुभारु ॥  
 तुम्ह मुनि मातु सचिव सिख मानी । पालेहु पुहुमि प्रजा रजधानी ॥

दो०— मुखिआ मुखु सो चाहिऐ खान पान कहुँ एक ।

पालइ पोषइ सकल अँग तुलसी सहित बिबेक ॥ 315  
 राजधरम सरबसु एतनोई । जिमि मन माहँ मनोरथ गोई ॥  
 बंधु प्रबोधु कीन्ह बहु भौँती । बिनु अधार मन तोषु न सौँती ॥  
 भरत सील गुर सचिव समाजू । सकुच सनेह बिबस रघुराजू ॥  
 प्रभु करि कृपा पाँवरीं दीन्हीं । सादर भरत सीस धरि लीन्हीं ॥  
 चरनपीठ करुनानिधान के । जनु जुग जामिक प्रजा प्रान के ॥  
 संपुट भरत सनेह रतन के । आखर जुग जनु जीव जतन के ॥

कुल कपाट कर कुसल करम के । बिमल नयन सेवा सुधरम के ॥  
 भरत मुदित अवलंब लहे तें । अस सुख जस सिय रामु रहे तें ॥  
 दो०— मागेउ बिदा प्रनामु करि राम लिए उर लाइ ।  
 लोग उचाटे अमरपति कुटिल कुअवसरु पाइ ॥ 316  
 सो कुचालि सब कहें भइ नीकी । अवधि आस सम जीवनि जी की ॥  
 नतरु लखन सिय राम बियोगा । हहरि भरत सब लोग कुरोगा ॥  
 रामकृपों अवरैब सुधारी । बिबुध धारि भइ गुनद गोहारी ॥  
 भेंटत भुज भरि भाइ भरत सो । राम प्रेम रसु कहि न परत सो ॥  
 तन मन बचन उमग अनुरागा । धीर धुरंधर धीरजु त्यागा ॥  
 बारिज लोचन मोचत बारी । देखि दसा सुर सभा दुखारी ॥  
 मुनिगन गुर धुर धीर जनक से । ग्यान अनल मन कसैं कनक से ॥  
 जे बिरचि निरलेप उपाए । पदुम पत्र जिमि जग जल जाए ॥

दो०— तेउ बिलोकि रघुबर भरत प्रीति अनूप अपार ।  
 भए मगन मन तन बचन सहित बिराग बिचार ॥ 317  
 जहाँ जनक गुर गति मति भोरी । प्राकृत प्रीति कहत बड़ि खोरी ॥  
 बरनत रघुबर भरत बियोगू । सुनि कठोर कबि जानिहि लोगू ॥  
 सो सकोच रसु अकथ सुबानी । समउ सनेहु सुमिरि सकुचानी ॥  
 भेंटि भरतु रघुबर समुझाए । पुनि रिपुदवनु हरषि हियें लाए ॥  
 सेवक सचिव भरत रुख पाई । निज निज काज लगे सब जाई ॥  
 सुनि दारुन दुखु दुहूँ समाजा । लगे चलन के साजन साजा ॥  
 प्रभु पद पदुम बंदि दोउ भाई । चले सीस धरि राम रजाई ॥  
 मुनि तापस बनदेव निहोरी । सब सनमानि बहोरि बहोरी ॥

दो०— लखनहि भेंटि प्रनामु करि सिर धरि सिय पद धूरि ।  
 चले सप्रेम असीस सुनि सकल समंगल मूरि ॥ 318  
 सानुज राम नृपहि सिर नाई । कीन्हि बहुत बिधि बिनय बडाई ॥  
 देव दया बस बड़ दुखु पायउ । सहित समाज काननहिं आयउ ॥  
 पुर पगु धारिअ देइ असीसा । कीन्ह धीर धरि गवनु महीसा ॥  
 मुनि महिदेव साधु सनमाने । बिदा किए हरि हर सम जाने ॥  
 सासु समीप गए दाउ भाई । फिरे बंदि पग आसिष पाई ॥  
 कौसिक बामदेव जाबाली । पुरजन परिजन सचिव सुचाली ॥  
 जथा जोगु करि बिनय प्रनामा । बिदा किए सब सानुज रामा ॥  
 नारि पुरुष लघु मध्य बड़ेरे । सब सनमानि कृपानिधि फेरे ॥

दो०— भरत मातु पद बंदि प्रभु सुचि सनेहें मिलि भेंटि ।  
 बिदा कीन्ह सजि पालकी सकुच सोच सब मेटि ॥ 319  
 परिजन मातु पितहि मिलि सीता । फिरी प्रानप्रिय प्रेम पुनीता ॥  
 करि प्रनामु भेंटीं सब सासू । प्रीति कहत कबि हियें न हुलासू ॥  
 सुनि सिख अभिमत आसिष पाई । रही सीय दुहु प्रीति समाई ॥  
 रघुपति पटु पालकीं मगाई । करि प्रबोधु सब मातु चढाई ॥  
 बार बार हिलि मिलि दुहु भाई । सम सनेहें जननी पहुँचाई ॥  
 साजि बाजि गज बाहन नाना । भरत भूप दल कीन्ह पयाना ॥  
 हृदयें रामु सिय लखन समेता । चले जाहिं सब लोग अचेता ॥  
 बसह बाजि गज पसु हियें हारें । चले जाहिं परबस मन मारें ॥

दो०— गुर गुरतिय पद बंदि प्रभु सीता लखन समेत ।  
 फिरे हरष बिसमय सहित आए परन निकेत ॥ 320

बिदा कीन्ह सनमानि निषादू । चलेउ हृदयें बड़ बिरह बिषादू ॥  
 कोल किरात भिल्ल बनचारी । फेरे फिरे जोहारि जोहारी ॥  
 प्रभु सिय लखन बैठि बट छाहीं । प्रिय परिजन बियोग बिलखाहीं ॥  
 भरत सनेह सुभाउ सुबानी । प्रिया अनुज सन कहत बखानी ॥  
 प्रीति प्रतीति बचन मन करनी । श्रीमुख राम प्रेम बस बरनी ॥  
 तेहि अवसर खग मृग जल मीना । चित्रकूट चर अचर मलीना ॥  
 बिबुध बिलोकि दसा रघुबर की । बरषि सुमन कहि गति घर घर की ॥  
 प्रभु प्रनामु करि दीन्ह भरोसो । चले मुदित मन डर न खरो सो ॥

दो०— सानुज सीय समेत प्रभु राजत परन कुटीर ।

भगति ग्यानु बैराग्य जनु सोहत धरें सरिर ॥ 321

मुनि महिसुर गुर भरत भुआलू । राम बिरहें सबु साजु बिहालू ॥  
 प्रभु गुन ग्राम गनत मन माहीं । सब चुपचाप चले मग जाहीं ॥  
 जमुना उतरि पार सबु भयऊ । सो बासरु बिनु भोजन गयऊ ॥  
 उतरि देवसरि दूसर बासू । रामसखों सब कीन्ह सुपासू ॥  
 सई उतरि गोमतीं नहाए । चौथें दिवस अवधपुर आए ॥  
 जनकु रहे पुर बासर चारी । राज काज सब साज सँभारी ॥  
 सौंषि सचिव गुर भरतहि राजू । तेरहुति चले साजि सबु साजू ॥  
 नगर नारि नर गुर सिख मानी । बसे सुखेन राम रजधानी ॥

दो०— राम दरस लागि लोग सब करत नेम उपबास ।

तजि तजि भूषन भोग सुख जिअत अवधि कीं आस ॥ 322

सचिव सुसेवक भरत प्रबोधे । निज निज काज पाइ सिख ओधे ॥  
 पुनि सिख दीन्हि बोलि लघु भाई । सौंपो सकल मातु सेवकाई ॥  
 भूसुर बोलि भरत कर जोरे । करि प्रनाम बय बिनय निहोरे ॥  
 ऊँच नीच कारजु भल पोचू । आयसु देब न करब सँकोचू ॥  
 परिजन पुरजन प्रजा बोलाए । समाधानु करि सुबस बसाए ॥  
 सानुज गे गुर गेहँ बहोरी । करि दंडवत कहत कर जोरी ॥  
 आयसु होइ त रहौं सनेमा । बोले मुनि तन पुलकि सपेमा ॥  
 समुझब कइब करब तुम्ह जोई । धरम सारु जग होइहि सोई ॥

दो० सुनि सिख पाइ असीस बड़ि गनक बोलि दिनु साधि ।

सिंघासन प्रभु पादुका बैठारे निरुपाधि ॥ 323

राम मातु गुर पद सिरु नाई । प्रभु पद पीठ रजायसु पाई ॥  
 नंदिगावें करि परन कुटीरा । कीन्ह निवासु धरम धुर धीरा ॥  
 जटाजूट सिर मुनिपट धारी । महि खनि कुस सौंथरी सँवारी ॥  
 असन बसन बासन ब्रत नेमा । करत कठिन रिषिधरम सप्रेमा ॥  
 भूषन बसन भोग सुख भूरी । मन तन बचन तजे तिन तूरी ॥  
 अवध राजु सुर राजु सिहाई । दसरथ धनु सुनि धनदु लजाई ॥  
 तेहिं पुर बसत भरत बिनु रागा । चंचरीक जिमि चंपक बागा ॥  
 रमा बिलासु राम अनुरागी । तजत बमन जिमि जन बड़भागी ॥

दो० राम पेम भाजन भरतु बड़े न एहिं करतूति ।

चातक हंस सराहिअत टेंक बिबेक बिभूति ॥ 324

देह दिनहुँ दिन दूबरि होई । घटइ तेजु बलु मुखछबि सोई ॥  
 नित नव राम प्रेम पनु पीना । बढ़त धरम दलु मनु न मलीना ॥  
 जिमि जलु निघटत सरद प्रकासे । बिलसत बेतस बनज बिकासे ॥  
 सम दम संजम नियम उपासा । नखत भरत हिय बिमल अकासा ॥

ध्रुव बिस्वासु अवधि राका सी । स्वामि सुरति सुरबीथि बिकासी ॥  
 राम पेम बिधु अचल अदोषा । सहित समाज सोह नित चोखा ॥  
 भरत रहनि समुझनि करतूती । भगति बिरति गुन बिमल बिभूती ॥  
 बरनत सकल सुकबि सकुचाहीं । सेस गनेस गिरा गमु नाही ॥  
 दो० नित पूजत प्रभु पॉवरी प्रीति न हृदयें समाति ।  
 मागि मागि आयसु करत राज काज बहु भॉति ॥ 325  
 पुलक गात हियें सिय रघुबीरू । जीह नामु जप लोचन नीरू ॥  
 लखन राम सिय कानन बसहीं । भरतु भवन बसि तप तनु कसहीं ॥  
 दोउ दिसि समुझि कहत सबु लोगू । सब बिधि भरत सराहन जोगू ॥  
 सुनि ब्रत नेम साधु सकुचाहीं । देखि दसा मुनिराज लजाहीं ॥  
 परम पुनीत भरत आचरनू । मधुर मंजु मुद मंगल करनू ॥  
 हरन कठिन कलि कलुष कलेसू । महामोह निसि दलन दिनेसू ॥  
 पाप पुंज कुंजर मृगराजू । समन सकल संताप समाजू ॥  
 जन रंजन भंजन भव भारू । राम सनेह सुधाकर सारू ॥  
 छ० सिय राम प्रेम पियूष पूरन होत जनमु न भरत को ।  
 मुनि मन अगम जम नियम सम दम बिषम ब्रत आचरत को ॥  
 दुख दाह दारिद दंभ दूषन सुजस मिस अपहरत को ।  
 कलिकाल तुलसी से सठन्हि हठि राम सनमुख करत को ॥  
 सो० भरत चरित करि नेमु तुलसी जो सादर सुनहिं ।  
 सीय राम पद पेमु अवसि होइ भव रस बिरति ॥ 326

मासपारायण, इक्कीसवॉ बिश्राम

इति श्रीमद्रामचरितमानसे सकलकलिकलुषविध्वंसने

द्वितीयः सोपानः समाप्तः

(अयोध्याकाण्ड समाप्त)

— गणपतये नमः

अरण्यकाण्ड

श्लोक

मूलं धर्मतरोर्विवेकजलधेः पूर्णेन्दुमानन्ददं  
वैराग्याम्बुजभास्करं ह्यघघनध्वान्तापहं तापहम् ।  
मोहाम्भोधरपूगपाटनविधौ स्वःसम्भवं शंकरं  
वन्दे ब्रह्मकुलं कलंकशमनं श्रीरामभूप्रियम् ॥ 1 ॥  
सान्द्रानन्दपयोदसौभगतनुं पीताम्बरं सुन्दरं  
पाणौ बाणशरासनं कटिलसत्तूणीरभारं वरम् ।  
राजीवायतलोचनं धृतजटाजूटेन संशोभितं  
सीतालक्ष्मणसंयुतं पथिगतं रामाभिरामं भजे ॥ 2 ॥

सो०— उमा राम गुन गूढ पंडित मुनि पावहिं बिरति ।

पावहिं मोह बिमूढ जे हरि बिमुख न धर्म रति ॥

पुर नर भरत प्रीति में गाई । मति अनुरूप अनूप सुहाई ॥

अब प्रभु चरित सुनहु अति पावन । करत जे बन सुर नर मुनि भावन ॥

एक बार चुनि कुसुम सुहाए । निज कर भूषन राम बनाए ॥

सीतहि पहिराए प्रभु सादर । बैठे फटिक सिला पर सुंदर ॥

सुरपति सुत धरि बायस बेषा । सठ चाहत रघुपति बल देखा ॥

जिमि पिपीलिका सागर थाहा । महा मंदमति पावन चाहा ॥

सीता चरन चोंच हति भागा । मूढ मंदमति कारन कागा ॥

चला रुधिर रघुनायक जाना । सीक धनुष सायक संधाना ॥

दो०— अति कृपाल रघुनायक सदा दीन पर नेह ।

ता सन आइ कीन्ह छलु मूरख अवगुन गेह ॥ 1

प्रेरित मंत्र ब्रह्मसर धावा । चला भाजि बायस भय पावा ॥

धरि निज रूप गयउ पितु पाहीं । राम बिमुख राखा तेहि नाहीं ॥

भा निरास उपजी मन त्रासा । जथा चक भय रिषि दुर्बासा ॥

ब्रह्मधाम सिवपुर सब लोका । फिरा श्रमित ब्याकुल भय सोका ॥

काहूँ बैठन कहा न ओही । राखि को सकइ राम कर द्रोही ॥

मातु मृत्यु पितु समन समाना । सुधा होइ विष सुनु हरिजाना ॥

मातु मृत्यु पितु समन समाना । सुधा होइ विष सुनु हरिजाना ॥

मित्र करइ सत रिपु कै करनी । ता कहँ बिबुधनदी बैतरनी ॥

सब जगु ताहि अनलहु ते ताता । जो रघुबीर बिमुख सुनु भ्राता ॥

नारद देखा बिकल जयंता । लागि दया कोमल चित संता ॥

पठवा तुरत राम पहिं ताही । कहेसि पुकारि प्रनत हित पाही ॥  
आतुर सभय गहेसि पद जाई । त्राहि त्राहि दयाल रघुराई ॥  
अतुलित बल अतुलित प्रभुताई । मै मतिमंद जानि नहिं पाई ॥  
निज कृत कर्म जनित फल पायउँ । अब प्रभु पाहि सरन तकि आयउँ ॥  
सुनि कृपाल अति आरत बानी । एकनयन करि तजा भवानी ॥

सो०— कीन्ह मोह बस द्रोह जद्यपि तेहि कर बध उचित ।

प्रभु छाड़ेउ करि छोह को कृपाल रघुबीर सम ॥ 2  
रघुपति चित्रकूट बसि नाना । चरित किए श्रुति सुधा समाना ॥  
बहुरि राम अस मन अनुमाना । होइहि भीर सबहिं मोहि जाना ॥  
सकल मुनिन्ह सन बिदा कराई । सीता सहित चले द्वौ भाई ॥  
अत्रि के आश्रम जब प्रभु गयऊ । सुनत महामुन हरषित भयऊ ॥  
पुलकित गात अत्रि उठि धाए । देखि राम आतुर चलि आए ॥  
करत दंडवत मुनि उर लाए । प्रेम बारि द्वौ जन अन्हवाए ॥  
देखि राम छबि नयन जुड़ाने । सादर निज आश्रम तब आने ॥  
करि पूजा कहि बचन सुहाए । दिए मूल फल प्रभु मन भाए ॥

सो० प्रभु आसन आसीन भरि लोचन सोभा निरखि ।  
मुनिबर परम प्रबीन जोरि पानि अस्तुति करत ॥ 3

छं०— नमामि भक्त वत्सलं । कृपालु शील कोमलं ॥  
भजामि ते पदांबुजं । अकामिनां स्वधामदं ॥  
निकाम श्याम सुंदरं । भवाम्बुनाथ मंदरं ॥  
प्रफुल्ल कंज लोचनं । मदादि दोष मोचनं ॥  
प्रलंब बाहु विक्रमं । प्रभोप्रमेय वैभवं ॥  
निषंग चाप सायकं । धरं त्रिलोक नायकं ॥  
दिनेश वंश मंडनं । महेश चाप खंडनं ॥  
मुनींद्र संत रंजनं । सुरारि बृंद भंजनं ॥  
मनोज वैरि वंदितं । अजादि देव सेवितं ॥  
विशुद्ध बोध विग्रहं । समस्त दूषणापहं ॥  
नमामि इंदिररा पतिं । सुखाकरं सतां गतिं ॥  
भजे सशक्ति सानुजं । शची पति प्रियानुजं ॥  
त्वदंघ्रि मूल ये नराः । भजंति हीन मत्सराः ॥  
पतंति नो भवार्णवे । वितर्क वीचि संकुले ॥  
विविक्त वासिनः सदा । भजंति मुक्तये मुदा ॥  
निरस्य इंद्रियादिकं । प्रयांति ते गतिं स्वकं ॥  
तमेकमद्भुतं प्रभुं । निरीहमीश्वरं विभुं ॥  
जगद्गुरुं च शाश्वतं । तुरीयमेव केवलं ॥  
भजामि भाव वल्लभं । कुयोगिनां सुदुर्लभं ॥  
स्वभक्त कल्प पादपं । समं सुसेव्यमन्वहं ॥  
अनूप रूप भूपतिं । नतोहमुर्विजा पतिं ॥  
प्रसीद मे नमामि ते । पदाब्ज भक्ति देहि में ॥  
पठंति ये स्तवं इदं । नरादरेण ते पदं ॥  
व्रजंति नात्र संशयं । त्वदीय भक्ति संयुताः ॥

दो० बिनती करि मुनि नाइ सिरु कह कर जोरि बहोरि ।  
चरन सरोरुह नाथ जनि कबहुँ तजै मति मोरि ॥ 4

अनुसुइया के पद गहि सीता। मिली बहोरि सुसील बिनीता।।  
 रिषिपतिनी मन सुख अधिकाई। आसिष देइ निकट बैठाई।।  
 दिव्य बसन भूषन पहिराए। जे नित नूतन अमल सुहाए।।  
 कह रिषिबधू सरस मृदु बानी। नारिधर्म कछु ब्याज बखानी।।  
 मातु पिता भ्राता हितकारी। मितप्रद सब सुनु राजकुमारी।।  
 अमित दानि भर्ता बयदेही। अधम सो नारि जो सेव न तेही।।  
 धीरज धर्म मित्र अरु नारी। आपद काल परिखिअहिं चारी।।  
 बिनु श्रम नारि परम गति लहई। पतिव्रत धर्म छाडि छल गहई।।  
 सो० सुनु सीता तव नाम सुमिरि नारि पतिव्रत करहिं।  
 तोहि प्रानप्रिय राम कहिउँ कथा संसार हित।। 5  
 सुनि जानकी परम सुखु पावा। सादर तासु चरन सिरु नावा।।  
 तब मुनि सन कह कपानिधाना। आयसु होइ जाउँ बन आना।।  
 संतत मो पर कृपा करेहू। सेवक जानि तजेहु जनि नेहू।।  
 धर्म धुरंधर प्रभु कै बानी। सुनि सप्रेम बोले मुनि ग्यानी।।  
 जासु कृपा अज सिव सनकादी। चहत सकल परमारथ बादी।।  
 ते तुम्ह राम अकाम पिआरे। दीन बंधु मृदु बचन उचारे।।  
 अब जानी मैं श्री चतुराई। भजी तुम्हहि सब देव बिहाई।।  
 जेहि समान अतिसय नहिं कोई। ता कर सील कस न अस होई।।  
 केहि बिधि कहौं जाहु अब स्वामी। कहहु नाथ तुम्ह अंतरजामी।।  
 अस कहि प्रभु बिलोकि मुनि धीरा। लोचन जल बह पुलक सरीरा।।  
 छ० तन पुलक निर्भर प्रेम पूरन नयन मुख पंकज दिए।  
 मन ग्यान गुन गोतीत प्रभु मैं दीख जप तप का किए।  
 जप लोग धर्म समूह तें नर भगति अपुपम पावई।  
 रघुबीर चरित पुनीत निसि दिन दास तुलसी गावई।।  
 दो०— कलिमल समन दमन मन राम सुजस सुखमूल।  
 सादर सुनहिं जे तिन्ह पर राम रहहिं अनुकूल।। 6(क)  
 सो०— कठिन काल मल कोस धर्म न ग्यान न जोग जप।  
 परिहरि सकल भरोस रामहि भजहिं ते चतुर नर।। 6(ख)  
 मुनि पद कमल नाइ करि सीसा। चले बनहि सुर पर मुनि ईसा।।  
 आगे राम अनुज पुनि पाछे। मुनि बर बेष बने अति काछे।।  
 उभय बीच श्री सोहइ कैसी। ब्रह्म जीव बिच माया जैसी।।  
 सरिता बन गिरि अवघट घाटा। पति पहिचानि देहिं बर बाटा।।  
 जहँ जहँ जाहिं देव रघुराया। करहिं मेघ तहँ तहँ नभ छाया।।  
 मिला असुर बिराध मग जाता। आवतहीं रघुबीर निपाता।।  
 तुरतहिं रुचिर रूप तेहिं पावा। देखि दुखी निज धाम पठावा।।  
 पुनि आए जहँ मुनि सरभंगा। सुंदर अनुज जानकी संग।।  
 दो०— देखि राम मुख पंकज मुनिबर लोचन भृंग।  
 सादर पान करत अति धन्य जन्म सरभंग।। 7  
 कह मुनि सुनु रघुबीर कृपाला। संकर मानस राजमराला।।  
 जात रहेउँ बिरंचि के धामा। सुनेउँ श्रवन बन ऐहहिं रामा।।  
 चितवत पंथ रहेउँ दिन राती। अब प्रभु देखि जुड़ानी छाती।।  
 नाथ सकल साधन मैं हीना। कीन्हीं कृपा जानि जन दीना।।  
 सो कछु देव न मोहि निहोरा। निज पन राखेउ जन मन चोरा।।

तब लगि रहहु दीन हित लागी । जब लगि मिलौं तुम्हहिं तनु त्यागी ॥  
जोग जग्य जप तप ब्रत कीन्हा । प्रभु कहँ देइ भगति बर लीन्हा ॥  
एहि बिधि सर रचि मुनि सरभंगा । बैठे हृदयँ छाड़ि सब संगी ॥

दो०— सीता अनुज समेत प्रभु नील जलद तनु स्याम ।

मम हियँ बसहु निरंतर सगुनरूप श्रीराम ॥ 8

अस कहि जोग अग्नि तनु जारा । राम कृपाँ बैकुंठ सिधारा ॥  
ताते मुनि हरि लीन न भयऊ । प्रथमहिं भेद भगति बर लयऊ ॥  
रिषि निकाय मुनि बर गति देखी । सुखी भए निज हृदयँ बिसेषी ॥  
अस्तुति करहिं सकल मुनि बूँदा । जयति प्रनत हित करुना कंदा ॥  
पुनि रघुनाथ चले बन आगे । मुनिबर बूँद बिपुल सँग लागे ॥  
अस्थि समूह देखि रघुराया । पूछी मुनिन्ह लागि अति दाया ॥  
जानतहुँ पूछिअ कस स्वामी । सबदरसी तुम्ह अंतरजामी ॥  
निसिचर निकर सकल मुनि खाए । सुनि रघुबीर नयन जल छाए ॥

दो०— निसिचर हीन करउँ महि भुज उठाई पन कीन्ह ।

सकल मुनिन्ह के आश्रमन्हि जाइ जाइ सुख दीन्ह ॥ 9

मुनि अगस्ति कर सिष्य सुजाना । नाम सुतीक्ष्ण रति भगवाना ॥  
मन कम बचन राम पद सेवक । सपनेहु आन भरोस न देवक ॥  
प्रभु आगवनु श्रवन सुनि पावा । करत मनोरथ आतुर धावा ॥  
हे बिधि दीनबंधु रघुराया । मो से सठ पर करिहहिं दाया ॥  
सहित अनुज मोहि राम गोसाई । मिलिहहिं निज सेवक की नाई ॥  
मोरे जियँ भरोस दृढ़ नाही । भगति बिरति न ग्यान मन माहीं ॥  
नहिं सतसंग जोग जप जागा । नहिं दृढ़ चरन कमल अनुरागा ॥  
एक बानि करुनानिधान की । सो प्रिय जाकेँ गति न आन की ॥  
होइहैं सुफल आजु मम लोचन । देखि बदन पंकज भव मोचन ॥  
निर्भर प्रेम मगन मुनि ग्यानी । कहि न जाइ सो दसा भवानी ॥  
दिसि अरु बिदिसि पंथ नहिं सूझा । को मैं चलेउँ कहौं नहिं बूझा ॥  
कबहुँक फिरि पाछेँ पुनि जाई । कबहुँक नृत्य करइ गुन गाई ॥  
अबिरल प्रेम भगति मुनि पाई । प्रभु देखै तरु ओट लुकाई ॥  
अतिसय पीति देखि रघुबीरा । प्रगटे हृदयँ हरन भव भीरा ॥  
मुनि मग माझ अचल होइ बैसा । पुलक सरीर पनस फल जैसा ॥  
तब रघुनाथ निकट चलि आए । देखि दसा निज जन मन भाए ॥  
मुनिहि राम बहु भौंति जगावा । जाग न ध्यान जनित सुख पावा ॥  
भूप रूप तब राम दुरावा । हृदयँ चतुर्भुज रूप देखावा ॥  
मुनि अकुलाइ उठा तब कैसे । बिकल हीन मनि फनि बर जैसे ॥  
आगेँ देखि राम तन स्यामा । सीता अनुज सहित सुख धामा ॥  
परेउ लकुट इव चरनन्हि लागी । प्रेम मगन मुनिबर बड़भागी ॥  
भुज बिसाल गहि लिए उठाई । परम प्रीति राखे उर लाई ॥  
मुनिहि मिलत अस सोह कृपाला । कनक तरुहि जनु भेंट तमाला ॥  
राम बदनु बिलोक मुनि ठाढ़ा । मानहुँ चित्र माझ लिखि काढ़ा ॥

दो०— तब मुनि हृदयँ धीर धरि गहि पद बारहिं बार ।

निज आश्रम प्रभु आनि करि पूजा बिबिध प्रकार ॥ 10

कह मुनि प्रभु सुनु बिनती मोरी । अस्तुति करौं कवन बिधि तोरी ॥  
महिमा अमित मोरि मति थोरी । रबि सन्मुख खद्योत अँजोरी ॥  
श्याम तामरस दाम शरीरं । जटा मुकुट परिधन मुनिचीरं ॥

पाणि चाप शर कटि तूणीरं । नौमि निरंतर श्रीरघुबीरं ॥  
 मोह विपिन घन दहन कृशानुः । संत सरोरुह कानन भानुः ॥  
 निशिचर करि वरूथ मृगराजः । त्रातु सदा नो भव खग बाजः ॥  
 अरुण नयन राजीव सुवेशं । सीता नयन चकोर निशेशं ॥  
 हर हृदि मानस बाल मरालं । नौमि राम उर बाहु विशालं ॥  
 संशय सर्प ग्रसन सुर यूथः । त्रातु सदा नो कृपा वरूथः ॥  
 निर्गुण सगुण विषम सम रूपं । ज्ञान गिरा गोतीतमनूपं ॥  
 अमलमखिलमनवद्यमपारं । नौमि राम भंजन महि भारं ॥  
 भक्त कल्पपादप आरामः । तर्जन कोध लोभ मद कामः ॥  
 अति नागर भव सागर सेतुः । त्रातु सदा दिनकर कुल केतुः ॥  
 धर्म वर्म नर्मद गुण ग्रामः । संतत शं तनोतु मम रामः ॥  
 जदपि बिरज ब्यापक अबिनासी । सब के हृदयें निरंतर बासी ॥  
 तदपि अनुज श्री सहित खरारी । बसतु मनसि मम काननचारी ॥  
 जे जानहिं ते जानहुँ स्वामी । सगुन अगुन उर अंतरजामी ॥  
 जो कोसल पति राजिव नयना । करउ सो राम हृदय मम अयना ॥  
 अस अभिमान जाइ जनि भोरे । मैं सेवक रघुपति पति मोरे ॥  
 सुनि मुनि बचन राम मन भाए । बहुरि हरषि मुनिबर उर लाए ॥  
 परम प्रसन्न जानु मुनि मोही । जो बर मागहु देउँ सो तोही ॥  
 मुनि कह मैं बर कबहुँ न जाचा । समुझि न परइ झूठ का साचा ॥  
 तुम्हहि नीक लागै रघुराई । सो मोहि देहु दास सुखदाई ॥  
 अबिरल भगति बिरति बिग्याना । होहु सकल गुन ग्यान निधाना ॥  
 प्रभु जो दीन्ह सो बरु मैं पावा । अब सो देहु मोहि जो भावा ॥

दो०— अनुज जानकी सहित प्रभु चाप बान धर राम ।

मम हिय गगन इंदु इव बसहु सदा निहकाम ॥ 11

एवमस्तु करि रमानिवासा । हरषि चले कुंभज रिषि पासा ॥  
 बहत दिवस गुर दरसनु पाएँ । भए मोहि एहिं आश्रम आएँ ॥  
 अब प्रभु संग जाउँ गुर पाहीं । तुम्ह कहँ नाथ निहोरा नाहीं ॥  
 देखि कृपानिधि मुनि चतुराई । लिए संग बिहसे द्वौ भाई ॥  
 पंथ कहत निज भगति अनूपा । मुनि आश्रम पहुँचे सुरभूपा ॥  
 तुरत सुतीक्ष्ण गुर पहिं गयऊ । करि दंडवत कहत अस भयऊ ॥  
 नाथ कोसलाधीस कुमारा । आए मिलन जगत आधारा ॥  
 सुनत अगस्ति तुरत उठि धाए । हरि बिलोकि लोचन जल छाए ॥  
 मुनि पद कमल परे द्वौ भाई । रिषि अति प्रीति लिए उर लाई ॥  
 सादर कुसल पूछि मुनि ग्यानी । आसन बर बैठारे आनी ॥  
 पुनि करि बहु प्रकार प्रभु पूजा । मोहि सम भाग्यवंत नहिं दूजा ॥  
 जहँ लगि रहे अपर मुनि बूदा । हरषे सब बिलोकि सुखकंदा ॥

दो०— मुनि समूह महँ बैठे सन्मुख सब की ओर ।

सरद इंदु तन चितवत मानहुँ निकर चकोर ॥ 12

तब रघुबीर कहा मुनि पाहीं । तुम्ह सन प्रभु दुराव कछु नाहीं ॥  
 तुम्ह जानहुँ जेहि कारन आयउँ । ताते तात न कहि समुझायउँ ॥  
 अब सो मंत्र देहु प्रभु मोही । जेहि प्रकार मारौं मुनिद्रोही ॥  
 मुनि मुसुकाने सुनि प्रभु बानी । पूछेहु नाथ मोहि का जानी ॥  
 तुम्हरेई भजन प्रभाव अघारी । जानउँ महिमा कछुक तुम्हारी ॥  
 ऊमरि तरु बिसाल तव माया । फल ब्रह्मांड अनेक निकाया ।

जीव चराचर जंतु समाना । भीतर बसहिं न जानहिं आना ॥  
 ते फल भच्छक कठिन कराला । तव भयें डरत सदा सोउ काला ॥  
 ते तुम्ह सकल लोकपति साई । पूँछेहु मोहि मनुज की नाई ॥  
 यह बर मागउँ कृपानिकेता । बसहु हृदयें श्री अनुज समेता ॥  
 अबिरल भगति बिरति सतसंगा । चरन सरोरुह प्रीति अभंगा ॥  
 जद्यपि ब्रह्म अखंड अनंता । अनुभव गम्य भजहिं जेहि संता ॥  
 अस तव रूप बखानउँ जानउँ । फिरि फिरि सगुन ब्रह्म रति मानउँ ॥  
 संतत दासन्ह देहु बड़ाई । तातें मोहि पूँछेहु रघुराई ॥  
 है प्रभु परम मनाहर ठाऊँ । पावन पंचवटी तेहि नाऊँ ॥  
 दंडक बन पुनीत प्रभु करहू । उग्र साप मुनिबर कर हरहू ॥  
 बास करहु तहें रघुकुल राया । कीजे सकल मुनिन्ह पर दाय ॥  
 चले राम मुनि आयसु पाई । तुरतहिं पंचवटी निअराई ॥  
 दो०— गीधराज सैं भेंट भई बडु बिधि प्रीति बढ़ाई ।

गादावरी निकट प्रभु रहे परन गृह छाइ ॥ 13

जब ते राम कीन्ह तहें बासा । सुखी भए मुनि बीती त्रासा ॥  
 गिरि बन नदीं ताल छबि छाए । दिन दिन प्रति अति होहिं सुहाए ॥  
 खग मृग बृंद अनंदित रहहीं । मधुप मधुर गुंजत छबि लहहीं ॥  
 सो बन बरनि न सक अहिराजा । जहाँ प्रगट रघुबोर बिराजा ॥  
 एक बार प्रभु सुख आसीना । लछिमन बचन कहे छलहीना ॥  
 सुर नर मुनि सचराचर साई । मैं पूँछउँ निज प्रभु की नाई ॥  
 मोहि समुझाई कहहु सोइ देवा । सब तजि करौ चरन रज सेवा ॥  
 कहहु ग्यान बिराग अरु माया । कहहु सो भगति करहु जेहिं दाय ॥

दो०— ईस्वर जीव भेद प्रभु सकल कहौ समुझाई ।

जातें होइ चरन रति सोक मोह भ्रम जाइ ॥ 14

थोरेहि महें सब कहउँ बुझाई । सुनहु तात मति मन चित लाई ॥  
 मैं अरु मोर तोर तैं माया । जेहिं बस कीन्हे जीव निकाया ॥  
 गो गोचर जहें लागि मन जाई । सो सब माया जानेहु भाई ॥  
 तेहि कर भेद सुनहु तुम्ह सोऊ । बिद्या अपर अबिद्या दोऊ ॥  
 एक दुष्ट अतिसय दुखरूपा । जा बस जीव परा भवकूपा ॥  
 एक रचइ जग गुन बस जाकें । प्रभु प्रेरित नहिं निज बस ताकें ॥  
 ग्यान मान जहें एकउ नाहीं । देख ब्रह्म समान सब माहीं ॥  
 कहिअ तात सो परम बिरागी । तून सम सिद्धि तीनि गुन त्यागी ॥

दो०— माया इस न आपु कहूँ जान कहिअ सो जीव ।

बंध मोच्छ प्रद सर्बपर माया प्रेरक सीव ॥ 15

भगति कि साधन कहउँ बखानी । सुगम पंथ मोहि पावहिं प्रानी ॥  
 प्रथमहिं सन्त चरन अति प्रीती । निज निज कर्म निरत श्रुति रीती ॥  
 एहि कर फल पुनि विषय बिरागा । तब मम धर्म उपज अनुरागा ॥  
 श्रवनादिक नव भक्ति दृढाहीं । मम लीला रति अति मन माहीं ॥  
 संत चरन पंकज अति प्रेमा । मन कम बचन भजन दृढ नेमा ॥  
 गुरु पितु मातु बंधु पति देवा । सब मोहि कहें जानै दृढ सेवा ॥  
 मम गुन गावत पुलक सरीरा । गदगद गिरा नयन बह नीरा ॥  
 काम आदि मद दंभ न जाकें । तात निरंतर बस मैं ताकें ॥

दो०— बचन कर्म मन मोरि गति भजनु करहिं निःकाम ।

तिन्ह के हृदय कमल महुँ करउँ सदा विश्राम ॥ 16

भगति जोग सुनि अति सुख पावा । लछिमन प्रभु चरनन्हि सिर नावा ॥  
 एहि बिधि गए कछुक दिन बीती । कहत बिराग ग्यान गुन नीती ॥  
 सूपनखा रावन कै बहिनी । दुष्ट हृदय दारुन जस अहिनी ॥  
 पंचबटी सो गइ एक बारा । देखि बिकल भइ जुगल कुमारा ॥  
 रुचिर रूप धरि प्रभु पहिं जाई । बोली बचन बहुत मुसुकाई ॥  
 तुम्ह सम पुरुष न मो सम नारी । यह सँजोग बिधि रचा बिचारी ॥  
 मम अनुरूप पुरुष जग माहीं । देखेउं खोजि लोक तिहु नाहीं ॥  
 तातें अब लागि रहिउं कुमारी । मनु माना कछु तुम्हहि निहारी ॥  
 सीतहि चितइ कही प्रभु बाता । अहइ कुमार मोर लघु भ्राता ॥  
 गइ लछिमन रिपु भगिनी जानी । प्रभु बिलोकि बोले मृदु बानी ॥  
 सुंदरि सुनु मैं उन्ह कर दासा । पराधीन नहिं तोर सुपासा ॥  
 प्रभु समर्थ कोसलपुर राजा । जो कछु करहिं उनहि सब छाजा ॥  
 सेवक सुख चह मान भिखारी । ब्यसनी धन सुभ गति बिभिचारी ॥  
 लोभी जसु चह चार गुमानी । नभ दुहि दूध चहत ए प्रानी ॥  
 पुनि फिरि राम निकट सो आई । प्रभु लछिमन पहिं बहुरि पठाई ॥  
 लछिमन कहा तोहि सो बरई । जो तून तोरि लाज परिहरई ॥  
 तब खिसिआनि राम पहिं गई । रूप भयंकर प्रगटत भई ॥  
 सीतहि सभय देखि रघुराई । कहा अनुज सन सयन बुझाई ॥  
 दो०— लछिमन अति लाघवें सो नाक कान बिनु कीन्हि ।

ताके कर रावन कहें मनौ चुनौती दीन्हि ॥ 17

नाक कान बिनु भइ बिकरारा । जनु ०व सैल गेरु कै धारा ॥  
 खर दूषन पहिं गई बिलपाता । धिग धिग तव पौरुष बल भ्राता ॥  
 तेहिं पूछा सब कहेसि बुझाई । जातुधान सुनि सेन बनाई ॥  
 धाए निसिचर निकर बरुथा । जनु सपच्छ कज्जल गिरि जूथा ॥  
 सूपनखा आगें करि लीनी । असुभ रूप श्रुति नासा हीनी ॥  
 असगुन अमित होहिं भयकारी । गनहिं न मृत्यु बिबस सब झारी ॥  
 गर्जहिं तर्जहिं गगन उड़ाहीं । देखि कटक भट अति हरषाहीं ॥  
 कोउ कह जिअत धरहु द्वौ भाई । धरि मारहु तिय लेहु छड़ाई ॥  
 धूरि पूरि नभ मंडल रहा । राम बोलाई अनुज सन कहा ॥  
 लै जानकिहि जाह गिरि कंदर । आवा निसिचर कटक भयंकर ॥  
 रहेहु सजग सुनि प्रभु कै बानी । चले सहित श्री सर धनु पानी ॥  
 देखि राम रिपुदल चलि आवा । बिहसि कठिन कोदंड चढ़ावा ॥

छ०— कोदंड कठिन चढ़ाई सिर जट जूट बाँधत सोह क्यों ।  
 मरकत सयल पर लरत दामिनि कोटि सों जुग भुजग ज्यों ॥  
 कटि कसि निषंग बिसाल भुज गहि चाप बिसिख सुधारि कै ।  
 चितवत मनहुँ मृगराज प्रभु गजराज घटा निहारि कै ॥

सो०— आइ गए बगमेल धरहु धरहु धावत सुभट ।

जथा बिलोकि अकेल बाल रबिहि घेरत दनुज ॥ 18

प्रभु बिलोकि सर सकहिं न डारी । थकित भई रजनीचर धारी ॥  
 सचिव बोलि बोले खर दूषन । यह कोउ नृपबालक नर भूषन ॥  
 नाग असुर सुर नर मुनि जेते । देखे जिते हते हम केते ॥  
 हम भरि जन्म सुनहु सब भाई । देखी नहिं असि सुंदरताई ॥  
 जद्यपि भगिनी कीन्हि कुरुपा । बध लायक नहिं पुरुष अनूपा ॥

देहु तुरत निज नारि दुराई । जीअत भवन जाहु द्वौ भाई ॥  
 मोर कहा तुम्ह ताहि सुनावहु । तासु बचन सुनि आतुर आवहु ॥  
 दूतन्ह कहा राम सन जाई । सुनत राम बोले मुसुकाई ॥  
 हम छत्री मृगया बन करहीं । तुम्ह से खल मृग खोजत फिरहीं ॥  
 रिपु बलवंत देखि नहिं डरहीं । एक बार कालहु सन लरहीं ॥  
 जद्यपि मनुज दनुज कुल घालक । मुनि पालक खल सालक बालक ॥  
 जाँ न होइ बल घर फिरि जाहू । समर बिमुख मै हतउँ न काहू ॥  
 रन चढि करिअ कपट चतुराई । रिपु पर कृपा परम कदराई ॥  
 दूतन्ह जाइ तुरत सब कहैऊ । सुनि खर दूषन उर अति दहेऊ ॥

- छं०— उर दहेउ कहेउ कि धरहु धाए बिकट भट रजनीचरा ।  
 सर चाप तोमर सक्ति सूल कृपान परिघ परसु धरा ॥  
 प्रभु कीन्हि धनुष टकोर प्रथम कठोर घोर भयावहा ।  
 भए बधिर ब्याकुल जातुधान न ग्यान तेहि अवसर रहा ॥
- दो०— सावधान होइ धाए जानि सबल आराति ।  
 लागे बरषन राम पर अस्त्र सस्त्र बहुभाँति ॥ 19 (क)  
 तिन्ह के आयुध तिल सम करि काटे रघुबीर ।  
 तानि सरासन श्रवन लागि पुनि छोँड़े निज तीर ॥ 19 (ख)
- छं.— तब चले बान कराल । फुंकरत जनु बहु ब्याल ॥  
 कोपेउ समर श्रीराम । चले बिसिख निसित निकाम ॥  
 अवलोकि खर तर तीर । मुरि चले निसिचर बीर ॥  
 भए कुद्ध तीनिउ भाइ । जो भागि रन ते जाई ॥  
 तेहि बधब हम निज पानि । फिरे मरन मन महुँ ठानि ॥  
 आयुध अनेक प्रकार । सनमुख ते करहिं प्रहार ॥  
 रिपु परम कोपे जानि । प्रभु धनुष सर संधानि ॥  
 छोँड़े बिपुल नाराच । लगे कटन बिकट पिसाच ॥  
 उस सीस भुज कर चरन । जहँ तहँ लगे महि परन ॥  
 चिक्करत लागत बान । धर परत कुधर समान ॥  
 भट कटत तन सत खंड । पुनि उठत करि पाषंड ॥  
 नभ उड़त बहु भुज मुंड । बिनु मौलि धावत रुंड ॥  
 खग कंक काक सृगाल । कटकटहिं कठिन कराल ॥
- छं०— कटकटहिं जंबुक भूत प्रेत पिसाच खर्पर संचहीं ॥  
 बेताल बीर कपाल ताल बजाई जोगिनि नंचहीं ॥  
 रघुबीर बान प्रचंड खंडहिं भटन्ह के उर भुज सिरा ।  
 जहँ तहँ परहिं उठि लरहिं धर धरु धरु करहिं भयकर गिरा ॥  
 अंतावरीं गहि उड़त गीध पिसाच कर गहि धावहीं ।  
 संग्राम पुर बासी मनहुँ बहु बाल गुड़ी उड़ावहीं ॥  
 मारे पछारे उर बिदारे बिपुल भट कहँरत परे ।  
 अवलोकि निज दल बिकल भट तिसिरादि खर दूषन परे ।  
 सर सक्ति तोमर परसु सूल कृपान एकहि बारहीं ।  
 करि कोप श्रीरघुबीर पर अगनित निसाचर डारहीं ॥  
 प्रभु निमिष महुँ रिपु सर निवारि पचारि डारे सायका ।  
 दस दस बिसिख उर माझ मारे सकल निसिचर नायका ॥  
 महि परत उठि भट फिरत मरत न करत माया अति घनी ।  
 सुर डरत चौदह सहस प्रेत बिलोकि एक अवध घनी ॥

- सुर मुनि सभय प्रभु देखि मायानाथ अति कौतुक कर्यो ।  
देखहिं परसपर राम करि संग्राम रिपुदल लरि मर्यो ॥
- दो०— राम राम कहि तनु तजहिं पावहिं पद निर्बान ।  
करि उपाय रिपु मारे छन महुँ कृपानिधान ॥ 20 (क)  
हरषित बरषहिं सुमन सुर बाजहिं गगन निसान ।  
अस्तुति करि करि सब चले सोभित बिबिध बिमान ॥ 20 (ख)  
तब लछिमन सीतहि लै आए । प्रभु पद परत हरषि उर लाए ॥  
सीता चितव स्याम मृदु गाता । परम प्रेम लोचन न अघाता ॥  
पंचबटीं बसि श्रीरघुनायक । करत चरित सुर मुनि सुखदायक ॥  
धुआँ देखि खरदूषन केरा । जाइ सुपनखँ रावन प्रेरा ॥  
बोली बचन कोध करि भारी । देस कोस कै सुरति बिसारी ॥  
करसि पान सोवसि दिनु राती । सुधि नहिं तव सिर पर आराती ॥  
राज नीति बिनु धन बिनु धर्मा । हरिहि समर्पे बिनु सतकर्मा ॥  
बिद्या बिनु बिबेक उपजाएँ । श्रम फल पढ़ेँ किएँ अरु पाएँ ॥  
संग तें जती कुमंत्र ते राजा । मान ते ग्यान पान तें लाजा ॥  
प्रीति प्रनय बिनु मद ते गुनी । नासहिं बेगि नीति अस सुनी ॥
- सो०— रिपु रुज पावक पाप प्रभु अहि गनिअ न छोट करि ।  
अस कहि बिबिध बिलाप करि लागी रोदन करन ॥ 21 (क)
- दो०— सभा माझ परि ब्याकुल बहु प्रकार कह रोइ ।  
तोहि जिअत दसकंधर मोरि कि असि गति होइ ॥ 21 (ख)  
सुनत सभासद उठे अकुलाई । समुझाई गहि बौह उठाई ॥  
कह लंकेस कहसि निज बाता । केई तव नासा कान निपाता ॥  
अवध नृपति दसरथ के जाए । पुरुष सिंघ बन खेलन आए ॥  
समुझि परी मोहि उन्ह कै करनी । रहित निसाचर करिहहिं धरनी ॥  
जिन्ह कर भुजबल पाइ दसानन । अभय भए बिचरत मुनि कानन ॥  
देखत बालक काल समाना । परम धीर धन्वी गुन नाना ॥  
अतुलित बल प्रताप द्वौ भ्राता । खल बध रत सुर मुनि सुखदाता ॥  
सोभा धाम राम अस नामा । तिन्ह के संग नारि एक स्यामा ॥  
रूप रासि बिधि नारि सँवारी । रति सत कोटि तासु बलिहारी ॥  
तासु अनुज काटे श्रुति नासा । सुनि तव भगिनि करहिं परिहासा ॥  
खर दूषन सुनि लगे पुकारा । छन महुँ सकल कटक उन्ह मारा ॥  
खर दूषन तिसिरा कर घाता । सुनि दससीस जरे सब गाता ॥
- दो०— सूपनखहि समुझाइ करि बल बोलेसि बहु भौंति ।  
गयउ भवन अति सोचबस नीद परइ नहिं राति ॥ 22  
सुर नर असुर नाग खग माहीं । मोरे अनुचर कहँ कोउ नाहीं ॥  
खर दूषन मोहि सम बलवंता । तिन्हहि को मारइ बिनु भगवंता ॥  
सुर रंजन भंजन महि भारा । जौं भगवंत लीन्ह अवतारा ॥  
तौ मैं जाइ बैरु हठि करउँ । प्रभु सर प्रान तजें भव तरऊँ ॥  
होइहि भजनु न तामस देहा । मन कम बचन मंत्र दृढ़ एहा ॥  
जौं नररूप भूपसुत कोऊ । हरिहउँ नारि जीति रन दोऊ ॥  
चला अकेल जान चढ़ि तहवां । बस मारीच सिंधु तट जहवाँ ॥  
इहाँ राम जसि जुगुति बनाई । सुनहु उमा सो कथा सुहाई ॥
- दो०— लछिमन गए बनहिं जब लेन मूल फल कंद ।  
जनकसुता सन बोले बिहसि कृपा सुख बृंद ॥ 23

सुनहु प्रिया ब्रत रुचिर सुसीला । मैं कछु करबि ललित नरलीला ॥  
मम पावन मन करहु निवासा । जौ लगि करौ निसाचर नासा ॥  
जबहिं राम सब कहा बखानी । प्रभु पद धरि हिये हरिहि समानी ॥  
निज प्रतिबिंब राखि तहें सीता । तैसइ सील रूप सुबिनीता ॥  
लछिमनहूँ यह मरमु न जाना । जो कछु चरित रचा भगवाना ॥  
दसमुख गयउ जहाँ मारीचा । नाइ माथ स्वारथ रत नीचा ॥  
नवनि नीच कै अति दुखदाई । जिमि अंकुस धनु उरग बिलाई ॥  
भयदायक खल कै प्रिय बानी । जिमि अकाल के कुसुम भवानी ॥

दो०— करि पूजा मारीच तब सादर पूछी बात ।

कवन हेतु मन ब्यग्र अति अकसर आयहु तात ॥ 24

दसमुख सकल कथा तेहि आगे । कही सहित अभिमान अभागें ॥  
होहु कपट मृग तुम्ह छलकारी । जेहि बिधि हरि आनौ नृपनारी ॥  
तेहि पुनि कहा सुनहु दससीसा । ते नररूप चराचर ईसा ॥  
तासों तात बयरु नहिं कीजै । मारें मरिअ जिआएँ जीजै ॥  
मुनि मख राखन गयउ कुमारा । बिनु फर सर रघुपति मोहि मारा ।  
सत जोजन आयउँ छन माहीं । तिन्ह सन बयरु किएँ भल नाहीं ॥  
भइ मम कीट भृंग की नाई । जहें तहें मैं देखउँ दोउ भाई ॥  
जौ नर तात तदपि अति सूरा । तिन्हहि बिरोधि न आइहि पूरा ॥

दो०— जेहिं ताड़का सुबाहु हति खंडेउ हर कोदंड ।

खर दूषन तिसिरा बधेउ मनुज कि अस बरिबंड ॥ 25

जाहु भवन कुल कुसल बिचारी । सुनत जरा दीन्हिसि बहु गारी ॥  
गुरु जिमि मूढ करसि मम बोधा । कहु जग मोहि समान को जोधा ॥  
तब मारीच हृदयें अनुमाना । नवहि बिरोधें नहिं कल्याना ॥  
सस्त्री मर्मी प्रभु सठ धनी । बैद बंदि कबि भानस गुनी ॥  
उभय भौंति देखा निज मरना । तब ताकिसि रघुनायक सरना ॥  
उतरु देत मोहि बधब अभागें । कस न मरौ रघुपति सर लागें ॥  
अस जिये जानि दसानन संगी । चला राम पद प्रेम अभंगा ॥  
मन अति हरष जनाव न तेही । आजु देखिहउँ परम सनेही ॥

छं०— निज परम प्रीतम देखि लोचन सुफल करि सुख पाइहौ ।

श्री सहित अनुज समेत कृपानिकेत पद मन लाइहौ ॥

निर्बान दायक कोध जा कर भगति अबसहि बसकरी ।

निज पानि सर संधानि सो मोहि बधिहि सुखसागर हरी ॥

दो०— मम पाछें धर धावत धरें सरासन बान ।

फिरि फिरि प्रभुहि बिलोकिहउँ धन्य न मो सम आन ॥ 26

तेहि बन निकट दसानन गयऊ । तब मारीच कपटमृग भयऊ ॥  
सीता परम रुचिर मृग देखा । कनक देह सुमनोहर बेषा ॥  
सुनहु देव रघुबीर कृपाला । एहि मृग कर अति सुंदर छाला ॥  
सत्यसंध प्रभु बधि करि एही । आनहु चर्म कहति बैदेही ॥  
तब रघुपति जानत सब कारन । उठे हरषि सुर काजु सँवारन ॥  
मृग बिलोकि कटि परिकर बाँधा । करतल चाप रुचिर सर साँधा ॥  
प्रभु लछिमनहि कहा समुझाई । फिरत बिपिन निसिचर बहु भाई ॥  
सीता केरि करेहु रखवारी । बुधि बिबेक बल समय बिचारी ॥  
प्रभुहि बिलोकि चला मृग भाजी । धाए राम सरासन साजी ॥  
निगम नेति सिव ध्यान न पावा । मायामृग पाछें सो धावा ॥

कबहुँ निकट पुनि दूरि पराई । कबहुँक प्रगटइ कबहुँ छपाई ॥  
 प्रगटत दुरत करत छल भूरी । एहि बिधि प्रभुहि गयउ लै दूरी ॥  
 तब तकि राम कठिन सर मारा । धरनि परेउ करि घोर पुकारा ॥  
 लछिमन कर प्रथमहिं लै नामा । पाछें सुमिरेसि मन महुँ रामा ॥  
 प्राण तजत प्रगटेसि निज देहा । सुमिरेसि रामु समेत सनेहा ॥  
 अंतर प्रेम तासु पहिचाना । मुनि दुर्लभ गति दीन्हि सुजाना ॥  
 दो०— बिपुल सुमन सुर बरषहिं गावहिं प्रभु गुन गाथ ।  
 निज पद दीन्ह असुर कहुँ दीनबंधु रघुनाथ ॥ 27  
 खल बधि तुरत फिरे रघुबीरा । सोह चाप कर कटि तूनीरा ॥  
 आरत गिरा सुनी जब सीता । कह लछिमन सन परम सभिता ॥  
 जाहु बेगि संकट अति भ्राता । लछिमन बिहसि कहा सुनु माता ॥  
 मृकुटि बिलास सृष्टि लय होई । सपनेहुँ संकट परइ कि सोई ॥  
 मरम बचन जब सीता बोली । हरि प्रेरित लछिमन मति डोली ॥  
 बन दिसि देव सौंषि सब काहू । चले जहों रावन ससि राहू ॥  
 सून बीच दसकंधर देखा । आवा निकट जती के बेसा ॥  
 जाकें डर सुर असुर डेराहीं । निसि न नींद दिन अन्न न खाहीं ॥  
 सो दससीस स्वान की नाई । इत उत चितइ चला भड़िहाई ॥  
 इमि कुपंथ पग देत खगेसा । रह न तेज मन बुधि बल लेसा ॥  
 नाना बिधि करि कथा सुहाई । राजनीति भय प्रीति देखाई ॥  
 कह सीता सुनु जती गोसाई । बोलेहु बचन दुष्ट की नाई ॥  
 तब रावन निज रूप देखावा । भई सभय जब नाम सुनावा ॥  
 कह सीता धरि धीरजु गाढा । आइ गयउ प्रभु रहु खल ठाढा ॥  
 जिमि हरिबधुहि छुद्र सस चाहा । भएसि कालबस निसिचर नाहा ॥  
 सुनत बचन दससीस रिसाना । मन महुँ चरन बंदि सुख माना ॥  
 दो०— कोधवंत तब रावन लीन्हिसि रथ बैठाइ ।  
 चला गगनपथ आतुर भयें रथ हॉकि न जाई ॥ 28  
 हा जग एक बीर रघुराया । केहिं अपराध बिसारेहु दाया ॥  
 आरति हरन सरन सुखदायक । हा रघुकुल सरोज दिननायक ॥  
 हा लछिमन तुम्हार नहिं दोसा । सो फलु पायउं कीन्हेउं रोसा ॥  
 बिबिध बिलाप करति बैदेही । भूरि कृपा प्रभु दूरि सनेही ॥  
 बिपति मोरिको प्रभुहिं सुनावा । पुरोडास चह रासभ खावा ॥  
 सीता कै बिलाप सुनि भारी । भए चराचर जीव दुखारी ॥  
 गीधराज सुनि आरत बानी । रघुकुलतिलक नारि पहिचानी ॥  
 अधम निसाचर लीन्हें जाई । जिमि मलेछ बस कपिला गाई ॥  
 सीते पुत्रि करसि जनि त्रासा । करिहउं जातुधान कर नासा ॥  
 धावा कोधवंत खग कैसें । छूटइ पबि परबत कहुँ जैसें ॥  
 रे रे दुष्ट ठाढ किन होही । निर्भय चलेसि न जानेहि मोही ॥  
 आवत देखि कृतांत समाना । फिरि दसकंधर कर अनुमाना ॥  
 की मैनाक कि खगपति होइ । मम बल जान सहित पति सोई ॥  
 जाना जरठ जटायू एहा । मम कर तीरथ छॉड़िहि देहा ॥  
 सुनत गीध कोधातुर धावा । कह सुन रावन मोर सिखावा ॥  
 तजि जानकिहि कुसल गह जाहू । नाहिं त अस होइहि बहुबाहू ॥  
 राम रोष पावक अति घोरा । होइहि सकल सलभ कुल तोरा ॥  
 उतरु न देत दसानन जोधा । तबहिं गीध धावा करि कोधा ॥

धरि कच बिरथ कीन्ह महि गिरा । सीतहि राखि गीध पुनि फिरा ॥  
 चोचन्ह मारि बिदारेसि देही । दंड एक भइ मुरुछा तेही ॥  
 तब सकोध निसिचर खिसिआना । काढेसि परम कराल कृपाना ॥  
 काटेसि पंख परा खग धरनी । सुमिरि राम करि अदभुत करनी ॥  
 सीतहि जान चढाई बहोरी । चला उताइल त्रास न थोरी ॥  
 करति बिलाप जाति नभ सीता । ब्याध बिबस जनु मृगी सभीता ॥  
 गिरि पर बैठे कपिन्ह निहारी । कहि हरि नाम दीन्ह पट डारी ॥  
 एहि बिधि सीतहि सो लै गयऊ । बन असोक महुँ राखत भयऊ ॥  
 दो०— हारि परा खल बहु बिधि भय अरु प्रीति देखाइ ।

तब असोक पादप तर राखिसि जतन कराइ ॥ 29 (क)

नवान्हपारायण छठा विश्राम

जेहि बिधि कपट कुरंग सँग धाइ चले श्रीराम ।

सा छबि सीता राखि उर रटति रहति हरिनाम ॥ 29 (ख)

रघुपति अनुजहि आवत देखी । बाहित चिंता कीन्हि बिसेषी ॥  
 जनकसुता परिहरिहु अकेली । आयहु तात बचन मम पेली ॥  
 निसिचर निकर फिरहिं बन माहीं । मम मन सीता आश्रम नाहीं ॥  
 गहि पद कमल अनुज कर जोरी । कहेउ नाथ कछु मोहि न खोरी ॥  
 अनुज समेत गए प्रभु तहवों । गोदावरि तट आश्रम जहवों ॥  
 आश्रम देखि जानकी हीना । भए बिकल जस प्राकृत दीना ॥  
 हा गुन खानि जानकी सीता । रूप सील ब्रत नेम पुनीता ॥  
 लछिमन समुझाए बहु भौंती । पूछत चले लता तरु पौंती ॥  
 हे खग मृग हे मधुकर श्रेनी । तुम्ह देखी सीता मृगनैनी ॥  
 खंजन सुक कपोल मृग मीना । मधुप निकर कोकिला प्रबीना ॥  
 कुंद कली दाड़िम दामिनी । कमल सरद ससि अहिभामिनी ॥  
 बरुन पास मनोज धनु हंसा । गज केहरि निज सुनत प्रसंसा ॥  
 श्रीफल कनक कदलि हरषाहीं । नेकु न संक सकुच मन माहीं ॥  
 सुनु जानकी तोहि बिन् आजू । हरषे सकल पाइ जनु राजू ॥  
 किमि सहि जात अनख तोहि पाहीं । प्रिया बेगि प्रगटसि कस नाहीं ॥  
 एहि बिधि खोजत बिलपत स्वामी । मनहुँ महा बिरही अति कामी ॥  
 पूरनकाम राम सुख रासी । मनुज चरित कर अज अबिनासी ॥  
 आगें परा गीधपति देखा । सुमिरत राम चरन जिन्ह रेखा ॥

दो०— कर सरोज सिर परसेउ कृपासिंधु रघुबीर ।

निरखि राम छबि धाम मुख बिगत भई सब पीर ॥ 30

तब कह गीध बचन धरि धीरा । सुनहु राम भंजन भव भीरा ॥  
 नाथ दसानन यह गति कीन्हीं । तेहिं खल जनकसुता हरि लीन्हीं ॥  
 लै दच्छिन दिसि गयउ गोसाईं । बिलपति अति कुररी की नाई ॥  
 दरस लागि प्रभु राखेउँ प्राणा । चलन चहत अब कृपानिधाना ॥  
 राम कहा तनु राखहु ताता । मुख मुसुकाई कही तेहिं बाता ॥  
 जाकर नाम मरत मुख आवा । अधमउ मुकुत होइ श्रुति गावा ॥  
 सो मम लोचन गोचर आगें । राखौं देह नाथ केहि खौंगें ॥  
 जल भरि नयन कहहिं रघुराईं । तात कर्म निज तें गति पाई ॥  
 परहित बस जिन्ह के मन माहीं । तिन्ह कहूँ जग दुर्लभ कछु नाहीं ॥  
 तनु तजि तात जाहु मम धामा । देउँ काह तुम्ह पूरनकामा ॥  
 दो०— सीता हरन तात जनि कहहु पिता सन जाइ ।

जौं मैं राम त कुल सहित कहिहि दसानन आइ ॥ 31  
गीध देह तजि धरि हरि रूपा । भूषन बहु पट पीत अनूपा ॥  
स्याम गात बिसाल भुज चारी । अस्तुति करत नयन भरि बारी ॥

छं०— जय राम रूप अनूप निर्गुन सगुन गुन प्रेरक सही ।  
दससीस बाहु प्रचंड खंडन चंड सर मंडन मही ॥  
पाथोद गात सरोज मुख राजीव आयत लोचनं ।  
नित नौमि रामु कृपाल बाहु बिसाल भव भय मोचनं ॥ 1  
बलमप्रमेयमनादिमजमव्यक्तमैकमगोचरं ।  
गोविंद गोपर द्वंद्वहर बिग्यानघन धरनीधरं ॥  
जे राम मंत्र जपंत संत अनंत जन मन रंजनं ।  
नित नौमि राम अकाम प्रिय कामादि खल दल गंजनं ॥ 2  
जेहि श्रुति निरंजन ब्रह्म ब्यापक बिरज अज कहि गावहीं ।  
करि ध्यान ग्यान बिराग जोग अनेक मुनि जेहि पावहीं ॥  
सो प्रगट करुना कंद सोभा बृंद अग जग मोहई ।  
मम हृदय पंकज भृंग अंग अनंग बहु छबि सोहई ॥ 3  
जो अगम सुगम सुभाव निर्मल असम सम सीतल सदा ।  
पस्यंति जं जोगी जतन करि करत मन गो बस सदा ॥  
सो राम रमा निवास संतत दास बस त्रिभुवन धनी ।  
मम उर बसउ सो समन संसृति जासु कीरति पावनी ॥ 4

दो०— अबिरल भगति मागि बर गीध गयउ हरिधाम ॥  
तेहि की क्रिया जथोचित निज कर कीन्ही राम ॥ 32  
कोमल चित अति दीनदयाला । कारन बिनु रघुनाथ कृपाला ॥  
गीध अधम खग आमिष भागी । गति दीन्हीं जो जाचत जोगी ॥  
सुनहु उमा ते लोग अभागी । हरि तजि होंहिं बिषय अनुरागी ॥  
पुनि सीतहि खोजत द्वौ भाई । चले बिलोकत बन बहुताई ॥  
संकुल लता बिटप घन कानन । बहु खग मृग तहें गज पंचानन ॥  
आवत पंथ कबंध निपाता । तेहिं सब कही साप कै बाता ॥  
दुरबासा मोहि दीन्हीं सापा । प्रभु पद पेखि मिटा सो पापा ॥  
सुनु गंधर्ब कहउँ मैं तोही । मोहि न सोहाइ संतकुल द्रोही ॥

दो०— मन कम बचन कपट तजि जो कर संतन्ह सेव ।  
मोहि समेत बिरंचि सिव बस ताके सब देव ॥ 33  
कहि निज धर्म ताहि समुझावा । निज पद प्रीति देखि मन भावा ॥  
रघुपति चरन कमल सिरु नाई । गयउ गगन आपनि गति पाई ॥  
ताहि देइ गति राम उदारा । सबरी के आश्रम पगु धारा ॥  
सबरी देखि राम गृहें आए । मुनि के बचन समुझि जियें भाए ॥  
सरसिज लोचन बाहु बिसाला । जटा मुकुट सिर उर बनमाला ॥  
स्याम गौर सुंदर दोउ भाई । सबरी परी चरन लपटाई ॥  
प्रेम मगन मुख बचन न आवा । पुनि पुनि पद सरोज सिर नावा ॥  
सादर जल लै चरन पखारे । पुनि सुंदर आसन बैठारे ॥

दो०— कंद मूल फल सुरस अति दिए राम कहुं आनि ।  
प्रेम सहित प्रभु खाए बारंबार बखानि ॥ 34  
पानि जोरि आगें भइ ठाढ़ी । प्रभुहि बिलोकि प्रीति अति बाढ़ी ॥  
केहि बिधि अस्तुति करौं तुम्हारी । अधम जाति मैं जडमति भारी ॥  
अधम ते अधम अधम संसारी । तिन्ह महें मैं मतिमंद अघारी ॥

कह रघुपति सुनु भामिनि बाता । मानउँ एक भगति कर नाता ॥  
जाति पाँति कुल धर्म बड़ाई । धन बल परिजन गुन चतुराई ॥  
भगति हीन नर सोहइ कैसा । बिनु जल बारिद देखिअ जैसा ॥  
नवधा भगति कहउँ तोहि पाहीं । सावधान सुनु धरु मन माहीं ॥  
प्रथम भगति संतन्ह कर संगी । दूसरि रति मम कथा प्रसंगा ॥

दो०— गुर पद पंकज सेवा तीसरि भगति अमान ।

चौथि भगति मम गुन गन करइ कपट तजि गान ॥ 35  
मंत्र जाप मम दृढ बिस्वासा । पंचम भजन सो बेद प्रकासा ॥  
छठ दम सील बिरति बहु करमा । निरत निरंतर सज्जन धरमा ॥  
सातवें सम मोहि मय जग देखा । मोतें संत अधिक करि लेखा ॥  
आठवें जथालाभ संतोषा । सपनेहुँ नहिं देखइ परदोषा ॥  
नवम सरल सब सन छलहीना । मम भरोस हियें हरष न दीना ॥  
नव महुँ एकउ जिन्ह कें होई । नारि पुरुष सचराचर कोई ॥  
सोइ अतिसय प्रिय भामिनि मोरें । सकल प्रकार भगति दृढ तोरें ॥  
मम दरसन फल परम अनूपा । जीव पाव निज सहज सरूपा ॥  
जनकसुता कइ सुधि भामिनी । जानहि कहु करिबरगामिनी ॥  
पंपा सरहि जाहु रघुराई । तहें होइहि सुग्रीव मितार्ई ॥  
सो सब कहिहि देव रघुबीरा । जानतहुँ पूछहु मतिधीरा ॥  
बार बार प्रभु पद सिरु नाई । प्रेम सहित सब कथा सुनाई ॥

छ०— कहि कथा सकल बिलोकि हरि मुख हृदयें पद पंकज धरे ।  
तजि जोग पावक देह हरि पद लीन भइ जहें नहिं फिरे ॥  
नर बिबिध कर्म अधर्म बहु मत सोकप्रद सब त्यागहू ।  
बिस्वास करि कह दास तुलसी राम पद अनुरागहू ॥  
चले राम त्यागा बन सोऊ । अतुलित बल नर केहरि दोऊ ॥  
बिरही इव प्रभु करत बिषादा । कहत कथा अनेक संबादा ॥  
लछिमन देखु बिपिन कइ सोभा । देखत केहि कर मन नहिं छोभा ॥  
नारि सहित सब खग मृग बृंदा । मानहुँ मोरि करत हहिं निंदा ॥  
हमहि देखि मृग निकर पराहीं । मृगीं कहहिं तुम्ह कहें भय नाहीं ॥  
तुम्ह आनंद करहु मृग जाए । कंचन मृग खोजन ए आए ॥  
संग लाइ करिनीं करि लेहीं । मानहुँ मोहि सिवावनु देहीं ॥  
सास्त्र सुचिंतित पुनि पुनि देखिअ । भूप सुसेवित बस नहिं लेखिअ ॥

दो०— बिरह बिकल बलहीन मोहि जानेसि निपट अकेल ।

सहित बिपिन मधुकर खग मदन कीन्ह बगमेल ॥ 36 (क)

देखि गयउ भ्राता सहित तासु दूत सुनि बात ।

डेरा कीन्हेउ मनहुँ तब कटकु हटकि मन जात ॥ 36 (ख)

बिटम बिसाल लता अरुझानी । बिबिध बितान दिए जनु तानी ॥  
कदलि ताल बर धुजा पताका । देखि न मोह धीर मन जाका ॥  
बिबिध भाँति फूले तरु नाना । जनु बानैत बने बहु बाना ॥  
कहुँ कहुँ सुंदर बिटप सुहाए । जनु भट बिलग बिलग होइ छाए ॥  
कृजत पिक मानहुँ गज माते । ढेक महोख ऊँट बिसराते ॥  
मोर चकोर कीर बर बाजी । पारावत मराल सब ताजी ॥  
तीतिर लावक पदचर जूथा । बरनि न जाइ मनोज बरूथा ॥  
रथ गिरि सिला दुंदुभीं झरना । चातक बंदी गुन गन बरना ॥  
मधुकर मुखर भेरि सहनाई । त्रिबिध बयारि बसीठीं आई ॥

चतुरंगिनी सेन सँग लीन्हें । बिचरत सबहि चुनौती दीन्हें ॥  
लछिमन देखत काम अनीका । रहहिं धीर तिन्ह कै जग लीका ॥  
एहि कें एक परम बल नारी । तेहि तें उबर सुभट सोइ भारी ॥  
दो०— तात तीनि अति प्रबल खल काम कोध अरु लोभ ।  
मुनि बिग्यान धाम मन करहिं निमिष महुँ छोभ ॥ 37 (क)  
लोभ कें इच्छा दंभ बल काम कें केवल नारि ।  
कोध कें परुष बचन बल मुनिबर कहहिं बिचारि ॥ 37 (ख)  
गुनातीत सचराचर स्वामी । राम उमा सब अंतरजामी ॥  
कामिन्ह कै दीनता देखाई । धीरन्ह कें मन बिरति दृढ़ाई ॥  
कोध मनोज लोभ मद माया । छूटहिं सकल राम कीं दाया ॥  
सो नर इंद्रजाल नहिं भूला । जा पर होइ सो नट अनुकूला ॥  
उमा कहउँ मैं अनुभव अपना । सत हरि भजनु जगत सब सपना ॥  
पुनि प्रभु गए सरोबर तीरा । पंपा नाम सुभग गंभीरा ॥  
संत हृदय जस निर्मल बारी । बॉधे घाट मनोहर चारी ॥  
जहँ तहँ पिअहिं बिबिध मृग नीरा । जनु उदार गृह जाचक भीरा ॥

दो०— पुरइनि सघन ओट जल बेगि न पाइए मर्म ।  
मायाछन्न न देखिऐ जैसैं निर्गुन ब्रह्म ॥ 38 (क)  
सुखी मीन सब एकरस अति अगाध जल माहिं ।  
जथा धर्मसीलन्ह के दिन सुख संजुत जाहिं ॥ 38 (ख)  
बिकसे सरसिज नाना रंगा । मधुर मुखर गुंजत बहु भृंगा ॥  
बोलत जलकुक्कुट कलहंसा । प्रभु बिलोकि जनु करत प्रसंसा ॥  
चकबाक बक खग समुदाई । देखत बनइ बरनि नहिं जाई ॥  
सुंदर खग गन गिरा सुहाई । जात पथिक जनु लेत बोलाई ॥  
ताल समीप मुनिन्ह गृह छाए । चहु दिसि कानन बिटप सुहाए ॥  
चंपक बकुल कदंब तमाला । पाटल पनस परास रसाला ॥  
नव पल्लव कुसुमित तरु नाना । चंचरीक पटली कर गाना ॥  
सीतल मंद सुगंध सुभाऊ । संतत बहइ मनोहर बाऊ ॥

दो०— फल भारन नमि बिटप सब रहे भूमि निअराइ ।  
पर उपकारी पुरुष जिमि नवहिं सुसंपति पाइ ॥ 39  
देखि राम अति रुचिर तलावा । मज्जनु कीन्ह परम सुख पावा ॥  
देखी सुंदर तरुबर छाया । बैठे अनुज सहित रघुराया ॥  
तहँ पुनि सकल देव मुनि आए । अस्तुति करि सुर धाम सिधाए ॥  
बिरहवंत भगवंतहि देखी । नारद मन भा सोच बिसेषी ॥  
मोर साप करि अंगीकारा । सहत राम नाना दुख भारा ॥  
ऐसे प्रभुहि बिलोकउँ जाई । पुनि न बनिहि अस अवसरु आई ॥  
यह बिचारि नारद कर बीना । गए जहाँ प्रभु सुख आसीना ॥  
गावत राम चरित मृदु बानी । प्रेम सहित बहु भौंति बखानी ॥  
करत दंडवत लिए उठाई । राखे बहुत बार उर लाई ॥  
स्वागत पूँछि निकट बैठारे । लछिमन सादर चरन पखारे ॥

दो०— नाना बिधि बिनती करि प्रभु प्रसन्न जियँ जानि ।  
नारद बोले बचन तब जोरि सरोरुह पानि ॥ 40  
सुनहु उदार सहज रघुनायक । सुंदर अगम सुगम बर दायक ॥  
देहु एक बर मागउँ स्वामी । जद्यपि जानत अंतरजामी ॥

जानहु मुनि तुम्ह मोर सुभाऊ । जन सन कबहुँ कि करउँ दुराऊ ॥  
 कवन बस्तु असि प्रिय मोहि लागी । जो मुनिबर न सकहु तुम्ह मागी ॥  
 जन कहँ कछु अदेय नहिं मोरें । अस बिस्वास तजहु जनि भोरें ॥  
 तब नारद बोले हरषाई । अस बर मागउँ करउँ ढिठाई ॥  
 जद्यपि प्रभु के नाम अनेका । श्रुति कह अधिक एक तें एका ॥  
 राम सकल नामन्ह ते अधिका । होउ नाथ अघ खग गन बधिका ॥

दो०— राका रजनी भगति तव राम नाम सोइ सोम ।  
 अपर नाम उडगन बिमल बसहुँ भगत उर ब्योम ॥ 41 (क)  
 एवमस्तु मुनि सन कहेउ कृपासिंधु रघुनाथ ।  
 तब नारद मन हरष अति प्रभु पद नायउ माथ ॥ 41 (ख)  
 अति प्रसन्न रघुनाथहि जानी । पुनि नारद बोले मृदु बानी ॥  
 राम जबहिं प्रेरेउ निज माया । मोहेहु मोहि सुनहु रघुराया ॥  
 तब बिबाह मैं चाहउँ कीन्हा । प्रभु केहि कारन करै न दीन्हा ॥  
 सुनु मुनि तोहि कहउँ सहरोसा । भजहिं जे मोहि तजि सकल भरोसा ॥  
 करउँ सदा तिन्ह कै रखवारी । जिमि बालक राखइ महतारी ॥  
 गह सिंसु बच्छ अनल अहि धाई । तहँ राखइ जननी अरगाई ॥  
 प्रौढ भएँ तेहि सुत पर माता । प्रीति करइ नहिं पाछिलि बाता ॥  
 मोरे प्रौढ तनय सम ग्यानी । बालक सुत सम दास अमानी ॥  
 जनहि मोर बल निज बल ताही । दुहु कहँ काम कोध रिपु आही ॥  
 यह बिचारि पंडित मोहि भजहीं । पाएहुँ ग्यान भगति नहिं तजहीं ॥  
 सुनि रघुपति के बचन सुहाए । मुनि तन पुलक नयन भरि आए ॥  
 कहहु कवन प्रभु कै असि रीती । सेवक पर ममता अरु प्रीती ॥  
 पुनि सादर बोले मुनि नारद । सुनहु राम बिग्यान बिसारद ॥  
 संतन्ह के लच्छन रघुबीरा । कहहु नाथ भव भंजन भीरा ॥  
 सुनु मुनि संतन्ह के गुन कहऊँ । जिन्ह ते मैं उन्ह के बस रहउँ ॥  
 षट बिकार जित अनघ अकामा । अचल अकिंचन सुचि सुखधामा ॥  
 अमित बोध अनीह मितभोगी । सत्यसार कबि कोबिद जोगी ॥  
 सावधान मानद मदहीना । धीर धर्म गति परम प्रबीना ॥

दो०— गुनागार संसार दुख रहित बिगत संदह ।  
 तजि मम चरन सरोज प्रिय तिन्ह कहँ देह न गेह ॥ 42  
 निज गुन श्रवन सुनत सकुचाहीं । पर गुन सुनत अधिक हरषाहीं ॥  
 सम सीतल नहिं त्यागहिं नीती । सरल सुभाउ सबहि सन प्रीती ॥  
 जप तप ब्रत दम संजम नेमा । गुरु गोबिद संत पद प्रेमा ॥  
 श्रद्धा छमा मयत्री दाया । मुदिता मम पद प्रीति अमाया ॥  
 बिरति बिबेक बिनय बिग्याना । बोध जथारथ बेद पुराना ॥  
 दंभ मान मद करहिं न कारु । भूलि न देहिं कुमारग पारु ॥  
 गावहिं सुनहिं सदा मम लीला । हेतु रहित परहित रत सीला ॥  
 मुनि सुनु साधुन्ह के गुन जेते । कहि न सकहिं सारद श्रुति तेते ॥

छ०— कहि सक न सारद सेष नारद सुनत पद पंकज गहे ।  
 अस दीनबंधु कृपाल अपने भगत गुन निज मुख कहे ॥  
 सिरु नाइ बारहिं बार चरनन्हि ब्रह्मपुर नारद गए ।  
 ते धन्य तुलसीदास आस बिहाइ जे हरि रँग रँए ॥

दो०— रावनारि जसु पावन गावहिं सुनहिं जे लोग ।  
 राम भगति दृढ़ पावहिं बिनु बिराग जप जोग ॥ 43

मासपारायण, बाईसर्वो विश्राम  
इति श्रीमद्रामचरितमानसे सकल कलिकलुष विध्वंसवने  
तृतीयः सोपानः समाप्तः  
(अरण्यकाण्ड समाप्त)

— गणपतये नमः

किष्किन्धाकाण्ड

श्लोक

कुन्देन्दीवरसुन्दरावतिबलौ विज्ञानधामावुभौ  
शोभाद्भ्यौ वरधन्विनौ श्रुतिनुतौ गोविप्रवृन्दप्रियौ ।  
मायामानुषरूपिणौ रघुवरौ सद्धर्मवर्मो हितौ  
सीतान्वेषणतत्परौ पथिगतौ भक्तिप्रदौ तौ हि नः ॥ 1 ॥  
ब्रह्माम्भोधिसमुद्भवं कलमलप्रध्वंसनं चाव्ययं  
श्रीमच्छम्भुमुखेन्दुसुन्दरवरे संशोभितं सर्वदा ।  
संसारामयभेषजं सुखकरं श्रीजानकीजीवनं  
धन्यास्ते कृतिनः पिवन्ति सततं श्रीरामनामामृतम् ॥ 2 ॥

सो० मुक्ति जन्म महि जानि ग्यान खानि अघ हानि कर ।  
जहँ बस संभु भवानि सो कासी सेइअ कस न ॥  
जरत सकल सुर बृद बिषम गरल जेहिं पान किय ।  
तेहि न भजसि मन मंद को कृपाल संकर सरिस ॥  
आगे चले बहुरि रघुराया । रिष्यमूक पर्वत निअराया ॥  
तहँ रह सचिव सहित सुग्रीवा । आवत देखि अतुल बल सीवा ॥  
अति सभित कह सुनु हनुमाना । पुरुष जुगल बल रूप निधाना ॥  
धरि बटु रूप देखु तैं जाई । कहेसु जानि जियेँ सयन बुझाई ॥  
पठए बालि होहिं मन मैला । भागौ तुरत तजौ यह सैला ॥  
विप्र रूप धरि कपि तहँ गयऊ । माथ नाइ पूछत अस भयऊ ॥  
को तुम्ह स्यामल गौर सरीरा । छत्री रूप फिरहु बन बीरा ॥  
कठिन भूमि कोमल पद गामी । कवन हेतु बिचरहु बन स्वामी ॥  
मृदुल मनोहर सुंदर गाता । सहत दुसह बन आतप बाता ॥  
की तुम्ह तीनि देव महँ कोऊ । नर नारायन की तुम्ह दोऊ ॥

दो० जग कारन तारन भव भंजन धरनी भार ।  
की तुम्ह अखिल भुवन पति लीन्ह मनुज अवतार ॥ 1  
कोसलेस दसरथ के जाए । हम पितु बचन मानि बन आए ॥  
नाम राम लछिमन दोउ भाई । संग नारि सुकुमारि सुहाई ॥  
इहाँ हरी निसिचर बैदेही । विप्र फिरहिं हम खोजत तेही ॥  
आपन चरित कहा हम गाई । कहहु विप्र निज कथा बुझाई ॥  
प्रभु पहिचानि परेउ गहि चरना । सो सुख उमा जाइ नहिं बरना ॥  
पुनि धीरजु धरि अस्तुति कीन्ही । हरष हृदयें निज नाथहि चीन्ही ॥  
मोर न्याउ मैं पूछा साई । तुम्ह पूछहु कस नर की नाई ॥  
तव माया बस फिरउँ भुलाना । ता ते मैं नहिं प्रभु पहिचाना ॥

दो० एकु मैं मंद मोहबस कुटिल हृदयें अग्यान ।  
 पुनि प्रभु मोहि बिसारेउ दीनबंधु भगवान ॥ 2  
 जदपि नाथ बहु अवगुन मोरें । सेवक प्रभुहि परै जनि भोरें ॥  
 नाथ जीव तव मायों मोहा । सो निस्तरइ तुम्हारेहिं छोहा ॥  
 ता पर मैं रघुबीर दोहाई । जानउँ नहिं कछु भजन उपाई ॥  
 सेवक सुत पति मातु भरोसें । रहइ असोच बनइ प्रभु पोसें ॥  
 अस कहि परेउ चरन अकुलाई । निज तनु प्रगटि प्रीति उर छाई ॥  
 तब रघुपति उठाइ उर लावा । निज लोचन जल सींचि जुड़ावा ॥  
 सुनु कपि जियें मानसि जनि ऊना । तैं मम प्रिय लछिमन ते दूना ॥  
 समदरसी मोहि कह सब कोऊ । सेवक प्रिय अनन्यगति सोऊ ॥

दो० सो अनन्य जाकें असि मति न टरइ हनुमंत ।  
 मैं सेवक सचराचर रूप स्वामि भगवंत ॥ 3  
 देखि पवनसुत पति अनुकूला । हृदयें हरष बीती सब सूला ॥  
 नाथ सैल पर कपिपति रहई । सो सुग्रीव दास तव अहई ॥  
 तेहि सन नाथ मयत्री कीजे । दीन जानि तेहि अभय करीजे ॥  
 सो सीता कर खोज कराइहि । जहँ तहँ मरकट कोटि पठाइहि ॥  
 एहि बिधि सकल कथा समुझाई । लिए दुऔ जन पीठि चढ़ाई ॥  
 जब सुग्रीवें राम कहूँ देखा । अतिसय जन्म धन्य करि लेखा ॥  
 सादर मिलेउ नाइ पद माथा । भेंटेउ अनुज सहित रघुनाथा ॥  
 कपि कर मन बिचार एहि रीती । करिहहि बिधि मो सन ए प्रीती ॥

दो० तब हनुमंत उभय दिसि की सब कथा सुनाइ ।  
 पावक साखी देइ करि जोरी प्रीति दृढ़ाइ ॥ 4  
 कीन्हि प्रीति कछु बीच न राखा । लछिमन राम चरित सब भाषा ॥  
 कह सुग्रीव नयन भरि बारी । मिलिहि नाथ मिथिलेसकुमारी ॥  
 मंत्रिन्ह सहित इहाँ एक बारा । बैठ रहेउं मैं करत बिचारा ॥  
 गगन पंथ देखी मैं जाता । परबस परी बहुत बिलपाता ॥  
 राम राम हा राम पुकारी । हमहि देखि दीन्हेउ पट डारी ॥  
 मागा राम तुरत तेहिं दीन्हा । पट उर लाइ सोच अति कीन्हा ॥  
 कह सुग्रीव सुनहु रघुबीरा । तजहु सोच मन आनहु धीरा ॥  
 सब प्रकार करिहउं सेवकाई । जेहि बिधि मिलिहि जानकी आई ॥

दो० सखा बचन सुनि हरषे कृपासिंधु बलसीव ।  
 कारन कवन बसहु बन मोहि कहहु सुग्रीव ॥ 5  
 नाथ बालि अरु मैं द्वौ भाई । प्रीति रही कछु बरनि न जाई ॥  
 मय सुत मायावी तेहि नाऊँ । आवा सो प्रभु हमरें गाऊँ ॥  
 अर्ध राति पुर द्वार पुकारा । बाली रिपु बल सहै न पारा ॥  
 धावा बालि देखि सो भागा । मैं पुनि गयउं बंधु सँग लागा ॥  
 गिरिबर गुहों पैठ सो जाई । तब बालीं मोहि कहा बुझाई ॥  
 परिखेसु मोहि एक पखवारा । नहिं आवौं तब जानेसु मारा ॥  
 मास दिवस तहँ रहेउं खरारी । निसरी रुधिर धार तहँ भारी ॥  
 बालि हतेसि मोहि मारिहि आई । सिला देइ तहँ चलेउं पराई ॥  
 मंत्रिन्ह पुर देख बिनु साई । दीन्हेउ मोहि राज बरिआई ॥  
 बाली ताहि मारि गृह आवा । देखि मोहि जियें भेद बढ़ावा ॥  
 रिपु सम मोहि मारेसि अति भारी । हरि लीन्हेसि सर्बसु अरु नारी ॥  
 ताकें भय रघुबीर कृपाला । सकल भुवन मैं फिरेउं बिहाला ॥

इहों साप बस आवत नाही । तदपि सभित रहउं मन माहीं ॥  
सुनि सेवक दुख दीनदयाला । फरकि उठीं द्वै भुजा बिसाला ॥

दो० सुनु सुग्रीव मारिहउं बालिहि एकहिं बान ।

ब्रह्म रुद्र सरनागत गएँ न उबरिहिं प्रान ॥ 6

जे न मित्र दुख होहिं दुखारी । तिन्हहि बिलोकत पातक भारी ॥  
निज दुख गिरि सम रज करि जाना । मित्रक दुख रज मेरु समाना ॥  
जिन्ह कें असि मति सहज न आई । ते सठ कल हठि करत मित्ताई ॥  
कुपथ निवारि सुपंथ चलावा । गुन प्रगटै अवगुनन्हि दुरावा ॥  
देत लेत मन संक न धरई । बल अनुमान सदा हित करई ॥  
बिपति काल कर सतगुन नेहा । श्रुति कह संत मित्र गुन एहा ॥  
आगें कह मृदु बचन बनाई । पाछें अनहित मन कुटिलाई ॥  
जा कर चित अहि गति सम भाई । अस कुमित्र परिहरेहिं भलाई ॥  
सखा सोच त्यागहु बल मोरें । सब बिधि घटब काज मैं तोरें ॥  
कह सुग्रीव सुनहु रघुबीरा । बालि महाबल अति रनधीरा ॥  
दंदुभि अस्थि ताल देखराए । बिनु प्रयास रघुनाथ ढहाए ॥  
देखि अमित बल बाढी प्रीती । बालि बधब इनह भइ परतीती ॥  
बार बार नावइ पद सीसा । प्रभुहि जानि मन हरष कपीसा ॥  
उपजा ग्यान बचन तब बोला । नाथ कृपों मन भयउ अलोला ॥  
सुख संपति परिवार बड़ाई । सब परिहरि करिहउं सेवकाई ॥  
ए सब राम भगति के बाधक । कहहिं संत तव पद अवराधक ॥  
सत्रु मित्र सुख दुख जग माहीं । माया कृत परमारथ नाही ॥  
बालि परम हित जासु प्रसादा । मिलेहु राम तुम्ह समन बिषादा ॥  
सपनें जेहि सन होइ लराई । जागें समुझत मन सकुचाई ॥  
अब प्रभु कुपा करह, एहि भौंती । सब तजि भजनु करौं दिन राती ॥  
सुनि बिराग संजुत कपि बानी । बोले बिहँसि रामु धनुपानी ॥  
जो कछु कहेहु सत्य सब सोई । सखा बचन मम मृषा न होई ॥  
नट मरकट इव सबहि नचावत । रामु खगेस बेद अस गावत ॥  
लै सुग्रीव संग रघुनाथा । चले चाप सायक गहि हाथा ॥  
तब रघुपति सुग्रीव पठावा । गर्जेसि जाइ निकट बल पावा ॥  
सुनत बालि कोधातुर धावा । गहि कर चरन नारि समुझावा ॥  
सुनु पति जिन्हहि मिलेउ सुग्रीवा । ते द्वौ बंधु तेज बल सींवा ॥  
कोसलेस सुत लछिमन रामा । कालहु जीति सकहिं संग्रामा ॥

दो० कह बाली सुनु भीरु प्रिय समदरसी रघुनाथ ।

जौं कदाचि मोहि मारहिं तौ पुनि होउं सनाथ ॥ 7

अस कहि चला महा अभिमानी । तून समान सुग्रीवहि जानी ॥  
भिरे उभौ बाली अति तर्जा । मुठिका मारि महाधुनि गर्जा ॥  
तब सुग्रीव बिकल होइ भागा । मुष्टि प्रहार बज्र सम लागा ॥  
मैं जो कहा रघुबोर कृपाला । बंधु न होइ मोर यह काला ॥  
एकरूप तुम्ह भ्राता दोरु । तेहि भ्रम तें नहिं मारेउं सोरु ॥  
कर परसा सुग्रीव सरीरा । तनु भा कुलिस गइ सब पीरा ॥  
मेली कंठ सुमन कै माला । पठवा पुनि बल देइ बिसाला ॥  
पुनि नाना बिधि भई लराई । तब रन मह उतरे रघुराई ॥

दो० धावा बालि कोधातुर अधम न प्रभु पहिचानि ।

मारा बालि राम तब हृदय मॉझ सर तानि ॥ 8  
 परा बिकल महि सर के लागे । पुनि उठि बैठ देखि प्रभु आगे ॥  
 स्याम गात सिर जटा बनाएँ । अरुन नयन सर चाप चढ़ाएँ ॥  
 पुनि पुनि चितइ चरन चित दीन्हा । सुफल जन्म माना प्रभु चीन्हा ॥  
 हृदयें प्रीति मुख बचन कठोरा । बोला चितइ राम की ओरा ॥  
 धर्म हेतु अवतरेउ गुसाई । तजेउ मोहि प्राकृत नर नाई ॥  
 मैं बैरी सुग्रीव पिआरा । कहहु नाथ मैं काहि बिगारा ॥  
 अनुज बधू भगिनी सुत नारी । सुनु सठ कन्या सम ए चारी ॥  
 इन्हहि कुदृष्टि बिलोकइ जोई । ताहि बधे कछु पाप न होई ॥  
 मूढ तोहि अतिसय अभिमाना । नारि सिखावन करसि न काना ॥  
 मम भुज बल आश्रित तेहि जानी । मारा चहसि अधम अभिमानी ॥  
 दो० सुनहु राम स्वामी सन चल न चातुरी मोरि ।  
 प्रभु अजहूँ मैं पापी अंतकाल गति तोरि ॥ 9  
 सुनत राम अति कोमल बानी । बालि सीस परसेउ निज पानी ॥  
 अचल करौं तनु राखहु प्राणा । बालि कहा सुनु कृपानिधाना ॥  
 जन्म जन्म मुनि जतनु कराहीं । अंत राम कहि आवत नाहीं ॥  
 मम लोचन गोचर सोइ आवा । बहुरि कि प्रभु अस बनिहि बनावा ॥  
 छं० सो नयन गोचर जासु गुन नित नेति कहि श्रुति गावहीं ।  
 जिति पवन मन गो निरस करि मुनि ध्यान कबहुँक पावहीं ॥  
 मोहि जानि अति अभिमान बस प्रभु कहेउ राखु सरीरही ।  
 अस कवन सठ हठि काटि सुरतरु बारि करिहि बबुरही ॥ 1  
 अब नाथ करि करुना बिलोकहु देहु जो बर मागऊँ ।  
 जेहिं जोनि जन्मौं कर्म बस तहें राम पद अनुरागऊँ ॥  
 यह तनय मम सम बिनय बल कल्यानप्रद प्रभु लीजिए ।  
 गहि बाँह सुर नर नाह आपन दास अंगद कीजिए ॥ 2  
 दो० राम चरन दृढ प्रीति करि बालि कीन्ह तनु त्याग ।  
 सुमन माल जिमि कंठ ते गिरत न जानइ नाग ॥ 10  
 राम बालि निज धाम पठावा । नगर लोग सब ब्याकुल धावा ॥  
 नाना बिधि बिलाप कर तारा । छूटे केस न देह सँभारा ॥  
 तारा बिकल देखि रघुराया । दीन्ह ग्यान हरि लीन्हीं माया ॥  
 छिति जल पावक गगन समीरा । पंच रचित अति अधम सरीरा ॥  
 प्रगट सो तनु तव आगें सोवा । जीव नित्य केहि लगि तुम्ह रोवा ॥  
 उपजा ग्यान चरन तब लागी । लीन्हेसि परम भगति बर मागी ॥  
 राम कहा अनुजहि समुझाई । राज देहु सुग्रीवहि जाई ॥  
 रघुपति चरन नाइ करि माथा । चले सकल प्रेरित रघुनाथा ॥  
 दो० लछिमन तुरत बोलाए पुरजन बिप्र समाज ।  
 राजु दीन्ह सुग्रीव कहें अंगद कहें जुबराज ॥ 11  
 उमा राम सम हित जग माहीं । गुरु पितु मातु बंधु प्रभु नाहीं ॥  
 सुर नर मुनि सब कै यह रीती । स्वारथ लागि करहिं सब प्रीती ॥  
 बालि त्रास ब्याकुल दिन राती । तन बहु ब्रन चिंतौं जर छाती ॥  
 सोइ सुग्रीव कीन्ह कपिराऊ । अति कृपाल रघुबीर सुभाऊ ॥  
 जानतहूँ अस प्रभु परिहरहीं । काहे न बिपति जाल नर परहीं ॥  
 पुनि सुग्रीवहि लीन्ह बोलाई । बहु प्रकार नृपनीति सिखाई ॥  
 कह प्रभु सुनु सुग्रीव हरीसा । पुर न जाउँ दस चारि बरीसा ॥

गत ग्रीषम बरषा रितु आई । रहिहउँ निकट सैल पर छाई ॥  
अंगद सहित करहु तुम्ह राजू । संतत हृदयँ धरेहु मम काजू ॥  
जब सुग्रीव भवन फिरि आए । रामु प्रबरषन गिरि पर छाए ॥  
दो० प्रथमहि देवन्ह गिरि गुहा राखेउ रुचिर बनाइ ।

राम कृपानिधि कछु दिन बास करहिंगे आइ ॥ 12

सुंदर बन कुसुमित अति सोभा । गुंजत मधुप निकर मधु लोभा ॥  
कंद मूल फल पत्र सुहाए । भए बहुत जब ते प्रभु आए ॥  
देखि मनोहर सैल अनुपा । रहे तहँ अनुज सहित सुरभूपा ॥  
मधुकर खग मृग तनु धरि देवा । करहि सिद्ध मुनि प्रभु कै सेवा ॥  
मंगलरूप भयउ बन तब ते । कीन्ह निवास रमापति जब ते ॥  
फटिक सिला अति सुभ्र सुहाई । सुख आसीन तहाँ द्वौ भाई ॥  
कहत अनुज सन कथा अनेका । भगति बिरति नृपनीति बिबेका ॥  
बरषा काल मेघ नभ छाए । गरजत लागत परम सुहाए ॥

दो० लछिमन देखु मोर गन नाचत बारिद पेखि ।

गृही बिरति रत हरष जस बिष्णु भगत कहँ देखि ॥ 13

घन घमंड नभ गरजत घोरा । प्रिया हीन डरपत मन मोरा ॥  
दामिनि दमक रह न घन माहीं । खल कै प्रीति जथा थिर नाहीं ॥  
बरषहिं जलद भूमि निअराएँ । जथा नवहिं बुध बिद्या पाएँ ॥  
बूँद अघात सहहिं गिरि कैसैं । खल के बचन संत सह जैसैं ॥  
छुद्र नदी भरि चली उतराई । जस थोरेहुँ घन खल बौराई ॥  
भूमि परत भा ढाबर पानी । जनु जीवहि माया लपटानी ॥  
समिति समिति जल भरहिं तलावा । जिमि सदगुन सज्जन पहिं आवा ॥  
सरिता जल जलनिधि महुँ जाई । होइ अचल जिमि जिव हरि पाई ॥

दो० हरित भूमि तृन संकुल समुझि परहिं नहिं पंथ ।

जिमि पाखंड बिबाद तें लुप्त होहिं सदग्रंथ ॥ 14

दादुर धुनि चहु दिसा सुहाई । बेद पढ़हिं जनु बटु समुदाई ॥  
नव पल्लव भए बिटप अनेका । साधक मन जस मिलें बिबेका ॥  
अर्क जवास पात बिनु भयरु । जस सुराज खल उद्यम गयरु ॥  
खोजत कतहुँ मिलइ नहिं धूरी । करइ क्रोध जिमि धरमहि दूरी ॥  
ससि संपन्न सोह महि कैसी । उपकारी कै संपति जैसी ॥  
निसि तम घन खद्योत बिराजा । जनु दंभिन्ह कर मिला समाजा ॥  
कषी निरावहिं चतुर किसाना । जिमि बुध तजहिं मोह मद माना ॥  
ऊसर बरषइ तृन नहिं जामा । जिमि हरिजन हियेँ उपज न कामा ॥  
बिबिध जंतु संकुल महि भ्राजा । प्रजा बाढ़ जिमि पाइ सुराजा ॥  
जहँ तहँ रहे पथिक थकि नाना । जिमि इंद्रिय गन उपजेँ ग्याना ॥

दो० कबहुँ प्रबल बह मारुत जहँ तहँ मेघ बिलाहिं ।

जिमि कपूत के उपजेँ कुल सद्धर्म नसाहिं ॥ 15 (क)

कबहुँ दिवस महुँ निबिड़ तम कबहुँक प्रगट पतंग ।

बिनसइ उपजइ ग्यान जिमि पाइ कुसंग सुसंग ॥ 15 (ख)

बरषा बिगत सरद रितु आई । लछिमन देखहु परम सुहाई ॥  
फूलें कास सकल महि छाई । जनु बरषों कृत प्रगट बुढ़ाई ॥  
उदित अगस्ति पंथ जल सोषा । जिमि लोभहि सोषइ संतोषा ॥  
सरिता सर निर्मल जल सोहा । संत हृदयें जस गत मद मोहा ॥  
रस रस सूख सरित सर पानी । ममता त्याग करहिं जिमि ग्यानी ॥

जानि सरद रितु खंजन आए । पाइ समय जिमि सुकृत सुहाए ॥  
पंक न रेनु सोह असि धरनी । नीति निपुन नृप कै जसि करनी ॥  
जल संकोच बिकल भई मीना । अबुध कुटुंबी जिमि धनहीना ॥  
बिनु घन निर्मल सोह अकासा । हरिजन इव परिहरि सब आसा ॥  
कहुँ कहुँ बृष्टि सारदी थोरी । कोउ एक पाव भगति जिमि मोरी ॥  
दो० चले हरषि तजि नगर नृप तापस बनिक भिखारि ।

जिमि हरि भगति पाइ श्रम तजहिं आश्रमी चारि ॥ 16  
सुखी मीन जे नीर अगाधा । जिमि हरि सरन न एकउ बाधा ॥  
फूलें कमल सोह सर कैसा । निर्गुन ब्रह्म सगुन भएँ जैसा ॥  
गुंजत मधुकर मुखर अनूपा । सुंदर खग रव नाना रूपा ॥  
चकबाक मन दुख निसि पेखी । जिमि दुर्जन पर संपति देखी ॥  
चातक रटत तृषा अति ओही । जिमि सुख लहइ न संकरद्रोही ॥  
सरदातप निसि ससि अपहरई । संत दरस जिमि पातक टरई ॥  
देखि इंदु चकोर समुदाई । चितवहिं जिमि हरिजन हरि पाई ॥  
मसक दंस बीते हिम त्रासा । जिमि हरि द्रोह किऐँ कुल नासा ॥

दो० भूमि जीव संकुल रहे गए सरद रितु पाइ ।  
सदगुर मिलें जाहिं जिमि संसय भ्रम समुदाइ ॥ 17  
बरषा गत निर्मल रितु आई । सुधि न तात सीता कै पाई ॥  
एक बार कैसेहुँ सुधि जानौं । कालहु जीति निमिष महुँ आनौं ॥  
कतहुँ रहउ जौं जीवति होई । तात जतन करि आनउँ सोई ॥  
सुग्रीवहुँ सुधि मोरि बिसारी । पावा राज कोस पुर नारी ॥  
जेहिं प्रकार मारा हौं बाली । तेहि बिधि हतौं मूढ कहँ काली ॥  
जासु कृपाँ छूटहिं मद मोहा । ता कहुँ उमा कि सपनेहुँ कोहा ॥  
जानहिं यह चरित्र मुनि ग्यानी । जिन्ह रघुबीर चरन रति मानी ॥  
लछिमन कोधवंत प्रभु जाना । धनुष चढ़ाइ गहे कर बाना ॥

दो० तब अनुजहि समुझावा रघुपति करुना सीव ।  
भय देखाइ लै आवहु तात सखा सुग्रीव ॥ 18  
इहौं पवनसुत हृदयें बिचारा । राम काजु सुग्रीवें बिसारा ॥  
निकट जाइ चरनन्हि सिरु नावा । चारिहु बिधि तेहि कहि समुझावा ॥  
सुनि सुग्रीवें परम भय माना । बिषयें मोर हरि लीन्हेउ ग्याना ॥  
अब मारुतसुत दूत समूहा । पठवहु जहँ तहँ बानर जूहा ॥  
कहहु पाख महुँ आव न जोई । मोरें कर ता कर बध होई ॥  
तब हनुमंत बोलाए दूता । सब कर करि सनमान बहूता ॥  
भय अरु प्रीति नीति देखराई । चले सकल चरनन्हि सिर नाई ॥  
एहि अवसर लछिमन पुर आए । कोध देखि जहँ तहँ कपि धाए ॥

दो० धनुष चढ़ाइ कहा तब जारि करउँ पुर छार ।  
ब्याकुल नगर देखि तब आयउ बालिकुमार ॥ 19  
चरन नाइ सिरु बिनती कीन्हीं । लछिमन अभय बौह तेहि दीन्ही ॥  
कोधवंत लछिमन सुनि काना । कह कपीस अति भयें अकुलाना ॥  
सुनु हनुमंत संग लै तारा । करि बिनती समुझाउ कुमारा ॥  
तारा सहित जाइ हनुमाना । चरन बंदि प्रभु सुजस बखाना ॥  
करि बिनती मंदिर लै आए । चरन पखारि पलंग बैठाए ॥  
तब कपीस चरनन्हि सिरु नावा । गहि भुज लछिमन कंठ लगावा ॥  
नाथ बिषय सम मद कछु नाहीं । मुनि मन मोह करइ छन माहीं ॥

सुनत बिनीत बचन सुख पावा । लछिमन तेहि बहु बिधि समुझावा ॥  
दो० हरषि चले सुग्रीव तब अंगदादि कपि साथ ।

रामानुज आर्गे करि आए जहँ रघुनाथ ॥ 20

नाइ चरन सिरु कह कर जोरी । नाथ मोहि कछु नाहिन खोरी ॥  
अतिसय प्रबल देव तव माया । छूटइ राम करहु जौँ दाया ॥  
बिषय बस्य सुर नर मुनि स्वामी । मैं पावँर पसु कपि अति कामी ॥  
नारि नयन सर जाहि न लागा । घोर कोध तम निसि जो जागा ॥  
लोभ पॉस जेहिं गर न बँधाया । सो नर तुम्ह समान रघुराया ॥  
यह गुन साधन तें नहिं हाई । तुम्हरी कृपाँ पाव कोइ कोई ॥  
तब रघुपति बोले मुसुकाई । तुम्ह प्रिय मोहि भरत जिमि भाई ॥  
अब सोइ जतनु करहु मन लाई । जेहि बिधि सीता कै सुधि पाई ॥

दो० एहि बिधि होत बतकही आए बानर जूथ ।

नाना बरन सकल दिसि देखिअ कीस बरूथ ॥ 21

बानर कटक उमा मैं देखा । सो मूरख जो करन चह लेखा ॥  
आइ राम पद नावहिं माथा । निरखि बदनु सब होहिं सनाथा ॥  
अस कपि एक न सेना माहीं । राम कुसल जेहि पूछा नाहीं ॥  
यह कछु नहिं प्रभु कइ अधिकाई । बिस्वरूप ब्यापक रघुराई ॥  
ठाढे जहँ तहँ आयसु पाई । कह सुग्रीव सबहि समुझाई ॥  
राम काजु अरु मोर निहोरा । बानर जूथ जाहु चहुँ ओरा ॥  
जनकसुता कहँ खोजहु जाई । मास दिवस महँ आएहु भाई ॥  
अवधि मेटि जो बिनु सुधि पाएँ । आवइ बनिहि सो मोहि मराएँ ॥

दो० बचन सुनत सब बानर जहँ तहँ चले तुरंत ।

तब सुग्रीवें बोलाए अगद नल हनुमंत ॥ 22

सुनहु नील अंगद हनुमाना । जामवंत मतिधीर सुजाना ॥  
सकल सुभट मिलि दच्छिन जाहू । सीता सुधि पूँछेहु सब काहू ॥  
मन कम बचन सो जतन बिचारेहु । रामचंद्र कर काजु सँवारेहु ॥  
भानु पीठि सेइअ उर आगी । स्वामिहि सर्व भाव छल त्यागी ॥  
देह धरे कर यह फलु भाई । भजिअ राम सब काम बिहाई ॥  
सोइ गुनग्य सोई बड़भागी । जो रघुबीर चरन अनुरागी ॥  
आयसु मागि चरन सिरु नाइ । चले हरषि सुमिरत रघुराई ॥  
पाछें पवन तनय सिरु नावा । जानि काज प्रभु निकट बोलावा ॥  
परसा सीस सरोरुह पानी । करमुद्रिका दीन्हि जन जानी ॥  
बहु प्रकार सीतहि समुझाएहु । कहि बल बिरह बेगि तुम्ह आएहु ॥  
हनुमत जन्म सुफल करि माना । चलेउ हृदयें धरि कृपानिधाना ॥  
जद्यपि प्रभु जानत सब बाता । राजनीति राखत सुरत्राता ॥

दो० चले सकल बन खोजत सरिता सर गिरि खोह ।

राम काज लयलीन मन बिसरा तन कर छोह ॥ 23

कतहं होइ निसिचर सैं भेटा । प्रान लेहिं एक एक चपेटा ॥  
बहु प्रकार गिरि कानन हेरहिं । कोउ मुनि मिलइ ताहि सब घेरहिं ॥  
लागि तृषा अतिसय अकुलाने । मिलइ न जल घन गहन भुलाने ॥  
मन हनुमान कीन्ह अनुमाना । मरन चहत सब बिनु जल पाना ॥  
चढ़ि गिरि सिखर चहँ दिसि देखा । भूमि बिबर एक कौतुक पेखा ॥  
चकबाक बक हंस उड़ाहीं । बहुतक खग प्रबिसहिं तेहि माहीं ॥  
गिरि ते उतरि पवनसुत आवा । सब कहँ लै सोइ बिबर देखावा ॥

आगें कै हनुमंतहि लीन्हा । पैठे बिबर बिलंबु न कीन्हा ॥  
 दो० दीख जाइ उपबन बर सर बिगसित बहु कंज ।  
 मंदिर एक रुचिर तहें बैठि नारि तप पुंज ॥ 24  
 दूरि ते ताहि सबन्हि सिरु नावा । पूछें निज बृत्तांत सुनावा ॥  
 तेहिं तब कहा करहु जल पाना । खाहु सुरस सुंदर फल नाना ॥  
 मज्जनु कीन्ह मधुर फल खाए । तासु निकट पुनि सब चलि आए ॥  
 तेहिं सब आपनि कथा सुनाई । मैं अब जाब जहाँ रघुराई ॥  
 मूदहु नयन बिबर तजि जाहू । पैहहु सीतहि जनि पछिताहू ॥  
 नयन मूदि पुनि देखहिं बीरा । ठाढ़े सकल सिंधु कें तीरा ॥  
 सो पुनि गई जहाँ रघुनाथा । जाइ कमल पद नाएसि माथा ॥  
 नाना भौंति बिनय तेहिं कीन्हीं । अनपायनी भगति प्रभु दीन्ही ॥

दो० बदरीबन कहुं सो गई प्रभु अग्या धरि सीस ।  
 उर धरि राम चरन जुग जे बंदत अज ईस ॥ 25  
 इहाँ बिचारहिं कपि मन माहीं । बीती अवधि काजु कछु नाहीं ॥  
 सब मिलि कहहिं परस्पर बाता । बिनु सुधि लएँ करब का भ्राता ॥  
 कह अंगद लोचन भरि बारी । दुहुँ प्रकार भइ मृत्यु हमारी ॥  
 इहाँ न सुधि सीता कै पाई । उहाँ गएँ मारिहि कपिराई ॥  
 पुनि पुनि अंगद कह सब पाहीं । मरन भयउ कछु संसय नाहीं ॥  
 अंगद बचन सुनत कपि बीरा । बोलि न सकहिं नयन बह नीरा ॥  
 छन एक सोच मगन होइ रहे । पुनि अस बचन कहत सब भए ॥  
 हम सीता कै सुधि लीन्हें बिना । नहिं जैहै जुबराज प्रबीना ॥  
 अस कहि लवन सिंधु तट जाई । बैठे कपि सब दर्भ डसाई ॥  
 जामवंत अंगद दुख देखी । कहीं कथा उपदेस बिसेषी ॥  
 तात राम कहुं नर जनि मानहु । निर्गुन ब्रह्म अजित अज जानहु ॥  
 हम सब सेवक अति बड़भागी । संतत सगुन ब्रह्म अनुरागी ॥

दो० निज इच्छाँ प्रभु अवतरइ सुर महि गो मुनि लागि ।  
 सगुन उपासक संत तहें रहहिं मोच्छ सब त्यागि ॥ 26  
 एहि बिधि कथा कहहिं बहु भौंती । गिरि कंदरौ सुनी संपाती ॥  
 बाहेर होइ देखि बहु कीसा । मोहि अहार दीन्ह जगदीसा ॥  
 कबहुँ न मिल भरि उदर अहारा । आजु दीन्ह बिधि एकहिं बारा ॥  
 डरपे गीध बचन सुनि काना । अब भा मरन सत्य हम जाना ॥  
 कपि सब उठे गीध कहें देखी । जामवंत मन सोच विसेषी ॥  
 कह अंगद बिचारि मन माहीं । धन्य जटायू सम कोउ नाहीं ॥  
 राम काज कारन तनु त्यागी । हरि पुर गयउ परम बड़ भागी ॥  
 सुनि खग हरष सोक जुत बानी । आवा निकट कपिन्ह भय मानी ॥  
 तिन्हहि अभय करि पूछेसि जाई । कथा सकल तिन्ह ताहि सुनाई ॥  
 सुनि संपाति बंधु कै करनी । रघुपति महिमा बहुबिधि बरनी ॥

दो० मोहि ले जाहु सिंधुतट देउं तिलांजलि ताहि ।  
 बचन सहाइ करबि मैं पैहहु खोजहु जाहि ॥ 27  
 अनुज किया करि सागर तीरा । कहि निज कथा सुनहु कपि बीरा ॥  
 हम द्वौ बंधु प्रथम तरुनाई । गगन गए रबि निकट उड़ाई ॥  
 तेज न सहि सक सो फिरि आवा । मैं अभिमानी रबि निअरावा ॥  
 जरे पंख अति तेज अपारा । परेउं भूमि करि घोर चिकारा ॥  
 मुनि एक नाम चंद्रमा ओही । लागी दया देखि करि मोही ॥

बहु प्रकार तेहिं ग्यान सुनावा । देह जनित अभिमान छड़ावा ॥  
 त्रेतो ब्रह्म मनुज तनु धरिही । तासु नारि निसिचर पति हरिही ॥  
 तासु खोज पठइहि प्रभु दूता । तिन्हहि मिलें तैं होब पुनीता ॥  
 जमिहहिं पंख करसि जनि चिंता । तिन्हहि देखाइ देहेसु तैं सीता ॥  
 मुनि कइ गिरा सत्य भइ आजू । सुनि मम बचन करहु प्रभु काजू ॥  
 गिरि त्रिकूट ऊपर बस लंका । तहें रह रावन सहज असंका ॥  
 तहें असोक उपबन जहें रहई । सीता बैठि सोच रत अहई ॥  
 दो० मैं देखउँ तुम्ह नाहि गीधहि दृष्टि अपार ।  
 बूढ़ भयउँ न त करतेउँ कछुक सहाय तुम्हार ॥ 28  
 जो नाघइ सत जोजन सागर । करइ सो राम काज मति आगर ॥  
 मोहि बिलोकि धरहु मन धीरा । राम कृपाँ कस भयउ सरीरा ॥  
 पापिउ जा कर नाम सुमिरहीं । अति अपार भवसागर तरहीं ॥  
 तासु दूत तुम्ह तजि कदराई । राम हृदयें धरि करहु उपाई ॥  
 अस कहि गरुड गीध जब गयरु । तिन्ह केँ मन अति बिसमय भयरु ॥  
 निज निज बल सब काहूँ भाषा । पार जाइ कर संसय राखा ॥  
 जरठ भयउँ अब कहइ रिछेसा । नहिं तन रहा प्रथम बल लेसा ॥  
 जबहिं त्रिबिक्रम भए खरारी । तब मैं तरुन रहेउँ बल भारी ॥  
 दो० बलि बाँधत प्रभु बाढेउ सो तनु बरनि न जाइ ।  
 उभय घरी महेँ दीन्हीं सात प्रदच्छिन धाइ ॥ 29  
 अंगद कहइ जाउँ मैं पारा । जियेँ संसय कछु फिरती बारा ॥  
 जामवंत कह तुम्ह सब लायक । पठइअ किमि सब ही कर नायक ॥  
 कहइ रीछपति सुनु हनुमाना । का चुप साधि रहेहु बलवाना ॥  
 पवन तनय बल पवन समाना । बुधि बिबेक बिग्यान निधाना ॥  
 कवन सो काज कठिन जग माहीं । जो नहिं होइ तात तुम्ह पाहीं ॥  
 राम काज लागि तव अवतारा । सुनतहिं भयउ पर्वताकारा ।  
 कनक बरन तन तेज बिराजा । मानहुँ अपर गिरिन्ह कर राजा ॥  
 सिंहनाद करि बारहिं बारा । लीलहिं नाघउँ जलनिधि खारा ॥  
 सहित सहाय रावनहि मारी । आनउँ इहाँ त्रिकूट उपारी ॥  
 जामवंत मैं पूँछउँ तोही । उचित सिखावनु दीजहु मोही ॥  
 एतना करहु तात तुम्ह जाई । सीतहि देखि कहहु सुधि आई ॥  
 तब निज भुज बल राजिवनैना । कौतुक लागि संग कपि सेना ॥  
 छ० कपि सेन संग सँघारि निसिचर रामु सीतहि आनिहैं ।  
 त्रैलोक पावन सुजसु सुर मुनि नारदादि बखानिहैं ॥  
 जो सुनत गावत कहत समुझत परम पद नर पावई ।  
 रघुबीर पद पाथोज मधुकर दास तुलसी गावई ॥  
 दो० भव भेषज रघुनाथ जसु सुनहिं जे नर अरु नारि ।  
 तिन्ह कर सकल मनोरथ सिद्ध करहिं त्रिसिरारि ॥ 30 (क)  
 सो० नीलोत्पल तन स्याम काम कोटि सोभा अधिक ।  
 सुनिअ तासु गुन ग्राम जासु नाम अघ खग बधिक ॥ 30 (ख)

— गणपतये नमः

सुन्दरकाण्ड

श्लोक

शान्तं शाश्वतमप्रमेयमनघं निर्वाणशान्तिप्रदं  
ब्रह्माशम्भुफणीन्द्रसेव्यमनिशं वेदान्तवेद्यं विभुम् ।  
रामाख्यं जगदीश्वरं सुरगुरुं मायामनुष्यं हरिं  
वन्देहं करुणाकरं रघुवरं भूपालचूडामणिम् ॥ 1  
नान्या स्पृहा रघुपते हृदयेस्मदीये  
सत्यं वदामि च भवानखिलान्तरात्मा ।  
भक्तिं प्रयच्छ रघुपुंगव निर्भरां मे  
कामादिदोषरहितं कुरु मानसं च ॥ 2  
अतुलितबलधामं हेमशैलाभदेहं  
दनुजवनकृशानुं ज्ञानिनामग्रगण्यम् ।  
सकलगुणनिधानं वानराणामधीशं  
रघुपतिप्रियभक्तं वातजातं नमामि ॥ 3

जामवंत के बचन सुहाए । सुनि हनुमंत हृदय अति भाए ॥  
तब लगि मोहि परिखेहु तुम्ह भाई । सहि दुख कंद मूल फल खाई ॥  
जब लगि आवौं सीतहि देखी । होइहि काजु मोहि हरष बिसेषी ॥  
अस कहि नाइ सबन्हि कहूँ माथा । चलेउ हरषि हियँ धरि रघुनाथा ॥  
सिंधु तीर एक भूधर सुंदर । कौतुक कूदि चढ़ेउ ता ऊपर ॥  
बार बार रघुबीर सँभारी । तरकेउ पवनतनय बल भारी ॥  
जिमि अमोघ रघुपति कर बाना । एही भौंति चलेउ हनुमाना ॥  
जलनिधि रघुपति दूत बिचारी । तैं मैनाक होहि श्रमहारी ॥  
दो० हनुमान तेहि परसा कर पुनि कीन्ह प्रनाम ।

राम काजु कीन्हें बिनु मोहि कहौं विश्राम ॥ 1  
जात पवनसुत देवन्ह देखा । जानैँ कहूँ बल बुद्धि बिसेषा ॥  
सुरसा नाम अहिन्ह कै माता । पठइन्हि आइ कही तेहिं बाता ॥  
आजु सुरन्ह मोहि दीन्ह अहारा । सुनत बचन कह पवनकुमारा ॥  
राम काजु करि फिरि मैं आवौं । सीता कइ सुधि प्रभुहि सुनावौं ॥  
तब तव बदन पैठिहउँ आइ । सत्य कहउँ मोहि जान दे माई ॥  
कवनेहुँ जतन देह नहिं जाना । ग्रससि न मोहि कहेउ हनुमाना ॥  
जोजन भरि तेहिं बदनु पसारा । कपि तनु कीन्ह दुगुन बिस्तारा ॥  
सोरह जोजन मुख तेहिं ठयऊ । तुरत पवनसुत बतिस भयऊ ॥  
जस जस सुरसा बदनु बढ़ावा । तासु दून कपि रूप देखावा ॥  
सत जोजन तेहिं आनन कीन्हा । अति लघु रूप पवनसुत लीन्हा ॥

बदन पड़िठि पुनि बाहेर आवा । मागा बिदा ताहि सिरु नावा ॥  
 मोहि सुरन्ह जेहि लागि पठावा । बुधि बल मरमु तोर मैं पावा ॥  
 दो० राम काजु सबु करिहहु तुम्ह बल बुद्धि निधान ।  
 आसिष देइ गई सो हरषि चलेउ हनुमान ॥ 2  
 निसिचरि एक सिंधु महुँ रहई । करि माया नभु के खग गहई ॥  
 जीव जंतु जे गगन उड़ाहीं । जल बिलोकि तिन्ह कै परिछाहीं ॥  
 गहइ छाहँ सक सो न उड़ाई । एहि बिधि सदा गगनचर खाई ॥  
 सोइ छल हनुमान कहँ कीन्हा । तासु कपटु कपि तुरतहिं चीन्हा ॥  
 ताहि मारि मारुतसुत बीरा । बारिधि पार गयउ मतिधीरा ॥  
 तहाँ जाइ देखी बन सोभा । गुंजत चंचरीक मधु लोभा ॥  
 नाना तरु फल फूल सुहाए । खग मृग बृंद देखि मन भाए ॥  
 सैल बिसाल देखि एक आगें । ता पर धाइ चढ़ेउ भय त्यागें ॥  
 उमा न कछु कपि कै अधिकाई । प्रभु प्रताप जो कालहि खाई ॥  
 गिरि पर चढ़ि लंका तेहिं देखी । कहि न जाइ अति दुर्ग बिसेषी ॥  
 छं० कनक कोट बिचित्र मनि कृत सुंदरायतना घना ।  
 चउहट्ट हट्ट सुबट्ट बीथीं चारु पुर बहु बिधि बना ॥  
 गज बाजि खच्चर निकर पदचर रथ बरुथन्हि को गनै ।  
 बहुरूप निसिचर जूथ अतिबल सेन बरनत नहिं बनै ॥ 1  
 बन बाग उपबन बाटिका सर कूप बापीं सोहहीं ।  
 नर नाग सुर गंधर्ब कन्या रूप मुनि मन मोहहीं ॥  
 कहँ माल देह बिसाल सैल समान अतिबल गर्जहीं ।  
 नाना अखारेन्ह भिरहिं बहु बिधि एक एकन्ह तर्जहीं ॥ 2  
 करि जतन भट कोटिन्ह बिकट तन नगर चहुँ दिसि रच्छहीं ।  
 कहं महिष मानुष धेनु खर अज खल निसाचर भच्छहीं ॥  
 एहि लागि तुलसीदास इन्ह की कथा कछु एक है कही ।  
 रघुबीर सर तीरथ सरीरन्हि त्यागि गति पैहहिं सही ॥ 3  
 दो० पुर रखवारे देखि बहु कपि मन कीन्ह बिचार ।  
 अति लघु रूप धरौं निसि नगर करौं पइसार ॥ 3  
 मसक समान रूप कपि धरी । लंकहि चलेउ सुमिरि नरहरी ॥  
 नाम लंकिनी एक निसिचरी । सो कह चलेसि मोहि निंदरी ॥  
 जानेहि नहीं मरमु सठ मोरा । मोर अहार जहाँ लागि चोरा ॥  
 मुठिका एक महा कपि हनी । रुधिर बमत धरनीं ढनमनी ॥  
 पुनि संभारि उठी सो लंका । जोरि पानि कर बिनय ससंका ॥  
 जब रावनहि ब्रह्म बर दीन्हा । चलत बिरंचि कहा मोहि चीन्हा ॥  
 बिकल होसि तैं कपि के मारे । तब जानेसु निसिचर संघारे ॥  
 तात मोर अति पुन्य बहूता । देखेउँ नयन राम कर दूता ॥  
 दो० तात स्वर्ग अपबर्ग सुख धरिअ तुला एक अंग ।  
 तूल न ताहि सकल मिलि जो सुख लव सतसंग ॥ 4  
 पबिसि नगर कीजे सब काजा । हृदयें राखि कोसलपुर राजा ॥  
 गरल सुधा रिपु करहिं मिताई । गोपद सिंधु अनल सितलाई ॥  
 गरुड़ सुमेरु रेनु सम ताही । राम कृपा करि चितवा जाही ॥  
 अति लघु रूप धरेउ हनुमाना । पैठा नगर सुमिरि भगवाना ॥  
 मंदिर मंदिर प्रति करि सोधा । देखे जहँ तहँ अगनित जोधा ॥  
 गयउ दसानन मंदिर माहीं । अति बिचित्र कहि जात सो नाहीं ॥

सयन किएँ देखा कपि तेही । मंदिर महुँ न दीखि बैदेही ॥  
भवन एक पुनि दीख सुहावा । हरि मंदिर तहँ भिन्न बनावा ॥

दो0 रामायुध अंकित गृह सोभा बरनि न जाइ ।

नव तुलसिका बृंद तहँ देखि हरष कपिराइ ॥ 5  
लंका निसिचर निकर निवासा । इहाँ कहाँ सज्जन कर बासा ॥  
मन महुँ तरक करैँ कपि लागा । तेहीं समय बिभीषनु जागा ॥  
राम राम तेहिं सुमिरन कीन्हा । हृदयँ हरष कपि सज्जन चीन्हा ॥  
एहि सन हठि करिहउँ पहिचानी । साधु ते होइ न कारज हानी ॥  
विप्र रूप धरि बचन सुनाए । सुनत बिभीषन उठि तहँ आए ॥  
करि प्रनाम पूँछी कुसलाई । विप्र कहहु निज कथा बुझाई ॥  
की तुम्ह हरि दासन्ह महेँ कोई । मोरैँ हृदय प्रीति अति होई ॥  
की तुम्ह रामु दीन अनुरागी । आयहु मोहि करन बड़भागी ॥

दो0 तब हनुमंत कही सब राम कथा निज नाम ।

सुनत जुगल तन पुलक मन मगन सुमिरि गुन ग्राम ॥ 6  
सुनहु पवनसुत रहनि हमारी । जिमि दसनन्हि महुँ जीभ बिचारी ॥  
तात कबहुँ मोहि जानि अनाथा । करिहहिं कृपा भानुकुल नाथा ॥  
तामस तनु कछु साधन नाही । प्रीति न पद सरोज मन माहीं ॥  
अब मोहि भा भरोस हनुमंता । बिनु हरिकृपा मिलहिं नहिं संता ॥  
जौँ रघुबीर अनुग्रह कीन्हा । तौ तुम्ह मोहि दरसु हठि दीन्हा ॥  
सुनहु बिभीषन प्रभु कै रीती । करहिं सदा सेवक पर प्रीती ॥  
कहहु कवन मैँ परम कुलीना । कपि चंचल सबहीं बिधि हीना ॥  
प्रात लेइ जो नाम हमारा । तेहि दिन ताहि न मिलै अहारा ॥

दो0 अस मैँ अधम सखा सुनु मोहू पर रघुबीर ।

कीन्हीं कृपा सुमिरि गुन भरे बिलोचन नीर ॥ 7  
जानतहुँ अस स्वामि बिसारी । फिरहिं ते काहे न होहिं दुखारी ॥  
एहि बिधि कहत राम गुन ग्रामा । पावा अनिर्बाचय बिश्रामा ॥  
पुनि सब कथा बिभीषन कही । जेहि बिधि जनकसुता तहँ रही ॥  
तब हनुमंत कहा सुनु भ्राता । देखी चहउँ जानकी माता ॥  
जुगुति बिभीषन सकल सुनाई । चलेउ पवनसुत बिदा कराई ॥  
करि सोइ रूप गयउ पुनि तहवाँ । बन असोक सीता रह जहवाँ ॥  
देखि मनहि महुँ कीन्हा प्रनामा । बैठेहिं बीति जात निसि जामा ॥  
कृस तनु सीस जटा एक बेनी । जपति हृदयँ रघुपति गुन श्रेनी ॥

दो0 निज पद नयन दिएँ मन राम पद कमल लीन ।

परम दुखी भा पवनसुत देखि जानकी दीन ॥ 8  
तरु पल्लव महुँ रहा लुकाई । करइ बिचार करौँ का भाई ॥  
तेहि अवसर रावनु तहँ आवा । संग नारि बहु किएँ बनावा ॥  
कह रावनु सुनु सुमुखि सयानी । मंदोदरी आदि सब रानी ॥  
तव अनुचरीं करउँ पन मोरा । एक बार बिलोकु मम ओरा ॥  
तून धरि ओट कहति बैदेही । सुमिरि अवधपति परम सनेही ॥  
सुनु दसमुख खद्योत प्रकासा । कबहुँ कि नलिनी करइ बिकासा ॥  
अस मन समुझ कहति जानकी । खल सुधि नहिं रघुबीर बान की ॥  
सठ सूनें हरि आनेहि मोही । अधम निलज्ज लाज नहिं तोही ॥

दो0 आपुहि सुनि खद्योत सम रामहि भानु समान ।

परुष बचन सुनि काढि असि बोला अति खिसिआन ॥ 9  
सीता तैं मम कृत अपमाना । कटिहउँ तव सिर कठिन कृपाना ॥  
स्याम सरोज दाम सम सुंदर । प्रभु भुज करि कर सम दसकंधर ॥  
सो भुज कंठ कि तव असि घोरा । सुनु सठ अस प्रवान पन मोरा ॥  
चंद्रहास हरु मम परितापं । रघुपति बिरह अनल संजातं ॥  
सीतल निसित बहसि बर धारा । कह सीता हरु मम दुख भारा ॥  
सुनत बचन पुनि मारन धावा । मयतनयाँ कहि नीति बुझावा ॥  
कहेसि सकल निसिचरिन्ह बोलाई । सीतहि बहु बिधि त्रासहु जाई ॥  
मास दिवस महुँ कहा न माना । तौ मैं मारबि काढि कृपाना ॥

दो0 भवन गयउ दसकंधर इहों पिसाचिनि बृंद ।

सीतहि त्रास देखावहिं धरहिं रूप बहु मंद ॥ 10

त्रिजटा नाम राच्छसी एका । राम चरन रति निपुन बिबेका ॥  
सबन्हौ बोलि सुनाएसि सपना । सीतहि सेइ करहु हित अपना ॥  
सपनें बानर लंका जारी । जातुधान सेना सब मारी ॥  
खर आरुढ नगन दससीसा । मुंडित सिर खंडित भुज बीसा ॥  
एहि बिधि सो दच्छिन दिसि जाई । लंका मनहुँ बिभीषन पाई ॥  
नगर फिरी रघुबीर दोहाई । तब प्रभु सीता बोलि पठाई ॥  
यह सपना मैं कहउँ पुकारी । होइहि सत्य गएँ दिन चारी ॥  
तासु बचन सुनि ते सब डरीं । जनकसुता के चरनन्हि परीं ॥

दो0 जहँ तहँ गई सकल तब सीता कर मन सोच ।

मास दिवस बीतें मोहि मारिहि निसिचर पोच ॥ 11

त्रिजटा सन बोलीं कर जोरी । मातु बिपति संगिनि तैं मोरी ॥  
तजौं देह करु बेगि उपाई । दुसह बिरहु अब नहिं सहि जाई ॥  
आनि काठ रचु चिता बनाई । मातु अनल पुनि देहि लगाई ॥  
सत्य करहि मम प्रीति सयानी । सुनै को श्रवन सूल सम बानी ॥  
सुनत बचन पद गहि समुझाएसि । प्रभु प्रताप बल सुजसु सुनाएसि ॥  
निसि न अनल मिल सुनु सुकुमारी । अस कहि सो निज भवन सिधारी ॥  
कह सीता बिधि भा प्रतिकूला । मिलिहि न पावक भिटिहि न सूला ॥  
देखिअत प्रगट गगन अंगारा । अवनि न आवत एकउ तारा ॥  
पावकमय ससि ०वत न आगी । मानहुँ मोहि जानि हत भागी ॥  
सुनहि बिनय मम बिटप असोका । सत्य नाम करु हरु मम सोका ॥  
नूतन किसलय अनल समाना । देहि अगिनि जनि करहि निदाना ॥  
देखि परम बिरहाकुल सीता । सो छन कपिहि कलप सम बीता ॥

सो0 कपि करि हृदयें बिचार दीन्हि मुद्रिका डारि तब ।

जनु असोक अंगार दीन्ह हरषि उठि कर गहेउ ॥ 12

तब देखी मुद्रिका मनोहर । राम नाम अंकित अति सुंदर ॥  
चकित चितव मुदरी पहिचानी । हरष बिषाद हृदयें अकुलानी ॥  
जीति को सकइ अजय रघुराई । माया तैं असि रचि नहिं जाई ॥  
सीता मन बिचार कर नाना । मधुर बचन बोलेउ हनुमाना ॥  
रामचंद्र गुन बरनैं लागा । सुनतहिं सीता कर दुख भागा ॥  
लागीं सुनैं श्रवन मन लाई । आदिहु तैं सब कथा सुनाई ॥  
श्रवनामृत जेहिं कथा सुहाई । कही सो प्रगट होति किन भाई ॥  
तब हनुमंत निकट चलि गयऊ । फिरि बैठीं मन बिसमय भयऊ ॥

राम दूत मैं मातु जानकी । सत्य सपथ करुनानिधान की ॥  
 यह मुद्रिका मातु मैं आनी । दीन्हि राम तुम्ह कहँ सहिदानी ॥  
 दो० कपि के बचन सप्रेम सुनि उपजा मन बिस्वास ।  
 जाना मन कम बचन यह कृपासिंधु कर दास ॥ 13  
 हरिजन जानि प्रीति अति गाढी । सजल नयन पुलकावलि बाढी ॥  
 बूड़त बिरह जलधि हनुमाना । भयहु तात मो कहँ जलजाना ॥  
 अब कहु कुसल जाउँ बलिहारी । अनुज सहित सुख भवन खरारो ॥  
 कोमलचित कृपाल रघुराई । कपि केहि हेतु धरी निटुराई ॥  
 सहज बानि सेवक सुख दायक । कबहुँक सुरति करत रघुनायक ।  
 कबहुँ नयन मम सीतल ताता । होइहहिं निरखि स्याम मृदु गाता ॥  
 बचनु न आव नयन भरे बारी । अहह नाथ हौं निपट बिसारी ॥  
 देखि परम बिरहाकुल सीता । बोला कपि मृदु बचन बिनीता ॥  
 मातु कुसल प्रभु अनुज समेता । तव दुख दुखी सुकृपा निकेता ॥  
 जानि जननी मानहु जियेँ ऊना । तुम्ह ते प्रेमु राम के दूना ॥

दो० रघुपति कर संदेसु अब सुनु जननी धरि धीर ।  
 अस कहि कपि गदगद भयउ भरे बिलोचन नीर ॥ 14  
 कहेउ राम बियोग तव सीता । मो कहँ सकल भए बिपरीता ॥  
 नव तरु किसलय मनहुँ कृसानू । काल निसा सम निसि ससि भानू ॥  
 कुबलय बिपिन कुंत बन सरिसा । बारिद तपत तेल जनु बरिसा ॥  
 जे हित रहे करत तेइ पीरा । उरग स्वास सम त्रिबिध समीरा ॥  
 कहेहु तें कछु दुख घटि होई । काहि कहौ यह जान न कोई ॥  
 तत्व प्रेम कर मम अरु तोरा । जानत प्रिया एकु मनु मोरा ॥  
 सो मनु सदा रहत तोहि पाहीं । जानु प्रीति रसु एतनेहि माहीं ॥  
 प्रभु संदेसु सुनत बैदेही । मगन प्रेम तन सुधि नहिं तेही ॥  
 कह कपि हृदयें धीर धरु माता । सुमिरु राम सेवक सुखदाता ॥  
 उर आनहु रघुपति प्रभुताई । सुनि मम बचन तजहु कदराई ॥

दो० निसिचर निकर पतंग सम रघुपति बान कृसानु ।  
 जननी हृदयें धीर धरु जरे निसाचर जानु ॥ 15  
 जाँ रघुबीर होति सुधि पाई । करते नहिं बिलंबु रघुराई ॥  
 अबहिं मातु मैं जाउँ लवाई । प्रभु आयसु नहिं राम दोहाई ॥  
 कछुक दिवस जननी धरु धीरा । कपिन्ह सहित अइहहिं रघुबीरा ॥  
 निसिचर मारि तोहि लै जैहहिं । तिहुँ पुर नारदादि जसु गैहहिं ॥  
 हैं सुत कपि सब तुम्हहिं समाना । जातुधान अति भट बलवाना ॥  
 मोरें हृदय परम संदेहा । सुनि कपि प्रगट कीन्हि निज देहा ॥  
 कनक भूधराकार सरीरा । समर भयंकर अतिबल बीरा ॥  
 सीता मन भरोस तब भयऊ । पुनि लघु रूप पवनसुत लयऊ ॥

दो० सुनु माता साखामृग नहिं बल बुद्धि बिसाल ।  
 प्रभु प्रताप तें गरुडहि खाइ परम लघु ब्याल ॥ 16  
 मन संतोष सुनत कपि बानी । भगति प्रताप तेज बल सानी ॥  
 आसिष दीन्हि रामप्रिय जाना । होहु तात बल सील निधाना ॥  
 अजर अमर गुननिधि सुत होहू । करहुँ बहुत रघुनायक छोहू ॥  
 करहुँ कृपा प्रभु अस सुनि काना । निर्भर प्रेम मगन हनुमाना ॥  
 बार बार नाएसि पद सीसा । बोला बचन जोरि कर कीसा ॥  
 सुनहु मातु मोहि अतिसय भूखा । लागि देखि सुंदर फल रूखा ॥

सुनु सुत करहिं बिपिन रखवारी । परम सुभट रजनीचर भारी ॥  
 तिन्ह कर भय माता मोहि नाही । जौं तुम्ह सुख मानहु मन माहीं ॥  
 दो० देखि बुद्धि बल निपुन कपि कहेउ जानकी जाहु ।  
 रघुपति चरन हृदयें धरि तात मधुर फल खाहु ॥ 17  
 चलेउ नाइ सिरु पैठेउ बागा । फल खाएसि तरु तोरें लागा ॥  
 रहे तहाँ बहु भट रखवारे । कछु मारेसि कछु जाइ पुकारे ॥  
 नाथ एक आवा कपि भारी । तेहिं असोक बाटिका उजारी ॥  
 खाएसि फल अरु बिटप उपारे । रच्छक मर्दि मर्दि महि डारे ॥  
 सुनि रावन पठए भट नाना । तिन्हहि देखि गर्जेउ हनुमाना ॥  
 सब रजनीचर कपि संघारे । गए पुकारत कछु अधमारे ॥  
 पुनि पठयउ तेहिं अच्छकुमारा । चला संग लै सुभट अपारा ॥  
 आवत देखि बिटप गहि तर्जा । ताहि निपाति महाधुनि गर्जा ॥  
 दो० कछु मारेसि कछु मर्देसि कछु मिलएसि धरि धूरि ।  
 कछु पुनि जाइ पुकारे प्रभु मर्कट बल भूरि ॥ 18  
 सुनि सुत बध लंकेस रिसाना । पठएसि मेघनाद बलवाना ॥  
 मारसि जनि सुत बाँधेसु ताही । देखिअ कपिहि कहौं कर आही ॥  
 चला इंद्रजित अतुलित जोधा । बंधु निधन सुनि उपजा कोधा ॥  
 कपि देखा दारुन भट आवा । कटकटाइ गर्जा अरु धावा ॥  
 रहे महाभट ताके संगी । गहि गहि कपि मर्दइ निज अंगा ॥  
 तिन्हहि निपाति ताहि सन बाजा । भिरे जुगल मानहुँ गजराजा ॥  
 मुठिका मारि चढा तरु जाई । ताहि एक छन मुरुछा आई ॥  
 उठि बहोरि कीन्हिस बहु माया । जीति न जाइ प्रभंजन जाया ॥  
 दो० ब्रह्म अस्त्र तेहिं सौंघा कपि मन कीन्ह बिचार ।  
 जौं न ब्रह्मसर मानउँ महिमा मिटइ अपार ॥ 19  
 ब्रह्मबान कपि कहूँ तेहिं मारा । परतिहुँ बार कटक संघारा ॥  
 तेहिं देखा कपि मुरुछित भयऊ । नागपास बाँधेसि लै गयऊ ॥  
 जासु नाम जपि सुनहु भवानी । भव बंधन काटहिं नर ग्यानी ॥  
 तासु दूत कि बंध तरु आवा । प्रभु कारज लागि कपिहिं बँधावा ॥  
 कपि बंधन सुनि निसिचर धाए । कौतुक लागि सभौं सब आए ॥  
 दसमुख सभा दीखि कपि जाई । कहि न जाइ कछु अति प्रभुताई ॥  
 कर जोरें सुर दिसिप बिनीता । भृकुटि बिलोकत सकल सभिता ॥  
 देखि प्रताप न कपि मन संका । जिमि अहिगन महुँ गरुड़ असंका ॥  
 दो० कपिहि बिलोकि दसानन बिहसा कहि दुर्बाद ।  
 सुत बध सुरति कीन्हि पुनि उपजा हृदयें बिषाद ॥ 20  
 कह लंकेस कवन तैं कीसा । केहि कें बल घालेहि बन खीसा ॥  
 मारे निसिचर केहिं अपराधा । कहु सठ तोहि न प्रान कइ बाधा ॥  
 सुनु रावन ब्रह्मांड निकाया । पाइ जासु बल बिरचति माया ॥  
 जाके बल बिरचि हरि ईसा । पालत सृजत हरत दससीसा ॥  
 जा बल सीस धरत सहसानन । अंडकोस समेत गिरि कानन ॥  
 धरइ जो बिबिध देह सुरत्राता । तुम्ह से सठन्ह सिखावनु दाता ॥  
 हर कोदंड कठिन जेहिं भंजा । तेहि समेत नृप दल मद गंजा ॥  
 खर दूषन त्रिसिरा अरु बाली । बधे सकल अतुलित बलसाली ॥  
 दो० जाके बल लवलेस तैं जितेहु चराचर झारि ।  
 तासु दूत मैं जा करि हरि आनेहु प्रिय नारि ॥ 21

जानउँ मैं तुम्हारि प्रभुताई । सहसबाहु सन परी लराई ॥  
 समर बालि सन करि जसु पावा । सुनि कपि बचन बिहसि बिहरावा ॥  
 खायउँ फल प्रभु लागी भूखा । कपि सुभाव तें तोरेउँ रूखा ॥  
 सब कें देह परम प्रिय स्वामी । मारहिं मोहि कुमारग गामी ॥  
 जिन्ह मोहि मारा ते मैं मारे । तेहि पर बाँधेउँ तनयें तुम्हारे ॥  
 मोहि न कछु बाँधे कइ लाजा । कीन्ह चहउँ निज प्रभु कर काजा ॥  
 बिनती करउँ जोरि कर रावन । सुनहु मान तजि मोर सिखावन ॥  
 देखहु तुम्ह निज कुलहिं बिचारी । भ्रम तजि भजहु भगत भय हारी ॥  
 जाकें डर अति काल डेराई । जो सुर असुर चराचर खाई ॥  
 तासों बयरु कबहुँ नहिं कीजै । मोरे कहें जानकी दीजै ॥

दो० प्रनतपाल रघुनायक करुना सिंधु खरारि ।

गएँ सरन प्रभु राखिहैं तव अपराध बिसारि ॥ 22

राम चरन पंकज उर धरहू । लंका अचल राजु तुम्ह करहू ॥  
 रिषि पुलस्ति जसु बिमल मयंका । तेहि ससि महुँ जनि होहु कलंका ॥  
 राम नाम बिनु गिरा न सोहा । देखु बिचारि त्यागि मद मोहा ॥  
 बसन हीन नहिं सोह सुरारी । सब भूषन भूषित बर नारी ॥  
 राम बिमुख संपति प्रभुताई । जाइ रही पाई बिनु पाई ॥  
 सजल मूल जिन्ह सरितन्ह नाहीं । बरषि गएँ पुनि तबहिं सुखाहीं ॥  
 सुनु दसकंठ कहउँ पन रोपी । बिमुख राम त्राता नहिं कोपी ॥  
 संकर सहस बिष्नु अज तोही । सकहिं न राखि राम कर द्रोही ॥

दो० मोहमूल बहु सूल प्रद त्यागहु तम अभिमान ।

भजहु राम रघुनायक कृपा सिंधु भगवान ॥ 23

जदपि कही कपि अति हित बानी । भगति बिबेक बिरति नय सानी ॥  
 बोला बिहसि महा अभिमानी । मिला हमहि कपि गुर बड़ ग्यानी ॥  
 मृत्यु निकट आई खल तोही । लागेसि अधम सिखावन मोही ॥  
 उलटा होइहि कह हनुमाना । मतिभ्रम तोर प्रगट मैं जाना ॥  
 सुनि कपि बचन बहुत खिसिआना । बेगि न हरहु मूढ कर प्राणा ॥  
 सुनत निसाचर मारन धाए । सचिवन्ह सहित बिभीषनु आए ॥  
 नाइ सीस करि बिनय बहूता । नीति बिरोध न मारिअ दूता ॥  
 सुनत बिहसि बोला दंसकंधर । अंग भंग करि पठइअ बंदर ॥

दो० कपि कें ममता पूँछ पर सबहि कहउँ समुझाइ ।

तेल बोरि पट बाँधि पुनि पावक देहु लगाइ ॥ 24

पूँछहीन बानर तहें जाइहि । तब सठ निज नाथहि लइ आइहि ॥  
 जिन्ह कै कीन्हिसि बहुत बड़ाई । देखउँ मैं तिन्ह कै प्रभुताई ॥  
 बचन सुनत कपि मन मुसुकाना । भइ सहाय सारद मैं जाना ॥  
 जातुधान सुनि रावन बचना । लागे रचैं मूढ सोइ रचना ॥  
 रहा न नगर बसन घृत तेला । बाढ़ी पूँछ कीन्ह कपि खेला ॥  
 कौतुक कहें आए पुरबासी । मारहिं चरन करहिं बहु हॉसी ॥  
 बाजहिं ढोल देहिं सब तारी । नगर फेरि पुनि पूँछ प्रजारी ॥  
 निबुक चढेउ कपि कनक अटारी । भई सभैत निसाचर नारी ॥

दो० हरि प्रेरित तेहि अवसर चले मरुत उनचास ।

अट्टहास करि गर्जा कपि बढि लाग अकास ॥ 25

देह बिसाल परम हरुआई । मंदिर तें मंदिर चढ़ धाई ॥  
 जरइ नगर भा लोग बिहाला । झपट लपट बहु कोटि कराला ॥

तात मातु हा सुनिअ पुकारा । एहिं अवसर को हमहि उबारा ॥  
हम जो कहा यह कपि नहिं होई । बानर रूप धरें सुर कोई ॥  
साधु अवग्या कर फलु ऐसा । जरइ नगर अनाथ कर जैसा ॥  
जारा नगरु निमिष एक माहीं । एक बिभीषन कर गृह नाहीं ॥  
ता कर दूत अनल जेहिं सिरिजा । जरा न सो तेहि कारन गिरिजा ॥  
उलटि पलटि लंका सब जारी । कूदि परा पुनि सिंधु मझारी ॥

दो० पूँछ बुझाइ खोइ श्रम धरि लघु यप बहोरि ।

जनकसुता के आगें ठाढ़ भयउ कर जोरि ॥ 26

मातु मोहि दीजे कछु चीन्हा । जैसैं रघुनायक मोहि दीन्हा ॥  
चूड़ामनि उतारि तब दयऊ । हरष समेत पवनसुत लयऊ ॥  
कहेहु तात अस मोर प्रनामा । सब प्रकार प्रभु पूरनकामा ॥  
दीन दयाल बिरिदु संभारी । हरहु नाथ मम संकट भारी ॥  
तात सकसुत कथा सुनाएहु । बान प्रताप प्रभुहि समुझाएहु ॥  
मास दिवस महुं नाथु न आवा । तौ पुनि मोहि जिअत नहिं पावा ॥  
कहु कपि केहि बिधि राखौं प्राणा । तुम्हहू तात कहत अब जाना ॥  
तोहिं देखि सीतलि भइ छाती । पुनि मो कहुं सोइ दिनु सो राती ॥

दो० जनकसुतहि समुझाइ करि बहु बिधि धीरजु दीन्ह ।

चरन कमल सिरु नाइ कपि गवनु राम पहिं कीन्ह ॥ 27

चलत महाधुनि गर्जेसि भारी । गर्भ ऽवहिं सुनि निसिचर नारी ॥  
नाधि सिंधु एहि पारहि आवा । सबद किलिकिला कपिन्ह सुनावा ॥  
हरषे सब बिलोकि हनुमाना । नूतन जन्म कपिन्ह तब जाना ॥  
मुख प्रसन्न तन तेज बिराजा । कीन्हेसि रामचंद्र कर काजा ॥  
मिले सकल अति भए सुखारी । तलफत मीन पाव जिमि बारी ॥  
चले हरषि रघुनायक पासा । पूँछत कहत नवल इतिहासा ॥  
तब मधुबन भीतर सब आए । अंगद संमत मधु फल खाए ॥  
रखवारे जब बरजन लागे । मुष्टि प्रहार हनत सब भागे ॥

दो० जाइ पुकारे ते सब बन उजार जुबराज ।

सुनि सुग्रीव हरष कपि करि आए प्रभु काज ॥ 28

जौं न होति सीता सुधि पाई । मधुबन के फल सकहिं कि खाई ॥  
एहि बिधि मन बिचार कर राजा । आइ गए कपि सहित समाजा ॥  
आइ सबन्हि नावा पद सीसा । मिलेउ सबन्हि अति प्रेम कपीसा ॥  
पूँछी कुसल कुसल पद देखी । राम कृपों भा काजु बिसेषी ॥  
नाथ काजु कीन्हेउ हनुमाना । राखे सकल कपिन्ह के प्राणा ॥  
सुनि सुग्रीव बहुरि तेहि मिलेऊ । कपिन्ह सहित रघुपति पहिं चलेऊ ॥  
राम कपिन्ह जब आवत देखा । किऐं काजु मन हरष बिसेषा ॥  
फटिक सिला बैठे द्वौ भाई । परे सकल कपि चरनन्हि जाई ॥

दो० प्रीति सहित सब भेंटे रघुपति करुना पुंज ।

पूँछी कुसल नाथ अब कुसल देखि पद कंज ॥ 29

जामवंत कह सुनु रघुराया । जा पर नाथ करहु तुम्ह दाया ॥  
ताहि सदा सुभ कुसल निरंतर । सुर नर मुनि प्रसन्न ता ऊपर ॥  
सोइ बिजई बिनई गुन सागर । तासु सुजसु त्रैलोक उजागर ॥  
प्रभु कीं कृपा भयउ सबु काजू । जन्म हमार सुफल भा आजू ॥  
नाथ पवनसुत कीन्हि जो करनी । सहसहुं मुख न जाइ सो बरनी ॥

पवनतनय के चरित सुहाए । जामवंत रघुपतिहि सुनाए ॥  
 सुनत कृपानिधि मन अति भाए । पुनि हनुमान हरषि हिये लाए ॥  
 कहहु तात केहि भौंति जानकी । रहति करति रच्छा स्वप्राण की ॥  
 दो० नाम पाहरू दिवस निसि ध्यान तुम्हार कपाट ।  
 लोचन निज पद जंत्रित जाहिं प्राण केहिं बाट ॥ 30  
 चलत मोहि चूड़ामनि दीन्ही । रघुपति हृदये लाइ सोइ लीन्ही ॥  
 नाथ जुगल लोचन भरि बारी । बचन कहे कछु जनककुमारी ॥  
 अनुज समेत गहेहु प्रभु चरना । दीन बंधु प्रनतारति हरना ॥  
 मन कम बचन चरन अनुरागी । केहिं अपराध नाथ हौं त्यागी ॥  
 अवगुन एक मोर मैं माना । बिछुरत प्राण न कीन्ह पयाना ॥  
 नाथ सा नयनन्हि को अपराधा । निसरत प्राण करहिं हठि बाधा ॥  
 बिरह अग्निनि तनु तूल समीरा । स्वास जरइ छन माहिं सरीरा ॥  
 नयन ओवहिं जलु निज हित लागी । जरैं न पाव देह बिरहागी ॥  
 दो० निमिष निमिष करुनानिधि जाहिं कलप सम बीति ।  
 बेगि चलिअ प्रभु आनिअ भुज बल खल दल जीति ॥ 31  
 सुनि सीता दुख प्रभु सुख अयना । भरि आए जल राजिव नयना ॥  
 बचन कार्ये मन मम गति जाही । सपनेहुँ बूझिअ बिपति कि ताही ॥  
 कह हनुमंत बिपति प्रभु सोई । जब तव सुमिरन भजइ न होई ॥  
 केतिक बात प्रभु जातुधान की । रिपुहि जीति आनिबी जानकी ॥  
 सुनु कपि तोहि समान उपकारी । नहिं कोउ सुर नर मुनि तनुधारी ॥  
 प्रति उपकार करौं का तोरा । सनमुख होइ न सकत मन मोरा ॥  
 सुनु सुत तोहि उरिन मैं नाहीं । देखेउँ करि बिचार मन माहीं ॥  
 पुनि पुनि कपिहि चितव सुरत्राता । लोचन नीर पुलक अति गाता ॥  
 दो० सुनि प्रभु बचन बिलोकि मुख गात हरषि हनुमंत ।  
 चरन परेउ प्रेमाकुल त्राहि त्राहि भगवंत ॥ 32  
 बार बार प्रभु चहइ उठावा । प्रेम मगन तेहि उठब न भावा ॥  
 प्रभु कर पंकज कपि केँ सीसा । सुभिरि सो दसा मगन गौरीसा ॥  
 सावधान मन करि पुनि संकर । लागे कहन कथा अति सुंदर ॥  
 कपि उठाइ प्रभु हृदये लगावा । कर गहि परम निकट बैठावा ॥  
 कहु कपि रावन पालित लंका । केहि बिधि दहेउ दुर्ग अति बंका ॥  
 प्रभु प्रसन्न जाना हनुमाना । बोला बचन बिगत अभिमाना ॥  
 साखामृग कै बड़ि मनुसाई । साखा तें साखा पर जाई ॥  
 नाधि सिंधु हाटकपुर जारा । निसिचर गन बधि बिपिन उजारा ॥  
 दो० ता कहुँ प्रभु कछु अगम नहिं जा पर तुम्ह अनुकूल ।  
 तव प्रभावेँ बड़वानलहि जारि सकइ खलु तूल ॥ 33  
 नाथ भगति अति सुखदायिनी । देहु कृपा करि अनपायनी ॥  
 सुनि प्रभु परम सरल कपि बानी । एवमस्तु तब कहेउ भवानी ॥  
 उमा राम सुभाउ जेहिं जाना । ताहि भजनु तजि भाव न आना ॥  
 यह संबाद जासु उर आवा । रघुपति चरन भगति सोइ पावा ॥  
 सुनि प्रभु बचन कहहिं कपिबुंदा । जय जय जय कृपाल सुखकंदा ॥  
 तब रघुपति कपिपतिहि बोलावा । कहा चलैं कर करहु बनावा ॥  
 अब बिलंबु केहि कारन कीजै । तुरत कपिन्ह कहुँ आयसु दीजे ॥  
 कौतुक देखि सुमन बहु बरषी । नभ तें भवन चले सुर हरषी ॥

दो० कपिपति बेगि बोलाए आए जूथप जूथ ।

नाना बरन अतुल बल बानर भालु बरूथ ॥ 34

प्रभु पद पंकज नावहिं सीसा । गर्जहिं भालु महाबल कीसा ॥  
देखी राम सकल कपि सेना । चितइ कृपा करि राजिव नैना ॥  
राम कृपा बल पाइ कपिंदा । भए पच्छजुत मनहुं गिरिंदा ॥  
हरषि राम तब कीन्ह पयाना । सगुन भए सुंदर सुभ नाना ॥  
जासु सकल मंगलमय कीती । तासु पयान सगुन यह नीती ॥  
प्रभु पयान जाना बैदेहीं । फरकि बाम अँग जनु कहि देहीं ॥  
जोइ जोइ सगुन जानकिहि होई । असगुन भयउ रावनहि सोई ॥  
चला कटक को बरनै पारा । गर्जहिं बानर भालु अपारा ॥  
नख आयुध गिरि पादपधारी । चले गगन महि इच्छाचारी ॥  
केहरिनाद भालु कपि करहीं । डगमगाहिं दिग्गज चिक्करहीं ॥

छं० चिक्करहिं दिग्गज डोल महि गिरि लोल सागर खरभरे ।  
मन हरष सब गंधर्ब सुर मुनि नाग किंनर दख टरे ॥  
कटकटहिं मर्कट बिकट भट बहु कोटि कोटिन्ह धावहीं ।  
जय राम प्रबल प्रताप कोसलनाथ गुन गन गावहीं ॥ 1  
सहि सक न भार उदार अहिपति बार बारहिं मोहई ।  
गह दसन पुनि पुनि कमठ पृष्ठ कठोर सो किमि सोहई ॥  
रघुबीर रुचिर प्रयान प्रस्थिति जानि परम सुहावनी ।  
जनु कमठ खर्पर सर्पराज सो लिखत अबिचल पावनी ॥ 2

दो० एहि बिधि जाइ कृपानिधि उतरे सागर तीर ।

जहँ तहँ लागे खान फल भालु बिपुल कपि बीर ॥ 35

उहाँ निसाचर रहहिं ससंका । जब तें जारि गयउ कपि लंका ॥  
निज निज गृहँ सब करहिं बिचारा । नहिं निसिचर कुल केर उबारा ॥  
जासु दूत बल बरनि न जाई । तेहि आएँ पुर कवन भलाई ॥  
दूतिन्ह सन सुनि पुरजन बानी । मंदोदरी अधिक अकुलानी ॥  
रहसि जोरि कर पति पग लागी । बोची बचन नीति रस पागी ॥  
कंत करष हरि सन परिहरहू । मोर कहा अति हित हियेँ धरहू ॥  
समुझत जासु दूत कइ करनी । ओवहिं गर्भ रजनीचर घरनी ॥  
तासु नारि निज सचिव बोलाई । पठवहु कंत जो चहहु भलाई ॥  
तव कुल कमल बिपिन दुखदाई । सीता सीत निसा सम आई ॥  
सुनहु नाथ सीता बिनु दीन्हें । हित न तुम्हार संभु अज कीन्हें ॥

दो० राम बान अहि गन सरिस निकर निसाचर भेक ।

जब लागि ग्रसत न तब लागि जतनु करहु तजि टेक ॥ 36

श्रवन सुनी सठ ता करि बानी । बिहसा जगत बिदित अभिमानी ॥  
जौ आवइ मर्कट कटकाई । जिअहिं बिचारे निसिचर खाई ॥  
कंपहिं लोकप जाकीं त्रासा । तासु नारि सभीत बडि हासा ॥  
अस कहि बिहसि ताहि उर लाई । चलेउ सभौ ममता अधिकाई ॥  
मंदोदरी हृदयें कर चिंता । भयउ कंत पर बिधि बिपरीता ॥  
बैठैउ सभौ खबरि असि पाई । सिंधु पार सेना सब आई ॥  
बूझेसि सचिव उचित मत कहहू । ते सब हँसे मष्ट करि रहहू ॥  
जितेहु सुरासुर तब श्रम नाही । नर बानर केहि लेखे माहीं ॥

दो० सचिव बैद गुर तीन जौं प्रिय बोलहिं भय आस ।

राज धर्म तन तीनि कर होइ बेगिहीं नास ॥ 37  
 सोइ रावन कहूँ बनी सहाई । अस्तुति करहिं सुनाइ सुनाई ॥  
 अवसर जानि बिभीषनु आवा । भ्राता चरन सीसु तेहिं नावा ॥  
 पुनि सिरु नाइ बैठ निज आसन । बोला बचन पाइ अनुसासन ॥  
 जौ कृपाल पूँछिहु मोहि बाता । मति अनुरूप कहउँ हित ताता ॥  
 जो आपन चाहै कल्याना । सुजसु सुमति सुभ गति सुख नाना ॥  
 सो परनारि लिलार गोसाई । तजउ चउथि के चंद कि नाई ॥  
 चौदह भुवन एक पति होई । भूतद्रोह तिष्टइ नहिं सोई ॥  
 गुन सागर नागर नर जोऊ । अलप लोभ भल कहइ न कोऊ ॥  
 दो0 काम कोध मद लोभ सब नाथ नरक के पंथ ॥  
 सब परिहरि रघुबीरहि भजहु भजहिं जेहि संत ॥ 38  
 तात राम नहिं नर भूपाला । भुवनेस्वर कालहु कर काला ॥  
 ब्रह्म अनामय अज भगवंता । व्यापक अजित अनादि अनंता ॥  
 गो सुर सन्त धेनु हितकारी । कृपा सिंधु मानुष तनुधारी ॥  
 जन रंजन भंजन खल ब्राता । बेद धर्म रच्छक सुनु भ्राता ॥  
 ताहि बयरु तजि नाइअ माथा । प्रनतारति भंजन रघुनाथा ॥  
 देहु नाथ प्रभु कहूँ बैदेही । भजहु राम बिनु हेतु सनेही ॥  
 सरन गएँ प्रभु ताहु न त्यागा । बिस्व द्रोह कृत अघ जेहि लागा ॥  
 जासु नाम त्रय ताप नसावन । सोइ प्रभु प्रगट समुझु जियेँ रावन ॥  
 दो0 बार बार पद लागउँ बिनय करउँ दससीस ।  
 परिहरि मान मोह मद भजहु कोसलाधीस ॥ 39 (क)  
 मुनि पुलस्ति निज सिष्य सन कहि पठई यह बात ।  
 तुरत सो मैं प्रभु सन कही पाइ सुअवसरु तात ॥ 39 (ख)  
 माल्यवंत अति सचिव सयाना । तासु बचन सुनि अति सुख माना ॥  
 तात अनुज तव नीति बिभूषन । सो उर धरहु जो कहत बिभीषन ॥  
 रिपु उतकरष कहत सठ दोऊ । दूरि न करहु इहाँ हइ कोऊ ॥  
 माल्यवंत गृह गयउ बहोरी । कहइ बिभीषनु पुनि कर जोरी ॥  
 सुमति कुमति सब के उर रहहीं । नाथ पुरान निगम अस कहहीं ॥  
 जहाँ सुमति तहँ संपति नाना । जहाँ कुमति तहँ बिपति निदाना ॥  
 तव उर कुमति बसी बिपरीता । हित अनहित मानहु रिपु प्रीता ॥  
 कालराति निसिचर कुल केरी । तेहि सीता पर प्रीति घनेरी ॥  
 दो0 तात चरन गहि मागउँ राखहु मोर दुलार ।  
 सीता देहु राम कहूँ अहित न होइ तुम्हार ॥ 40  
 बुध पुरान श्रुति संमत बानी । कही बिभीषन नीति बखानी ॥  
 सुनत दसानन उठा रिसाई । खल तोहि निकट मृत्यु अब आई ॥  
 जिअसि सदा सठ मोर जिआवा । रिपु कर पच्छ मूढ़ तोहि भावा ॥  
 मम पुर बसि तपसिन्ह पर प्रीती । सठ मिलु जाइ तिन्हहि कहु नीती ॥  
 अस कहि कीन्हेसि चरन प्रहारा । अनुज गहे पद बारहिं बारा ॥  
 उमा संत कइ इहइ बडाई । मंद करत जो करइ भलाई ॥  
 तुम्ह पितु सरिस भलेहिं मोहि मारा । रामु भजे हित नाथ तुम्हारा ॥  
 सचिव संग लै नभ पथ गयऊ । सबहि सुनाइ कहत अस भयऊ ॥  
 दो0 रामु सत्यसंकल्प प्रभु सभा कालबस तोरि ।  
 मैं रघुबीर सरन अब जाउँ देहु जनि खोरि ॥ 41  
 अस कहि चला बिभीषनु जबहीं । आयूहीन भए सब तबहीं ॥

साधु अवग्या तुरत भवानी । कर कल्याण अखिल कै हानी ॥  
रावन जबहिं बिभीषण त्यागा । भयउ बिभव बिनु तबहिं अभागा ॥  
चलेउ हरषि रघुनायक पाहीं । करत मनोरथ बहु मन माहीं ॥  
देखिहउँ जाइ चरन जलजाता । अरुन मृदुल सेवक सुखदाता ॥  
जे पद परसि तरी रिषिनारी । दंडक कानन पावनकारी ॥  
जे पद जनकसुतों उर लाए । कपट कुरंग संग धर धाए ॥  
हर उर सर सरोज पद जेई । अहोभाग्य मैं देखिहउँ तेई ॥  
दो० जिन्ह पायन्ह के पादुकन्हि भरतु रहे मन लाइ ।  
ते पद आजु बिलोकिहउँ इन्ह नयनन्हि अब जाइ ॥ 42  
कपिन्ह बिभीषणु आवत देखा । जाना कोउ रिपु दूत बिसेषा ॥  
ताहि राखि कपीस पहिं आए । समाचार सब ताहि सुनाए ॥  
कह सुग्रीव सुनहु रघुराई । आवा मिलन दसानन भाई ॥  
कह प्रभु सखा बूझिए काहा । कहइ कपीस सुनहु नरनाहा ॥  
जानि न जाइ निसाचर माया । कामरूप केहि कारन आया ॥  
भेद हमार लेन सठ आवा । राखिअ बॉधि मोहि अस भावा ॥  
सखा नीति तुम्ह नीकि बिचारी । मम पन सरनागत भयहारी ॥  
सुनि प्रभु बचन हरष हनुमाना । सरनागत बच्छल भगवाना ॥  
दो० सरनागत कहूँ जे तजहिं निज अनहित अनुमानि ।  
ते नर पावँ पापमय तिन्हहि बिलोकत हानि ॥ 43  
कोटि विप्र बध लागहिं जाहू । आए सरन तजउँ नहिं ताहू ॥  
सनमुख होइ जीव मोहि जबहीं । जन्म कोटि अघ नासहिं तबहीं ॥  
पापवंत कर सहज सुभाऊ । भजनु मोर तेहि भाव न काऊ ॥  
जौं पै दुष्टहृदय सोइ होई । मोरें सनमुख आव कि सोई ॥  
निर्मल मन जन सो मोहि पावा । मोहि कपट छल छिद्र न भावा ॥  
भेद लेन पठवा दससीसा । तबहुँ न कछु भय हानि कपीसा ॥  
जग महुँ सखा निसाचर जेते । लछिमनु हनइ निमिष महुँ तेते ॥  
जौं सभैत आवा सरनाई । रखिहउँ ताहि प्राण की नाई ॥  
दो० उभय भॉति तेहि आनहु हँसि कह कृपानिकेत ।  
जय कृपाल कहि कपि चले अंगद हनू समेत ॥ 44  
सादर तेहि आगें करि बानर । चले जहाँ रघुपति करुनाकर ॥  
दूरिहि ते देखे द्वौ भ्राता । नयनामंद दान के दाता ॥  
बहुरि राम छबिधाम बिलोकी । रहेउ ठटुकि एकटक पल रोकी ॥  
भुज प्रलंब कंजारुन लोचन । स्यामल गात प्रनत भय मोचन ॥  
सिंघ कंध आयत उर सोहा । आनन अमित मदन मन मोहा ॥  
नयन नीर पुलकित अति गाता । मन धरि धीर कही मृदु बाता ॥  
नाथ दसानन कर मैं भ्राता । निसिचर बंस जनम सुरत्राता ॥  
सहज पापप्रिय तापस देहा । जथा उलूकहि तम पर नेहा ॥  
दो० श्रवन सुजसु सुनि आयउँ प्रभु भंजन भव भीर ।  
त्राहि त्राहि आरति हरन सरन सुखद रघुबीर ॥ 45  
अस कहि करत दंडवत देखा । तुरत उठे प्रभु हरष बिसेषा ॥  
दीन बचन सुनि प्रभु मन भावा । भुज बिसाल गहि हृदयें लगावा ॥  
अनुज सहित मिलि ढिग बैठारी । बोले बचन भगत भयहारी ॥  
कहु लंकेस सहित परिवारा । कुसल कुठाहर बास तुम्हारा ॥  
खल मंडली बसहु दिनु राती । सखा धरम निबहइ केहि भॉती ॥

मैं जानउँ तुम्हारि सब रीती । अति नय निपुन न भाव अनीती ॥  
 बरु भल बास नरक कर ताता । दुष्ट संग जनि देइ बिधाता ॥  
 अब पद देखि कुसल रघुराया । जौं तुम्ह कीन्हि जानि जन दाया ॥  
 दो0 तब लागि कुसल न जीव कहूँ सपनेहुँ मन बिश्राम ।  
 जब लागि भजत न राम कहूँ सोक धाम तजि काम ॥ 46  
 तब लागि हृदयें बसत खल नाना । लोभ मोह मच्छर मद माना ॥  
 जब लागि उर न बसत रघुनाथा । धरें चाप सायक कटि भाथा ॥  
 ममता तरुन तमो अँधिआरी । राग द्वेष उलूक सुखकारी ॥  
 तब लागि बसति जीव मन माहीं । जब लागि प्रभु प्रताप रबि नाहीं ॥  
 अब मैं कुसल मिटे भय भारे । देखि राम पद कमल तुम्हारे ॥  
 तुम्ह कृपाल जा पर अनुकूला । ताहि न ब्याप त्रिबिध भव सूला ॥  
 मैं निसिचर अति अधम सुभाऊ । सुभ आचरनु कीन्हि नहिं काऊ ॥  
 जासु रूप मुनि ध्यान न आवा । तेहिं प्रभु हरषि हृदयें मोहि लावा ॥  
 दो0 अहोभाग्य मम अमित अति राम कृपा सुख पुंज ।  
 देखेउँ नयन बिरंचि सिव सेव्य जुगल पद कंज ॥ 47  
 सुनहु सखा निज कहउँ सुभाऊ । जान भुसुंछि संभु गिरिजाऊ ॥  
 जौं नर होइ चराचर द्रोही । आवै सभय सरन तकि मोही ॥  
 तजि मद मोह कपट छल नाना । करउँ सद्य तेहि साधु समाना ॥  
 जननी जनक बंधु सुत दारा । तनु धनु भवन सुहृद परिवारा ॥  
 सब कै ममता ताग बटोरी । मम पद मनहि बाँध बरि डोरी ॥  
 समदरसी इच्छा कछु नाहीं । हरष सोक भय नहिं मन माहीं ॥  
 अस सज्जन मम उर बस कैसें । लोभी हृदयें बसइ धनु जैसें ॥  
 तुम्ह सारिखे संत प्रिय मोरें । धरउँ देह नहिं आन निहोरें ॥  
 दो0 सगुन उपासक परहित निरत नीति दृढ नेम ।  
 ते नर प्रान समान मम जिन्ह केँ हरि पद प्रेम ॥ 48  
 सुनु लंकेस सकल गुन तोरें । तातें तुम्ह अतिसय प्रिय मोरें ॥  
 राम बचन सुनि बानर जूथा । सकल कहहिं जय कृपा बरुथा ॥  
 सुनत बिभीषनु प्रभु कै बानी । नहिं अघात श्रवनामृत जानी ॥  
 पद अंबुज गहि बारहिं बारा । हृदयें समात न प्रेमु अपारा ॥  
 सुनहु देव सचराचर स्वामी । प्रनतपाल उर अंतरजामी ॥  
 उर कछु प्रथम बासना रही । प्रभु पद प्रीति सरित सो बही ॥  
 अब कृपाल निज भगति पावनी । देहु सदा सिव मन भावनी ॥  
 एवमस्तु कहि प्रभु रनधीरा । मागा तुरत सिंधु कर नीरा ॥  
 जदपि सखा तव इच्छा नाहीं । मोर दरसु अमोघ जग माहीं ॥  
 अस कहि राम तिलक तेहि सारा । सुमन बृष्टि नभ भई अपारा ॥  
 दो0 रावन कोध अनल निज स्वास समीर प्रचंड ।  
 जरत बिभीषनु राखेउ दीन्हेउ राजु अखंड ॥ 49 (क)  
 जो संपति सिव रावनहि दीन्हि दिऐँ दस माथ ।  
 सोइ संपदा बिभीषनहि सकुचि दीन्हि रघुनाथ ॥ 49 (ख)  
 अस प्रभु छाडि भजहिं जे आना । ते नर पसु बिनु पूँछ बिषाना ॥  
 निज जन जानि ताहि अपनावा । प्रभु सुभाव कपि कुल मन भावा ॥  
 पुनि सर्वग्य सर्व उर बासी । सर्वरूप सब रहित उदासी ॥  
 बोचे बचन नीति प्रतिपालक । कारन मनुज दनुज कुल घालक ॥  
 सुनु कपीस लंकापति बीरा । केहि बिधि तरिअ जलधि गंभीरा ॥

संकुल मकर उरग झष जाती । अति अगाध दुस्तर सब भौंती ॥  
कह लंकेस सुनहु रघुनायक । कोटि सिंधु सोषक तव सायक ॥  
जद्यपि तदपि नीति असि गाई । बिनय करिअ सागर सन जाई ॥

दो० प्रभु तुम्हार कुलगुर जलधि कहिहि उपाय बिचारि ।

बिनु प्रयास सागर तरिहि सकल भालु कपि धारि ॥ 50  
सखा कही तुम्ह नीकि उपाई । करिअ दव जौं होइ सहाई ॥  
मंत्र न यह लछिमन मन भावा । राम बचन सुनि अति दुख पावा ॥  
नाथ दैव कर कवन भरोसा । सोषिअ सिंधु करिअ मन रोसा ॥  
कादर मन कहूँ एक अधारा । दैव दैव आलसी पुकारा ॥  
सुनत बिहसि बोले रघुबीरा । ऐसेहिं करब धरहु मन धीरा ॥  
अस कहि प्रभु अनुजहि समुझाई । सिंधु समीप गए रघुराई ॥  
प्रथम प्रनाम कीन्ह सिरु नाई । बैठे पुनि तट दर्भ डसाई ॥  
जबहिं बिभीषन प्रभु पहिं आए । पाछे रावन दूत पठाए ॥

दो० सकल चरित तिन्ह देखे धरें कपट कपि देह ।

प्रभु गुन हृदयें सराहहिं सरनागत पर नेह ॥ 51  
प्रगट बखानहिं राम सुभाऊ । अति सप्रेम गा बिसरि दुराऊ ॥  
रिपु के दूत कपिन्ह तब जाने । सकल बाँधि कपीस पहिं आने ॥  
कह सुग्रीव सुनहु सब बानर । अंग भंग करि पठवहु निसिचर ॥  
सुनि सुग्रीव बचन कपि धाए । बाँधि कटक चहु पास फिराए ॥  
बहु प्रकार मारन कपि लागे । दीन पुकारत तदपि न त्यागे ॥  
जो हमार हर नासा काना । तेहि कोसलाधीस कै आना ॥  
सुनि लछिमन सब निकट बोलाए । दया लागि हँसि तुरत छोड़ाए ॥  
रावन कर दीजहु यह पाती । लछिमन बचन बाचु कुलघाती ॥

दो० कहेहु मुखागर मूढ़ सन मम संदेसु उदार ।

सीता देइ मिलहु न त आवा कालु तुम्हार ॥ 52  
तुरत नाइ लछिमन पद माथा । चले दूत बरनत गुन गाथा ॥  
कहत राम जसु लंकाँ आए । रावन चरन सीस तिन्ह नाए ॥  
बिहसि दसानन पूँछी बाता । कहसि न सुक आपनि कुसलाता ॥  
पुनि कहु खबरि बिभीषन केरी । जाहि मृत्यु आई अति नेरी ॥  
करत राज लंका सठ त्यागी । होइहि जव कर कोट अभागी ॥  
पुनि कहु भालु कीस कटकाई । कठिन काल प्रेरित चलि आई ॥  
जिन्ह के जीवन कर रखवारा । भयउ मृदुल चित सिंधु बिचारा ॥  
कहु तपसिन्ह कै बात बहोरी । जिन्ह के हृदयें त्रास अति मोरी ॥

दो० की भइ भेंट कि फिरि गए श्रवन सुजसु सुनि मोर ।

कहसि न रिपु दल तेज बल बहुत चकित चित तोर ॥ 53  
नाथ कृपा करि पूँछेहु जैसें । मानहु कहा कोध तजि तैसें ॥  
मिला जाइ जब अनुज तुम्हारा । जातहिं राम तिलक तेहि सारा ॥  
रावन दूत हमहि सुनि काना । कपिन्ह बाँधि दीन्हें दुख नाना ॥  
श्रवन नासिका काटै लागे । राम सपथ दीन्हें हम त्यागे ॥  
पूँछिहु नाथ राम कटकाई । बदन कोटि सत बरनि न जाई ॥  
नाना बरन भालु कपि धारी । बिकटानन बिसाल भयकारी ॥  
जेहिं पुर दहेउ हतेउ सुत तोरा । सकल कपिन्ह महें तेहि बलु थोरा ॥  
अमित नाम भट कठिन कराला । अमित नाग बल बिपुल बिसाला ॥

दो० द्विबिद मयंक नील नल अंगद गद बिकटासि ।

दधिमुख केहरि निसठ सठ जामवंत बलरासि ॥ 54

ए कपि सब सुग्रीव समाना । इन्ह सम कोटिन्ह गनइ को नाना ॥  
राम कृपाँ अतुलित बल तिन्हहीं । तून समान त्रैलोकहि गनहीं ॥  
अस मैं सुना श्रवन दसकंधर । पदुम अठारह जूथप बंदर ॥  
नाथ कटक महेँ सो कपि नाही । जो न तुम्हहि जीतै रन माहीं ॥  
परम कोध मीजहिं सब हाथा । आयसु पै न देहिं रघुनाथा ॥  
सोषहिं सिंधु सहित झष ब्याला । पूरहिं न त भरि कुधर बिसाला ॥  
मर्दि गर्द मिलवहिं दससीसा । ऐसेइ बचन कहहिं सब कीसा ॥  
गर्जहिं तर्जहिं सहज असंका । मानहुँ ग्रसन चहत हहिं लंका ॥  
दो० सहज सूर कपि भालु सब पुनि सिर पर प्रभु राम ।

रावन काल कोटि कहुँ जीति सकहिं संग्राम ॥ 55

राम तेज बल बुधि बिपुलाई । सेष सहस सत सकहिं न गाई ॥  
सक सर एक सोषि सत सागर । तव भ्रातहि पूँछेउ नय नागर ॥  
तासु बचन सुनि सागर पाही । मांगत पंथ कृपा मन माही ॥  
तासु बचन बिहसा दससीसा । जौँ असि मति सहाय कृत कीसा ॥  
सहज भीरु कर बचन दृढ़ाई । सागर सन ठानी मचलाई ॥  
मूढ़ मृषा का करसि बड़ाई । रिपु बल बुद्धि थाह मैं पाई ॥  
सचिव सभित बिभीषन जाकेँ । बिजय बिभूति कहौँ जग ताकेँ ॥  
सुनि खल बचन दूत रिस बाढी । समय बिचारि पत्रिका काढी ॥  
रामानुज दीन्हीं यह पाती । नाथ बचाइ जुड़ावहु छाती ॥  
बिहसि बाम कर लीन्ही रावन । सचिव बोलि सठ लाग बचावन ॥

दो० बातन्ह मनहि रिझाइ सठ जनि घालसि कुल खीस ।

राम बिरोध न उबरसि सरन बिष्नु अज ईस ॥ 56 (क)

की तजि मान अनुज इव प्रभु पद पंकज भृंग ।

होहि कि राम सरानल खल कुल सहित पतंग ॥ 56 (ख)

सुनत सभय मन मुख मुसुकाई । कहत दसानन सबहि सुनाई ॥  
भूमि परा कर गहत अकासा । लघु तापस कर बाग बिलासा ॥  
कह सुक नाथ सत्य सब बानी । समुझइ छाड़ि प्रकृति अभिमानी ॥  
सुनहु बचन मम परिहरि कोधा । नाथ राम सन तजहु बिरोधा ॥  
अति कोमल रघुबीर सुभाऊ । जद्यपि अखिल लोक कर राऊ ॥  
मिलत कृपा तुम्ह पर प्रभु करिही । उर अपराध न एकउ धरिही ॥  
जनकसुता रघुनाथहि दीजे । एतना कहा मोर प्रभु कीजे ॥  
जब तेहिं कहा देन बैदेही । चरन प्रहार कीन्ह सठ तेही ॥  
नाइ चरन सिरु चला सो तहौँ । कृपासिंधु रघुनायक जहौँ ॥  
करि प्रनामु निज कथा सुनाई । राम कृपाँ आपनि गति पाई ॥  
रिषि अगस्ति कीं साप भवानी । राछस भयउ रहा मुनि ग्यानी ॥  
बंदि राम पद बारहिं बारा । मुनि निज आश्रम कहुँ पगु धारा ॥

दो० बिनय न मानत जलधि जड़ गए तीनि दिन बीति ।

बोले राम सकोप तब भय बिनु होइ न प्रीति ॥ 57

लछिमन बान सरासन आनू । सोषौँ बारिधि बिसिख कृसानू ॥  
सठ सन बिनय कुटिल सन प्रीती । सहज कृपन सन सुंदर नीती ॥  
ममता रत सन ग्यान कहानी । अति लोभी सन बिरति बखानी ॥  
कोधिहि सम कामिहि हरि कथा । ऊसर बीज बएँ फल जथा ॥  
अस कहि रघुपति चाप चढ़ावा । यह मत लछिमन के मन भावा ॥

संधानेउ प्रभु बिसिख कराला । उठी उदधि उर अंतर ज्वाला ॥  
 मकर उरग झष गन अकुलाने । जरत जंतु जलनिधि जब जाने ॥  
 कनक थार भरि मनि गन नाना । विप्र रूप आयउ तजि माना ॥  
 दो० काटेहिं पइ कदरी फरइ कोटि जतन कोउ सींच ।  
 बिनय न मान खगेस सुनु डाटेहिं पइ नव नीच ॥ 58  
 सभय सिंधु गहि पद प्रभु केरे । छमहु नाथ सब अवगुन मेरे ।  
 गगन समीर अनल जल धरनी । इन्ह कइ नाथ सहज जड़ करनी ॥  
 तव प्रेरित मायों उपजाए । सुष्टि हेतु सब ग्रंथनि गाए ॥  
 प्रभु आयसु जेहि कहँ जस अहई । सो तेहि भॉति रहँ सुख लहई ॥  
 प्रभु भल कीन्ह मोहि सिख दीन्ही । मरजादा पुनि तुम्हरी कीन्ही ॥  
 कपटी कुटिल कुमति उरगारी । सकल ताड़ना के अधिकारी ॥  
 प्रभु प्रताप मैं जाब सुखाई । उतरिहि कटकु न मोरि बड़ाई ॥  
 प्रभु अग्या अपेल श्रुति गाई । करौं सो बेगि जो तुम्हहि सोहाई ॥  
 दो० सुनत बिनित बचन अति कह कृपाल मुसुकाइ ।  
 जेहि बिधि उतरै कपि कटकु तात सो कहहु उपाइ ॥ 59  
 नाथ नील नल कपि द्वौ भाई । लरिकाईं रिषि आसिष पाई ॥  
 तिन्ह कें परस किँ गिरि भारे । तरिहहिं जलधि प्रताप तुम्हारे ॥  
 मैं पुनि उर धरि प्रभु प्रभुताई । करिहउँ बल अनुमान सहाई ॥  
 एहि बिधि नाथ पयोधि बँधाइअ । जेहिं यह सुजसु लोक तिहुँ गाइअ ॥  
 एहिं सर मम उत्तर तट बासी । हतहु नाथ खल नर अघ रासी ॥  
 सुनि कृपाल सागर मन पीरा । तुरतहिं हरी राम रनधीरा ॥  
 देखि राम बल पौरुष भारी । हरषि पयोनिधि भयउ सुखारी ॥  
 सकल चरित कहि प्रभुहि सुनावा । चरन बंदि पाथोधि सिधावा ॥  
 छ० निज भवन गवनेउ सिंधु श्रीरघुपतिहि यह मत भायऊ ।  
 यह चरित कलि मलहर जथामति दास तुलसी गायऊ ॥  
 सुख भवन संसय समन दवन बिषाद रघुपति गुन गना ।  
 तजि सकल आस भरोस गावहि सुनहि संतत सठ मना ॥  
 दो० सकल सुमंगल दायक रघुनायक गुन गान ।  
 सादर सुनहिं ते तरहिं भव सिंधु बिना जलजान ॥ 60

मासपारायण, चौबीसवाँ विश्राम

— गणपतये नमः

लंकाकाण्ड

श्लोक

रामं कामारिसेव्यं भवभयहरणं कालमत्तेभसिंहं  
योगीन्द्रं ज्ञानगम्यं गुणनिधिमजितं निर्गुणं निर्विकारम् ।  
मायातीतं सुरेशं खलवधनिरतं ब्रह्मवृन्दैकदेवं  
वन्दे कन्दावतं सरसिजनयनं देवमुर्वीशरूपम् ॥ 1 ॥  
शंखेन्द्राभमतीवसुन्दरतनुं शार्दूलचर्माम्बरं  
कालव्यालकरालभूषणधरं गंगाशशांकप्रियम् ।  
काशीशं कलिकल्मषौघशमनं कल्याणकल्पद्रुमं  
नौमीड्यं गिरिजापतिं गुणनिधिं कन्दर्पहं शंकरम् ॥ 2 ॥  
यो ददाति सतां शम्भुः कैवल्यमपि दुर्लभम् ।

खलानां दण्डकृद्योसौ शंकरः शं तनोतु मे ॥ 3 ॥

दो० लव निमेष परमानु जुग बरष कलप सर चंड ।  
भजसि न मन तेहि राम को कालु जासु कोदंड ॥  
सो० सिंधु बचन सुनि राम सचिव बोलि प्रभु अस कहेउ ।  
अब बिलंबु केहि काम करहु सेतु उतरै कटक ॥  
सुनहु भानुकुल केतु जामवंत कर जोरि कह ।  
नाथ नाम तव सेतु नर चढि भव सागर तरहिं ॥  
यह लघु जलधि तरत कति बारा । अस सुनि पुनि कह पवनकुमारा ॥  
प्रभु प्रताप बड़वानल भारी । सोषेउ प्रथम पयोनिधि बारी ॥  
तव रिपु नारि रुदन जल धारा । भरेउ बहोरि भयउ तेहिं खारा ॥  
सुनि अति उकुति पवनसुत केरी । हरषे कपि रघुपति तन हेरी ॥  
जामवंत बोले दोउ भाई । नल नीलहि सब कथा सुनाई ॥  
राम प्रताप सुमिरि मन माहीं । करहु सेतु प्रयास कछु नाहीं ॥  
बोलि लिए कपि निकर बहोरी । सकल सुनहु बिनती कछु मोरी ॥  
राम चरन पंकज उर धरहू । कौतुक एक भालु कपि करहू ॥  
धावहु मर्कट बिकट बरुथा । आनहु बिटप गिरिन्ह के ज्था ॥

सुनि कपि भालु चले करि हूहा । जय रघुबीर प्रताप समूहा ॥  
दो० अति उत्तंग गिरि पादप लीलहिं लेहिं उठाइ ।

आनि देहिं नल नीलहि रचहिं ते सेतु बनाइ ॥ 1

सैल बिसाल आनि कपि देहीं । कंदुक इव नल नील ते लेहीं ॥  
देखि सेतु अति सुंदर रचना । बिहसि कृपानिधि बोल बचना ॥  
परम रम्य उत्तम यह धरनी । महिमा अमित जाइ नहिं बरनी ॥  
करिहउं इहों संभु थापना । मोरे हृदयें परम कलपना ॥  
सुनि कपीस बहु दूत पठाए । मुनिबर सकल बोलि लै आए ॥  
लिंग थापि बिधिवत करि पूजा । सिवसमान प्रिय मोहि न दूजा ॥  
सिव द्रोही मम भगत कहावा । सा नर सपनेहुँ मोहि न पावा ॥  
संकर बिमुख भगति चह मोरी । सो नारकी मूढ़ मति थोरी ॥

दो० संकरप्रिय मम द्रोही सिव द्रोही मम दास ।

ते नर करहिं कलप भरि घोर नरक महुँ बास ॥ 2

जे रामेस्वर दरसनु करिहहिं । ते तनु तजि मम लोक सिधरिहहिं ॥  
जो गंगाजलु आनि चढ़ाइहि । सो साजुज्य मुक्ति नर पाइहि ॥  
होइ अकाम जो छल तजि सेइहि । भगति मोरि तेहि संकर देइहि ॥  
मम कृत सेतु जो दरसनु करिही । सो बिनु श्रम भवसागर तरिही ॥  
गिरिजा रघुपति कै यह रीती । संतत करहिं प्रनत पर प्रीती ॥  
बौधा सेतु नील नल नागर । राम कृपों जसु भयउ उजागर ॥  
बूड़हिं आनहि बोरहिं जेई । भए उपल बोहित सम तेई ॥  
महिमा यह न जलधि कइ बरनी । पाहन गुन न कपिन्ह कइ करनी ॥

दो० श्री रघुबीर प्रताप ते सिंधु तरे पाषान ।

ते मतिमंद जे राम तजि भजहिं जाइ प्रभु आन ॥ 3

बौधि सेतु अति सुदृढ़ बनावा । देखि कपानिध के मन भावा ॥  
चली सेन कछु बरनि न जाई । गर्जहिं मर्कट भट समुदाई ॥  
सेतुबंध ढिग चढ़ि रघुराई । चिव कृपाल सिंधु बहुताई ॥  
देखन कहुँ प्रभु करुना कंदा । प्रगट भए सब जलचर बूंदा ॥  
मकर नक नाना झष ब्याला । सत जोजन तन परम बिसाला ॥  
अइसेउ एक तिन्हहि जे खाहीं । एकन्ह के डर तेपि डेराहीं ॥  
प्रभुहि बिलोकहिं टरहिं न टारे । मन हरषित सब भए सुखारे ॥  
तिन्ह की ओट न देखिअ बारी । मगन भए हरि रूप निहारी ॥

दो० सेतुबंध भइ भीर अति कपि नभ पंथ उड़ाहिं ।

अपर जलचरन्हि ऊपर चढ़ि चढ़ि पारहि जाहिं ॥ 4

अस कौतक बिलोकि द्वौ भाई । बिहंसि चले कृपाल रघुराई ॥  
सेन सहित उत्तरे रघुबीरा । कहि न जाइ कपि जूथप भीरा ॥  
सिंधु पार प्रभु डेरा कीन्हा । सकल कपिन्ह कहुँ आयसु दीन्हा ॥  
खाहु जाइ फल मूल सुहाए । सुनत भालु कपि जहें तहें धाए ॥  
सब तरु फरे राम हित लागी । रितु अरु कुरितु काल गति त्यागी ॥  
खाहिं मधुर फल बिटप हलावहिं । लंका सन्मुख सिखर चलावहिं ॥  
जहें कहुँ फिरत निसाचर पावहिं । घेरि सकल बहु नाच नचावहिं ॥  
दसनन्हि काटि नासिका काना । कहि प्रभु सुजसु देहिं तब जाना ॥  
जिन्ह कर नासा कान निपाता । तिन्ह रावनहि कही सब बाता ॥  
सुनत श्रवन बारिधि बंधाना । दस मुख बोलि उठा अकुलाना ॥

दो० बॉधो बननिधि नीरनिधि जलधि सिंधु बारीस ।

सत्य तोयनिधि कंपति उदधि पयोधि नदीस ॥ 5

मंदोदरीं सुन्यो प्रभु आयो । कौतुकहीं पाथोधि बँधायो ॥  
कर गहि पतिहि भवन निज आनी । बोली परम मनोहर बानी ॥  
चरन नाइ सिरु अंचलु रोपा । सुनहु बचन पिय परिहरि कोपा ॥  
नाथ बयरु कीजे ताही सों । बुधि बल सकिअ जीति जाही सों ॥  
तुम्हहि रघुपतिहि अंतर कैसा । खलु खद्योत दिनकरहि जैसा ॥  
अतिबल मधु कैटभ जेहिं मारे । महाबीर दितिसुत संघारे ॥  
जेहिं बलि बॉधि सहसभुज मारा । सोइ अवतरेउ हरन महि भारा ॥  
तासु बिरोध न कीजिअ नाथा । काल करम जिव जाके हाथा ॥

दो० रामहि सौंपि जानकी नाइ कमल पद माथ ।

सुत कहँ राज समर्पि बन जाइ भजिअ रघुनाथ ॥ 6

नाथ दीनदयाल रघुराई । बाघउ सनमुख गएँ न खाई ॥  
चाहिअ करन सो सब करि बीते । तुम्ह सुर असुर चराचर जीते ॥  
संत कहहिं असि नीति दसानन । चौथेंपन जाइहि नृप कानन ॥  
तासु भजन कीजिए तहँ भर्ता । जो कर्ता पालक संहर्ता ॥  
सोइ रघुबीर प्रनत अनुरागी । भजहु नाथ ममता सब त्यागी ॥  
मुनिबर जतनु करहिं जेहि लागी । भूप राजु तजि होहिं बिरागी ॥  
सोइ कोसलाधीस रघुराया । आयउ करन तोहि पर दाया ॥  
जौं पिय मानहु मोर सिखावन । सुजसु होइ तिहुँ पुर अति पावन ॥

दो० अस कहि नयन नीर भरि गहि पद कंपित गात ।

नाथ भजहु रघुनाथहि अचल होइ अहिवात ॥ 7

सुनु तैं प्रिया बृथा भय माना । जग जोधा को मोहि समाना ॥  
बरुन कुबेर पावन जम काला । भुज बल जितेउँ सकल दिगपाला ॥  
देव दनुज नर सब बस मोरें । कवन हेतु उपजा भय तोरें ॥  
नाना बिधि तेहि कहेसि बुझाई । सभों बहोरि बैठ सो जाई ॥  
मंदोदरीं हृदयें अस जाना । काल बस्य उपजा अभिमाना ॥  
सभों आइ मंत्रिन्ह तेहिं बूझा । करब कवन बिधि रिपु सैं जूझा ॥  
कहहिं सचिव सुनु निसिचर नाहा । बार बार प्रभु पूछहु काहा ॥  
कहहु कवन भय करिअ बिचारा । नर कपि भालु अहार हमारा ॥

दो० सब के बचन श्रवन सुनि कह प्रहस्त कर जोरि ।

नीति बिरोध न करिअ प्रभु मंत्रिन्ह मति अति थोरि ॥ 8

कहहिं सचिव सठ ठकुरसोहाती । नाथ न पूर आव एहि भौंती ॥  
बारिधि नाधि एक कपि आवा । तासु चरित मन महुँ सबु गावा ॥  
छुधा न रही तुम्हहि तब काहू । जारत नगरु कस न धरि खाहू ॥  
सुनत नीक आगें दुख पावा । सचिवन अस मत प्रभुहि सुनावा ॥  
जेहिं बारीस बँधायउ हेला । उतरेउ सेन समेत सुबेला ॥  
सो भनु मनुज खाब हम भाई । बचन कहहिं सब गाल फुलाई ॥  
तात बचन मम सुनु अति आदर । जनि मन गुनहु मोहि करि कादर ॥  
प्रिय बानी जे सुनहिं जे कहहीं । ऐसे नर निकाय जग अहहीं ॥  
बचन परम हित सुनत कठोरे । सुनहिं जे कहहिं ते नर प्रभु थोरे ॥  
प्रथम बसीठ पठउ सुनु नीती । सीता देइ करहु पुनि प्रीती ॥

दो० नारि पाइ फिरि जाहिं जौं तौ न बढ़ाइअ रारि ।

नाहिं त सन्मुख समर महि तात करिअ हठि मारि ॥ 9  
 यह मत जौं मानहु प्रभु मोरा । उभय प्रकार सुजसु जग तोरा ॥  
 सुत सन कह दसकंठ रिसाई । असि मति सठ केहिं तोहि सिखाई ॥  
 अबहीं ते उर संसय होई । बेनुमूल सुत भयहु घमोई ॥  
 सुनि पितु गिरा परुष अति घोरा । चला भवन कहि बचन कठोरा ॥  
 संध्या समय जानि दससीसा । भवन चलेउ निरखत भुज बीसा ॥  
 लंका सिखर उपर आगारा । अति बिचित्र तहें होइ अखारा ॥  
 बैठ जाइ तेहिं मंदिर रावन । लागे किंनर गुन गन गावन ॥  
 बाजहिं ताल पखावज बीना । नृत्य करहिं अपछरा प्रबीना ॥

दो० सुनासीर सत सरिस सो संतत करइ बिलास ।

परम प्रबल रिपु सीस पर तद्यपि सोच न त्रास ॥ 10

इहाँ सुबेल सैल रघुबीरा । उत्तरे सेन सहित अति भीरा ॥  
 सिखर एक उत्तंग अति देखी । परम रम्य सम सुभ्र बिसेषी ॥  
 तहें तरु किसलय सुमन सुहाए । लछिमन रचि निज हाथ डसाए ॥  
 ता पर रुचिर मृदुल मृगछाला । तेहिं आसन आसीन कृपाला ॥  
 प्रभु कृत सीस कपीस उछंगा । बाम दहिन दिसि चाप निषंगा ॥  
 दुहुं कर कमल सुधारत बाना । कह लंकेस मंत्र लगी काना ॥  
 बड़भागी अंगद हनुमाना । चरन कमल चापत बिधि नाना ॥  
 प्रभु पाछें लछिमन बीरासन । कटि निषंग कर बान सरासन ॥

दो० एहि बिधि कृपा रूप गुन धाम रामु आसीन ।

धन्य ते नर एहिं ध्यान जे रहत सदा लयलीन ॥ 11 (क)

पूरब दिसा बिलोकि प्रभु देखा उदित मयंक ।

कहत सबहि देखहु ससिहि मृगपति सरिस असंक ॥ 11 (ख)

पूरब दिसि गिरिगुहा निवासी । परम प्रताप तेज बल रासी ॥  
 मत्त नाग तम कुंभ बिदारी । ससि केसरी गगन बन चारी ॥  
 बिथुरे नभ मुकुताहल तारा । निसि सुंदरी केर सिंगारा ॥  
 कह प्रभु ससि महुं मेचकताई । कहहु काह निज निज मति भाई ॥  
 कह सुग्रीव सुनहु रघुराई । ससि महुं प्रगट भूमि कै झाँई ॥  
 मारेउ राहु ससिहि कह कोई । उर महें परी स्यामता सोई ॥  
 कोउ कह जब बिधि रति मुख कीन्हा । सार भाग ससि कर हरि लीन्हा ॥  
 छिद्र सो प्रगट इंदु उर माहीं । तेहि मग देखिअ नभ परिछाहीं ॥  
 पभु कह गरल बंधु ससि केरा । अति प्रिय निज उर दीन्ह बसेरा ॥  
 बिष संजुत कर निकर पसारी । जारत बिरहवंत नर नारी ॥

दो० कह हनुमंत सुनहु प्रभु ससि तुम्हार प्रिय दास ।

तव मूरति बिधु उर बसति सोइ स्यामता अभास ॥ 12 (क)

नवान्हपारायण, सातवों विश्राम

पवन तनय के बचन सुनि बिहेंसे रामु सुजान ।

दच्छिन दिसि अवलोकि प्रभु बोले कृपानिधान ॥ 12 (ख)

देखु बिभीषन दच्छिन आसा । घन घमंड दामिनी बिलासा ॥  
 मधुर मधुर गरजइ घन घोरा । होइ बृष्टि जनि उपल कठोरा ॥  
 कहत बिभीषन सुनहु कृपाला । होइ न तड़ित न बारिद माला ॥  
 लंका सिखर उपर आगारा । तहें दसकंधर देख अखारा ॥

छत्र मेघडंबर सिर धारी । सोइ जनु जलद घटा अति कारी ॥  
 मंदोदरी श्रवन ताटंका । सोइ प्रभु जनु दामिनी दमंका ॥  
 बाजहिं ताल मृदंग अनूपा । सोइ रव मधुर सुनहु सुरभूपा ॥  
 प्रभु मुसुकान समुझि अभिमाना । चाप चढाइ बान संधाना ॥  
 दो० छत्र मुकुट ताटंक तब हते एकहीं बान ।  
 सब के देखत महि परे मरमु न कोऊ जान ॥ 13 (क)  
 अस कौतुक करि राम सर प्रबिसेउ आइ निषंग ।  
 रावन सभा ससंक सब देखि महा रसभंग ॥ 13 (ख)  
 कंप न भूमि न मरुत बिसेषा । अस्त्र सस्त्र कछु नयन न देखा ॥  
 सोचहिं सब निज हृदय मझारी । असगुन भयउ भयंकर भारी ॥  
 दसमुख देखि सभा भय पाई । बिहसि बचन कह जुगुति बनाई ॥  
 सिरउ गिरे संतत सुभ जाही । गवने भवन सकल सिर नाई ॥  
 मंदोदरी सोच उर बसेऊ । जब ते श्रवनपूर महि खसेऊ ॥  
 सजल नयन कह जुग कर जोरी । सुनहु प्रानपति बिनती मोरो ॥  
 कंत राम बिरोध परिहरहू । जानि मनुज जनि हठ मन धरहू ॥  
 दो० बिस्वरूप रघुबंस मनि करहु बचन बिस्वासु ।  
 लोक कल्पना बेद कर अंग संग प्रति जासु ॥ 14  
 पद पाताल सीस अज धामा । अपन लोक अंग अंग बिश्रामा ॥  
 मृकुटि बिलास भयंकर काला । नयन दिवाकर कच घन माला ॥  
 जासु घान अस्विनीकुमारा । निसि अरु दिवस निमेष अपारा ॥  
 श्रवन दिसा दस बेद बखानी । मारुत स्वास निगम निज बानी ॥  
 अधर लोभ जम दसन कराला । माया हास बाहु दिगपाला ॥  
 आनन अनल अंबुपति जीहा । उतपति पालन प्रलय समीहा ॥  
 रोम राजि अष्टादस भारा । अस्थि सैल सरिता नस जारा ॥  
 उदर उदधि अधगो जातना । जगमय प्रभु का बहु कलपना ॥  
 दो० अहंकार सिव बुद्धि अज मन ससि चित्त महान ।  
 मनुज बास सचराचर रूप राम भगवान ॥ 15 (क)  
 अस बिचारि सुनु प्रानपति प्रभु सन बयरु बिहाइ ।  
 प्रीति करहु रघुबीर पद मम अहिवात न जाइ ॥ 15 (ख)  
 बिहँसा नारि बचन सुनि काना । अहो मोह महिमा बलवाना ॥  
 मूढ सुभाउ सत्य सब कहहीं । अवगुन आठ सदा उर रहहीं ॥  
 साहस अनृत चपलता माया । भय अबिबेक असौच अदाया ॥  
 रिपु कर रूप सकल तैं गावा । अति बिसाल भय मोहि सुनावा ॥  
 सो सब प्रिया सहज बस मोरें । समुझि परा प्रसाद अब तोरें ॥  
 जानिउँ प्रिया तोरि चतुराई । एहि बिधि कहउ मोरि प्रभुताई ॥  
 तव बतकही गूढ मृगलोचनि । समुझत सुखद सुनत भय मोचनि ॥  
 मंदोदरि मन महुँ अस ठयऊ । पियहि काल बस मतिभ्रम भयऊ ॥  
 दो० एहि बिधि करत बिनोद बहु प्रात प्रगट दसकंध ।  
 सहज असंक लंकपति सभाँ गयउ मद अंध ॥ 16 (क)  
 सो० फूलइ फरइ न बेत जदपि सुधा बरषहिं जलद ।  
 मूरुख हृदयें न चेत जौं गुर मिलहिं बिरंचि सम ॥ 16 (ख)  
 इहाँ प्रात जागे रघुराई । पूछा मत सब सचिव बोलाई ॥  
 कहहु बेगि का करिअ उपाई । जामवंत कह पद सिरु नाई ॥

सुनु सर्बग्य सकल उर बासी । बुधि बल तेज धम गुन रासी ॥  
मंत्र कहउँ निज मति अनुसार । दूत पठाइअ बालिकुमारा ॥  
नीक मंत्र सब के मन माना । अंगद सन कह कृपानिधाना ॥  
बालितनय बुधि बल गुन धामा । लंका जाहु तात मम कामा ॥  
बहुत बुझाइ तुम्हहि का कहउँ । परम चतुर मैं जानत अहउँ ॥  
काजु हमार तासु हित होई । रिपु सन करेहु बतकही सोई ॥

सो० प्रभु अग्या धरि सीस चरन बंदि अंगद उठेउ ।

सोई गुन सागर ईस राम कृपा जा पर करहु ॥ 17 (क)

स्वयंसिद्ध सब काज नाथ मोहि आदरु दियउ ।

अस बिचारि जुबराज तन पुलकित हरषित हियउ ॥ 17 (ख)

बंदि चरन उर धरि प्रभुताई । अंगद चलेउ सबहि सिरु नाई ॥

प्रभु प्रताप उर सहज असंका । रन बाँकुरा बालिसुत बंका ॥

पुर पैठत रावन कर बेटा । खेलत रहा सो होइ गै भेटा ॥

बातहिं बात करष बढि आई । जुगल अतुल बल पुनि तरुनाई ॥

तेहिं अंगद कहूँ लात उठाई । गहि पद पटकेउ भूमि भवोई ॥

निसिचर निकर देखि भट भारी । जहँ तहँ चले न सकहिं पुकारी ॥

एक एक सन मरमु न कहहीं । समुझि तासु बध चुप करि रहहीं ॥

भयउ कोलाहल नगर मझारी । आवा कपि लंका जेहिं जारी ॥

अब धौं कहा करिहि करतारा । अति सभित सब करहिं बिचारा ॥

बिनु पूछें मगु देहिं दिखाई । जेहि बिलोक सोइ जाइ सुखाई ॥

दो० गयउ सभा दरबार तब सुमिरि राम पद कंज ।

सिंह ठवनि इत उत चितव धीर बीर बल पुंज ॥ 18

तुरत निसाचर एक पटावा । समाचार रावनहि जनावा ॥

सुनत बिहँसि बोला दससीसा । आनहु बोलि कहों कर कीसा ॥

आयसु पाइ दूत बहु धाए । कपिकुंजरहि बोलि लै आए ॥

अंगद दीख दसानन बैसैं । सहित प्रान कज्जलगिरि जैसैं ॥

भुजा बिटप सिर सृंग समाना । रोमावली लता जनु नाना ॥

मुख नासिका नयन अरु काना । गिरि कंदरा खोह अनुमाना ॥

गयउ सभौं मन नेकु न मुरा । बालितनय अतिबल बाँकुरा ॥

उठे सभासद कपि कहूँ देखी । रावन उर भा कोध बिसेषी ॥

दो० जथा मत्त गज जूथ महुँ पंचानन चलि जाइ ।

राम प्रताप सुमिरि मन बैठ सभौं सिरु नाइ ॥ 19

कह दसकंठ कवन तैं बंदर । मैं रघुबीर दूत दसकंधर ॥

मम जनकहि तोहि रही मिताई । तव हित कारन आयउँ भाई ॥

उत्तम कुल पुलस्तिक कर नाती । सिव बिरंचि पजेहु बहु भाँती ॥

बर पायहु कीन्हेहु सब काजा । जीतेहु लोकपाल सब राजा ॥

नृप अभिमान मोह बस किंबा । हरि आनिहु सीता जगदंबा ॥

अब सुभ कहा सुनहु तुम्ह मोरा । सब अपराध छमिहि प्रभु तोरा ॥

दसन गहहु तृन कंठ कुठारी । परिजन सहित संग निज नारी ॥

सादर जनकसुता करि आगें । एहि बिधि चलहु सकल भय त्यागें ॥

दो० प्रनतपाल रघुबंसमनि त्राहि त्राहि अब मोहि ।

आरत गिरा सुनत प्रभु अभय करैगो तोहि ॥ 20

रे कपिपोत न बोलु संभारी । मूढ न जानेहि मोहि सुरारी ॥

कहु निज नाम जनक कर भाई । केहि नाते मानिऐ मितार्ई ॥  
 अंगद नाम बालि कर बेटा । तासों कबहुँ भई हो भेटा ॥  
 अंगद बचन सुनत सकुचाना । रहा बालि बानर मैं जाना ॥  
 अंगद तहीं बालि कर बालक । उपजेहु बंस अनल कुल घालक ॥  
 गर्भ न गयहु ब्यर्थ तुम्ह जायहु । निज मुख तापस दूत कहायहु ॥  
 अब कहु कुसल बालि कहँ अहई । बिहँसि बचन तब अंगद कहई ॥  
 दिन दस गएँ बालि पहिं जाई । बूझेहु कुसल सखा उर लाई ॥  
 राम बिरोध कुसल जसि होई । सो सब तोहि सुनाइहि सोई ॥  
 सुनु सठ भेद होइ मन ताके । श्रीरघुबीर हृदयँ नहिं जाके ॥

दो० हम कुल घालक सत्य तुम्ह कुल पालक दससीस ।

अंधउ बधिर न अस कहहिं नयन कान तव बीस ॥ 21

सिव बिरंचि सुर मुनि समुदाई । चाहत जासु चरन सेवकाई ॥  
 तासु दूत होइ हम कुल बोरा । अइसिहुँ मति उर बिहर न तोरा ॥  
 सुनि कठोर बानी कपि केरी । कहत दसानन नयन तरेरी ॥  
 खल तव कठिन बचन सब सहऊँ । नीति धर्म मैं जानत अहऊँ ॥  
 कह कपि धर्मसीलता तोरी । हमहुँ सुनी कृत पर त्रिय चोरी ॥  
 देखी नयन दूत रखवारी । बूड़ि न मरहु धर्म ब्रतधारी ॥  
 कान नाक बिनु भगिनि निहारी । छमा कीन्हि तुम्ह धर्म बिचारी ॥  
 धर्मसीलता तव जग जागी । पावा दरसु हमहुँ बड़भागी ॥

दो० जनि जल्पसि जड़ जंतु कपि सठ बिलोकु मम बाहु ।

लोकपाल बल बिपुल ससि ग्रसन हेतु सब राहु ॥ 22 (क)

पुनि नभ सर मम कर निकर कमलन्हि पर करि बास ।

सोभत भयउ मराल इव संभु सहित कैलास ॥ 22 (ख)

तुम्हरे कटक माझ सुनु अंगद । मो सन भिरिहि कवन जोधा बद ॥  
 तव प्रभु नारि बिरहँ बलहीना । अनुज तासु दुख दुखी मलीना ॥  
 तुम्ह सुग्रीव कूलदुम दोऊ । अनुज हमार भीरु अति सोऊ ॥  
 जामवंत मंत्री अति बूढ़ा । सो कि होइ अब समरारूढ़ा ॥  
 सिल्पि कर्म जानहिं नल नीला । है कपि एक महा बलसीला ॥  
 आवा प्रथम नगरु जेहिं जारा । सुनत बचन कह बालिकुमारा ॥  
 सत्य बचन कहु निसिचर नाहा । साँचेहुँ कीस कीन्ह पुर दाहा ॥  
 रावन नगर अल्प कपि दहई । सुनि अस बचन सत्य को कहई ॥  
 जो अति सुभट सरारेहु रावन । सो सुग्रीव केर लघु धावन ॥  
 चलइ बहुत सो बीर न होई । पठवा खबरि लेन हम सोई ॥

दो० सत्य नगरु कपि जारेउ बिनु प्रभु आयसु पाइ ।

फिरि न गयउ सुग्रीव पहिं तहिं भय रहा लुकाइ ॥ 23 (क)

सत्य कहहिं दसकंठ सब मोहि न सुनि कछु कोह ।

कोउ न हमारें कटक अस तो सन लरत जो सोह ॥ 23 (ख)

प्रीति बिरोध समान सन करिअ नीति असि आहि ।

जौं मृगपति बध मेडुकन्हि भल कि कहइ कोउ ताहि ॥ 23 (ग)

जद्यपि लघुता राम कहुँ तोहि बधेँ बड़ दोष ।

तदपि कठिन दसकंठ सुनु छत्र जाति कर रोष ॥ 23 (घ)

बक उक्ति धनु बचन सर हृदय दहेउ रिपु कीस ।

प्रतिउत्तर सड़सिन्ह मनहु काढ़त भट दससीस ॥ 23 (ङ)

हँसि बोलेउ दसमौलि तब कपि कर बड़ गुन एक ।

जो प्रतिपालइ तासु हित करइ उपाय अनेक ॥ 23 (च)

धन्य कीस जो निज प्रभु काजा । जहँ तहँ नाचइ परिहरि लाजा ॥  
नाचि कूदि करि लोग रिझाई । पति हित करइ धर्म निपुनाई ॥  
अंगद स्वामिभक्त तव जाती । प्रभु गुन कस न कहसि एहि भौंती ॥  
मैं गुन गाहक परम सुजाना । तव कटु रटनि करउँ नहिं काना ॥  
कह कपि तव गुन गाहकताई । सत्य पवनसुत मोहि सुनाई ॥  
बन बिधंसि सुत बधि पुर जारा । तदपि न तेहिं कछु कृत अपकारा ॥  
सोइ बिचारि तव प्रकृति सुहाई । दसकंधर मैं कीन्हि ढिठाई ॥  
देखेउँ आइ जो कछु कपि भाषा । तुम्हरें लाज न रोष न माखा ॥  
जौं असि मति पितु खाए कीसा । कहि अस बचन हँसा दससीसा ॥  
पितहि खाइ खातेउँ पुनि तोही । अबहीं समुझि परा कछु मोही ॥  
बालि बिमल जस भाजन जानी । हतउँ न तोहि अधम अभिमानी ॥  
कहु रावन रावन जग केते । मैं निज श्रवन सुने सुनु जेते ॥  
बलिहि जितन एक गयउ पताला । राखेउ बाँधि सिसुन्ह हयसाला ॥  
खेलहिं बालक मारहिं जाई । दया लागि बलि दीन्ह छोड़ाई ॥  
एक बहोरि सहसभुज देखा । धाइ धरा जिमि जंतु बिसेषा ॥  
कौतुक लागि भवन लै आवा । सो पुलस्ति मुनि जाइ छोड़ावा ॥  
दो० एक कहत मोहि सकुच अति रहा बालि कीं कौंख ।

इन्ह महँ रावन तैं कवन सत्य बदहि तजि माख ॥ 24

सुनु सठ सोइ रावन बलसीला । हरगिरि जान जासु भुज लीला ॥  
जान उमापति जासु सुराई । पूजेउँ जेहि सिर सुमन चढ़ाई ॥  
सिर सरोज निज करन्हि उतारी । पूजेउँ अमित बार त्रिपुरारी ॥  
भुज बिकम जानहिं दिगपाला । सठ अजहूँ जिन्ह के उर साला ॥  
जानहिं दिग्गज उर कठिनाई । जब जब भिरउँ जाइ बरिआई ॥  
जिन्ह के दसन कराल न फूटे । उर लागत मूलक इव टूटे ॥  
जासु चलत डोलति इमि धरनी । चढ़त मत्त गज जिमि लघु तरनी ॥  
सोइ रावन जग बिदित प्रतापी । सुनेहि न श्रवन अलीक प्रलापी ॥  
दो० तेहि रावन कहँ लघु कहसि नर कर करसि बखान ।

रे कपि बर्बर खर्ब खल अब जाना तव ग्यान ॥ 25

सुनि अंगद सकोप कह बानी । बोलु सँभारि अधम अभिमानी ॥  
सहसबाहु भुज गहन अपारा । दहन अनल सम जासु कुठारा ॥  
जासु परसु सागर खर धारा । बूड़े नृप अगनित बहु बारा ॥  
तासु गर्ब जेहि देखत भागा । सो नर क्यों दससीस अभागा ॥  
राम मनज कस रे सठ बंगा । धन्वी कामु नदी पुनि गंगा ॥  
पसु सुरधेनु कल्पतरु रूखा । अन्न दान अरु रस पीयूषा ॥  
बैनतेय खग अहि सहसानन । चिंतामनि पुनि उपल दसानन ॥  
सुनु मतिमंद लोक बैकुंठा । लाभ कि रघुपति भगति अंकुंठा ॥  
दो० सेन सहित तव मान मथि बन उजारि पुर जारि ।

कस रे सठ हनुमान कपि गयउ जो तव सुत मारि ॥ 26

सुनु रावन परिहरि चतुराई । भजसि न कृपासिंधु रघुराई ॥  
जौं खल भएसि राम कर द्रोही । ब्रह्म रुद्र सक राखि न तोही ॥  
मूढ बृथा जनि मारसि गाला । राम बयर अस होइहि हाला ॥

तव सिर निकर कपिन्ह के आगें । परिहहिं धरनि राम सर लागें ॥  
 ते तव सिर कंदुक सम नाना । खेलिहहिं भालु कीस चौगाना ॥  
 जबहिं समर कोपिहि रघुनायक । छुटिहहिं अति कराल बहु सायक ॥  
 तब कि चलिहि अस गाल तुम्हारा । अस बिचारि भजु राम उदारा ॥  
 सुनत बचन रावन परजरा । जरत महानल जनु घृत परा ॥  
 दो० कुंभकरन अस बंधु मम सुत प्रसिद्ध सकारि ।  
 मोर पराकम नहिं सुनेहि जितेउँ चराचर झारि ॥ 27  
 सठ साखामृग जोरि सहाई । बौंधा सिंधु इहइ प्रभुताई ॥  
 नाघहिं खग अनेक बारीसा । सूर न होहिं ते सुनु सब कीसा ॥  
 मम भुज सागर बल जल पूरा । जहँ बूड़े बहु सुर नर सूरा ॥  
 बीस पयोधि अगाध अपारा । को अस बीर जो पाइहि पारा ॥  
 दिगपालन्ह मैं नीर भरावा । भूप सुजस खल मोहि सुनावा ॥  
 जौं पै समर सुभट तव नाथा । पुनि पुनि कहसि जासु गुन गाथा ।  
 तौ बसीठ पठवत केहि काजा । रिपु सन प्रीति करत नहिं लाजा ॥  
 हरगिरि मथन निरखु मम बाहू । पनि सठ कपि निज प्रभुहि सराहू ॥  
 दो० सूर कवन रावन सरिस स्वकर काटि जेहिं सीस ।  
 हुने अनल अति हरष बहु बार साखि गौरीस ॥ 28  
 जरत बिलोकेउँ जबहिं कृपाला । बिधि के लिखे अंक निज भाला ॥  
 नर केँ कर आपन बध बाँची । हसेउँ जानि बिधि गिरा असौँची ॥  
 सोउ मन समुझि त्रास नहिं मोरें । लिखा बिरंचि जरठ मति भोरें ॥  
 आन बीर बल सठ मम आगें । पुनि पुनि कहसि लाज पति त्यागें ॥  
 कह अंगद सलज्ज जग माहीं । रावन तोहि समान कोउ नाहीं ॥  
 लाजवंत तव सहज सुभाऊ । निज मुख निज गुन कहसि न काऊ ॥  
 सिर अरु सैल कथा चित रही । ताते बार बीस तैं कही ॥  
 सो भुजबल राखेहु उर घाली । जीतेहु सहसबाहु बलि बाली ॥  
 सुनु मतिमंद देहि अब पूरा । काटें सीस कि होइअ सूरा ॥  
 इंद्रजालि कहूँ कहिअ न बीरा । काटइ निज कर सकल सरीरा ॥  
 दो० जरहिं पतंग मोह बस भार बहहिं खर बृंद ।  
 ते नहिं सूर कहावहिं समुझि देखु मतिमंद ॥ 29  
 अब जनि बतबढ़ाव खल करही । सुनु मम बचन मान परिहरही ॥  
 दसमुख मैं न बसीठीं आयउँ । अस बिचारि रघुबीर पठायउँ ॥  
 बार बार अस कहइ कृपाला । नहिं गजारि जसु बधेँ सृकाला ॥  
 मन महूँ समुझि बचन प्रभु केरे । सहेउँ कठोर बचन सठ तेरे ॥  
 नाहिं त करि मुख भंजन तोरा । लै जातेउँ सीतहि बरजोरा ॥  
 जानेउँ तव बल अधम सुरारी । सूनें हरि आनिहि परनारी ॥  
 तैं निसिचरपति गर्ब बहूता । मैं रघुपति सेवक कर दूता ॥  
 जौं न राम अपमानहि डरऊँ । तोहि देखत अस कौतुक करऊँ ॥  
 दो० तोहि पटकि महि सेन हति चौपट करि तव गाउँ ।  
 तव जुबन्तिह समेत सठ जनकसुतहि लै जाउँ ॥ 30  
 जौं अस करौं तदपि न बड़ाई । मुएहि बधेँ नहिं कछु मनुसाई ॥  
 कौल कामबस कृपिन बिमूढ़ा । अति दरिद्र अजसी अति बूढ़ा ॥  
 सदा रोगबस संतत कोधी । बिष्नु बिमुख श्रुति संत बिरोधी ॥  
 तनु पोषक निंदक अघ खानो । जीवत सव सम चौदह प्रानी ॥

अस बिचारि खल बधुँ न तोही । अब जनि रिस उपजावसि मोही ॥  
 सुनि सकोप कह निसिचर नाथा । अधर दसन दसि मीजत हाथा ॥  
 रे कपि अधम मरन अब चहसी । छोटे बदन बात बड़ि कहसी ॥  
 कटु जल्पसि जड़ कपि बल जाके । बल प्रताप बुधि तेज न तार्के ॥  
 दो० अगुन अमान जानि तेहि दीन्ह पिता बनबास ।  
 सो दुख अरु जुबती बिरह पुनि निसि दिन मम त्रास ॥ 31 (क)  
 जिन्ह के बल कर गर्ब तोहि अइसे मनुज अनेक ।  
 खाहिं निसाचर दिवस निसि मूढ समुझु तजि टेक ॥ 31 (ख)  
 जब तेहिं कीन्हि राम कै निंदा । कोधवंत अति भयउ कपिंदा ॥  
 हरि हर निंदा सुनइ जो काना । होइ पाप गोघात समाना ॥  
 कटकटान कपिकुंजर भारी । दुहु भुजदंड तमकि महि मारी ॥  
 डोलत धरनि सभासद खसे । चले भाजि भय मारुत ग्रसे ॥  
 गिरत सँभारि उठा दसकंधर । भूतल परे मुकुट अति सुंदर ॥  
 कछु तेहिं लै निज सिरन्हि सँवारे । कछु अंगद प्रभु पास पबारे ॥  
 आवत मुकुट देखि कपि भागे । दिनहीं लूक परन बिधि लागे ॥  
 की रावन करि कोप चलाए । कुलिस चारि आवत अति धाए ॥  
 कह प्रभु हँसि जनि हृदयें डेराहू । लूक न असनि केतु नहिं राहू ॥  
 ए किरीट दसकंधर केरे । आवत बालितनय के प्रेरे ॥  
 दो० तरकि पवनसुत कर गहे आनि धरे प्रभु पास ।  
 कौतुक देखहिं भालु कपि दिनकर सरिस प्रकास ॥ 32क)  
 उहाँ सकोपि दसानन सब सन कहत रिसाइ ।  
 धरहु कपिहि धरि मारहु सुनि अंगद मुसुकाइ ॥ 32 (ख)  
 मर्कटहीन करहु महि जाई । जिअत धरहु तापस द्वौ भाई ॥  
 पुनि सकोप बोलेउ जुबराजा । गाल बजावत तोहि न लाजा ॥  
 मरु गर काटि निलज कुलघाती । बल बिलोकि बिहरति नहिं छाती ॥  
 रे त्रिय चोर कुमारग गामी । खल मल रासि मंद मति कामी ॥  
 सन्यपात जल्पसि दुर्बादा । भएसि कालबस खल मनुजादा ॥  
 याको फलु पावहिगो आगे । बानर भालु चपेटन्हि लागे ॥  
 राम मनुज बोलत असि बानी । गिरहिं न तव रसना अभिमानी ॥  
 गिरिहहिं रसना संसय नाही । सिरन्हि समेत समर महि माहीं ॥  
 सो० तव सोनित कीं प्यास तृषित राम सायक निकर ।  
 तजुँ तोहि तेहि त्रास कटु जल्पक निसिचर अधम ॥ 33  
 मैं तव दसन तोरिबे लायक । आयसु मोहि न दीन्ह रघुनायक ॥  
 असि रिस होति दसउ मुख तोरौं । लंका गहि समुद्र महेँ बोरौं ॥  
 गूलरि फल समान तव लंका । बसहु मध्य तुम्ह जंतु असंका ॥  
 मैं बानर फल खात न बारा । आयसु दीन्ह न राम उदारा ॥  
 जुगुति सुनत रावन मुसुकाई । मूढ सिखिहि कहें बहुत झुठाई ॥  
 बालि न कबहुँ गाल अस मारा । मिलि तपसिन्ह तैं भएसि लबारा ॥  
 साँचेहुँ मैं लबार भुज बीहा । जौं न उपायिउँ तव दस जीहा ॥  
 समुझि राम प्रताप कपि कोपा । सभा माझ पन करि पद रोपा ॥  
 जौं मम चरन सकसि सठ टारी । फिरहिं रामु सीता मैं हारी ॥  
 सुनहु सुभट सब कह दससीसा । पद गहि धरनि पछारहु कीसा ॥  
 इंद्रजीत आदिक बलवाना । हरषि उठे जहें तहें भट नाना ॥

झपटहिं करि बल बिपुल उपाई । पद न टरइ बैठहिं सिरु नाई ॥  
 पुनि उठि झपटहिं सुर आराती । टरइ न कीस चरन एहि भौंती ॥  
 पुरुष कुजोगी जिमि उरगारी । मोह बिरुप नहिं सकहिं उपारी ॥  
 दो० कोटिन्ह मेघनाद सम सुभट उठे हरषाइ ।  
 झपटहिं तरै न कपि चरन पुनि बैठहिं सिर नाइ ॥ 34 (क)  
 भूमि न छौंड़त कपि चरन देखत रिपु मद भाग ।  
 कोटि बिघ्न ते संत कर मन जिमि नीति न त्याग ॥ 34 (ख)  
 कपि बल देखि सकल हिये हारे । उठा आपु कपि के परचारे ॥  
 गहत चरन कह बालिकुमारा । मम पद गहे न तोर उबारा ॥  
 गहसि न राम चरन सठ जाई । सुनत फिरा मन अति सकुचाई ॥  
 भयउ तेजहत श्री सब गई । मध्य दिवस जिमि ससि सोहई ॥  
 सिंघासन बैठेउ सिर नाई । मानहुँ संपति सकल गेवाई ॥  
 उमा राम की भृकुटि बिलासा । होइ बिस्व पुनि पावइ नासा ॥  
 तून ते कुलिस कुलिस तून करई । तासु दूत पन कहु किमि टरई ॥  
 पुनि कपि कही नीति बिधि नाना । मान न ताहि कालु निअराना ॥  
 रिपु मद मथि प्रभु सुजसु सुनायो । यह कहि चल्यो बालि नृप जायो ॥  
 हतौ न खेत खेलाइ खेलाई । तोहि अबहिं का करौं बड़ाई ॥  
 प्रथमहिं तासु तनय कपि मारा । सो सुनि रावन भयउ दुखारा ॥  
 जातुधान अंगद पन देखी । भय ब्याकुल सब भए बिसेषी ॥  
 दो० रिपु बल धरषि हरषि कपि बालितनय बल पुंज ।  
 पुलक सरीर नयन जल गहे राम पद कंज ॥ 35 (क)  
 सौंझ जानि दसकंधर भवन गयउ बिलखाइ ।  
 मंदोदरीं रावनहि बहुरि कही समुझाइ ॥ 35 (ख)  
 कंत समुझि मन तजहु कुमतिही । सोह न समर तुम्हहि रघुपतिही ॥  
 रामानुज लघु रेख खचाई । सोउ नहिं नाघेहु असि मनुसाई ॥  
 पिय तुम्ह ताहि जितब संग्रामा । जाके दूत केर यह कामा ॥  
 कौतुक सिंधु नाधि तव लंका । आयउ कपि केहरी असंका ॥  
 रखवारे हति बिपिन उजारा । देखत तोहि अच्छ तेहिं मारा ॥  
 जारि सकल पुर कीन्हेसि छारा । कहौं रहा बल गर्ब तुम्हारा ॥  
 अब पति मृषा गाल जनि मारहु । मोर कहा कछु हृदये बिचारहु ॥  
 पति रघुपतिहि नृपति जनि मानहु । अग जग नाथ अतुल बल जानहु ॥  
 बान प्रताप जान मारीचा । तासु कहा नहिं मानेहि नीचा ॥  
 जनक सभौं अगनित भूपाला । रहे तुम्हउ बल अतुल बिसाला ॥  
 भंजि धनुष जानकी बिआही । तब संग्राम जितेहु किन ताही ॥  
 सूपनखा कै गति तुम्ह देखी । तदपि हृदये नहिं लाज बिसेषी ॥  
 दो० बधि बिराध खर दूषनहि लीलाँ हत्यो कबंध ।  
 खल मनुजाद बध्यो बहु तेहि जानहु दसकंध ॥ 36  
 जेहिं जलनाथ बंधायउ हेला । उतरे प्रभु दल सहित सुबेला ॥  
 कारुनीक दिनकर कुल केतू । दूत पठायउ तव हित हेतू ॥  
 सभा माझ जेहिं तव बल मथा । करि बरुथ महुँ मृगपति जथा ॥  
 अंगद हनुमत अनुचर जाके । रन बाँकुरे बीर अति बाँके ॥  
 तेहि कहे पिय पुनि पुनि नर कहहू । मुघा मान ममता मद बहहू ॥  
 अहह कंत कृत राम बिरोधा । काल बिबस मन उपज न बोधा ॥

काल दंड गहि काहु न मारा । हरइ धर्म बल बुद्धि बिचारा ॥  
 निकट काल जेहि आवत साई । तेहि भ्रम होइ तुम्हारिहि नाई ॥  
 दो० दुइ सुत मरे दहेउ पुर अजहुँ पूर पिय देहु ।  
 कृपासिंधु रघुनाथ भजि नाथ बिमल जसु लेहु ॥ 37  
 नारि बचन सुनि बिसिख समाना । सभौ गयउ उठि होत बिहाना ॥  
 बैठ जाइ सिंघासन फूली । अति अभिमान त्रास सब भूली ॥  
 इहाँ राम अंगदहि बोलावा । आइ चरन पंकज सिरु नावा ॥  
 अति आदर समीप बैठारी । बोले बिहँसि कृपाल खरारी ॥  
 बालितनय कौतुक अति मोही । तात सत्य कहु पूछउँ तोही ॥  
 रावनु जातुधान कुल टीका । भुज बल अतुल जासु जग लीका ॥  
 तासु मुकुट तुम्ह चारि चलाए । कहहु तात कवनी बिधि पाए ॥  
 सुनु सबंग्य प्रनत सुखकारी । मुकुट न होहिं भूप गुन चारी ॥  
 साम दाम अरु दंड बिभेदा । नृप उर बसहिं नाथ कह बेदा ॥  
 नीति धर्म के चरन सुहाए । अस जियँ जानि नाथ पहिं आए ॥  
 दो० धर्महीन प्रभु पद बिमुख काल बिबस दससीस ।  
 तेहि परिहरि गुन आए सुनहु कोसलाधीस ॥ 38 (क)  
 परम चतुरता श्रवन सुनि बिहँसे रामु उदार ।  
 समाचार पुनि सब कहे गढ़ के बालिकुमार ॥ 38 (ख)  
 रिपु के समाचार जब पाए । राम सचिव सब निकट बोलाए ॥  
 लंका बाँके चारि दुआरा । केहि बिधि लागिअ करहु बिचारा ॥  
 तब कपीस रिच्छेस बिभीषन । सुमिरि हृदयँ दिनकर कुल भूषन ॥  
 करि बिचार तिन्ह मंत्र दूढ़ावा । चारि अनी कपि कटक बनावा ॥  
 जथाजोग सेनापति कीन्है । जूथप सकल बोलि तब लीन्है ॥  
 प्रभु प्रताप कहि सब समुझाए । सुनि कपि सिंघनाद करि धाए ॥  
 हरषित राम चरन सिर नावहिं । गहि गिरि सिखर बीर सब धावहिं ॥  
 गर्जहिं तर्जहिं भालु कपीसा । जय रघुबीर कोसलाधीसा ॥  
 जानत परम दुर्ग अति लंका । प्रभु प्रताप कपि चले असंका ॥  
 घटाटोप करि चहुँ दिसि घेरी । मुखहिं निसान बजावहिं भेरी ॥  
 दो० जयति राम जय लछिमन जय कपीस सुग्रीव ।  
 गर्जहिं सिंघनाद कपि भालु महा बल सीव ॥ 39  
 लंकाँ भयउ कोलाहल भारी । सुना दसानन अति अहँकारी ॥  
 देखहु बनरन्ह केरि ढिठाई । बिहँसि निसाचर सेन बोलाई ॥  
 आए कीस काल के प्रेरे । छुधावंत सब निसिचर मेरे ॥  
 अस कहि अट्टहास सठ कीन्हा । गृह बैठें अहार बिधि दीन्हा ॥  
 सुभट सकल चारिहुँ दिसि जाहू । धरि धरि भालु कीस सब खाहू ॥  
 उमा रावनहि अस अभिमाना । जिमि टिटिटभ खग सूत उताना ॥  
 चले निसाचर आयसु मागी । गहि कर भिंडिपाल बर साँगी ॥  
 तोमर मुद्गर परसु प्रचंडा । सूल कृपान परिघ गिरिखंडा ॥  
 जिमि अरुनोपल निकर निहारी । धावहिं सठ खग मांस अहारी ॥  
 चोंच भंग दुख तिन्हहि न सूझा । तिमि धाए मनुजाद अबूझा ॥  
 दो० नानायुध सर चाप धर जातुधान बल बीर ।  
 कोट कँगूरन्हि चढ़ि गए कोटि कोटि रनधीर ॥ 40  
 कोट कँगूरन्हि सोहहिं कैसे । मेरु के सृगनि जनु घन बैसे ॥

बाजहिं ढोल निसान जुझारु । सुनि धुनि होइ भटन्हि मन चारु ॥  
 बाजहिं भेरि नफीरि अपारा । सुनि कादर उर जाहिं दरारा ॥  
 देखिन्ह जाइ कपिन्ह के ठट्टा । अति बिसाल तनु भालु सुभट्टा ॥  
 धावहिं गनहिं न अवघट घाटा । पर्वत फोरि करहिं गहि बाटा ॥  
 कटकटाहिं कोटिन्ह भट गर्जहिं । दसन ओठ काटहिं अति तर्जहिं ॥  
 उत रावन इत राम दोहाई । जयति जयति जय परी लराई ॥  
 निसिचर सिखर समूह ढहावहिं । कूदि धरहिं कपि फेरि चलावहिं ॥

छं० धरि कुधर खंड प्रचंड मर्कट भालु गढ़ पर डारहीं ।  
 झपटहिं चरन गहि पटकि महि भजि चलत बहुरि पचारहीं ॥  
 अति तरल तरुन प्रताप तरपहिं तमकि गढ़ चढ़ि चढ़ि गए ।  
 कपि भालु चढ़ि मंदिरन्ह जहें तहें राम जसु गावत भए ॥

दो० एकु एकु निसिचर गहि पुनि कपि चले पराइ ।  
 ऊपर आपु हेठ भट गिरहिं धरनि पर आइ ॥ 41

राम प्रताप प्रबल कपिजूथा । मर्दहिं निसिचर सुभट बरूथा ॥  
 चढ़े दुर्ग पुनि जहें तहें बानर । जय रघुबीर प्रताप दिवाकर ॥  
 चले निसाचर निकर पराई । प्रबल पवन जिमि घन समुदाई ॥  
 हाहाकार भयउ पुर भारी । रोवहिं बालक आतुर नारी ॥  
 सब मिलि देहिं रावनहिं गारी । राज करत एहिं मृत्यु हँकारी ॥  
 निज दल बिचल सुनी तेहिं काना । फेरि सुभट लंकेंस रिसाना ॥  
 जो रन बिमुख सुना मैं काना । सो मैं हतब कराल कृपाना ॥  
 सर्बसु खाइ भोग करि नाना । समर भूमि भए बल्लभ प्राना ॥  
 उग्र बचन सुनि सकल डेराने । चले कोध करि सुभट लजाने ॥  
 सन्मुख मरन बीर कै सोभा । तब तिन्ह तजा प्रान कर लोभा ॥

दो० बहु आयुध धर सुभट सब भिरहिं पचारि पचारि ।

ब्याकुल किए भालु कपि परिघ त्रिसूलन्हि मारि ॥ 42

भय आतुर कपि भागन लागे । जद्यपि उमा जीतिहहिं आगे ।  
 कोउ कह कहें अंगद हनुमंता । कहें नल नील दुबिद बलवंता ॥  
 निज दल बिकल सुना हनुमाना । पच्छिम द्वार रहा बलवाना ॥  
 मेघनाद तहें करइ लराई । टूट न द्वार परम कठिनाई ॥  
 पवनतनय मन भा अति कोधा । गर्जेउ प्रबल काल सम जोधा ॥  
 कूदि लंक गढ़ ऊपर आवा । गहि गिरि मेघनाद कहुं धावा ॥  
 भजेउ रथ सारथी निपाता । ताहि हृदयें महुं मारेसि लाता ॥  
 दुसरें सूत बिकल तेहि जाना । स्यंदन घालि तुरत गृह आना ॥

दो० अंगद सुना पवनसुत गढ़ पर गयउ अकेल ।

रन बाँकुरा बालिसुत तरकि चढ़ेउ कपि खेल ॥ 43

जुद्ध बिरुद्ध कुद्ध द्वौ बंदर । राम प्रताप सुमिरि उर अंतर ॥  
 रावन भवन चढ़े द्वौ धाई । करहिं कोसलाधीस दोहाई ॥  
 कलस सहित गहि भवनु ढहावा । देखि निसाचरपति भय पावा ॥  
 नारि बूंद कर पीटहिं छाती । अब दुइ कपि आए उतपाती ॥  
 कपिलीला करि तिन्हहिं डेरावहिं । रामचंद्र कर सुजसु सुनावहिं ॥  
 पुनि कर गहि कंचन के खंभा । कहेन्हि करिअ उतपात अरंभा ॥  
 गर्जि परे रिपु कटक मझारी । लागे मर्दै भुज बल भारी ॥  
 काहुहि लात चपेटन्हि केहू । भजहु न रामहि सो फल लेहू ॥

दो० एक एक सों मर्दहिं तोरि चलावहिं मुंड ।  
 रावन आगें परहिं ते जनु फूटहिं दधि कुंड ॥ 44  
 महा महा मुखिआ जे पावहिं । ते पद गहि प्रभु पास चलावहिं ॥  
 कहइ बिभीषनु तिन्ह के नामा । देहिं राम तिन्हहू निज धामा ॥  
 खल मनुजाद द्विजामिष भोगी । पावहिं गति जो जाचत जोगी ॥  
 उमा राम मृदुचित करुनाकर । बयर भाव सुमिरत मोहि निसिचर ॥  
 देहिं परम गति सो जियें जानी । अस कृपाल को कहहु भवानी ॥  
 अस प्रभु सुनि न भजहिं भ्रम त्यागी । नर मतिमंद ते परम अभागी ॥  
 अंगद अरु हनुमंत प्रबेसा । कीन्ह दुर्ग अस कह अवधेसा ॥  
 लंकाँ द्वौ कपि सोहहिं कैसैं । मथहिं सिंधु दुइ मंदर जैसैं ॥

दो० भुज बल रिपु दल दलमलि देखि दिवस कर अंत ।  
 कूदे जुगल बिगत श्रम आए जहें भगवंत ॥ 45  
 राम कृपा करि जुगल निहारे । भए बिगतश्रम परम सुखारे ॥  
 गए जानि अंगद हनुमाना । फिरे भालु मर्कट भट नाना ॥  
 जातुधान प्रदोष बल पाई । धाए करि दससीस दोहाई ॥  
 निसिचर अनी देखि कपि फिरे । जहें तहें कटकटाइ भट भिरे ॥  
 द्वौ दल प्रबल पचारि पचारी । लरत सुभट नहिं मानहिं हारी ॥  
 महाबीर निसिचर सब कारे । नाना बरन बलीमुख भारे ॥  
 सबल जुगल दल समबल जोधा । कौतुक करत लरत करि कोधा ॥  
 प्राबिट सरद पयोद घनेरे । लरत मनहुं मारुत के प्रेरे ॥  
 अनिप अकंपन अरु अतिकाया । बिचलत सेन कीन्हि इन्ह माया ॥  
 भयउ निमिष महें अति अधियारा । बृष्टि होइ रुधिरापल छारा ॥

दो० देखि निबिड़ तम दसहुं दिसि कपिदल भयउ खभार ।  
 एकहि एक न देखई जहें तहें करहिं पुकार ॥ 46  
 सकल मरमु रघुनायक जाना । लिए बोलि अंगद हनुमाना ॥  
 समाचार सब कहि समुझाए । सुनत कोपि कपिकुंजर धाए ॥  
 पुनि कृपाल हँसि चाप चढ़ावा । पावक सायक सपदि चलावा ॥  
 भयउ प्रकास कतहुं तम नाही । ग्यान उदर्यें जिमि संसय जाहीं ॥  
 भालु बलीमुख पाइ प्रकासा । धाए हरष बिगत श्रम त्रासा ॥  
 हनूमान अंगद रन गाजे । हॉक सुनत रजनीचर भाजे ॥  
 भागत भट पटकहिं धरि धरनी । करहिं भालु कपि अद्भुत करनी ॥  
 गहि पद डारहिं सागर माहीं । मकर उरग झष धरि धरि खाहीं ॥

दो० कछु मारे कछु घायल कछु गढ़ चढ़े पराइ ।  
 गर्जहिं भालु बलीमुख रिपु दल बल बिचलाइ ॥ 47  
 निसा जानि कपि चारिउ अनी । आए जहों कोसला धनी ॥  
 राम कृपा करि चितवा सबही । भए बिगतश्रम बानर तबही ॥  
 उहाँ दसानन सचिव हँकारे । सब सन कहेसि सुभट जे मारे ॥  
 आधा कटकु कपिन्ह संघारा । कहहु बेगि का करिअ बिचारा ॥  
 माल्यवंत अति जरठ निसाचर । रावन मातु पिता मंत्री वर ॥  
 बोला बचन नीति अति पावन । सुनहु तात कछु मोर सिखावन ॥  
 जब ते तुम्ह सीता हरि आनी । असगुन होहिं न जाहिं बखानी ॥  
 बेद पुरान जासु जसु गायो । राम बिमुख काहुं न सुख पायो ॥

दो० हिरन्याच्छ भ्राता सहित मधु कैटभ बलवान ।

जेहिं मारे सोइ अवतरेउ कृपासिंधु भगवान ॥ 48 (क)

मासपारायण, पच्चीसवॉ विश्राम

कालरूप खल बन दहन गुनागार घनबोध ।

सिव बिरंचि जेहिं सेवहिं तासों कवन बिरोध ॥ 48 (ख)

परिहरि बयरु देहु बैदेही । भजहु कृपानिधि परम सनेही ॥  
ताके बचन बान सम लागे । करिआ मुह करि जाहि अभागे ॥  
बूढ़ भएसि न त मरतेउँ तोही । अब जनि नयन देखावसि मोही ॥  
तेहिं अपने मन अस अनुमाना । बध्यो चहत एहि कृपानिधाना ॥  
सो उठि गयउ कहत दुर्बादा । तब सकोप बोलेउ घननादा ॥  
कौतुक प्रात देखिअहु मोरा । करिहउँ बहुत कहौं का थोरा ॥  
सुनि सुत बचन भरोसा आवा । प्रीति समेत अंक बैठावा ॥  
करत बिचार भयउ भिनुसारा । लागे कपि पुनि चहूँ दुआरा ॥  
कोपि कपिन्ह दुर्घट गढु घेरा । नगर कोलाहलु भयउ घनेरा ॥  
बिबिधायुध धर निसिचर धाए । गढ ते पर्वत सिखर ढहाए ॥

छं० ढाहे महीधर सिखर कोटिन्ह बिबिध बिधि गोला चले ।  
घहरात जिमि पबिपात गर्जत जनु प्रलय के बादले ॥  
मर्कट बिकट भट जुटत कटत न लटत तन जर्जर भए ।  
गहि सैल तेहि गढ पर चलावहिं जहँ सो तहँ निसिचर हए ॥

दो० मेघनाद सुनि श्रवन अस गढु पुनि छेंका आइ ।  
उतरयो बीर दुर्ग तें सन्मुख चलयो बजाइ ॥ 49  
कहँ कोसलाधीस द्वौ भ्राता । धन्वी सकल लोक बिख्याता ॥  
कहँ नल नील दुबिद सुग्रीवा । अंगद हनूमंत बल सींवा ॥  
कहौं बिभीषनु भ्राताद्रोही । आजु सबहि हठि मारउँ ओही ॥  
अस कहि कठिन बान संधाने । अतिसय कोध श्रवन लगि ताने ॥  
सर समूह सो छाडै लागा । जनु सपच्छ धावहिं बहु नागा ॥  
जहँ तहँ परत देखिअहिं बानर । सन्मुख होइ न सके तेहि अवसर ॥  
जहँ तहँ भागि चले कपि रीछा । बिसरी सबहि जुद्ध कै ईछा ॥  
सो कपि भालु न रन महँ देखा । कीन्हेसि जेहि न प्रान अवसेषा ।

दो० दस दस सर सब मारेसि परे भूमि कपि बीर ।  
सिंहनाद करि गर्जा मेघनाद बल धीर ॥ 50  
देखि पवनसुत कटक बिहाला । कोधवंत जनु धायउ काला ॥  
महासैल एक तुरत उपारा । अति रिस मेघनाद पर डारा ॥  
आवत देखि गयउ नभ सोई । रथ सारथी तुरग सब खोई ॥  
बार बार पचार हनुमाना । निकट न आव मरमु सो जाना ॥  
रघुपति निकट गयउ घननादा । नाना भौंति करेसि दुर्बादा ॥  
अस्त्र सस्त्र आयुध सब डारे । कौतुकहीं प्रभु काटि निवारे ॥  
देखि प्रताप मूढ़ खिसिआना । करै लाग माया बिधि नाना ॥  
जिमि कोउ करै गरुड़ सैं खेला । डरपावै गहि स्वल्प सपेला ॥

दो० जासु प्रबल माया बस सिव बिरंचि बड़ छोट ।  
ताहि दिखावइ निसिचर निज माया मति खोट ॥ 51  
नभ चढि बरष बिपुल अंगारा । महि ते प्रगट होहिं जलधारा ॥  
नाना भौंति पिसाच पिसाची । मारु काटु धुनि बोलहिं नाची ॥

बिष्टा पूय रुधिर कच हाड़ा । बरषइ कबहुँ उपल बहु छाड़ा ॥  
बरषि धूरि कीन्हेसि अँधिआरा । सूझ न आपन हाथ पसारा ॥  
कपि अकुलाने माया देखें । सब कर मरन बना एहि लेखें ॥  
कौतुक देखि राम मुसुकाने । भए समीत सकल कपि जाने ॥  
एक बान काटी सब माया । जिमि दिनकर हर तिभिर निकाया ॥  
कृपादृष्टि कपि भालु बिलोके । भए प्रबल रन रहहिं न रोके ॥

दो० आयसु मागि राम पहिं अंगदादि कपि साथ ।

लछिमन चले कुद्ध होइ बान सरासन हाथ ॥ 52

छतज नयन उर बाहु बिसाला । हिमगिरि निभ तनु कछु एक लाला ॥  
इहाँ दसानन सुभट पठाए । नाना अस्त्र सस्त्र गहि धाए ॥  
भूधर नख बिटपायुध धारी । धाए कपि जय राम पुकारी ॥  
भिरे सकल जोरिहि सन जोरी । इत उत जय इच्छा नहिं थोरी ॥  
मुठिकन्ह लातन्ह दातन्ह काटहिं । कपि जयसील मारि पुनि डाटहिं ॥  
मारु मारु धरु धरु धरु मारु । सीस तोरि गहि भुजा उपारु ॥  
असि रव पूरि रही नव खंडा । धावहिं जहें तहें रुंड प्रचंडा ॥  
देखहिं कौतुक नभ सुर बूँदा । कबहुँक बिसमय कबहुँ अनंदा ॥

दो० रुधिर गाड़ भरि भरि जम्यो ऊपर धूरि उड़ाइ ।

जनु अँगार रासिन्ह पर मृतक धूम रह्यो छाइ ॥ 53

घायल बीर बिराजहिं कैसे । कुसुमित किंसुक के तरु जैसे ॥  
लछिमन मेघनाद द्वौ जोधा । भिरहिं परसपर करि अति कोधा ॥  
एकहि एक सकइ नहिं जीती । निसिचर छल बल करइ अनीती ॥  
कोधवंत तब भयउ अनंता । भंजेउ रथ सारथी तुरंता ॥  
नाना बिधि प्रहार कर सेषा । राच्छस भयउ प्रान अवसेषा ॥  
रावन सुत निज मन अनुमाना । संकठ भयउ हरिहि मम प्राना ॥  
बीरघातिनी छाड़िसि साँगी । तेज पुंज लछिमन उर लागी ॥  
मुरुछा भई सक्ति के लागें । तब चलि गयउ निकट भय त्यागें ॥

दो० मेघनाद सम कोटि सत जोधा रहे उठाइ ।

जगदाधार सेष किमि उठै चले खिसिआइ ॥ 54

सुनु गिरिजा कोधानल जासू । जारइ भुवन चारिदस आसू ॥  
सक संग्राम जीति को ताही । सेवहिं सुर नर अग जग जाहीं ॥  
यह कौतूहल जानइ सोई । जा पर कृपा राम कै होई ॥  
संध्या भइ फिरी द्वौ बाहनी । लगे संभारन निज निज अनी ।  
ब्यापक ब्रह्म अजित भुवनेस्वर । लछिमन कहौ बूझ करुनाकर ॥  
तब लागि लै आयउ हनुमाना । अनुज देखि प्रभु अति दुख माना ॥  
जामवंत कह बैद सुषेना । लंकाँ रहइ को पठई लेना ॥  
धरि लघु रूप गयउ हनुमंता । आनेउ भवन समेत तुरंता ॥

दो० राम पदारबिंद सिर नायउ आइ सुषेन ।

कहा नाम गिरि औषधी जाहु पवनसूत लेन ॥ 55

राम चरन सरसिज उर राखी । चला प्रभंजन सुत बल भाषी ॥  
उहाँ दूत एक मरमु जनाव । रावनु कालनेमि गृह आवा ॥  
दसमुख कहा मरमु तेहि सुना । पुनि पुनि कालनेमि सिरु धुना ॥  
देखत तुम्हहि नगरु जेहिं जारा । तासु पंथ को रोकन पारा ॥  
भजि रघुपति करु हित आपना । छोंड़हु नाथ मृषा जल्पना ॥

नील कंज तनु सुंदर स्यामा । हृदयें राखु लोचनाभिरामा ॥  
 मैं तैं मोर मूढता त्यागू । महा मोह निसि सूतत जागू ॥  
 काल ब्याल कर भच्छक जोई । सपनेहुँ समर कि जीतिअ सोई ॥  
 दो० सुनि दसकंठ रिसान अति तेहिं मन कीन्ह बिचार ।  
 राम दूत कर मरौं बरु यह खल रत मल भार ॥ 56  
 अस कहि चला रचिसि मग माया । सर मंदिर बर बाग बनाया ॥  
 मारुतसुत देखा सुभ आश्रम । मुनिहि बूझि जल पियौं जाइ श्रम ॥  
 राच्छस कपट बेष तहँ सोहा । मायापति दूतहि चह मोहा ॥  
 जाइ पवनसुत नायउ माथा । लाग सो कहै राम गुन गाथा ॥  
 होत महा रन रावन रामहिं । जितिहहिं राम न संसय या महिं ।  
 इहाँ भएँ मैं देखउँ भाई । ग्यान दृष्टि बल मोहि अधिकाई ॥  
 मागा जल तेहिं दीन्ह कमंडल । कह कपि नहिं अघाउँ थोरें जल ॥  
 सर मज्जन करि आतुर आवहु । दिच्छा देउँ ग्यान जेहिं पावहु ॥

दो० सर पैठत कपि पद गहा मकरीं तब अकुलान ।  
 मारी सो धरि दिव्य तनु चली गगन चढ़ि जान ॥ 57  
 कपि तव दरस भइउँ निष्पापा । मिटा तात मुनिबर कर सापा ॥  
 मुनि न होइ यह निसिचर घोरा । मानहु सत्य बचन कपि मोरा ॥  
 अस कहि गई अपछरा जबहीं । निसिचर निकट गयउ कपि तबहीं ॥  
 कह कपि मुनि गुरदछिना लेहू । पाछें हमहि मंत्र तुम्ह देहू ॥  
 सिर लंगूर लपेटि पछारा । निज तनु प्रगटेसि मरती बारा ॥  
 राम राम कहि छाड़ेसि प्राणा । सुनि मन हरषि चलेउ हनुमाना ॥  
 देखा सैल न औषध चीन्हा । सहसा कपि उपारि गिरि लीन्हा ॥  
 गहि गिरि निसि नभ धावत भयऊ । गिरि त्रिकूट ऊपर कपि गयऊ ॥  
 उहाँ राम लछिमनहि निहारी । बोले बचन मनुज अनुसारी ॥  
 अर्ध राति गइ कपि नहिं आयउ । राम उठाइ अनुज उर लायउ ॥  
 सकहु न दुखित देखि मोहि काऊ । बंधु सदा तव मृदुल सुभाऊ ॥  
 मम हित लागि तजेहु पितु माता । सहेहु बिपिन हिम आतप बाता ॥  
 सो अनुराग कहौं अब भाई । उठहु न सुनि मम बच बिकलाई ॥  
 जाँ जनतेउँ बन बंधु बिछोहू । पिता बचन मनतेउँ नहिं ओहू ॥  
 सुत बित नारि भवन परिवारा । होहिं जाहिं जग बारहिं बारा ॥  
 अस बिचारि जियें जागहु ताता । मिलहिं न जगत सहोदर भ्राता ॥  
 जथा पंख बिनु खग अति दीना । मनि बिनु फनि करिबर कर हीना ॥  
 अस मम जिवन बंधु बिनु तोही । जाँ जड़ दैव जिआवै मोही ॥  
 जैहउँ अवध कवन मुहु लाई । नारि हेतु प्रिय बंधु गँवाई ॥  
 बरु अपजस सहतेउँ जग माहीं । नारि हानि बिसेष छति नाहीं ॥  
 अब अपलोकु सोकु सुत तोरा । सहिहि निठुर कठोर उर मोरा ॥  
 निज जननी के एक कुमारा । तात तासु तुम्ह प्राण अधारा ॥  
 सौंपेसि मोहि तुम्हहि गहि पानी । सब बिधि सुखद परम हित जानी ॥  
 उतरु काह दैहउँ तेहि जाई । उठि किन मोहि सिखावहु भाई ॥  
 बहु बिधि सोचत सोच बिमोचन । ०वत सलिल राजिव दल लोचन ॥  
 उमा एक अखंड रघुराई । नर गति भगत कृपाल देखाई ॥

सो० प्रभु प्रलाप सुनि कान बिकल भए बानर निकर ।  
 आइ गयउ हनुमान जिमि करुना महेँ बीर रस ॥ 58

हरषि राम भेटेउ हनुमाना । अति कृतग्य प्रभु परम सुजाना ॥  
 तुरत बैद तब कीन्हि उपाई । उठि बैठे लछिमन हरषाई ॥  
 हृदयें लाइ प्रभु भेटेउ भ्राता । हरषे सकल भालु कपि ब्राता ॥  
 कपि पुनि बैद तहाँ पहुँचावा । जेहि बिधि तबहिं ताहि लइ आवा ॥  
 यह बृत्तांत दसानन सुनेऊ । अति बिषाद पुनि पुनि सिर धुनेऊ ॥  
 ब्याकुल कुंभकरन पहिं आवा । बिबिध जतन करि ताहि जगावा ॥  
 जागा निसिचर देखिअ कैसा । मानहं कालु देह धरि बैसा ॥  
 कुंभकरन बूझा कहु भाई । काहे तव मुख रहे सुखाई ॥  
 कथा कही सब तेहिं अभिमानी । जेहि प्रकार सीता हरि आनी ॥  
 तात कपिन्ह सब निसिचर मारे । महा महा जोधा संघारे ॥  
 दुर्मुख सुररिपु मनुज अहारी । भट अतिकाय अकंपन भारी ॥  
 अपर महोदर आदिक बीरा । परे समर महि सब रनधीरा ॥

दो० सुनि दसकंधर बचन तब कुंभकरन बिलखान ।

जगदंबा हरि आनि अब सठ चाहत कल्यान ॥ 59

भल न कीन्ह तैं निसिचर नाहा । अब मोहि आइ जगाएहि काहा ॥  
 अजहूँ तात त्यागि अभिमाना । भजहु राम होइहि कल्याना ॥  
 हैं दससीस मनुज रघुनायक । जाके हनुमान से पायक ॥  
 अहह बंधु तैं कीन्हि खोटाई । प्रथमहिं मोहि न सुनाएहि आई ॥  
 कीन्हेहु प्रभु बिरोध तेहि देवक । सिव बिरंचि सुर जाके सेवक ॥  
 नारद मुनि मोहि ग्यान जो कहा । कहतेउँ तोहि समय निरबहा ॥  
 अब भरि अंक भेंटु मोहि भाई । लोचन सुफल करौं मैं जाई ॥  
 स्याम गात सरसीरुह लोचन । देखौं जाइ ताप त्रय मोचन ॥

दो० राम रूप गुन सुमिरत मगन भयउ छन एक ।

रावन मागेउ कोटि घट मद अरु महिष अनेक ॥ 60

महिष खाइ करि मदिरा पाना । गर्जा बज्जाघात समाना ॥  
 कुंभकरन दुर्मद रन रंगा । चला दुर्ग तजि सेन न संगी ॥  
 देखि बिभीषनु आगें आयउ । परेउ चरन निज नाम सुनायउ ॥  
 अनुज उठाइ हृदयें तेहि लायो । रघुपति भक्त जानि मन भायो ॥  
 तात लात रावन मोहि मारा । कहत परम हित मंत्र बिचारा ॥  
 तेहिं गलानि रघुपति पहिं आयउँ । देखि दीन प्रभु के मन भायउँ ॥  
 सुनु सुत भयउ कालबस रावन । सो कि मान अब परम सिखावन ॥  
 धन्य धन्य तैं धन्य बिभीषन । भयहु तात निसिचर कुल भूषन ॥

दो० बचन कर्म मन कपट तजि भजेहु राम रनधीर ।

जाहु न निज पर सूझ मोहि भयउँ कालबस बीर ॥ 61

बंधु बचन सुनि चला बिभीषन । आयउ जहँ त्रैलोक बिभूषन ॥  
 नाथ भूधराकार सरीरा । कुंभकरन आवत रनधीरा ॥  
 एतना कपिन्ह सुना जब काना । किलकिलाइ धाए बलवाना ॥  
 लिए उठाइ बिटप अरु भूधर । कटकटाइ डारहिं ता ऊपर ॥  
 कोटि कोटि गिरि सिखर प्रहारा । करहिं भालु कपि एक एक बारा ॥  
 मुर्यो न मनु तनु टर्यो न टार्यो । जिमि गज अर्क फलनि को मार्यो ॥  
 तब मारुतसुत मुठिका हन्यो । पर्यो धरनि ब्याकुल सिर धुन्यो ॥  
 पुनि उठि तेहिं मारेउ हनुमंता । घुर्मित भूतल परेउ तुरंता ॥  
 पुनि नल नीलहि अवनि पछारेसि । जहँ तहँ पटकि पटकि भट डारेसि ॥

चली बलीमुख सेन पराई । अति भय त्रसित न कोउ समुहाई ॥  
दो० अंगदादि कपि मुरुछित करि समेत सुग्रीव ।

काँख दाबि कपिराज कहूँ चला अभित बल सीव ॥ 62

उमा करत रघुपति नरलीला । खेलत गरुड़ जिमि अहिगन मीला ॥  
भृकुटि भंग जो कालहि खाई । ताहि कि सोहइ ऐसि लराई ॥  
जग पावनि कीरति बिस्तरिहहिं । गाइ गाइ भवनिधि नर तरिहहिं ॥  
मुरुछा गइ मारुतसुत जागा । सुग्रीवहि तब खोजन लागा ॥  
सुग्रीवहु कै मुरुछा बीती । निबुकि गयउ तेहि मृतक प्रतीती ॥  
काटेसि दसन नासिका काना । गरजि अकास चलेउ तेहिं जाना ॥  
गहेउ चरन गहि भूमि पछारा । अति लाघवँ उठि पुनि तेहि मारा ॥  
पुनि आयउ प्रभु पहिं बलवाना । जयति जयति जय कृपानिधाना ॥  
नाक कान काटे जियँ जानी । फिरा कोध करि भइ मन ग्लानी ॥  
सहज भीम पुनि बिनु श्रुति नासा । देखत कपि दल उपजी त्रासा ॥

दो० जय जय जय रघुबंस मनि धाए कपि दै हूह ।

एकहि बार तासु पर छाड़ेन्हि गिरि तरु जूह ॥ 63

कुंभकरन रन रंग बिरुद्धा । सन्मुख चला काल जनु कुद्धा ॥  
कोटि कोटि कपि धरि धरि खाई । जनु टीडी गिरि गुहौं समाई ॥  
कोटिन्ह गहि सरीर सन मर्दा । कोटिन्ह मीजि मिलव महि गर्दा ॥  
मुख नासा श्रवनन्हि कीं बाटा । निसरि पराहिं भालु कपि ठाटा ॥  
रन मद मत्त निसाचर दर्पा । बिस्व ग्रसिहि जनु एहि बिधि अर्पा ॥  
मुरे सुभट सब फिरहिं न फेरे । सूझ न नयन सुनहिं नहिं टेरे ॥  
कुंभकरन कपि फौज बिडारी । सुनि धाई रजनीचर धारी ॥  
देखी राम बिकल कटकाई । रिपु अनीक नाना बिधि आई ॥

दो० सुनु सुग्रीव बिभीषन अनुज सँभारेहु सैन ।

मैं देखउँ खल बल दलहि बोले राजिवनैन ॥ 64

कर सारंग साजि कटि भाथा । अरि दल दलन चले रघुनाथा ॥  
प्रथम कीन्हि प्रभु धनुष टँकोरा । रिपु दल बधिर भयउ सुनि सोरा ॥  
सत्यसंध छौंड़ि सर लच्छा । कालसर्प जनु चले सपच्छा ॥  
जहँ तहँ चले बिपुल नाराचा । लगे कटन भट बिकट पिसाचा ॥  
कटहिं चरन उर सिर भुजदंडा । बहुतक बीर होंहि सत खंडा ॥  
घुर्मि घुर्मि घायल महि परहीं । उठि संभारि सुभट पुनि लरहीं ॥  
लागत बान जलद जिमि गाजहिं । बहुतक देखि कठिन सर भाजहिं ॥  
रुंड प्रचंड मुंड बिनु धावहिं । धरु धरु मारु मारु धुनि गावहिं ॥

दो० छन महुँ प्रभु के सायकन्हि काटे बिकट पिसाच ।

पुनि रघुबीर निषंग महुँ प्रबिसे सब नाराच ॥ 65

कुंभकरन मन दीख बिचारी । हति छन माझ निसाचर धारी ।  
भा अति कुद्ध महाबल बीरा । कियो मृगनायक नाद गँभीरा ॥  
कोपि महीधर लेइ उपारी । डारइ जहँ मर्कट भट भारी ॥  
आवत देखि सैल प्रभु भारे । सरन्हि काटि रज सम करि डारे ॥  
पुनि धनु तानि कोपि रघुनायक । छौंड़े अति कराल बहु सायक ॥  
तनु महुँ प्रबिसि निसरि सर जाहीं । जिमि दाभिनि घन माझ समाहीं ॥  
सोनित ऽवत सोह तन कारे । जनु कज्जल गिरि गेरु पनारे ॥  
बिकल बिलोकि भालु कपि धाए । बिहँसा जबहिं निकट कपि आए ॥

दो० महानाद करि गर्जा कोटि कोटि गहि कीस ।

महि पटकइ गजराज इव सपथ करइ दससीस ॥ 66

भागे भालु बलीमुख जूथा । बृक बिलोकि जिमि मेष बरूथा ॥  
चले भागि कपि भालु भवानी । बिकल पुकारत आरत बानी ॥  
यह निसिचर दकाल सम अहई । कपिकुल देस परन अब चहई ॥  
कृपा बारिधर राम खरारी । पाहि पाहि प्रनतारति हारी ॥  
सकरुन बचन सुनत भगवाना । चले सुधारि सरासन बाना ॥  
राम सेन निज पाछें घाली । चले सकोप महा बलसाली ॥  
खैंचि धनुष सर सत संधाने । छूटे तीर सरीर समाने ॥  
लागत सर धावा रिस भरा । कुधर डगमगत डोलति धरा ॥  
लीन्ह एक तेहिं सैल उपाटी । रघुकुल तिलक भुजा सोइ काटी ॥  
धावा बाम बाहु गिरि धारी । प्रभु सोउ भुजा काटि महि पारी ॥  
काटें भुजा सोह खल कैसा । पच्छहीन मंदर गिरि जैसा ॥  
उग्र बिलोकनि प्रभुहि बिलोका । ग्रसन चहत मानहुँ त्रैलोका ॥

दो० करि चिक्कार घोर अति धावा बदनु पसारि ।

गगन सिद्ध सुर त्रासित हा हा हेति पुकारि ॥ 67

सभय देव करुनानिधि जान्यो । श्रवन प्रजंत सरासनु तान्यो ॥  
बिसिख निकर निसिचर मुख भरेऊ । तदपि महाबल भूमि न परेऊ ॥  
सरन्हि भरा मुख सन्मुख धावा । काल त्रोन सजीव जनु आवा ॥  
तब प्रभु कोपि तीब्र सर लीन्हा । धर ते भिन्न तासु सिर कीन्हा ॥  
सो सिर परेउ दसानन आगें । बिकल भयउ जिमि फनि मनि त्यागें ॥  
धरनि घसइ धर धाव प्रचंडा । तब प्रभु काटि कीन्ह दुइ खंडा ॥  
परे भूमि जिमि नभ तें भूधर । हेठ दाबि कपि भालु निसाचर ॥  
तासु तेज प्रभु बदन समाना । सुर मुनि सबहिं अचंभव माना ॥  
सुर दुंदुभीं बजावहिं हरषहिं । अस्तुति करहिं सुमन बहु बरषहिं ॥  
करि बिनती सुर सकल सिधाए । तेही समय देवरिषि आए ॥  
गगनोपरि हरि गुन गन गाए । रुचिर बीररस प्रभु मन भाए ॥  
बेगि हतहु खल कहि मुनि गए । राम समर महि सोभत भए ॥

छं० संग्राम भूमि बिराज रघुपति अतुल बल कोमल धनी ।

श्रम बिंदु मुख राजीव लोचन अरुन तन सोनित कनी ॥  
भुज जुगल फेरत सर सरासन भालु कपि चहु दिसि बने ।  
कह दास तुलसी कहि न सक छबि सेष जेहि आनन घने ॥

दो० निसिचर अधम मलाकर ताहि दीन्ह निज धाम ।

गिरिजा ते नर मंदमति जे न भजहिं श्रीराम ॥ 68

दिन कें अंत फिरीं द्वौ अनी । समर भई सुभटन्ह श्रम घनी ॥  
राम कृपा कपि दल बल बाढ़ा । जिमि तून पाइ लाग अति डाढ़ा ॥  
छीजहिं निसिचर दिनु अरु राती । निज मुख कहें सुकृत जेहि भौंती ॥  
बहु बिलाप दसकंधर करई । बंधु सीस पुनि पुनि उर धरई ॥  
मेघनाद तेहि अवसर आयउ । कहि बहु कथा पिता समुझायउ ॥  
देखेहु कालि मोरि मनुसाई । अबहिं बहुत का करौं बड़ाई ॥  
इष्टदेव सैं बल रथ पायउं । सो बल तात न तोहि देखायउं ॥  
एहि बिधि जल्पत भयउ बिहाना । चहुँ दुआर लागे कपि नाना ॥  
इत कपि भालु काल सम बीरा । उत रजनीचर अति रनधीरा ॥

लरहिं सुभट निज निज जय हेतू । बरनि न जाइ समर खगकेतू ॥  
 दो० मेघनाद मायामय रथ चढ़ि गयउ अकास ।  
 गर्जेउ अट्टहास करि भइ कपि कटकहि त्रास ॥ 69  
 सक्ति सूल तरवारि कृपाना । अस्त्र सस्त्र कुलिसायध नाना ॥  
 डारइ परसु परिघ पाषाना । लागेउ बृष्टि करै बहु बाना ॥  
 दस दिसि रहे बान नभ छाई । मानहुँ मघा मेघ झरि लाई ॥  
 गहि गिरि तरु अकास कपि धावहिं । देखहिं तेहि न दुखित फिरि आवहिं ॥  
 अवघट घाट बाट गिरि कंदर । माया बल कीन्हेसि सर पंजर ॥  
 जाहिं कहां ब्याकुल भए बंदर । सुरपति बंदि परे जनु मंदर ॥  
 मारुतसुत अंगद नल नीला । कीन्हेसि बिकल सकल बलसीला ॥  
 पुनि लछिमन सुग्रीव बिभीषन । सरन्हि मारि कीन्हेसि जर्जर तन ॥  
 पुनि रघुपति सैं जूझै लागा । सर छौंड़इ होइ लागहिं नागा ॥  
 ब्याल पास बस भए खरारी । स्वबस अनंत एक अबिकारी ॥  
 नट इव कपट चरित कर नाना । सदा स्वतंत्र एक भगवाना ॥  
 रन सोभा लागि प्रभुहिं बँधायो । नागपास देवन्ह भय पायो ॥  
 दो० गिरिजा जासु नाम जपि मुनि काटहिं भव पास ।  
 सो कि बंध तर आवइ ब्यापक बिस्व निवास ॥ 70  
 चरित राम के सगुन भवानी । तर्कि न जाहिं बुद्धि बल बानी ॥  
 अस बिचारि जे तग्य बिरागी । रामहि भजहिं तर्क सब त्यागी ॥  
 ब्याकुल कटकु कीन्ह घननादा । पुनि भा प्रगट कहइ दुर्बादा ॥  
 जामवंत कह खल रहु ठाढ़ा । सुनि करि ताहि कोध अति बाढ़ा ॥  
 बूढ़ जानि सठ छौंड़ेउँ तोही । लागेसि अधम पचारै मोही ॥  
 अस कहि तरल त्रिसूल चलायो । जामवंत कर गहि सोइ धायो ॥  
 मारिसि मेघनाद कै छाती । परा भूमि घुर्मित सुरघाती ॥  
 पुनि रिसान गहि चरन फिरायो । महि पछारि निज बल देखरायो ॥  
 बर प्रसाद सो मरइ न मारा । तब गहि पद लंका पर डारा ॥  
 इहाँ देवरिषि गरुड़ पठायो । राम समीप सपदि सो आयो ॥  
 दो० खगपति सब धरि खाए माया नाग बरूथ ।  
 माया बिगत भए सब हरषे बानर जूथ ॥ 71 (क)  
 गहि गिरि पादप उपल नख धाए कीस रिसाइ ।  
 चले तमीचर बिकलतर गढ़ पर चढ़े पराइ ॥ 71 (ख)  
 मेघनाद कै मुरछा जागी । पितहि बिलोकि लाज अति लागी ॥  
 तुरत गयउ गिरिबर कंदरा । करौँ अजय मख अस मन धरा ॥  
 इहाँ बिभीषन मंत्र बिचारा । सुनहु नाथ बल अतुल उदारा ॥  
 मेघनाद मख करइ अपावन । खल मायावी देव सतावन ॥  
 जौँ प्रभु सिद्ध होइ सो पाइहि । नाथ बेगि पुनि जीति न जाइहि ॥  
 सुनि रघुपति अतिसय सुख माना । बोले अंगदादि कपि नाना ॥  
 लछिमन संग जाहु सब भाई । करहु बिधंस जग्य कर जाई ॥  
 तुम्ह लछिमन मारेहु रन ओही । देखि सभय सुर दुख अति मोही ॥  
 मारेहु तेहि बल बुद्धि उपाई । जेहिं छीजै निसिचर सुनु भाई ॥  
 जामवंत सुग्रीव बिभीषन । सेन समेत रहेहु तीनिउ जन ॥  
 जब रघुबीर दीन्हि अनुसासन । कटि निषग कसि साजि सरासन ॥  
 प्रभु प्रताप उर धरि रनधीरा । बोले घन इव गिरा गँभीरा ॥

जौं तेहि आजु बधे बिनु आवौं । तौ रघुपति सेवक न कहावौं ॥  
जौं सत संकर करहिं सहाई । तदपि हतउँ रघुबीर दोहाई ॥  
दो० रघुपति चरन नाइ सिरु चलेउ तुरंत अनंत ।

अंगद नील मयंद नल संग सुभट हनुमंत ॥ 72

जाइ कपिन्ह सो देखा बैसा । आहुति देत रुधिर अरु भैंसा ॥  
कीन्ह कपिन्ह सब जग्य बिधंसा । जब न उठइ तब करहिं प्रसंसा ॥  
तदपि न उठइ धरेन्हि कच जाई । लातन्हि हति हति चले पराई ॥  
लै त्रिसूल धावा कपि भागे । आए जहँ रामानुज आगे ॥  
आवा परम क्रोध कर मारा । गर्ज घोर रव बारहिं बारा ॥  
कोपि मरुतसुत अंगद धाए । हति त्रिसूल उर धरनि गिराए ॥  
प्रभु कहँ छौंड़ेसि सूल प्रचंडा । सर हति कृत अनंत जुग खंडा ॥  
उठि बहोरि मारुति जुबराजा । हतहिं कोपि तेहि घाउ न बाजा ॥  
फिरे बीर रिपु मरइ न मारा । तब धावा करि घोर चिकारा ॥  
आवत देखि कुद्ध जनु काला । लछिमन छाड़े बिसिख कराला ॥  
देखेसि आवत पबि सम बाना । तुरत भयउ खल अंतरधाना ॥  
बिबिध बेष धरि करइ लराई । कबहुँक प्रगट कबहुँ दुरि जाई ॥  
देखि अजय रिपु डरपे कीसा । परम कुद्ध तब भयउ अहीसा ॥  
लछिमन मन अस मंत्र दृढावा । एहि पापिहि मै बहुत खेलावा ॥  
सुमिर कोसलाधीस प्रतापा । सर संधान कीन्ह करि दापा ॥  
छाड़ा बान माझ उर लागा । मरती बार कपटु सब त्यागा ॥

दो० रामानुज कहँ रामु कहँ अस कहि छौंड़ेसि प्रान ।

धन्य धन्य तव जननी कह अंगद हनुमान ॥ 73

बिन प्रयास हनुमान उठायो । लंका द्वार राखि पुनि आयो ॥  
तासु मरन सुनि सुर गंधर्बा । चढ़ि बिमान आए नभ सर्बा ॥  
बरषि सुमन दुंदुभीं बजावहिं । श्री रघुनाथ बिमल जसु गावहिं ॥  
जय अनंत जय जगदाधारा । तुम्ह प्रभु सब देवन्हि निस्तारा ॥  
अस्तुति करि सुर सिद्ध सिधाए । लछिमन कृपासिंधु पहिं आए ॥  
सुत बध सुना दसानन जबहीं । मुरुछित भयउ परेउ महि तबहीं ॥  
मंदोदरी रुदन कर भारी । उर ताड़न बहु भौंति पुकारी ॥  
नगर लोग सब ब्याकुल सोचा । सकल कहहिं दसकंधर पोचा ॥

दो० तब दसकंठ बिबिध बिधि समुझाई सब नारि ।

नस्वर रूप जगत सब देखहु हृदयें बिचारि ॥ 74

पर उपदेस कुसल बहुतेरे । जे आचरहिं ते नर न घनेरे ॥  
निसा सिरानि भयउ भिनुसारा । लगे भालु कपि चारिहुँ द्वारा ॥  
सुभट बोलाइ दसानन बोला । रन सन्मुख जा कर मन डोला ॥  
सो अबहीं बरु जाउ पराई । संजुग बिमुख भएँ न भलाई ॥  
निज भुज बल मै बयरु बढावा । देहउँ उतरु जो रिपु चढ़ि आवा ॥  
अस कहि मरुत बेग रथ साजा । बाजे सकल जुझारु बाजा ॥  
चले बीर सब अतुलित बली । जनु कज्जल कै आँधी चली ॥  
असगुन अमित होहिं तेहि काला । गनइ न भुजबल गर्ब बिसाला ॥

छं० अति गर्ब गनइ न सगुन असगुन ठेवहिं आयुध हाथ ते ।

भट गिरत रथ ते बाजि गज चिक्करत भाजहिं साथ ते ॥

गोमाय गीध कराल खर रव स्वान बोलहिं अति घने ।

जनु कालदूत उलूक बोलहिं बचन परम भयावने ॥  
 दो० ताहि कि संपति सगुन सुभ सपनेहुँ मन विश्राम ।  
 भूत द्रोह रत मोहबस राम बिमुख रति काम ॥ 75  
 चलेउ निसाचर कटक अपारा । चतुरंगिनी अनी बहु धारा ॥  
 बिबिध भौंति बाहन रथ जाना । बिपुल बरन पताक ध्वज नाना ॥  
 बरन बरन बिरदैत निकाया । समर सूर जानहिं बहु माया ॥  
 अति बिचित्र बाहिनी बिराजी । बीर बसंत सेन जनु साजी ॥  
 चलत कटक दिगसिंधुर डगहीं । छुभित पयोधि कुधर डगमगहीं ॥  
 उठी रेनु रबि गयउ छपाई । मरुत थकित बसुधा अकुलाई ॥  
 पनव निसान घोर रव बाजहिं । प्रलय समय के घन जनु गाजहिं ॥  
 भेरि नफीरि बाज सहनाई । मारु राग सुभट सुखदाई ॥  
 केहरि नाद बीर सब करहीं । निज निज बल पौरुष उच्चरहीं ॥  
 कहइ दसानन सुनहु सुभट्टा । मर्दहु भालु कपिन्ह के ठट्टा ॥  
 हौं मारिहउं भूप द्वौ भाई । अस कहि सन्मुख फौज रेंगाई ॥  
 यह सुधि सकल कपिन्ह जब पाई । धाए करि रघुबीर दोहाई ॥  
 छं० धाए बिसाल कराल मर्कट भालु काल समान ते ।  
 मानहुँ सपच्छ उड़ाहिं भूधर बृंद नाना बान ते ॥  
 नख दसन सैल महाद्रुमायुध सबल संक न मानहीं ।  
 जय राम रावन मत्त गज मृगराज सुजसु बखानहीं ॥  
 दो० दुहु दिसि जय जयकार करि निज निज जोरी जानि ।  
 भिरे बीर इत रामहि उत रावनहि बखानि ॥ 76  
 रावनु रथी बिरथ रघुबीरा । देखि बिभीषनु भयउ अधीरा ॥  
 नाथ न रथ नहिं तन पद त्राना । केहि बिधि जितब बीर बलवाना ॥  
 सुनहु सखा कह कृपानिधाना । जेहिं जय होइ सो स्यंदन आना ॥  
 सौरज धीरज तेहि रथ चाका । सत्य सील दृढ ध्वजा पताका ॥  
 बल बिबेक दम परहित घोरे । छमा कृपा समता रजु जोरे ॥  
 ईस भजनु सारथी सुजाना । बिरति चर्म संतोष कृपाना ॥  
 दान परसु बुधि सक्ति प्रचंडा । बर बिग्यान कठिन कोदंडा ॥  
 अमल अचल मन त्रोन समाना । सम जम नियम सिलीमुख नाना ॥  
 कवच अभेद साधु गुरु पूजा । एहि सम बिजय उपाय न दूजा ॥  
 सखा धर्ममय अस रथ जाके । जीतन कहें न कतहुँ रिपु ताके ॥  
 दो० महा अजय संसार रिपु जीति सकइ सो बीर ।  
 जाकेँ अस रथ होइ दृढ सुनहु सखा मतिधीर ॥ 77 (क)  
 सुनि प्रभु बचन बिभीषन हरषि गहे पद कंज ।  
 एहि मिस मोहि उपदेसेहु राम कृपा सुख पुंज ॥ 77 (ख)  
 उत पचार दसकंधर इत अंगद हनुमान ।  
 लरत निसाचर भालु कपि करि निज निज प्रभु आन ॥ 77 (ग)  
 सुर ब्रह्मादि सिद्ध मुनि नाना । देखत रन नभ चढ़े बिमाना ॥  
 हमहू उमा रहे तेहिं संगी । देखत राम चरित रन रंगा ॥  
 सुभट समर रस दुहु दिसि माते । कपि जयसील राम बल ताते ॥  
 एक एक सन भिरहिं पचारहिं । एकन्ह एक मर्दि महि पारहिं ॥  
 मारहिं काटहिं धरहिं पछारहिं । सीस तोरि सीसन्ह सन मारहिं ॥  
 उदर बिदारहिं भुजा उपारहिं । गहि पद अवनि पटकि भट डारहिं ॥

निसिचर भट महि गाड़हिं भालू । ऊपर ढारि देहिं बहु बालू ॥  
 बीर बलीमुख जुद्ध बिरुद्धे । देखिअत बिपुल काल जनु कुद्धे ॥  
 छं० कुद्धे कृतांत समान कपि तन ठेवत सोनित राजहीं ।  
 मर्दहिं निसाचर कटक भट बलवंत घन जिमि गाजहीं ॥  
 मारहिं चपेटन्हि डाटि दातन्ह काटि लातन्ह मीजहीं ।  
 चिक्करहिं मर्कट भालू छल बल करहिं जेहिं खल छीजहीं ॥  
 धरि गाल फारहिं उर बिदारहिं गल अँतावरि मेलहीं ।  
 प्रह्लादपति जनु बिबिध तनु धरि समर अंगन खेलहीं ॥  
 धरु मारु काटु पछारु घोर गिरा गगन महि भरि रही ।  
 जय राम जो तून ते कुलिस कर कुलिस ते कर तून सही ॥  
 दो० निज दल बिचलत देखेसि बीस भुजौँ दस चाप ।  
 रथ चढ़ि चलेउ दसानन फिरहु फिरहु करि दाप ॥ 78  
 धायउ परम कुद्ध दसकंधर । सन्मुख चले हूह दै बंदर ॥  
 गहि कर पादप उपल पहारा । डारेन्हि ता पर एकहि बारा ॥  
 लागहिं सैल बज्र तन तासू । खंड खंड होइ फूटहिं आसू ॥  
 चला न अचल रहा रथ रोपी । रन दुर्मद रावन अति कोपी ॥  
 इत उत झपटि दपटि कपि जोधा । मर्द लाग भयउ अति कोधा ॥  
 चले पराइ भालू कपि नाना । त्राहि त्राहि अंगद हनुमाना ॥  
 पाहि पाहि रघुबीर गोसाई । यह खल खाइ काल की नाई ॥  
 तेहिं देखे कपि सकल पराने । दसहुँ चाप सायक संधाने ॥  
 छं० संधानि धनु सर निकर छाड़ेसि उरग जिमि उड़ि लागहीं ।  
 रहे पूरि सर धरनी गगन दिसि बिदिसि कहँ कपि भागहीं ॥  
 भयो अति कोलाहल बिकल कपि दल भालु बोलहिं आतुरे ॥  
 रघुबीर करुना सिंधु आरत बंधु जन रच्छक हरे ॥  
 दो० निज दल बिकल देखि कटि कसि निषंग धनु हाथ ।  
 लछिमन चले कुद्ध होइ नाइ राम पद माथ ॥ 79  
 रे खल का मारसि कपि भालू । मोहि बिलोकु तोर मैं कालू ॥  
 खोजत रहेउँ तोहि सुतघाती । आजु निपाति जुडावउँ छाती ॥  
 अस कहि छाड़ेसि बान प्रचंडा । लछिमन किए सकल सत खंडा ॥  
 कोटिन्ह आयुध रावन डारे । तिल प्रवान करि काटि निवारे ॥  
 पुनि निज बानन्ह कीन्ह प्रहारा । स्यंदनु भंजि सारथी मारा ॥  
 सत सत सर मारे दस भाला । गिरि सृगन्ह जनु प्रबिसहिं ब्याला ॥  
 पुनि सत सर मारा उर माहीं । परेउ धरनि तल सुधि कछु नाहीं ॥  
 उठा प्रबल पुनि मुरुछा जागी । छाड़िसि ब्रह्म दीन्हि जो सौंगी ॥  
 छं० सो ब्रह्म दत्त प्रचंड सक्ति अनंत उर लागी सही ।  
 पर्यो बीर बिकल उठाव दसमुख अतुल बल महिमा रही ॥  
 ब्रह्मांड भवन बिराज जाकेँ एक सिर जिमि रज कनी ।  
 तेहि चह उठावन मूढ़ रावन जान नहिं त्रिभुअन धनी ॥  
 दो० देखि पवनसुत धायउ बोलत बचन कठोर ।  
 आवत कपिहि हन्यो तेहिं मुष्टि प्रहार प्रघोर ॥ 80  
 जानु टेकि कपि भूमि न गिरा । उठा सँभारि बहुत रिस भरा ॥  
 मुठिका एक ताहि कपि मारा । परेउ सैल जनु बज्र प्रहारा ॥  
 मुरुछा गै बहोरि सो जागा । कपि बल बिपुल सराहन लागा ॥

धिग धिग मम पौरुष धिग मोही । जौं तैं जिअत रहेसि सुरद्रोही ॥  
 अस कहि लछिमन महुँ कपि ल्यायो । देखि दसानन बिसमय पायो ॥  
 कह रघुबीर समुझु जियेँ भ्राता । तुम्ह कृतांत भच्छक सुर त्राता ॥  
 सुनत बचन उठि बैठ कृपाला । गई गगन सो सकति कराला ॥  
 पुनि कोदंड बान गहि धाए । रिपु सन्मुख अति आतुर आए ॥  
 छं० आतुर बहोरि बिभंजि स्यंदन सूत हति ब्याकुल कियो ।  
 गिरयो धरनि दसकंधर बिकलतर बान सत बेध्यो हियो ।  
 सारथी दूसर घालि रथ तेहि तुरत लंका लै गयो ।  
 रघुबीर बंधु प्रताप पुंज बहोरि प्रभु चरनन्हि नयो ॥  
 दो० उहाँ दसानन जागि करि करै लाग कछु जग्य ।  
 राम बिरोध बिजय चह सठ हठ बस अति अग्य ॥ 81  
 इहाँ बिभीषन सब सुधि पाई । सपदि जाइ रघुपतिहि सुनाई ॥  
 नाथ करइ रावन एक जागा । सिद्ध भएँ नहिं मरिहि अभागा ॥  
 पठवहु नाथ बेगि भट बंदर । करहिं बिधंस आव दसकंधर ॥  
 प्रात होत प्रभु सुभट पठाए । हनुमदादि अंगद सब धाए ॥  
 कौतुक कूदि चढ़े कपि लंका । पैठे रावन भवन असंका ॥  
 जग्य करत जबहीं सो देखा । सकल कपिन्ह भा कोध बिसेषा ॥  
 रन ते निलज भाजि गृह आवा । इहाँ आइ बक ध्यान लगावा ॥  
 अस कहि अंगद मारा लाता । चितव न सठ स्वारथ मन राता ॥  
 छं० नहिं चितव जब करि कोप कपि गहि दसन लातन्ह मारहीं ।  
 धरि केस नारि निकारि बाहेर तेतिदीन पुकारहीं ॥  
 तब उठेउ कुद्ध कृतांत सम गहि चवरन बानर डारई ।  
 एहि बीच कपिन्ह बिधंस कृत मख देखि मन महुँ हारई ॥  
 दो० जग्य बिधंसि कुसल कपि आए रघुपति पास ।  
 चलेउ निसाचर कुद्ध होइ त्यागि जिवन कै आस ॥ 82  
 चलत होहिं अति असुभ भयंकर । बैठहिं गीघ उड़ाइ सिरन्ह पर ॥  
 भयउ कालबस काहु न माना । कहेसि बजावहु जुद्ध निसाना ॥  
 चली तमीचर अनी अपारा । बहु गज रथ पदाति असवारा ॥  
 प्रभु सन्मुख धाए खल कैसैं । सलभ समूह अनल कहें जैसैं ॥  
 इहाँ देवतन्ह अस्तुति कीन्ही । दारुन बिपति हमहि एहिं दीन्ही ॥  
 अब जनि राम खेलावहु एही । अतिसय दुखित होति बैदेही ॥  
 देव बचन सुनि प्रभु मुसुकाना । उठि रघुबीर सुधारे बाना ॥  
 जटा जूट दृढ़ बौधैं माथे । सोहहिं सुमन बीच बिच गाथे ॥  
 अरुन नयन बारिद तनु स्यामा । अखिल लोक लोचनाभिरामा ॥  
 कटितट परिकर कस्यो निषंग । कर कोदंड कठिन सारंगा ॥  
 छं० सारंग कर सुंदर निषंग सिलीमुखाकर कटि कस्यो ।  
 भुजदंड पीन मनोहरायत उर धरासुर पद लस्यो ॥  
 कह दास तुलसी जबहिं प्रभु सर चाप कर फेरन लगे ।  
 ब्रह्मांड दिग्गज कमठ अहि महि सिंधु भूधर डगमगे ॥  
 दो० सोभा देखि हरषि सुर बरषहिं सुमन अपार ।  
 जय जय जय करुनानिधि छबि बल गुन आगार ॥ 83  
 एहीं बीच निसाचर अनी । कसमसात आई अति घनी ॥  
 देखि चले सन्मुख कपि भट्टा । प्रलयकाल के जनु घन घट्टा ॥

बहु कृपान तरवारि चमंकहिं । जनु दहें दिसि दामिनीं दमंकहिं ॥  
 गज रथ तुरग चिकार कठोरा । गर्जहिं मनहुँ बलाहक घोरा ॥  
 कपि लंगूर बिपुल नभ छाए । मनहुँ इंद्रधनु उए सुहाए ॥  
 उठइ धूरि मानहुँ जलधारा । बान बुंद भै वृष्टि अपारा ॥  
 दुहुँ दिसि पर्वत करहिं प्रहारा । बज्रपात जनु बारहिं बारा ॥  
 रघुपति कोपि बान झरि लाई । घायल भै निसिचर समुदाई ॥  
 लागत बान बीर चिक्करहीं । घुर्मि घुर्मि जहें तहें महि परहीं ॥  
 ०वहिं सैल जनु निर्झर भारी । सोनित सरि कादर भयकारी ॥

छं० कादर भयंकर रुधिर सरिता चली परम अपावनी ।

दोउ कूल दल रथ रेत चक अबर्त बहति भयावनी ॥  
 जलजंतु गज पदचर तुरग खर बिबिध बाहन को गने ।  
 सर सक्ति तोमर सर्प चाप तरंग चर्म कमठ घने ॥

दो० बीर परहिं जनु तीर तरु मज्जा बहु बह फेन ।

कादर देखि डरहिं तहें सुभटन्ह के मन चेन ॥ 84

मज्जहिं भूत पिसाच बेताला । प्रमथ महा झोटिंग कराला ॥  
 काक कंक लै भुजा उड़ाहीं । एक ते छीनि एक लै खाहीं ॥  
 एक कहहि ऐसिउ सौंघाई । सठहु तुम्हार दरिद्र न जाई ॥  
 कहँरत भट घायल तट गिरे । जहें तहें मनहुँ अर्धजल परे ॥  
 खैचहिं गीध आँत तट भए । जनु बंसी खेलत चित दए ॥  
 बहु भट बहहिं चढ़े खग जाहीं । जनु नावरि खेलहिं सरि माहीं ॥  
 जोगिनि भरि भरि खप्पर संचहिं । भूत पिसाच बधू नभ नंचहिं ॥  
 भट कपाल करताल बजावहिं । चामुंडा नाना बिधि गावहिं ॥  
 जंबुक निकर कटक्कट कट्टहिं । खाहिं हुआहिं अघाहिं दपट्टहिं ॥  
 कोटिन्ह रुंड मुंड बिनु डोल्लहिं । सीस परे महि जय जय बोल्लहिं ॥

छं० बोल्लहिं जो जय जय मुंड रुंड प्रचंड सिर बिनु धावहीं ।

खप्परिन्ह खग अलुज्झि जुज्जहिं सुभट भटन्ह ढहावहीं ॥  
 बानर निसाचर निकर मर्दहिं राम बल दर्पित भए ।  
 संग्राम अंगन सुभट सोवहिं राम सर निकरन्हि हए ॥

दो० रावन हृदयँ बिचारा भा निसिचर संघार ।

मैं अकेल कपि भालु बहु माया करौं अपार ॥ 85

देवन्ह प्रभुहि पयादें देखा । उपजा उर अति छोभ बिसेषा ॥  
 सुरपति निज रथ तुरत पठावा । हरष सहित मातलि लै आवा ॥  
 तेज पुंज रथ दिव्य अनूपा । हरषि चढ़े कोसलपुर भूपा ॥  
 चंचल तुरग मनोहर चारी । अजर अमर मन सम गतिकारी ॥  
 रथारूढ़ रघुनाथहि देखी । घाए कपि बलु पाइ बिसेषी ॥  
 सही न जाइ कपिन्ह कै मारी । तब रावन माया बिस्तारी ॥  
 सो माया रघुबीरहि बाँची । लछिमन कपिन्ह सो मानी साँची ॥  
 देखी कपिन्ह निसाचर अनी । अनुज सहित बहु कोसलधनी ॥

छं० बहु राम लछिमन देखि मर्कट भालु मन अति अपडरे ।

जनु चित्र लिखित समेत लछिमन जहें सो तहें चितवहिं खरे ॥  
 निज सेन चकित बिलोकि हँसि सर चाप सजि कोसल धनी ।  
 माया हरी हरि निमिष महुँ हरषी सकल मर्कट अनी ॥

दो० बहुरि राम सब तन चितइ बोले बचन गँभीर ।

द्वंदजुद्ध देखहु सकल श्रमित भए अति बीर ॥ 86

अस कहि रथ रघुनाथ चलावा । सन्त चरन पंकज सिरु नावा ॥  
तब लंकेस कोध उर छावा । गर्जत तर्जत सन्मुख धावा ॥  
जीतेहु जे भट संजुग माहीं । सुनु तापस मैं तिन्ह सम नाहीं ॥  
रावन नाम जगत जस जाना । लोकप जाके बंदीखाना ॥  
खर दूषन बिराघ तुम्ह मारा । बधेहु ब्याघ इव बालि बिचारा ॥  
निसिचर निकर सुभट संघारेहु । कुंभकरन घननादहि मारेहु ॥  
आजु बयरु सबु लेउं निबाही । जौ रन भूप भाजि नहिं जाही ॥  
आजु करउं खलु काल हवाले । परेहु कठिन रावन के पाले ॥  
सुनि दुर्बचन कालबस जाना । बिहँसि बचन कह कृपानिधाना ॥  
सत्य सत्य सब तव प्रभुताई । जल्पसि जनि देखाउ मनुसाई ॥

छं० जनि जल्पना करि सुजसु नासहि नीति सुनहि करहि छमा ।  
संसार महुँ पूरुष त्रिबिध पाटल रसाल पनस समा ॥  
एक सुमनप्रद एक सुमन फल एक फलइ केवल लागहीं ।  
एक कहहिं कहहिं करहिं अपर एक करहिं कहत न बागहों ॥

दो० राम बचन सुनि बिहँसा मोहि सिखावत ग्यान ।

बयरु करत नहिं तब डरे अब लागे प्रिय प्राण ॥ 87

कहि दुर्बचन कुद्ध दसकंधर । कुलिस समान लाग छौंड़ै सर ॥  
नानाकार सिलीमुख धाए । दिसि अरु बिदिस गगन महि छाए ॥  
पावक सर छौंड़ेउ रघुबीरा । छन महुँ जरे निसाचर तीरा ॥  
छाड़िसि तीब्र सक्ति खिसिआई । बान संग प्रभु फेरि चलाई ॥  
कोटिन्ह चक त्रिसूल पबारै । बिनु प्रयास प्रभु काटि निवारै ॥  
निफल होहिं रावन सर कैसैं । खल के सकल मनोरथ जैसें ॥  
तब सत बान सारथी मारेसि । परेउ भूमि जय राम पुकारेसि ॥  
राम कृपा करि सूत उठावा । तब प्रभु परम कोध कहुँ पावा ॥

छं० भए कुद्ध जुद्ध बिरुद्ध रघुपति त्रोन सायक कसमसे ।  
कोदंड धुनि अति चंड सुनि मनुजाद सब मारुत ग्रसे ॥  
मंदोदरी उर कंप कंपति कमठ भू भूधर त्रसे ।  
चिक्करहिं दिग्गज दसन गहि महि देखि कौतुक सुर हँसे ॥

दो० तानेउ चाप श्रवन लागि छौंड़े बिसिख कराल ।

राम मारगन गन चले लहलहात जनु ब्याल ॥ 88

चले बान सपच्छ जनु उरगा । प्रथमहिं हतेउ सारथी तुरगा ॥  
रथ बिभंजि हति केतु पताका । गर्जा अति अंतर बल थाका ॥  
तुरत आन रथ चढि खिसिआना । अस्त्र सस्त्र छौंड़ेसि बिधि नाना ॥  
बिफल होहिं सब उद्यम ताके । जिमि परद्रोह निरत मनसा के ॥  
तब रावन दस सूल चलावा । बाजि चारि महि मारि गिरावा ॥  
तुरग उठाइ कोपि रघुनायक । खैंचि सरासन छौंड़े सायक ॥  
रावन सिर सरोज बनचारी । चलि रघुबीर सिलीमुख धारी ॥  
दस दस बान भाल दस मारे । निसरि गए चले रुधिर पनारे ॥  
०वत रुधिर धायउ बलवाना । प्रभु पुनि कृत धनु सर संधाना ॥  
तीस तीर रघुबीर पबारै । भुजन्हि समेत सीस महि पारे ॥  
काटतहीं पुनि भए नबीने । राम बहोरि भुजा सिर छीने ॥  
प्रभु बहु बार बाहु सिर हए । कटत झटिति पुनि नूतन भए ॥

पुनि पुनि प्रभु काटत भुज सीसा । अति कौतुकी कोसलाधीसा ॥  
 रहे छाइ नभ सिर अरु बाहू । मानहुँ अमित केतु अरु राहू ॥  
 छं० जनु राहु केतु अनेक नभ पथ ठेवत सोनित धावहीं ।  
 रघुबीर तीर प्रचंड लागहिं भूमि गिरन न पावहीं ॥  
 एक एक सर सिर निकर छेदे नभ उड़त इमि सोहहीं ।  
 जनु कोपि दिनकर कर निकर जहँ तहँ बिधुंतुद पोहहीं ॥  
 दो० जिमि जिमि प्रभु हर तासु सिर तिमि तिमि होहिं अपार ।  
 सेवत बिषय बिबर्ध जिमि नित नित नूतन मार ॥ 89  
 दसमुख देखि सिरन्ह कै बाढी । बिसरा मरन भइ रिस गाढी ॥  
 गर्जेउ मूढ महा अभिमानी । धायउ दसहु सरासन तानी ॥  
 समर भूमि दसकंधर कोप्यो । बरषि बान रघुपति रथ तोप्यो ॥  
 दंड एक रथ देखि न परेऊ । जनु निहार महुँ दिनकर दुरेऊ ॥  
 हाहाकार सुरन्ह जब कीन्हा । तब प्रभु कोपि कारमुक लीन्हा ॥  
 सर निवारि रिपु के सिर काटे । ते दिसि बिदिसि गगन महि पाटे ॥  
 काटे सिर नभ मारग धावहिं । जय जय धुनि करि भय उपजावहिं ॥  
 कहँ लछिमन सुग्रीव कपीसा । कहँ रघुबीर कोसलाधीसा ॥  
 छं० कहँ रामु कहि सिर निकर धाए देखि मर्कट भजि चले ।  
 संधानि धनु रघुबंसमनि हँसि सरन्हि सिर बेधे भले ॥  
 सिर मालिका कर कालिका गहि बृंद बृदन्हि बहु मिलीं ।  
 करि रुधिर सरि मज्जनु मनहुँ संग्राम बट पूजन चलीं ॥  
 दो० पुनि दसकंठ कुद्ध होइ छौंड़ी सक्ति प्रचंड ।  
 चली बिभीषन सन्मुख मनहुँ काल कर दंड ॥ 90  
 आवत देखि सक्ति अति घोरा । प्रनतारति भंजन पन मोरा ॥  
 तुरत बिभीषन पाछें मेला । सन्मुख राम सहेउ सोइ सेला ॥  
 लागि सक्ति मुरुछा कछु भई । प्रभु कृत खेल सुरन्ह बिकलई ॥  
 देखि बिभीषन प्रभु श्रम पायो । गहि कर गदा कुद्ध होइ धायो ॥  
 रे कुभाग्य सठ मंद कुबुद्धे । तैं सुर नर मुनि नाग बिरुद्धे ॥  
 सादर सिव कहँ सीस चढाए । एक एक के कोटिन्ह पाए ॥  
 तेहि कारन खल अब लगि बाँच्यो । अब तव कालु सीस पर नाच्यो ॥  
 राम बिमुख सठ चहसि संपदा । अस कहि हनेसि माझ उर गदा ॥  
 छं० उर माझ गदा प्रहार घोर कठोर लागत महि पर्यो ।  
 दस बदन सोनित ठेवत पुनि संभारि धायो रिस भर्यो ॥  
 द्वौ भिरे अतिबल मल्लजुद्ध बिरुद्ध एकु एकहि हनै ।  
 रघुबीर बल दर्पित बिभीषनु घालि नहिं ता कहँ गन ॥  
 दो० उमा बिभीषनु रावनहि सन्मुख चितव कि काउ ।  
 सो अब भिरत काल ज्यों श्रीरघुबीर प्रभाउ ॥ 91  
 देखा श्रमित बिभीषनु भारी । धायउ हनूमान गिरि धारी ॥  
 रथ तुरंग सारथी निपाता । हृदयें माझ तेहि मारेसि लाता ॥  
 ठाढ़ रहा अति कंपित गाता । गयउ बिभीषनु जहँ जनत्राता ॥  
 पुनि रावन कपि हतेउ पचारी । चलेउ गगन कपि पूँछ पसारी ॥  
 गहिसि पूँछ कपि सहित उड़ाना । पुनि फिरि भिरेउ प्रबल हनुमाना ॥  
 लरत अकास जुगल सम जोधा । एकहि एकु हनत करि कोधा ॥

सोहहिं नभ छल बल बहु करहीं । कज्जल गिरि सुमेरु जनु लरहीं ॥  
 बुधि बल निसिचर परइ न पार्यो । तब मारुत सुत प्रभु संभार्यो ॥  
 छ० संभारि श्रीरघुबीर धीर पचारि कपि रावनु हन्यो ।  
 महि परत पुनि उठि लरत देवन्ह जुगल कहूँ जय जय भन्यो ।  
 हनुमंत संकट देखि मर्कट भालु कोधातुर चले ।  
 रन मत्त रावन सकल सुभट प्रचंड भुज बल दलमले ॥  
 दो० तब रघुबीर पचारे धाए कीस प्रचंड ।  
 कपि बल प्रबल देखि तेहिं कीन्ह प्रगट पाषंड ॥ 92  
 अंतरधान भयउ छन एका । पुनि प्रगटे खल रूप अनेका ॥  
 रघुपति कटक भालु कपि जेते । जहँ तहँ प्रगट दसानन तेते ॥  
 देखे कपिन्ह अमित दससीसा । जहँ तहँ भजे भालु अरु कीसा ॥  
 भागे बानर धरहिं न धीरा । त्राहि त्राहि लछिमन रघुबीरा ॥  
 दहँ दिसि धावहिं कोटिन्ह रावन । गर्जहिं घोर कठोर भयावन ॥  
 डरे सकल सुर चले पराई । जय कै आस तजहु अब भाई ॥  
 सब सुर जिते एक दसकंधर । अब बहु भए तकहु गिरि कंदर ॥  
 रहे बिरंचि संभु मुनि ग्यानी । जिन्ह जिन्ह प्रभु महिमा कछु जानी ॥  
 छ० जाना प्रताप ते रहे निर्भय कपिन्ह रिपु माने फुरे ।  
 चले बिचलि मर्कट भालु सकल कृपाल पाहि भयातुरे ॥  
 हनुमंत अंगद नील नल अतिबल लरत रन बाँकुरे ।  
 मर्दहिं दसानन कोटि कोटिन्ह कपट भू भट अंकुरे ॥  
 दो० सुर बानर देखे बिकल हँस्यो कोसलाधोस ।  
 सजि सारंग एक सर हते सकल दससीस ॥ 93  
 प्रभु छन महुँ माया सब काटी । जिमि रबि उएँ जाहिं तम फाटी ॥  
 रावनु एकु देखि सुर हरषे । फिरे सुमन बहु प्रभु पर बरषे ॥  
 भुज उठाइ रघुपति कपि फेरे । फिरे एक एकन्ह तब टेरे ॥  
 प्रभु बलु पाइ भालु कपि धाए । तरल तमकि संजुग महि आए ॥  
 अस्तुति करत देवतन्हि देखें । भयउँ एक मै इन्ह के लेखें ॥  
 सठहु सदा तुम्ह मोर मरायल । अस कहि कोपि गगन पर धायल ॥  
 हाहाकार करत सुर भागे । खलहु जाहु कहँ मोरें आगे ॥  
 देखि बिकल सुर अंगद धायो । कूदि चरन गहि भूमि गिरायो ॥  
 छ० गहि भूमि पार्यो लात मार्यो बालिसुत प्रभु पहिं गयो ।  
 संभारि उठि दसकंठ घोर कठोर रव गर्जत भयो ॥  
 करि दाप चाप चढ़ाइ दस संधानि सर बहु बरषई ।  
 किए सकल भट घायल भयाकुल देखि निज बल हरषई ॥  
 दो० तब रघुपति रावन के सीस भुजा सर चाप ।  
 काटे बहुत बढ़े पुनि जिमि तीरथ कर पाप ॥ 94  
 सिर भुज बाढ़ि देखि रिपु केरी । भालु कपिन्ह रिस भई घनेरी ॥  
 बालितनय मारुति नल नीला । बानरराज दुबिद बलसीला ॥  
 बिटप महीधर करहिं प्रहारा । सोइ गिरि तरु गहि कपिन्ह सो मारा ॥  
 एक नखन्हि रिपु बपुष बिदारी । भागि चलहिं एक लातन्ह मारी ॥  
 तब नल नील सिरन्हि चढ़ि गयरु । नखन्हि लिलार बिदारत भयरु ॥  
 रुधिर देखि बिषाद उर भारी । तिन्हहि धरन कहूँ भुजा पसारी ॥  
 गहे न जाहिं करन्हि पर फिरहीं । जनु जुग मधुप कमल बन चरहीं ॥

कोपि कूदि द्वौ धरेसि बहोरी । महि पटकत भजे भुजा मरोरी ॥  
 पुनि सकोप दस धनु कर लीन्हे । सरन्हि मारि घायल कपि कीन्हे ॥  
 हनुमदादि मुरुछित करि बंदर । पाइ प्रदोष हरष दसकंधर ॥  
 मुरुछित देखि सकल कपि बीरा । जामवंत धायउ रनधीरा ॥  
 संग भालु भूधर तरु धारी । मारन लगे पचारि पचारी ॥  
 भयउ कुद्ध रावन बलवाना । गहि पद महि पटकइ भट नाना ॥  
 देखि भालुपति निज दल घाता । कोपि माझ उर मारेसि लाता ॥  
 छं० उर लात घात प्रचंड लागत बिकल रथ ते महि परा ।  
 गहि भालु बीसहुँ कर मनहुँ कमलन्हि बसे निसि मधुकरा ॥  
 मुरुछित बिलोकि बहोरि पद हति भालुपति प्रभु पहिँ गयो ।  
 निसि जानि स्यंदन घालि तेहि तब सूत जतनु करत भयो ॥  
 दो० मुरुछा बिगत भालु कपि सब आए प्रभु पास ।  
 निसिचर सकल रावनहि घेरि रहे अति त्रास ॥ 95

मासपारायण, छब्बीसवॉ विश्राम  
 तेही निसि सीता पहिँ जाई । त्रिजटा कहि सब कथा सुनाई ॥  
 सिर भुज बाढि सुनत रिपु केरी । सीता उर भई त्रास घनेरी ॥  
 मुख मलीन उपजी मन चिंता । त्रिजटा सन बोली तब सीता ॥  
 होइहि कहा कहसि किन माता । केहि बिधि मरिहि बिस्व दुखदाता ॥  
 रघुपति सर सिर कटेहुँ न मरई । बिधि बिपरीत चरित सब करई ॥  
 मोर अभाग्य जिआवत ओही । जेहिं हौं हरि पद कमल बिछोही ॥  
 जेहिं कृत कपट कनक मृग झूठा । अजहुँ सो दैव मोहि पर रूठा ॥  
 जेहिं बिधि मोहि दुख दुसह सहाए । लछिमन कहुँ कटु बचन कहाए ॥  
 रघुपति बिरह सबिष सर भारी । तकि तकि मार बार बहु मारी ॥  
 बहु बिधि कर बिलाप जानकी । करि करि सुरति कृपानिधान की ॥  
 कह त्रिजटा सुनु राजकुमारी । उर सर लागत मरइ सुरारी ॥  
 प्रभु ताते उर हतइ न तेही । एहि के हृदयें बसति बैदेही ॥  
 छं० एहि के हृदयें बस जानकी जानकी उर मम बास है ।  
 मम उदर भुअन अनेक लागत बान सब कर नास है ॥  
 सुनि बचन हरष बिषाद मन अति देखि पुनि त्रिजटा कहा ।  
 अब मरिहि रिपु एहि बिधि सुनहि सुंदरि तजहि संसय महा ॥  
 दो० काटत सिर होइहि बिकल छुटि जाइहि तव ध्यान ।  
 तब रावनहि हृदय महुँ मरिहहिं रामु सुजान ॥ 96  
 अस कहि बहुत भौंति समुझाई । पुनि त्रिजटा निज भवन सिधाई ॥  
 राम सुभाउ सुमिरि बैदेही । उपजी बिरह बिथा अति तेही ॥  
 निसिहि ससिहि निंदति बहु भौंती । जुग सम भई सिराति न राती ॥  
 करति बिलाप मनहिं मन भारी । राम बिरहें जानकी दुखारी ॥  
 जब अति भयउ बिरह उर दाहू । फरकेउ बाम नयन अरु बाहू ॥  
 सगुन बिचारि धरी मन धीरा । अब मिलिहहिं कृपाल रघुबीरा ॥  
 इहाँ अर्धनिसि रावनु जागा । निज सारथि सन खीझन लागा ॥  
 सठ रनभूमि छड़ाइसि मोही । धिग धिग अधम मंदमति तोही ॥  
 तेहिं पद गहि बहु बिधि समुझावा । भोरु भएँ रथ चढि पुनि धावा ॥  
 सुनि आगवनु दसानन केरा । कपिदल खरभर भयउ घनेरा ॥

छ० धाए जो मर्कट बिकट भालु कराल कर भूधर धरा ।  
अति कोप करहिं प्रहार मारत भजि चले रजनीचरा ॥  
बिचलाइ दल बलवंत कीसन्ह घेरि पुनि रावनु लियो ।  
चहुँ दिसि चपेटन्ह मारि नखन्हि बिदारि तनु ब्याकुल कियो ॥

दो० देखि महा मर्कट प्रबल रावन कीन्ह बिचार ।  
अंतरहित होइ निमिष महुँ कृत माया बिस्तार ॥ 97

छ० जब कीन्ह तेहिं पाषंड । भए प्रगट जंतु प्रचंड ॥  
बेताल भूत पिसाच । कर धरें धनु नाराच ॥1॥  
जोगिनि गहें करबाल । एक हाथ मनुज कपाल ॥  
करि सद्य सोनित पान । नाचहिं करहिं बहु गान ॥2॥  
धरु मारु बोलहिं घोर । रहि पूरि धुनि चहुँ ओर ॥  
मुख बाइ धावहिं खान । तब लगे कीस परान ॥3॥  
जहें जाहिं मकट भागि । तहें बरत देखहिं आगि ॥  
भए बिकल बानर भालु । पुनि लाग बरषै बालु ॥4॥  
जहें तहें थकित करि कीस । गर्जेउ बहुरि दससीस ॥  
लछिमन कपीस समेत । भए सकल बीर अचेत ॥5॥  
हा राम हा रघुनाथ । कहि सुभट मीजहिं हाथ ॥  
एहि बिधि सकल बल तोरि । तेहिं कीन्ह कपट बहोरि ॥6॥  
प्रगटेसि बिपुल हनुमान । धाए गहे पाषान ॥  
तिन्ह रामु घेरे जाइ । चहुँ दिसि बरूथ बनाइ ॥7॥  
मारहु धरहु जनि जाइ । कटकटहिं पूँछ उठाइ ॥  
दहें दिसि लँगूर बिराज । तेहिं मध्य कोसलराज ॥8॥

छ० तेहिं मध्य कोसलराज सुंदर स्याम तन सोभा लहो ।  
जनु इंद्रधनुष अनेक की बर बारि तुंग तमालही ॥  
प्रभु देखि हरष बिषाद उर सुर बदत जय जय जय करी ।  
रघुबीर एकहिं तीर कोपि निमेष महुँ माया हरी ॥ 1  
माया बिगत कपि भालु हरषे बिटप गिरि गहि सब फिरे ।  
सर निकर छाड़े राम रावन बाहु सिर पुनि महि गिरे ।  
श्रोराम रावन समर चरित अनेक कल्प जो गावहीं ।  
सत सेष सारद निगम कबि तेउ तदपि पार न पावहीं ॥ 2

दो० ताके गुन गन कछु कहे जड़मति तुलसीदास ।  
जिमि निज बल अनुरूप ते माछी उड़इ अकास ॥ 98 (क)  
काटे सिर भुज बार बहु मरत न भट लंकेस ।  
प्रभु कीड़त सुर सिद्ध मुनि ब्याकुल देखि कलेस ॥ 98 (ख)  
काटत बढहिं सीस समुदाई । जिमि प्रति लाभ लोभ अधिकाई ॥  
मरइ न रिपु श्रम भयउ बिसेषा । राम बिभीषन तन तब देखा ॥  
उमा काल मर जाकीं ईछा । सो प्रभु जन कर प्रीति परीछा ॥  
सुनु सरबग्य चराचर नायक । प्रनतपाल सुर मुनि सुखदायक ॥  
नाभिकुंड पियूष बस याके । नाथ जिअत रावनु बल ताके ॥  
सुनत बिभीषन बचन कृपाला । हरषि गहे कर बान कराला ॥  
असुभ होन लागे तब नाना । रोवहिं खर सूकाल बहु स्वाना ॥  
बोलहिं खग जग आरति हेतू । प्रगट भए नभ जहें तहें केतू ॥  
दस दिसि दाह होन अति लागा । भयउ परब बिन् रबि उपरागा ॥

मंदोदरि उर कंपति भारी । प्रतिमा स्त्रवहिं नयन मग बारी ॥  
 छ० प्रतिमा ठेवहिं पबिपात नभ अति बात बह डोलति मही ।  
 बरषहिं बलाहक रुधिर कच रज असुभ अति सक को कही ॥  
 उतपात अमित बिलोकि नभ सुर बिकल बोलहिं जय जए ।  
 सुर सभय जानि कृपाल रघुपति चाप सर जोरत भए ॥  
 दो० खैचि सरासन श्रवन लागि छाड़े सर एकतीस ।  
 रघुनायक सायक चले मानहुँ काल फनीस ॥ 99  
 सायक एक नाभि सर सोषा । अपर लगे भुज सिर करि रोषा ॥  
 लै सिर बाहु चले नाराचा । सिर भुज हीन रुंड महि नाचा ॥  
 धरनि धसइ धर धाव प्रचंडा । तब सर हति प्रभु कृत दुइ खंडा ॥  
 गर्जेउ मरत घोर रव भारी । कहौं रामु रन हतौं पचारी ॥  
 डोली भूमि गिरत दसकंधर । छुभित सिंधु सरि दिग्गज भूधर ॥  
 मंदोदरि आगें भुज सीसा । धरि सर चले जहाँ जगदीसा ॥  
 प्रबिसे सब निषंग महु जाई । देखि सुरन्ह दुंदुभीं बजाई ॥  
 तासु तेज समान प्रभु आनन । हरषे देखि संभु चतुरानन ॥  
 जय जय धुनि पूरी ब्रह्मंडा । जय रघुबीर प्रबल भुजदंडा ॥  
 बरषहिं सुमन देव मुनि बृंदा । जय कृपाल जय जयति मुकुंदा ॥  
 छ० जय कृपा कंद मुकुंद द्वंद हरन सरन सुखप्रद प्रभो ।  
 खल दल बिदारन परम कारन कारुनीक सदा बिभो ॥  
 सुर सुमन बरषहिं हरष संकुल बाज दुंदुभि गहगही ।  
 संग्राम अंगन राम अंग अनंग बहु सोभा तही ॥ 1  
 सिर जटा मुकुट प्रसून बिच बिच अति मनोहर राजहीं ।  
 जनु नीलगिरि पर तड़ित पटल समेत उडुगन भ्राजहीं ॥  
 भुजदंड सर कोदंड फेरत रुधिर कन तन अति बने ।  
 जनु रायमुनी तमाल पर बैठीं बिपुल सुख आपने ॥ 2  
 दो० कृपादृष्टि करि बृष्टि प्रभु अभय किए सुर बृंद ।  
 भालु कीस सब हरषे जय सुख धाम मुकुंद ॥ 100  
 पति सिर देखत मंदोदरी । मुरुछित बिकल धरनि खसि परी ॥  
 जुबति बृंद रोवत उठि धाई । तेहि उठाइ रावन पहिं आई ॥  
 पति गति देखि ते करहिं पुकारा । छूटे कच नहिं बपुष सँभारा ॥  
 उर ताड़ना करहिं बिधि नाना । रोवत करहिं प्रताप बखाना ॥  
 तव बल नाथ डाल नित धरनी । तेज हीन पावक ससि तरनी ॥  
 सेष कमठ सहि सकहिं न भारा । सो तनु भूमि परेउ भरि छारा ॥  
 बरुन कुबेर सुरेस समीरा । रन सन्मुख धरि काहुँ न धीरा ॥  
 भुजबल जितेहु काल जम साई । आजु परेहु अनाथ की नाई ॥  
 राम बिमुख अस हाल तुम्हारा । रहा न कोउ कुल रोवनिहारा ॥  
 तव बस बिधि प्रपंच सब नाथा । सभय दिसिप नित नावहिं माथा ॥  
 अब तव सिर भुज जंबुक खाहीं । राम बिमुख यह अनुचित नाहीं ॥  
 काल बिबस पति कहा न माना । अग जग नाथु मनुज करि जाना ॥  
 छ० जान्यो मनुज करि दनुज कानन दहन पावक हरि स्वयं ।  
 जेहि नमत सिव ब्रह्मादि सुर पिय भजेहु नहिं करुनामयं ॥  
 आजन्म ते परद्रोह रत पापौघमय तव तनु अयं ।  
 तुम्हहू दियो निज धाम राम नमामि ब्रह्म निरामयं ॥

- दो० अहह नाथ रघुनाथ सम कृपासिंधु नहिं आन ।  
जोगि बृंद दुर्लभ गति तोहि दीन्हि भगवान ॥ 101  
मंदोदरी बचन सुनि काना । सुर मुनि सिद्ध सबन्हि सुख माना ॥  
अज महेस नारद सनकादी । जे मुनिबर परमारथबादी ॥  
भरि लोचन रघुपतिहि निहारी । प्रेम मगन सब भए सुखारी ॥  
रुदन करत देखीं सब नारी । गयउ बिभीषनु मन दुख भारी ॥  
बंधु दसा बिलोकि दुख कीन्हा । तब प्रभु अनुजहि आयसु दीन्हा ॥  
लछिमन तेहि बहु बिधि समुझायो । बहुरि बिभीषन प्रभु पहिं आयो ॥  
कृपादृष्टि प्रभु ताहि बिलोका । करहु किया परिहरि सब सोका ॥  
कीन्हि किया प्रभु आयसु मानी । बिधिवत देस काल जिये जानी ॥
- दो० मंदोदरी आदि सब देइ तिलांजलि ताहि ।  
भवन गई रघुपति गुन गन बरनत मन माहि ॥ 102  
आइ बिभीषन पुनि सिरु नायो । कृपासिंधु तब अनुज बोलायो ॥  
तुम्ह कपीस अंगद नल नीला । जामवंत मारुति नयसीला ॥  
सब मिलि जाहु बिभीषन साथे । सारेहु तिलक कहेउ रघुनाथा ॥  
पिता बचन मै नगर न आवउँ । आपु सरिस कपि अनुज पठावउँ ॥  
तुरत चले कपि सुनि प्रभु बचना । कीन्ही जाइ तिलक की रचना ॥  
सादर सिंहासन बैठारी । तिलक सारि अस्तुति अनुसारी ॥  
जोरि पानि सबहीं सिर नाए । सहित बिभीषन प्रभु पहिं आए ॥  
तब रघुबीर बोलि कपि लीन्हे । कहि प्रिय बचन सुखी सब कीन्हे ॥
- छं० किए सुखी कहि बानी सुधा सम बल तुम्हारे रिपु हयो ।  
पायो बिभीषन राज तिहुँ पुर जसु तुम्हारो नित नयो ॥  
मोहि सहित सुभ कीरति तुम्हारी परम प्रीति जो गाइहैं ।  
संसार सिंधु अपार पार प्रयास बिनु नर पाइहैं ॥
- दो० प्रभु के बचन श्रवन सुनि नहिं अघाहिं कपि पुंज ।  
बार बार सिर नावहिं गहहिं सकल पद कंज ॥ 103  
पुनि प्रभु बोलि लियउ हनुमाना । लंका जाहु कहेउ भगवाना ॥  
समाचार जानकिहि सुनावहु । तासु कुसल ले तुम्ह चलि आवहु ॥  
तब हनुमंत नगर महुँ आए । सुनि निसिचरी निसाचर धाए ॥  
बहु प्रकार तिन्ह पूजा कीन्ही । जनकसुता देखाइ पुनि दीन्ही ॥  
दूरिहि ते प्रनाम कपि कीन्हा । रघुपति दूत जानकी चीन्हा ॥  
कहहु तात प्रभु कृपानिकेता । कुसल अनुज कपि सेन समेता ॥  
सब बिधि कुसल कोसलाधीसा । मातु समर जीत्यो दससीसा ॥  
अबिचल राजु बिभीषन पायो । सुनि कपि बचन हरष उर छायो ।
- छं० अति हरष मन तन पुलक लोचन सजल कह पुनि पुनि रमा ।  
का देउँ तोहि त्रैलोक महुँ कपि किमपि नहिं बानी समा ॥  
सुनु मातु मै पायो अखिल जग राजु आजु न संसयं ।  
रन जीति रिपुदल बंधु जत पस्यामि राममनामयं ॥
- दो० सुनु सुत सदगुन सकल तव हृदयें बसहु हनुमंत ।  
सानुकूल कोसलपति रहहुँ समेत अनंत ॥ 104  
अब सोइ जतन करहु तुम्ह ताता । देखौं नयन स्याम मृदु गाता ॥  
तब हनुमान राम पहिं जाई । जनकसुता कै कुसल सुनाई ॥  
सुनि संदेसु भानुकुलभूषन । बोलि लिए जुबराज बिभीषन ॥

मारुतसुत के संग सिधावहु । सादर जनकसुतहि लै आवहु ॥  
 तुरतहि सकल गए जहँ सीता । सेवहिं सब निसिचरीं बिनीता ॥  
 बेगि बिभीषन तिन्हहि सिखायो । तिन्ह बहु बिधि मज्जन करवायो ॥  
 बहु प्रकार भूषन पहिराए । सिबिका रुचिर साजि पुनि ल्याए ॥  
 ता पर हरषि चढी बैदेही । सुमिरि राम सुखधाम सनेही ॥  
 बेतपानि रच्छक चहु पासा । चले सकल मन परम हुलासा ॥  
 देखन भालु कीस सब आए । रच्छक कोपि निवारन धाए ॥  
 कह रघुबीर कहा मम मानहु । सीतहि सखा पयादें आनहु ॥  
 देखहुँ कपि जननी की नाई । बिहसि कहा रघुनाथ गोसाई ॥  
 दो० बरषहिं सुमन हरषि सुर बाजहिं गगन निसान ।  
 गावहिं किंनर सुरबधू नाचहिं चढीं बिमान ॥ 105 (क)  
 जनकसुता समेत प्रभु सोभा अमित अपार ।  
 देखि भालु कपि हरषे जय रघुपति सुख सार ॥ 105 (ख)  
 तब रघुपति अनुसासन पाई । मातलि चलेउ चरन सिरु नाई ॥  
 आए देव सदा स्वारथी । बचन कहहिं जनु परमारथी ॥  
 दीन बंधु दयाल रघुराया । देव कीन्हि देवन्ह पर दाया ॥  
 बिस्व द्रोह रत यह खल कामी । निज अघ गयउ कुमारगगामी ॥  
 तुम्ह समरूप ब्रह्म अबिनासी । सदा एकरस सहज उदासी ॥  
 अकल अगुन अज अनघ अनामय । अजित अमोघसक्ति करुनामय ॥  
 मीन कमठ सूकर नरहरी । बामन परसुराम बपु धरी ॥  
 जब जब नाथ सुरन्ह दुखु पायो । नाना तनु धरि तुम्हई नसायो ॥  
 यह खल मलिन सदा सुरद्रोही । काम लोभ मद रत अति कोही ॥  
 अधम सिरोमनि तव पद पावा । यह हमरें मन बिसमय आवा ॥  
 हम देवता परम अधिकारी । स्वारथ रत प्रभु भगति बिसारी ॥  
 भव प्रबाहें संतत हम परे । अब प्रभु पाहि सरन अनुसरे ॥  
 दो० करि बिनती सुर सिद्ध सब रहे जहँ तहँ कर जोरि ।  
 अति सप्रेम तन पुलकि बिधि अस्तुति करत बहोरि ॥ 106  
 छं० जय राम सदा सुखधाम हरे । रघुनायक सायक चाप धरे ॥  
 भव बारन दारन सिंह प्रभो । गुन सागर नागर नाथ बिभो ॥  
 तन काम अनेक अनूप छबी । गुन गावत सिद्ध मुनींद्र कबी ॥  
 जसु पावन रावन नाग महा । खगनाथ जथा करि कोप गहा ॥  
 जन रंजन भंजन सोक भयं । गतकोध सदा प्रभु बोधमयं ॥  
 अवतार उदार अपार गुनं । महि भार बिभंजन ग्यानघनं ॥  
 अज ब्यापकमेकमनादि सदा । करुनाकर राम नमामि मुदा ॥  
 रघुबंस बिभूषन दूषन हा । कृत भूप बिभीषन दीन रहा ॥  
 गुन ग्यान निधान अमान अजं । नित राम नमामि बिभुं बिरजं ॥  
 भुजदंड प्रचंड प्रताप बलं । खल बृंद निकंद महा कुसलं ॥  
 बिनु कारन दीन दयाल हितं । छबि धाम नमामि रमा सहितं ॥  
 भव तारन कारन काज परं । मन संभव दारुन दोष हरं ॥  
 सर चाप मनोहर त्रोन धरं । जलजारुन लोचन भूपबरं ॥  
 सुख मंदिर सुंदर श्रीरमनं । मद मार मुधा ममता समनं ॥  
 अनवद्य अखंड न गोचर गो । सबरूप सदा सब होइ न गो ॥  
 इति बेद बदंति न दंतकथा । रबि आतप भिन्नमभिन्न जथा ॥

कृतकृत्य बिभो सब बानर ए । निरखंति तवानन सादर ए ॥  
धिग जीवन देव सरीर हरे । तव भक्ति बिना भव भूलि परे ॥  
अब दीनदयाल दया करिऐ । मति मोरि बिभेदकरी हरिऐ ॥  
जेहि ते बिपरीत किया करिऐ । दुख सो सुख मानि सुखी चरिऐ ॥  
खल खंडन मंडन रम्य छमा । पद पंकज सेवित संभु उमा ॥  
नृप नायक दे बरदानमिदं । चरनांबुज प्रेम सदा सुभदं ॥

दो० बिनय कीन्हि चतुरानन प्रेम पुलक अति गात ।  
सोभासिंधु बिलोकत लोचन नहीं अघात ॥ 107

तेहि अवसर दसरथ तहें आए । तनय बिलोकि नयन जल छाए ॥  
अनुज सहित प्रभु बंदन कीन्हा । आसिरबाद पिताँ तब दीन्हा ॥  
तात सकल तव पुन्य प्रभाऊ । जीत्योँ अजय निसाचर राऊ ॥  
सुनि सुत बचन प्रीति अति बाढी । नयन सलिल रोमावलि ठाढी ॥  
रघुपति प्रथम प्रेम अनुमाना । चितइ पितहि दीन्हेउ दृढ ग्याना ॥  
ताते उमा मोच्छ नहिं पायो । दसरथ भेद भगति मन लायो ॥  
सगुनोपासक मोच्छ न लेहीं । तिन्ह कहुँ राम भगति निज देहीं ॥  
बार बार करि प्रभुहि प्रनामा । दसरथ हरषि गए सुरधामा ॥

दो० अनुज जानकी सहित प्रभु कुसल कोसलाधीस ।  
सोभा देखि हरषि मन अस्तुति कर सुर ईस ॥ 108

छ० जय राम सोभा धाम । दायक प्रनत विश्राम ॥  
धृत त्रोन बर सर चाप । भुजदंड प्रबल प्रताप ॥1॥  
जय दूषनारि खरारि । मर्दन निसाचर धारि ॥  
यह दुष्ट मारेउ नाथ । भए देव सकल सनाथ ॥2॥  
जय हरन धरनी भार । महिमा उदार अपार ॥  
जय रावनारि कृपाल । किए जातुधान बिहाल ॥3॥  
लंकेस अति बल गर्ब । किए बस्य सुर गंधर्ब ॥  
मुनि सिद्ध नर खग नाग । हठि पंथ सब केँ लाग ॥4॥  
परद्रोह रत अति दुष्ट । पायो सो फलु पापिष्ट ॥  
अब सुनहु दीन दयाल । राजीव नयन बिसाल ॥5॥  
मोहि रहा अति अभिमान । नहिं कोउ मोहि समान ॥  
अब देखि प्रभु पद कंज । गत मान प्रद दुख पुंज ॥6॥  
कोउ ब्रह्म निर्गुन ध्याव । अब्यक्त जेहि श्रुति गाव ॥  
मोहि भाव कोसल भूप । श्रीराम सगुन सरूप ॥7॥  
बैदेहि अनुज समेत । मम हृदयें करहु निकेत ॥  
मोहि जानिए निज दास । दे भक्ति रमानिवास ॥8॥

छ० दे भक्ति रमानिवास त्रास हरन सरन सुखदायकं ।  
सुख धाम राम नमामि काम अनेक छबि रघुनायकं ॥  
सुर बृंद रंजन द्वंद भंजन मनुजतनु अतुलितबलं ।  
ब्रह्मादि संकर सेव्य राम नमामि करुना कोमलं ॥

दो० अब करि कृपा बिलोकि मोहि आयसु देहु कृपाल ।  
काह करौँ सुनि प्रिय बचन बोले दीनदयाल ॥ 109  
सुनु सुरपति कपि भालु हमारे । परे भूमि निसिचरन्हि जे मारे ॥  
मम हित लागि तजे इन्ह प्राणा । सकल जिआउ सुरेस सुजाना ॥  
सुनु खगेस प्रभु कै यह बानी । अति अगाध जानहिं मुनि ग्यानी ॥

प्रभु सक त्रिभुवन मारि जिआई । केवल सकहि दीन्हि बड़ाई ॥  
 सुधा बरषि कपि भालु जिआए । हरषि उठे सब प्रभु पहिं आए ॥  
 सुधाबष्टि भै दुहु दल ऊपर । जिए भालु कपि नहिं रजनीचर ॥  
 रामाकार भए तिन्ह के मन । मुक्त भए छूटे भव बंधन ॥  
 सुर अंसिक सब कपि अरु रीछा । जिए सकल रघुपति कीं ईछा ॥  
 राम सरिस को दीन हितकारी । कीन्हे मुकुत निसाचर झारी ॥  
 खल मल धाम काम रत पावन । गति पाई जो मुनिबर पाव न ॥  
 दो० सुमन बरषि सब सुर चले चढि चढि रुचिर बिमान ।  
 देखि सुअवसर प्रभु पहिं आयउ संभु सुजान ॥ 110 (क)  
 परम प्रीति कर जोरि जुग नलिन नयन भरि बारि ॥  
 पुलकित तन गदगद गिरौं बिनय करत त्रिपुरारि ॥ 110 (ख)  
 छ० मामभिरक्षय रघुकुल नायक । धृत बर चाप रुचिर कर सायक ॥  
 मोह महा घन पटल प्रभंजन । संसय बिपिन अनल सुर रंजन ॥ 1 ॥  
 अगुन सगुन गुन मंदिर सुंदर । भ्रम तम प्रबल प्रताप दिवाकर ॥  
 काम कोध मद गज पंचानन । बसहु निरंतर जन मन कानन ॥ 2 ॥  
 बिषय मनोरथ पुंज कंज बन । प्रबल तुषार उदार पार मन ॥  
 भव बारिधि मंदर परमं दर । बारय तारय संसृति दुस्तर ॥ 3 ॥  
 स्याम गात राजीव बिलोचन । दीन बंधु प्रनतारति मोचन ॥  
 अनुज जानकी सहित निरंतर । बसहु राम नृप मम उर अंतर ॥ 4 ॥  
 मुनि रंजन महि मंडल मंडन । तुलसिदास प्रभु त्रास बिखंडन ॥ 5 ॥  
 दो० नाथ जबहिं कोसलपुरीं होइहि तिलक तुम्हार ।  
 कृपासिंधु मैं आउब देखन चरित उदार ॥ 111  
 करि बिनती जब संभु सिधाए । तब प्रभु निकट बिभीषन आए ॥  
 नाइ चरन सिरु कह मृदु बानी । बिनय सुनहु प्रभु सारंगपानी ॥  
 सकुल सदल प्रभु रावन मार्यो । पावन जस त्रिभुवन बिस्तार्यो ॥  
 दीन मलीन हीन मति जाती । मो पर कृपा कीन्हि बहु भाँती ॥  
 अब जन गृह पुनीत प्रभु कीजे । मज्जनु करिअ समर श्रम छीजे ॥  
 देखि कोस मंदिर संपदा । देहु कृपाल कपिन्ह कहँ मुदा ॥  
 सब बिधि नाथ मोहि अपनाइअ । पुनि मोहि सहित अवधपुर जाइअ ॥  
 सुनत बचन मृदु दीनदयाला । सजल भए द्वौ नयन बिसाला ॥  
 दो० तोर कोस गृह मोर सब सत्य बचन सुनु भ्रात ।  
 भरत दसा सुमिरत मोहि निमिष कल्प सम जात ॥ 112 (क)  
 तापस बेष गात कृस जपत निरंतर मोहि ।  
 देखौं बेगि सो जतनु करु सखा निहोरउँ तोहि ॥ 112 (ख)  
 बीतैं अवधि जाउँ जाँ जिअत न पावउँ बीर ।  
 सुमिरत अनुज पोति प्रभु पुनि पुनि पुलक सरीर ॥ 112 (ग)  
 करेहु कल्प भरि राजु तुम्ह मोहि सुमिरेहु मन माहिं ।  
 पुनि मम धाम पाइहहु जहाँ संत सब जाहिं ॥ 112 (घ)  
 सुनत बिभीषन बचन राम के । हरषि गहे पद कृपाधाम के ॥  
 बानर भालु सकल हरषाने । गहि प्रभु पद गुन बिमल बखाने ॥  
 बहुरि बिभीषन भवन सिधायो । मनि गन बसन बिमान भरायो ॥  
 लै पुष्पक प्रभु आगें राखा । हँसि करि कृपासिंधु तब भाषा ॥  
 चढि बिमान सुनु सखा बिभीषन । गगन जाइ बरषहु पट भूषन ॥

नभ पर जाइ बिभीषन तबही । बरषि दिए मनि अंबर सबही ॥  
 जोइ जोइ मन भावइ सोइ लेहीं । मनि मुख मेलि डारि कपि देहीं ॥  
 हँसे रामु श्री अनुज समेता । परम कौतुकी कृपा निकेता ॥  
 दो० मुनि जेहि ध्यान न पावहिं नेति नेति कह बेद ।  
 कृपासिंधु सोइ कपिन्ह सन करत अनेक बिनोद ॥ 113 (क)  
 उमा जोग जप दान तप नाना मख ब्रत नेम ।  
 राम कृपा नहिं करहिं तसि जसि निष्केवल प्रेम ॥ 113 (ख)  
 भालु कपिन्ह पट भूषन पाए । पहिरि पहिरि रघुपति पहिं आए ॥  
 नाना जिनस देखि सब कीसा । पुनि पुनि हँसत कोसलाधीसा ॥  
 चितइ सबन्हि पर कीन्ही दाया । बोले मृदुल बचन रघुराया ॥  
 तुम्हरेँ बल मैं रावनु मारयो । तिलक बिभीषन कहें पुनि सारयो ॥  
 निज निज गृह अब तुम्ह सब जाहू । सुमिरेहु मोहि डरपहु जनि काहू ॥  
 सुनत बचन प्रेमाकुल बानर । जोरि पानि बोले सब सादर ॥  
 प्रभु जोइ कहहु तुम्हहि सब सोहा । हमरेँ होत बचन सुनि मोहा ॥  
 दीन जानि कपि किए सनाथा । तुम्ह त्रैलोक ईस रघुनाथा ॥  
 सनि प्रभु बचन लाज हम मरहीं । मसक कहूँ खगपति हित करहीं ॥  
 देखि राम रुख बानर रीछा । प्रेम मगन नहिं गृह कै ईछा ॥  
 दो० प्रभु प्रेरित कपि भालु सब राम रूप उर राखि ।  
 हरष बिषाद सहित चले बिनय बिबिध बिधि भाषि ॥ 114 (क)  
 कपिपति नील रीछपति अंगद नल हनुमान ।  
 सहित बिभीषन अपर जे जूथप कपि बलवान ॥ 114 (ख)  
 कहिं न सकहिं कछु प्रेम बस भरि भरि लोचन बारि ।  
 सन्मुख चितवहिं राम तन नयन निमेष निवारि ॥ 114 (ग)  
 अतिसय प्रीति देखि रघुराई । लीन्हें सकल बिमान चढ़ाई ॥  
 मन महुँ संत चरन सिरु नायो । उत्तर दिसिहि बिमान चलायो ॥  
 चलत बिमान कोलाहल होई । जय रघुबीर कहइ सबु कोई ॥  
 सिंहासन अति उच्च मनोहर । श्री समेत प्रभु बैठे ता पर ॥  
 राजत रामु सहित भामिनी । मेरु सृंग जनु घन दामिनी ॥  
 रुचिर बिमान चलेउ अति आतुर । कीन्ही सुमन बृष्टि हरषे सुर ॥  
 सगुन होहिं सुंदर चहुँ पासा । मन प्रसन्न निर्मल नभ आसा ॥  
 कह रघुबीर देखु रन सीता । लछिमन इहाँ हत्यो ईंद्रजीता ॥  
 हनूमान अंगद के मारे । रन महि परे निसाचर भारे ॥  
 कुंभकरन रावन द्वौ भाई । इहाँ हते सुर मुनि दुखदाई ॥  
 दो० इहाँ सेतु बाँध्यों अरु थापेउँ सिव सुख धाम ।  
 सीता सहित कृपानिधि संभुहि कीन्ह प्रनाम ॥ 115 (क)  
 जहँ जहँ कृपासिंधु बन कीन्ह बास विश्राम ।  
 सकल देखाए जानकिहि कहे सबन्हि के नाम ॥ 115 (ख)  
 तुरत बिमान तहाँ चलि आवा । दंडक बन जहँ परम सुहावा ॥  
 कुंभजादि मुनिनायक नाना । गए रामु सब के अस्थाना ॥  
 सकल रिषिन्ह सन पाइ असीसा । चित्रकूट आए जगदीसा ॥  
 तहँ करि मुनिन्ह केर संतोषा । चला बिमानु तहाँ ते चोखा ॥  
 बहुरि राम जानकिहि देखाई । जमुना कलि मल हरनि सुहाई ॥  
 पुनि देखी सुरसरी पुनीता । राम कहा प्रनाम करु सीता ॥

तीरथपति पुनि देखु प्रयागा । निरखत जन्म कोटि अघ भागा ॥  
देखु परम पावनि पुनि बेनी । हरनि सोक हरि लोक निसेनी ॥  
अवधपुरी देखू अति पावनि । त्रिबिध ताप भव रोग नसावनि ॥

दो० सीता सहित अवध कहूँ कीन्ह कृपाल प्रनाम ।  
सजल नयन तन पुलकित पुनि पुनि हरषित राम ॥ 116 (क)  
पुनि प्रभु आइ त्रिबेनीं हरषित मज्जनु कीन्ह ।  
कपिन्ह सहित बिप्रन्ह कहूँ दान बिबिध बिधि दीन्ह ॥ 116 (ख)  
प्रभु हनुमंतहि कहा बुझाई । धरि बटु रूप अवधपुर जाई ॥  
भरतहि कुसल हमारि सुनाएहु । समाचार लै तुम्ह चलि आएहु ॥  
तुरत पवनसुत गवनत भयऊ । तब प्रभु भरद्वाज पहिं गयऊ ॥  
नाना बिधि मुनि पूजा कीन्हीं । अस्तुति करि पुनि आसिष दीन्हीं ॥  
मुनि पद बंदि जुगल कर जोरी । चढ़ि बिमान प्रभु चले बहोरी ॥  
इहाँ निषाद सुना प्रभु आए । नाव नाव कहूँ लोग बोलाए ॥  
सुरसरि नाधि जान तब आयो । उतरेउ तट प्रभु आयसु पायो ॥  
तब सीताँ पूजी सुरसरी । बहु प्रकार पुनि चरनन्हि परी ॥  
दीन्हि असीस हरषि मन गंगा । सुंदरि तव अहिवात अभंगा ॥  
सुनत गुहा धायउ प्रेमाकुल । आयउ निकट परम सुख संकुल ॥  
प्रभुहि सहित बिलोकि बैदेही । परेउ अवनि तन सुधि नहिं तेही ॥  
प्रीति परम बिलोकि रघुराई । हरषि उठाइ लियो उर लाई ॥

छं० लियो हृदयँ लाइ कृपा निधान सुजान रायँ रमापती ।  
बैठारि परम समीप बूझी कुसल सो कर बीनती ॥  
अब कुसल पद पंकज बिलोकि बिरंचि संकर सेव्य जे ।  
सुख धाम पूरनकाम राम नमामि राम नमामि ते ॥ 1 ॥  
सब भौंति अधम निषाद सो हरि भरत ज्यों उर लाइयो ।  
मतिमंद तुलसीदास सो प्रभु मोह बस बिसराइयो ॥  
यह रावनारि चरित्र पावन राम पद रतिप्रद सदा ।  
कामादिहर बिग्यानकर सुर सिद्ध मुनि गावहिं मुदा ॥ 2 ॥

दो० समर बिजय रघुबीर के चरित जे सुनहिं सुजान ।  
बिजय बिबेक बिभूति नित तिन्हहि देहिं भगवान ॥ 117 (क)  
यह कलिकाल मलायतन मन करि देखु बिचार ।  
श्रीरघुनाथ नाम तजि नाहिन आन अधार ॥ 117 (ख)

मासपारायण, सत्ताईसवों विश्राम

— गणपतये नमः

उत्तराकाण्ड

श्लोक

केकीकण्ठाभनीलं सुरवरविलसद्विप्रपादाब्जचिह्नं  
शोभाढ्यं पीतवस्त्रं सरसिजनयनं सर्वदा सुप्रसन्नम् ।  
पाणौ नाराचचापं कपिनिकरयुतं बन्धुना सेव्यमानं  
नौमीड्यं जानकीशं रघुवरमनिशं पुष्पकारुढरामम् ॥ 1 ॥  
कोसलेन्द्रपदकंजमंजुलौ कोमलावजमहेशवन्दितौ  
जानकीकरसरोजलालितौ चिन्तकस्य मनभृंगसंगिनौ ॥ 2 ॥  
कुन्दइन्दुदरगौरसुन्दरं अम्बिकापतिमभीष्टसिद्धिदम् ।  
कारुणीककलकंजलोचनं नौमि शंकरमनंगमोचनम् ॥ 3 ॥

दो० रहा एक दिन अवधि कर अति आरत पुर लोग ।  
जहँ तहँ सोचहिं नारि नर कृस तन राम बियोग ॥  
सगुन होहिं सुंदर सकल मन प्रसन्न सब केर ।  
प्रभु आगवन जनाव जनु नगर रम्य चहुँ फेर ॥  
कौसल्यादि मातु सब मन अनंद अस होइ ।  
आयउ प्रभु श्री अनुज जुत कहन चहत अब कोइ ॥  
भरत नयन भुज दच्छिन फरकत बारहिं बार ।  
जानि सगुन मन हरष अति लागे करन बिचार ॥  
रहउ एक दिन अवधि अधारा । समुझत मन दुख भयउ अपारा ॥  
कारन कवन नाथ नहिं आयउ । जानि कुटिल किधौ मोहि बिसरायउ ॥  
अहह धन्य लछिमन बड़भागी । राम पदारबिंदु अनुरागी ॥  
कपटी कुटिल मोहि प्रभु चीन्हा । ताते नाथ संग नहिं लीन्हा ॥  
जौ करनी समुझै प्रभु मोरी । नहिं निस्तार कलप सत कोरी ॥  
जन अवगुन प्रभु मान न कारु । दीन बंधु अति मृदुल सुभाऊ ॥  
मोरे जियँ भरोस दृढ सोई । मिलिहहिं राम सगुन सुभ होई ॥  
बीतँ अवधि रहहिं जौ प्राणा । अधम कवन जग मोहि समाना ॥

दो० राम बिरह सागर महेँ भरत मगन मन होत ।  
बिप्र रूप धरि पवन सुत आइ गयउ जनु पोत ॥ 1 (क)  
बैठे देखि कुसासन जटा मुकुट कृस गात ।  
राम राम रघुपति जपत ठेवत नयन जलजात ॥ 1 (ख)  
देखत हनूमान अति हरषेउ । पुलक गात लोचन जल बरषेउ ॥  
मन महेँ बहुत भाँति सुख मानी । बोलेउ श्रवन सुधा सम बानी ॥

जासु बिरहें सोचहु दिन राती । रटहु निरंतर गुन गन पॉती ॥  
 रघुकुल तिलक सुजन सुखदाता । आयउ कुसल देव मुनि त्राता ॥  
 रिपु रन जीति सुजस सुर गावत । सीता सहित अनुज प्रभु आवत ॥  
 सुनत बचन बिसरे सब दूखा । तृषावंत जिमि पाइ पियूषा ॥  
 को तुम्ह तात कहों ते आए । मोहि परम प्रिय बचन सुनाए ॥  
 मारुत सुत मैं कपि हनुमाना । नामु मोर सुनु कृपानिधाना ॥  
 दीनबंधु रघुपति कर किंकर । सुनत भरत भेंटेउ उठि सादर ॥  
 मिलत प्रेम नहिं हृदयें समाता । नयन ँवत जल पुलकित गाता ॥  
 कपि तव दरस सकल दुख बीते । मिले आजु मोहि राम पिरीते ॥  
 बार बार बूझी कुसलाता । तो कहुं देउं काह सुनु भ्राता ॥  
 एहि संदेस सरिस जग माहीं । करि बिचार देखेउं कछु नाहीं ॥  
 नाहिन तात उरिन मैं तोही । अब प्रभु चरित सुनावहु मोही ॥  
 तब हनुमंत नाइ पद माथा । कहे सकल रघुपति गुन गाथा ॥  
 कहु कपि कबहुं कृपाल गोसाई । सुमिरहिं मोहि दास की नाई ॥  
 छं० निजि दास ज्यों रघुबंसभूषन कबहुं मम सुमिरन कर्यो ।  
 सुनि भरत बचन बिनीत अति कपि पुलकि तन चरनन्हि पर्यो ॥  
 रघुबीर निज मुख जासु गुन गन कहत अग जग नाथ जो ।  
 काहे न होइ बिनीत परम पुनीत सदगुन सिंधु सो ॥  
 दो० राम प्रान प्रिय नाथ तुम्ह सत्य बचन मम तात ।  
 पुनि पुनि मिलत भरत सुनि हरष न हृदयें समात ॥ 2 (क)  
 सो० भरत चरन सिरु नाइ तुरित गयउ कपि राम पहिं ।  
 कही कुसल सब जाइ हरषि चलेउ प्रभु जान चढि ॥ 2 (ख)  
 हरषि भरत कोसलपुर आए । समाचार सब गुरहि सुनाए ॥  
 पुनि मंदिर महें बात जनाई । आवत नगर कुसल रघुराई ॥  
 सुनत सकल जननीं उठि धाई । कहि प्रभु कुसल भरत समुझाई ॥  
 समाचार पुरबासिन्ह पाए । नर अरु नारि हरषि सब धाए ॥  
 दधि दुर्बा रोचन फल फूला । नव तुलसी दल मंगल मूला ॥  
 भरि भरि हेम थार भामिनी । गावत चलिं सिंधुरगामिनी ॥  
 जे जैसेहिं तैसेहिं उठि धावहिं । बाल बूद्ध कहें संग न लावहिं ॥  
 एक एकन्ह कहें बूझहिं भाई । तुम्ह देखे दयाल रघुराई ॥  
 अवधपुरी प्रभु आवत जानी । भई सकल सोभा कै खानी ॥  
 बहइ सुहावन त्रिबिध समीरा । भइ सरजू अति निर्मल नीरा ॥  
 दो० हरषित गुर परिजन अनुज भूसुर बृंद समेत ।  
 चले भरत मन प्रेम अति सन्मुख कृपानिकेत ॥ 3 (क)  
 बहुतक चढीं अटारिन्ह निरखहिं गगन बिमान ।  
 देखि मधुर सुर हरषित करहिं सुमंगल गान ॥ 3 (ख)  
 राका ससि रघुपति पुर सिंधु देखि हरषान ।  
 बढ्यो कोलाहल करत जनु नारि तरंग समान ॥ 3 (ग)  
 इहाँ भानुकुल कमल दिवाकर । कपिन्ह देखावत नगर मनोहर ॥  
 सुनु कपीस अंगद लंकेसा । पावन पुरी रुचिर यह देसा ॥  
 जद्यपि सब बैकुंठ बखाना । बेद पुरान बिदित जगु जाना ॥  
 अवधपुरी सम प्रिय नहिं सोऊ । यह प्रसंग जानइ कोउ कोऊ ॥  
 जन्मभूमि मम पुरी सुहावनि । उत्तर दिसि बह सरजू पावनि ॥

जा मज्जन ते बिनहिं प्रयासा । मम समीप नर पावहिं बासा ॥  
 अति प्रिय मोहि इहो के बासी । मम धामदा पुरी सुख रासी ॥  
 हरषे सब कपि सुनि प्रभु बानी । धन्य अवध जो राम बखानी ॥  
 दो० आवत देखि लोग सब कृपासिंधु भगवान ।  
 नगर निकट प्रभु प्रेरेउ उतरेउ भूमि बिमान ॥ 4 (क)  
 उतरि कहेउ प्रभु पुष्पकहि तुम्ह कुबेर पहिं जाहु ।  
 प्रेरित राम चलेउ सो हरषु बिरहु अति ताहु ॥ 4 (ख)  
 आए भरत संग सब लोगा । कृस तन श्रीरघुबीर बियोगा ॥  
 बामदेव बसिष्ट मुनिनायक । देखे प्रभु महि धरि धनु सायक ॥  
 धाइ धरे गुर चरन सरोरुह । अनुज सहित अति पुलक तनोरुह ॥  
 भेंटि कुसल बूझी मुनिराया । हमरें कुसल तुम्हारिहिं दाया ॥  
 सकल द्विजन्ह मिलि नायउ माथा । धर्म धुरंधर रघुकुलनाथा ॥  
 गहे भरत पुनि प्रभु पद पंकज । नमत जिन्हहि सुर मुनि संकर अज ॥  
 परे भूमि नहिं उठत उठाए । बर करि कृपासिंधु उर लाए ॥  
 स्यामल गात रोम भए ठाढ़े । नव राजीव नयन जल बाढ़े ॥  
 छ० राजीव लोचन ठेवत जल तन ललित पुलकावलि बनी ।  
 अति प्रेम हृदयें लगाइ अनुजहि मिले प्रभु त्रिभुअन धनी ॥  
 प्रभु मिलत अनुजहि सोह मो पहिं जाति नहिं उपमा कही ।  
 जनु प्रेम अरु सिंगार तनु धरि मिले बर सुषमा लही ॥ 1 ॥  
 बूझत कृपानिधि कुसल भरतहि बचन बेगि न आवई ।  
 सुनु सिवा सो सुख बचन मन ते भिन्न जान जो पावई ॥  
 अब कुसल कौसलनाथ आरत जानि जन दरसन दियो ।  
 बूडत बिरह बारीस कृपानिधान मोहि कर गहि लियो ॥ 2 ॥  
 दो० पुनि प्रभु हरषि सत्रुहन भेंटे हृदयें लगाइ ।  
 लछिमन भरत मिले तब परम प्रेम दोउ भाइ ॥ 5  
 भरतानुज लछिमन पुनि भेंटे । दुसह बिरह संभव दुख मेटे ॥  
 सीता चरन भरत सिरु नावा । अनुज समेत परम सुख पावा ॥  
 प्रभु बिलोकि हरषे पुरबासी । जनित बियोग बिपति सब नासी ॥  
 प्रेमातुर सब लोग निहारी । कौतुक कीन्ह कृपाल खरारी ॥  
 अमित रूप प्रगटे तेहि काला । जथा जोग मिले सबहि कृपाला ॥  
 छन महिं सबहि मिले भगवाना । उमा मरम यह काहुँ न जाना ॥  
 एहि बिधि सबहि सुखी करि रामा । आगें चले सील गुन धामा ॥  
 कौसल्यादि मातु सब धाई । निरखि बच्छ जनु धेनु लवाई ॥  
 छ० जनु धेनु बालक बच्छ तजि गृहें चरन बन परबस गई ।  
 दिन अंत पुर रुख ठेवत थन हुंकार करि धावत भई ॥  
 अति प्रेम प्रभु सब मातु भेंटीं बचन मृदु बहुबिधि कहे ।  
 गइ बिषम बिपति बियोग भव तिन्ह हरष सुख अगनित लहे ॥  
 दो० भेटेउ तनय सुमित्राँ राम चरन रति जानि ।  
 रामहि मिलत कैकई हृदयें बहुत सकुचानि ॥ 6 (क)  
 लछिमन सब मातन्ह मिलि हरषे आसिष पाइ ।  
 कैकइ कहें पुनि पुनि मिले मन कर छोभु न जाइ ॥ 6 (ख)  
 सासुन्ह सबनि मिली बैदेही । चरनन्हि लागि हरषु अति तेही ॥  
 देहिं असीस बूझि कुसलाता । होइ अचल तुम्हार अहिवाता ॥

सब रघुपतिहि मुख कमल बिलोकहिं । मंगल जानि नयन जल रोकहिं ॥  
 कनक थार आरती उतारहिं । बार बार प्रभु गात निहारहिं ॥  
 नाना भौंति निछावरि करहीं । परमानंद हरष उर भरहीं ॥  
 कौसल्या पुनि पुनि रघुबीरहि । चितवति कृपासिंधु रनधीरहि ॥  
 हृदयें बिचारति बारहिं बारा । कवन भौंति लंकापति मारा ॥  
 अति सुकुमार जुगल मेरे बारे । निसिचर सुभट महाबल भारे ॥  
 दो० लछिमन अरु सीता सहित प्रभुहि बिलोकति मातु ।  
 परमानंद मगन मन पुनि पुनि पुलकित गातु ॥ 7  
 लंकापति कपीस नल नीला । जामवंत अंगद सुभसीला ॥  
 हनुमदादि सब बानर बीरा । धरे मनोहर मनुज सरीरा ॥  
 भरत सनेह सील ब्रत नेमा । सादर सब बरनहिं अति प्रेमा ॥  
 पुनि रघुपति सब सखा बोलाए । मुनि पद लागहु सकल सिखाए ॥  
 गुर बसिष्ट कुलपूज्य हमारे । इन्ह की कृपाँ दनुज रन मारे ॥  
 ए सब सखा सुनहु मुनि मेरे । भए समर सागर कहँ बेरे ॥  
 मम हित लागि जन्म इन्ह हारे । भरतहु ते मोहि अधिक पिआरे ॥  
 सुनि प्रभु बचन मगन सब भए । निमिष निमिष उपजत सुख नए ॥  
 दो० कौसल्या के चरनन्हि पुनि तिन्ह नायउ माथ ।  
 आसिष दीन्हे हरषि तुम्ह प्रिय मम जिमि रघुनाथ ॥ 8 (क)  
 सुमन बृष्टि नभ संकुल भवन चले सुखकंद ।  
 चढ़ी अटारिन्ह देखहिं नगर नारि नर बृंद ॥ 8 (ख)  
 कंचन कलस बिचित्र सँवारे । सबहिं धरे सजि निज निज द्वारे ॥  
 वंदनवार पताका केतू । सबन्हि बनाए मंगल हेतू ॥  
 बीथीं सकल सुगंध सिंचाई । गजमनि रचि बहु चौक पुराई ॥  
 जहँ तहँ नारि निछावरि करहीं । देहिं असीस हरष उर भरहीं ॥  
 कंचन थार आरतीं नाना । जुबतीं सजैं करहिं सुभ गाना ॥  
 करहिं आरती आरतिहर कें । रघुकुल कमल बिपिन दिनकर कें ॥  
 पुर सोभा संपति कल्याना । निगम शेष सारदा बखाना ॥  
 तेउ यह चरित देखि ठगि रहहीं । उमा तासु गुन नर किमि कहहीं ॥  
 दो० नारि कुमुदिनीं अवध सर रघुपति बिरह दिनेस ।  
 अस्त भएँ बिगसत भईं निरखि राम राकेस ॥ 9 (क)  
 होहिं सगुन सुभ बिबिध बिधि बाजहिं गगन निसान ।  
 पुर नर नारि सनाथ करि भवन चले भगवान ॥ 9 (ख)  
 प्रभु जानी कैकई लजानी । प्रथम तासु गृह गए भवानी ॥  
 ताहि प्रबोधि बहुत सुख दीन्हा । पुनि निज भवन गवन हरि कीन्हा ॥  
 कृपासिंधु जब मंदिर गए । पुर नर नारि सुखी सब भए ॥  
 गुर बसिष्ट द्विज लिए बुलाई । आजु सुघरी सुदिन समुदाई ॥  
 सब द्विज देहु हरषि अनुसासन । रामचंद्र बैठहिं सिंघासन ॥  
 मुनि बसिष्ट के बचन सुहाए । सुनत सकल बिप्रन्ह अति भाए ॥  
 कहहिं बचन मृदु बिप्र अनेका । जग अभिराम राम अभिषेका ॥  
 अब मुनिबर बिलंब नहिं कीजै । महाराज कहँ तिलक करीजै ॥  
 दो० तब मुनि कहेउ सुमंत्र सन सुनत चलेउ हरषाइ ।  
 रथ अनेक बहु बाजि गज तुरत सँवारे जाइ ॥ 10 (क)  
 जहँ तहँ धावन पठइ पुनि मंगल द्रव्य मगाइ ।  
 हरष समेत बसिष्ट पद पुनि सिरु नायउ आइ ॥ 10 (ख)

नवान्हपारायण, आठवॉ विश्राम

- अवधपुरी अति रुचिर बनाई । देवन्ह सुमन बृष्टि झरि लाई ॥  
 राम कहा सेवकन्ह बुलाई । प्रथम सखन्ह अन्हवावहु जाई ॥  
 सुनत बचन जहँ तहँ जन धाए । सुग्रीवादि तुरत अन्हवाए ॥  
 पुनि करुनानिधि भरतु हँकारे । निज कर राम जटा निरुआरे ॥  
 अन्हवाए प्रभु तीनिउ भाई । भगत बछल कृपाल रघुराई ॥  
 भरत भाग्य प्रभु कोमलताई । सेष कोटि सत सकहिं न गाई ॥  
 पुनि निज जटा राम बिबराए । गुर अनुसासन मागि नहाए ॥  
 करि मज्जन प्रभु भूषन साजे । अंग अनंग देखि सत लाजे ॥
- दो० सासुन्ह सादर जानकिहि मज्जन तुरत कराइ ।  
 दिव्य बसन बर भूषन अँग अँग सजे बनाइ ॥ 11 (क)  
 राम बाम दिसि सोभति राम रूप गुन खानि ।  
 देखि मातु सब हरषीं जन्म सुफल निज जानि ॥ 11 (ख)  
 सुनु खगेस तेहि अवसर ब्रह्मा सिव मुनि बृंद ।  
 चढि बिमान आए सब सुर देखन सुखकंद ॥ 11 (ग)  
 प्रभु बिलोकि मुनि मन अनुरागा । तुरत दिव्य सिंघासन मागा ॥  
 रबि सम तेज सो बरनि न जाई । बैठे राम मुनिन्ह सिरु नाई ॥  
 जनकसुता समेत रघुराई । पेखि प्रहरषे मुनि समुदाई ॥  
 बेद मंत्र तब द्विजन्ह उचारे । नभ सुर मुनि जय जयति पुकारे ॥  
 प्रथम तिलक बसिष्ठ मुनि कीन्हा । पुनि सब बिप्रन्ह आयसु दोन्हा ॥  
 सुत बिलोकि हरषीं महतारी । बार बार आरती उतारी ॥  
 बिप्रन्ह दान बिबिध बिधि दीन्हे । जाचक सकल अजाचक कीन्हे ॥  
 सिंघासन पर त्रिभुअन साई । देखि सुरन्ह दुंदुभीं बजाई ॥
- छं० नभ दुंदुभीं बाजहिं बिपुल गंधर्ब किंनर गावहीं ।  
 नाचहिं अपछरा बृंद परमानंद सर मुनि पावहीं ॥  
 भरतादि अनुज बिभीषनांगद हनुमदादि समेत ते ।  
 गहँ छत्र चामर व्यजन धनु असि चर्म सक्ति बिराजते ॥ 1  
 श्री सहित दिनकर बंस भूषन काम बहु छबि सोहई ।  
 नव अंबुधर बर गात अंबर पीत सुर मन मोहई ॥  
 मुकुटांगदादि बिचित्र भूषन अंग अंगन्हि प्रति सजे ।  
 अंभोज नयन बिसाल उर भुज धन्य नर निरखंति जे ॥ 2
- दो० वह सोभा समाज सुख कहत न बनइ खगेस ।  
 बरनहिं सारद सेष श्रुति सो रस जान महेस ॥ 12 (क)  
 भिन्न भिन्न अस्तुति करि गए सुर निज निज धाम ।  
 बंदी बेष बेद तब आए जहँ श्रीराम ॥ 12 (ख)  
 प्रभु सर्बग्य कीन्ह अति आदर कृपानिधान ।  
 लखेउ न काहूँ मरम कछु लगे करन गुन गान ॥ 12 (ग)
- छं० जय सगुन निर्गुन रूप रूप अनूप भूप सिरोमने ।  
 दसकंधरादि प्रचंड निसिचर प्रबल खल भुज बल हने ॥  
 अवतार नर संसार भार बिभंजि दारुन दुख दहे ।  
 जय प्रनतपाल दयाल प्रभु संजुक्त सक्ति नमामहे ॥ 1  
 तव बिषम माया बस सुरासुर नाग नर अग जग हरे ।  
 भव पंथ भ्रमत अमित दिवस निसि काल कर्म गुननि भरे ॥

जे नाथ करि करुना बिलोके त्रिबिध दुख ते निर्बहे ।  
 भव खेद छेदन दच्छ हम कहँ रच्छ राम नमामहे ॥ 2  
 जे ग्यान मान बिमत्त तव भव हरनि भक्ति न आदरी ।  
 ते पाइ सुर दुर्लभ पदादपि परत हम देखत हरी ॥  
 बिस्वास करि सब आस परिहरि दास तव जे होइ रहे ।  
 जपि नाम तव बिनु श्रम तरहिं भव नाथ सो समरामहे ॥ 3  
 जे चरन सिव अज पूज्य रज सुभ परसि मुनिपतिनी तरी ।  
 नख निर्गता मुनि बंदिता त्रैलोक पावनि सुरसरी ॥  
 ध्वज कुलिस अंकुस कंज जुत बन फिरत कंटक किन लहे ।  
 पद कंज द्वंद मुकुंद राम रमेस नित्य भजामहे ॥ 4  
 अब्यक्तमूलमनादि तरु त्वच चारि निगमागम भने ।  
 षट कंध साखा पंच बीस अनेक पर्न सुमन घने ॥  
 फल जुगल बिधि कटु मधुर बेलि अकेलि जेहि आश्रित रहे ।  
 पल्लवत फूलत नवल नित संसार बिटप नमामहे ॥ 5  
 जे बह्म अजमद्वैतमनुभवगम्य मनपर ध्यावहीं ।  
 ते कहहँ जानहँ नाथ हम तव सगुन जस नित गावहीं ॥  
 करुनायतन प्रभु सदगुनाकर देव यह बर मागहीं ।  
 मन बचन कर्म बिकार तजि तव चरन हम अनुरागहीं ॥ 6  
 दो० सब के देखत बेदन्ह बिनती कीन्हि उदार ।  
 अंतर्धान भए पुनि गए ब्रह्म आगार ॥ 13 (क)  
 बैनतेय सुनु संभु तब आए जहँ रघुबीर ।  
 बिनय करत गदगद गिरा पूरित पुलक सरीर ॥ 13 (ख)  
 छ० जय राम रमारमनं समनं । भव ताप भयाकुल पाहि जनं ।  
 अवधेस सुरेस रमेस बिभो । सरनागत मागत पाहि प्रभो ॥ 1 ॥  
 दससीस बिनासन बीस भुजा । कृत दूरि महा महि भूरि रुजा ।  
 रजनीचर बृंद पतंग रहे । सर पावक तेज प्रचंड दहे ॥ 2 ॥  
 महि मंडल मंडन चारुतरं । धृत सायक चाप निषंग बरं ।  
 मद मोह महा ममता रजनी । तम पुंज दिवाकर तेज अनी ॥ 3 ॥  
 मनजात किरात निपात किए । मृग लोग कुभोग सरेन हिए ।  
 हति नाथ अनाथनि पाहि हरे । बिषया बन पावेंर भूलि परे ॥ 4 ॥  
 बहु रोग बियोगन्हि लोग हए । भवदंघ्रि निरादर के फल ए ।  
 भव सिंधु अगाध परे नर ते । पद पंकज प्रेम न जे करते ॥ 5 ॥  
 अति दीन मलीन दुखी नितहीं । जिन्ह के पद पंकज प्रीति नहीं ।  
 अवलंब भवंत कथा जिन्ह के । प्रिय संत अनंत सदा तिन्ह कं ॥ 6 ॥  
 नहिं राग न लोभ न मान मदा । तिन्ह के सम बैभव वा बिपदा ।  
 एहि ते तव सेवक होत मुदा । मुनि त्यागत जोग भरोस सदा ॥ 7 ॥  
 करि प्रेम निरंतर नेम लिए । पद पंकज सेवत सुद्ध हिए ।  
 सम मानि निरादर आदरही । सब संत सुखी बिचरंति मही ॥ 8 ॥  
 मुनि मानस पंकज भृंग भजे । रघुबीर महा रनधीर अजे ।  
 तव नाम जपामि नमामि हरी । भव रोग महागद मान अरी ॥ 9 ॥  
 गुन सील कृपा परमायतनं । प्रनमामि निरंतर श्रीरमनं ।  
 रघुनंद निकंदय द्वंदघनं । महिपाल बिलोकय दीनजनं ॥ 10 ॥  
 दो० बार बार बर मागउँ हरषि देहु श्रीरंग ।  
 पद सरोज अनपायनी भगति सदा सतसंग ॥ 14 (क)

बरनि उमापति राम गुन हरषि गए कैलास ।

तब प्रभु कपिन्ह दिवाए सब बिधि सुखप्रद बास ॥ 14 (ख)

सुनु खगपति यह कथा पावनी । त्रिबिध ताप भव भय दावनी ॥  
महाराज कर सुभ अभिषेका । सुनत लहहिं नर बिरति बिबेका ॥  
जे सकाम नर सुनहिं जे गावहिं । सुख संपति नाना बिधि पावहिं ॥  
सुर दुर्लभ सुख करि जग माहीं । अंतकाल रघुपति पुर जाहीं ॥  
सुनहिं बिमुक्त बिरत अरु बिषई । लहहिं भगति गति संपति नई ॥  
खगपति राम कथा मैं बरनी । स्वमति बिलास त्रास दुख हरनी ॥  
बिरति बिबेक भगति दृढ करनी । मोह नदी कहें सुंदर तरनी ॥  
नित नव मंगल कौसलपुरी । हरषित रहहिं लोग सब कुरी ॥

दो० ब्रह्मानंद मगन कपि सब कें प्रभु पद प्रीति ।

जात न जाने दिवस तिन्ह गए मास षट बीति ॥ 15

बिसरे गृह सपनेहुं सुधि नाहीं । जिमि परद्रोह संत मन माहीं ॥  
तब रघुपति सब सखा बोलाए । आइ सबन्हि सादर सिरु नाए ॥  
परम प्रीति समीप बैठारे । भगत सुखद मृदु बचन उचारे ॥  
तुम्ह अति कीन्हि मोरि सेवकाई । मुख पर केहि बिधि करौं बड़ाई ॥  
ताते मोहि तुम्ह अति प्रिय लागे । मम हित लागि भवन सुख त्यागे ॥  
अनुज राज संपति बैदेही । देह गेह परिवार सनेही ॥  
सब मम प्रिय नहिं तुम्हहिं समाना । मृषा न कहउँ मोर यह बाना ॥  
सब कें प्रिय सेवक यह नीती । मोरें अधिक दास पर प्रीती ॥

दो० अब गृह जाहु सखा सब भजेहु मोहि दृढ नेम ।

सदा सर्वगत सर्वहित जानि करेहु अति प्रेम ॥ 16

सुनि प्रभु बचन मगन सब भए । को हम कहौं बिसरि तन गए ॥  
एकटक रहे जोरि कर आगे । सकहिं न कछु कहि अति अनुरागे ॥  
परम प्रेम तिन्ह कर प्रभु देखा । कहा बिबिध बिधि ग्यान बिसेषा ॥  
प्रभु सन्मुख कछु कहन न पारहिं । पुनि पुनि चरन सरोज निहारहिं ॥  
तब प्रभु भूषन बसन मगाए । नाना रंग अनूप सुहाए ॥  
सुग्रीवहि प्रथमहिं पहिराए । बसन भरत निज हाथ बनाए ॥  
प्रभु प्रेरित लछिमन पहिराए । लंकापति रघुपति मन भाए ॥  
अंगद बैठ रहा नहिं डोला । प्रीति देखि प्रभु ताहि न बोला ॥

दो० जामवंत नीलादि सब पहिराए रघुनाथ ।

हियें धरि राम रूप सब चले नाइ पद माथ ॥ 17 (क)

तब अंगद उठि नाइ सिरु सजल नयन कर जोरि ।

अति बिनीत बोलेउ बचन मनहुं प्रेम रस बोरि ॥ 17 (ख)

सुनु सर्वग्य कृपा सुख सिंधो । दीन दयाकर आरत बंधो ॥  
मरती बेर नाथ मोहि बाली । गयउ तुम्हारेहि कोंछें घाली ॥  
असरन सरन बिरदु संभारी । मोहि जनि तजहु भगत हितकारी ॥  
मारें तुम्ह प्रभु गुर पितु माता । जाउँ कहौं तजि पद जलजाता ॥  
तुम्हहि बिचारि कहहु नरनाहा । प्रभु तजि भवन काज मम काहा ॥  
बालक ग्यान बुद्धि बल हीना । राखहु सरन नाथ जन दीना ॥  
नीचि टहल गृह कै सब करिहउँ । पद पंकज बिलोकि भव तरिहउँ ॥  
अस कहि चरन परेउ प्रभु पाही । अब जनि नाथ कहहु गृह जाही ॥

दो० अंगद बचन बिनीत सुनि रघुपति करुना सीव ।

प्रभु उठाइ उर लायउ सजल नयन राजीव ॥ 18 (क)

निज उर माल बसन मनि बालितनय पहिराइ ।

बिदा कीन्हि भगवान तब बहु प्रकार समुझाइ ॥ 18 (ख)

भरत अनुज सौमित्रि समेता । पठवन चले भगत कृत चेता ॥  
अंगद हृदयँ प्रेम नहिं थोरा । फिरि फिरि चितव राम कीं ओरा ॥  
बार बार कर दंड प्रनामा । मन अस रहन कहहिं मोहि रामा ॥  
राम बिलोकनि बोलनि चलनी । सुमिरि सुमिरि सोचत हँसि मिलनी ॥  
प्रभु रुख देखि बिनय बहु भाषी । चलेउ हृदयँ पद पंकज राखी ॥  
अति आदर सब कपि पहुँचाए । भाइन्ह सहित भरत पुनि आए ॥  
तब सुग्रीव चरन गहि नाना । भौंति बिनय कीन्हे हनुमाना ॥  
दिन दस करि रघुपति पद सेवा । पुनि तव चरन देखिहउँ देवा ॥  
पुन्य पुंज तुम्ह पवनकुमारा । सेवहु जाइ कृपा आगारा ॥  
अस कहि कपि सब चले तुरंता । अंगद कहइ सुनहु हनुमंता ॥

दो० कहेहु दंडवत प्रभु सैं तुम्हहि कहउँ कर जोरि ।

बार बार रघुनायकहि सुरति कराएहु मोरि ॥ 19 (क)

अस कहि चलेउ बालिसुत फिरि आयउ हनुमंत ।

तासु प्रीति प्रभु सन कही मगन भए भगवंत ॥ 19 (ख)

कुलिसहु चाहि कठोर अति कोमल कुसुमहु चाहि ।

चित्त खगेस राम कर समुझि परइ कहु काहि ॥ 19 (ग)

पुनि कृपाल लियो बोलि निषादा । दीन्हे भूषन बसन प्रसादा ॥  
जाहु भवन मम सुमिरन करेहू । मन कम बचन धर्म अनुसरेहू ॥  
तुम्ह मम सखा भरत सम भ्राता । सदा रहेहु पुर आवत जाता ॥  
बचन सुनत उपजा सुख भारी । परेउ चरन भरि लोचन बारी ॥  
चरन नलिन उर धरि गृह आवा । प्रभु सुभाउ परिजनन्हि सुनावा ॥  
रघुपति चरित देखि पुरबासी । पुनि पुनि कहहिं धन्य सुखरासी ॥  
राम राज बैठें त्रैलोका । हरषित भए गए सब सोका ॥  
बयरु न कर काहू सन कोई । राम प्रताप बिषमता खोई ॥

दो० बरनाश्रम निज निज धरम निरत बेद पथ लोग ।

चलहिं सदा पावहिं सुखहिं नहिं भय सोक न रोग ॥ 20

दैहिक दैविक भौतिक तापा । राम राज नहिं काहुहि ब्यापा ॥  
सब नर करहिं परस्पर प्रीती । चलहिं स्वधर्म निरत श्रुति नीती ॥  
चारिउ चरन धर्म जग माहीं । पूरि रहा सपनेहुँ अघ नाहीं ॥  
राम भगति रत नर अरु नारी । सकल परम गति के अधिकारी ॥  
अल्पमृत्यु नहिं कवनिउ पीरा । सब सुंदर सब बिरुज सरीरा ॥  
नहिं दरिद्र कोउ दुखी न दीना । नहिं कोउ अबुध न लच्छन हीना ॥  
सब निर्दभ धर्मरत पुनी । नर अरु नारि चतुर सब गुनी ॥  
सब गुनग्य पंडित सब ग्यानी । सब कृतग्य नहिं कपट सयानी ॥

दो० राम राज नभगेस सुनु सचराचर जग माहिं ।

काल कर्म सुभाव गुन कृत दुख काहुहि नाहिं ॥ 21

भूमि सप्त सागर मेखला । एक भूप रघुपति कोसला ॥  
भुअन अनेक रोम प्रति जासू । यह प्रभुता कछु बहुत न तासू ॥  
सो महिमा समुझत प्रभु केरी । यह बरनत हीनता घनेरी ॥  
सोउ महिमा खगेस जिन्ह जानी । फिरि एहिं चरित तिन्हहुँ रति मानी ॥  
सोउ जाने कर फल यह लीला । कहहिं महा मुनिबर दमसीला ॥  
राम राज कर सुख संपदा । बरनि न सकइ फनीस सारदा ॥

सब उदार सब पर उपकारी । संत चरन सेवक नर नारी ॥  
 एकनारि ब्रत रत सब झारी । ते मन बच कम पति हितकारी ॥  
 दो० दंड जतिन्ह कर भेद जहें नर्तक नृत्य समाज ।  
 जीतहु मनहि सुनिअ अस रामचंद्र के राज ॥ 22  
 फूलहिं फरहिं सदा तरु कानन । रहहिं एक सँग गज पंचानन ॥  
 खग मृग सहज बयरु बिसराई । सबन्हि परस्पर प्रीति बढ़ाई ॥  
 कूजहिं खग मृग नाना बूँदा । अभय चरहिं बन करहिं अनंदा ॥  
 सीतल सुरभि पवन बह मंदा । गुंजत अलि लै चलि मकरंदा ॥  
 लता बिटप मार्गे मधु चवहीं । मनभावतो धेनु पय ०वहीं ॥  
 ससि संपन्न सदा रह धरनी । त्रेतो भइ कृतजुग कै करनी ॥  
 प्रगटीं गिरिन्ह बिबिध मनि खानी । जगदातमा भूप जग जानी ॥  
 सरिता सकल बहहिं बर बारी । सीतल अमल स्वाद सुखकारी ॥  
 सागर निज मरजादों रहहीं । डारहिं रत्न तटन्हि नर लहहीं ॥  
 सरसिज संकुल सकल तड़ागा । अति प्रसन्न दस दिसा बिभागा ॥

दो० बिधु महि पूर मयूखन्हि रबि तप जेतनेहि काज ।  
 मार्गे बारिद देहिं जल रामचंद्र के राज ॥ 23  
 श्रुति पथ पालक धर्म धुरंधर । गुनातीत अरु भोग पुरंदर ॥  
 पति अनुकूल सदा रह सीता । सोभा खानि सुसील बिनीता ॥  
 जानति कृपासिंधु प्रभुताई । सेवति चरन कमल मन लाई ॥  
 जद्यपि गृहें सेवक सेवकिनी । बिपुल सदा सेवा बिधि गुनी ॥  
 निज कर गृह परिचरजा करई । रामचंद्र आयसु अनुसरई ॥  
 जेहि बिधि कृपासिंधु सुख मानइ । सोइ कर श्री सेवा बिधि जानइ ॥  
 कौसल्यादि सासु गृह माहीं । सेवइ सबन्हि मान मद नाहीं ॥  
 उमा रमा ब्रह्मादि बंदिता । जगदंबा संततमनिंदिता ॥

दो० जासु कृपा कटाच्छु सुर चाहत चितव न सोइ ।  
 राम पदारबिंद रति करति सुभावहि खोइ ॥ 24  
 सेवहिं सानकूल सब भाई । रामचरन रति अति अधिकाई ॥  
 प्रभु मुख कमल बिलोकत रहहीं । कबहुँ कृपाल हमहि कछु कहहीं ॥  
 राम करहिं भ्रातन्ह पर प्रीती । नाना भौंति सिखावहिं नीती ॥  
 हरषित रहहिं नगर के लोगा । करहिं सकल सुर दुर्लभ भोगा ॥  
 अहनिशि बिधिहि मनावत रहहीं । श्रीरघुबीर चरन रति चहहीं ॥  
 दुइ सुत सुंदर सीता जाए । लव कुस बेद पुरानन्ह गाए ॥  
 दोउ बिजई बिनई गुन मंदिर । हरि प्रतिबिंब मनहुँ अति सुंदर ॥  
 दुइ दुइ सुत सब भ्रातन्ह करे । भए रूप गुन सील घनेरे ॥

दो० ग्यान गिरा गोतीत अज माया मन गुन पार ।  
 सोइ सच्चिदानंद घन कर नर चरित उदार ॥ 25  
 प्रातकाल सररु करि मज्जन । बैठहिं सभों संग द्विज सज्जन ॥  
 बेद पुरान बसिष्ट बखानहिं । सुनहिं राम जद्यपि सब जानहिं ॥  
 अनुजन्ह संजुत भोजन करहीं । देखि सकल जननीं सुख भरहीं ॥  
 भरत सत्रुहन दोनउ भाई । सहित पवनसुत उपबन जाई ॥  
 बूझहिं बैठि राम गुन गाहा । कह हनुमान सुमति अवगाहा ॥  
 सुनत बिमल गुन अति सुख पावहिं । बहुरि बहुरि करि बिनय कहावहिं ॥  
 सब के गृह गृह होहिं पुराना । रामचरित पावन बिधि नाना ॥

- नर अरु नारि राम गुन गानहिं । करहिं दिवस निसि जात न जानहिं ॥  
दो० अवधपुरी बासिन्ह कर सुख संपदा समाज ।  
सहस सेष नहिं कहि सकहिं जहें नृप राम बिराज ॥ 26  
नारदादि सनकादि मुनीसा । दरसन लागि कोसलाधीसा ॥  
दिन प्रति सकल अवधपुर आवहिं । देखि नगरु बिरागु बिसरावहिं ॥  
जातरूप मनि रचित अटारीं । नाना रंग रुचिर गज ढारीं ॥  
पुर चहुं पास कोट अति सुंदर । रचे कँगूरा रंग रंग बर ॥  
नव ग्रह निकर अनीक बनाई । जनु घेरी अमरावति आई ॥  
महि बहु रंग रचित गच कौंचा । जो बिलोकि मुनिबर मन नाचा ॥  
धवल धाम ऊपर नभ चुंबत । कलस मनहुं रबि ससि दुति निंदत ॥  
बहु मनि रचित झरोखा भ्राजहिं । गृह गृह प्रति मनि दीप बिराजहिं ॥  
छ० मनि दीप राजहिं भवन भ्राजहिं देहरीं बिद्रुम रची ।  
मनि खंभ भीति बिरंचि बिरची कनक मनि मरकत खची ॥  
सुंदर मनोहर मंदिरायत अजिर रुचिर फटिक रचे ।  
प्रति द्वार द्वार कपाट पुरट बनाइ बहु बज्रन्हि खचे ॥  
दो० चारु चित्रसाला गृह गृह प्रति लिखे बनाइ ।  
राम चरित जे निरख मुनि ते मन लेहिं चोराइ ॥ 27  
सुमन बाटिका सबहिं लगाई । बिबिध भौंति करि जतन बनाई ॥  
लता ललित बहु जाति सुहाई । फूलहिं सदा बसंत कि नाई ॥  
गुंजत मधुकर मुखर मनोहर । मारुत त्रिबिध सदा बह सुंदर ॥  
नाना खग बालकन्हि जिआए । बोलत मधुर उडात सुहाए ॥  
मोर हंस सारस पारावत । भवननि पर सोभा अति पावत ॥  
जहें तहें देखहिं निज परिछाहीं । बहु बिधि कूजहिं नृत्य कराहीं ॥  
सुक सारिका पढावहिं बालक । कहहु राम रघुपति जनपालक ॥  
राज दुआर सकल बिधि चारु । बीथीं चौहट रुचिर बजारु ॥  
छ० बाजार रुचिर न बनइ बरनत बस्तु बिनु गथ पाइए ।  
जहें भूप रमानिवास तहें की संपदा किमि गाइए ॥  
बैठे बजाज सराफ बनिक अनेक मनहुं कुबेर ते ।  
सब सुखी सब सच्चरित सुंदर नारि नर सिसु जरठ जे ॥  
दो० उत्तर दिसि सरजू बह निर्मल जल गंभीर ।  
बाँधे घाट मनोहर स्वल्प पंक नहिं तीर ॥ 28  
दूरि फराक रुचिर सो घाटा । जहें जल पिअहिं बाजि गज ठाटा ॥  
पनिघट परम मनोहर नाना । तहों न पुरुष करहिं अस्नाना ॥  
राजघाट सब बिधि सुंदर बर । मज्जहिं तहों बरन चारिउ नर ॥  
तीर तीर देवन्ह के मंदिर । चहुं दिसि तिन्ह के उपबन सुंदर ॥  
कहुं कहुं सरिता तीर उदासी । बसहिं ग्यान रत मुनि संन्यासी ।  
तीर तीर तुलसिका सुहाई । बृंद बृंद बहु मुनिन्ह लगाई ॥  
पुर सोभा कछु बरनि न जाई । बाहेर नगर परम रुचिराई ॥  
देखत पुरी अखिल अघ भागा । बन उपबन बापिका तड़ागा ॥  
छ० बापीं तड़ाग अनूप कूप मनोहरायत सोहहीं ।  
सोपान सुंदर नीर निर्मल देखि सुर मुनि मोहहीं ॥  
बहु रंग कंज अनेक खग कूजहिं मधुप गुंजारहीं ।  
आराम रम्य पिकादि खग रव जनु पथिक हंकारहीं ॥  
दो० रमानाथ जहें राजा सो पुर बरनि कि जाइ ।

अनिमादिक सुख संपदा रहीं अवध सब छाड़ ॥ 29

जहँ तहँ नर रघुपति गुन गावहिं । बैठि परसपर इहइ सिखावहिं ॥  
भजहु प्रनत प्रतिपालक रामहि । सोभा सील रूप गुन धामहि ॥  
जलज बिलोचन स्यामल गातहि । पलक नयन इव सेवक त्रातहि ॥  
धृत सर रुचिर चाप तूनीरहि । संत कंज बन रबि रनधीरहि ॥  
काल कराल ब्याल खगराजहि । नमत राम अकाम ममता जहि ॥  
लोभ मोह मृगजूथ किरातहि । मनसिज करि हरि जन सुखदातहि ॥  
संसय सोक निबिड़ तम भानुहि । दनुज गहन घन दहन कृसानुहि ॥  
जनकसुता समेत रघुबीरहि । कस न भजहु भंजन भव भीरहि ॥  
बहु बासना मसक हिम रासिहि । सदा एकरस अज अबिनासिहि ॥  
मुनि रंजन भंजन महि भारहि । तुलसिदास के प्रभुहि उदारहि ॥  
दो० एहि बिधि नगर नारि नर करहिं राम गुन गान ।

सानुकूल सब पर रहहिं संतत कृपानिधान ॥ 30

जब ते राम प्रताप खगेसा । उदित भयउ अति प्रबल दिनेसा ॥  
पूरि प्रकास रहेउ तिहुँ लोका । बहुतेन्ह सुख बहुतन मन सोका ॥  
जिन्हहि सोक ते कहउँ बखानी । प्रथम अबिद्या निसा नसानी ॥  
अघ उलूक जहँ तहाँ लुकाने । काम क्रोध कैरव सकुचाने ॥  
बिबिध कर्म गुन काल सुभाऊ । ए चकोर सुख लहहिं न काऊ ॥  
मत्सर मान मोह मद चोरा । इन्ह कर हुनर न कवनिहुँ ओरा ॥  
धरम तड़ाग ग्यान बिग्याना । ए पंकज बिकसे बिधि नाना ॥  
सुख संतोष बिराग बिबेका । बिगत सोक ए कोक अनेका ॥  
दो० यह प्रताप रबि जाकेँ उर जब करइ प्रकास ।

पछिले बाढ़हिं प्रथम जे कहे ते पावहिं नास ॥ 31

भ्रातन्ह सहित रामु एक बारा । संग परम प्रिय पवनकुमारा ॥  
सुंदर उपबन देखन गए । सब तरु कुसुमित पल्लव नए ॥  
जानि समय सनकादिक आए । तेज पुंज गुन सील सुहाए ॥  
ब्रह्मानंद सदा लयलीना । देखत बालक बहुकालीना ॥  
रूप धरें जनु चारिउ बेदा । समदरसी मुनि बिगत बिभेदा ॥  
आसा बसन ब्यसन यह तिन्हहीं । रघुपति चरित होइ तहँ सुनहीं ॥  
तहाँ रहे सनकादि भवानी । जहँ घटसंभव मुनिबर ग्यानी ॥  
राम कथा मुनिबर बहु बरनी । ग्यान जोनि पावक जिमि अरनी ॥  
दो० देखि राम मुनि आवत हरषि दंडवत कीन्ह ।

स्वागत पूँछि पीत पट प्रभु बैठन कहँ दीन्ह ॥ 32

कीन्ह दंडवत तीनिउँ भाई । सहित पवनसुत सुख अधिकाई ॥  
मुनि रघुपति छबि अतुल बिलोकी । भए मगन मन सके न रोकी ॥  
स्यामल गात सरोरुह लोचन । सुंदरता मंदिर भव मोचन ॥  
एकटक रहे निमेष न लावहिं । प्रभु कर जोरें सीस नवावहिं ॥  
तिन्ह कै दसा देखि रघुबीरा । ओवत नयन जल पुलक सरीरा ॥  
कर गहि प्रभु मुनिबर बैठारे । परम मनोहर बचन उचारे ॥  
आजु धन्य मैं सुनहु मुनीसा । तुम्हरेँ दरस जाहिं अघ खीसा ॥  
बड़े भाग पाइब सतसंगा । बिनहिं प्रयास होहिं भव भंगा ॥  
दो० संत संग अपबर्ग कर कामी भव कर पंथ ।

कहहिं संत कबि कोबिद श्रुति पुरान सदग्रंथ ॥ 33

सुनि प्रभु बचन हरषि मुनि चारी । पुलकित तन अस्तुति अनुसारी ॥  
जय भगवंत अनंत अनामय । अनघ अनेक एक करुनामय ॥  
जय निर्गुन जय जय गुन सागर । सुख मंदिर सुंदर अति नागर ॥  
जय इंदिरा रमन जय भूधर । अनुपम अज अनादि सोभाकर ॥  
ग्यान निधान अमान मानप्रद । पावन सुजस पुरान बेद बद ॥  
तग्य कृतज्ञ अग्यता भंजन । नाम अनेक अनाम निरंजन ॥  
सर्व सर्वगत सर्व उरालय । बससि सदा हम कहूँ परिपालय ॥  
द्वंद बिपति भव फंद बिभंजय । हृदि बसि राम काम मद गंजय ॥

दो० परमानंद कृपायतन मनि परिपूरन काम ।

प्रेम भगति अनपायनी देहु हमहि श्रीराम ॥ 34

देहु भगति रघुपति अति पावनि । त्रिबिध ताप भव दाप नसावनि ॥  
भव बारिधि कुंभज रघुनायक । सेवत सलभ सकल सुख दायक ॥  
मन संभव दारुन दुख दारय । दीनबंधु समता बिस्तारय ॥  
आस त्रास इरिषादि निवारक । बिनय बिबेक बिरति बिस्तारक ॥  
भूप मौलि मनि मंडन धरनी । देहि भगति संसृति सरि तरनी ॥  
मुनि मन मानस हंस निरंतर । चरन कमल बंदित अज संकर ॥  
रघुकुल केतु सेतु श्रुति रच्छक । काल करम सुभाउ गुन भच्छक ॥  
तारन तरन हरन सब दूषन । तुलसिदास प्रभु त्रिभुवन भूषन ॥

दो० बार बार अस्तुति करि प्रेम सहित सिरु नाइ ।

ब्रह्म भवन सनकादि गे अति अभीष्ट बर पाइ ॥ 35

सनकादिक बिधि लोक सिधाए । भ्रातन्ह राम चरन सिरु नाए ॥  
पूछत प्रभुहिं सकल सकुचाहीं । चितवहिं सब मारुतसुत पाहीं ॥  
सुनी चहहिं प्रभु मुख कै बानी । जो सुनि होइ सकल भ्रम हानी ॥  
अंतरजामी प्रभु सब जाना । बूझत कहहु काह हनुमाना ॥  
जोरि पानि कह तब हनुमंता । सुनहु दीनदयाल भगवंता ॥  
नाथ भरत कछु पूँछन चहहीं । प्रस्न करत मन सकुचत अहहीं ॥  
तुम्ह जानहु कपि मोर सुभाऊ । भरतहि मोहि कछु अंतर काऊ ॥  
सुनि प्रभु बचन भरत गहे चरना । सुनहु नाथ प्रनतारति हरना ॥

दो० नाथ न मोहि संदेह कछु सपनेहुँ सोक न मोह ।

केवल कृपा तुम्हारिहि कृपानंद संदोह ॥ 36

करउँ कृपानिधि एक ढिठाई । मैं सेवक तुम्ह जन सुखदाई ॥  
संतन्ह कै महिमा रघुराई । बहु बिधि बेद पुरानन्ह गाई ॥  
श्रीमुख तुम्ह पुनि कीन्हि बड़ाई । तिन्ह पर प्रभुहि प्रीति अधिकाई ॥  
सुना चहउँ प्रभु तिन्ह कर लच्छन । कृपासिंधु गुन ग्यान बिचच्छन ॥  
संत असंत भेद बिलगाई । प्रनतपाल मोहि कहहु बुझाई ॥  
संतन्ह के लच्छन सुनु भ्राता । अगनित श्रुति पुरान बिख्याता ॥  
संत असंतन्हि कै असि करनी । जिमि कुठार चंदन आचरनी ॥  
काटइ परसु मलय सुनु भाई । निज गुन देइ सुगंध बसाई ॥

दो० ताते सुर सीसन्ह चढ़त जग बल्लभ श्रीखंड ।

अनल दाहि पीटत घनहिं परसु बदन यह दंड ॥ 37

बिषय अलंपट सील गुनाकर । पर दुख दुख सुख सुख देखे पर ॥  
सम अभूतरिपु बिमद बिरागी । लोभामरष हरष भय त्यागी ॥  
कोमलचित दीनन्ह पर दाया । मन बच कम मम भगति अमाया ॥  
सबहि मानप्रद आपु अमानी । भरत प्राण सम मम ते प्राणी ॥

बिगत काम मम नाम परायन । सांति बिरति बिनती मुदितायन ॥  
सीतलता सरलता मयत्री । द्विज पद प्रीति धर्म जनयत्री ॥  
ए सब लच्छन बसहिं जासु उर । जानेहु तात संत संतत फुर ॥  
सम दम नियम नीति नहिं डोलहिं । परुष बचन कबहुं नहिं बोलहिं ॥

दो० निंदा अस्तुति उभय सम ममता मम पद कंज ।

ते सज्जन मम प्रानप्रिय गुन मंदिर सुख पुंज ॥ 38

सुनहु असंतन्ह केर सुभाऊ । भूलेहुं संगति करिअ न काऊ ।  
तिन्ह कर संग सदा दुखदाई । जिमि कपिलहि घालइ हरहाई ॥  
खलन्ह हृदयें अति ताप बिसेषी । जरहिं सदा पर संपति देखी ॥  
जहें कहुं निंदा सुनहिं पराई । हरषहिं मनहुं परी निधि पाई ॥  
काम कोध मद लाभ परायन । निर्दय कपटी कुटिल मलायन ॥  
बयरु अकारन सब काहू सों । जो कर हित अनहित ताहू सों ॥  
झूठइ लेना झूठइ देना । झूठइ भोजन झूठ चबेना ॥  
बोलहिं मधुर बचन जिमि मोरा । खाइ महा अहि हृदय कठोरा ॥

दो० पर द्रोही पर दार रत पर धन पर अपबाद ।

ते नर पौवर पापमय देह धरें मनुजाद ॥ 39

लोभइ ओढन लोभइ डासन । सिस्नोदर पर जमपुर त्रास न ॥  
काहू की जौं सुनहिं बड़ाई । स्वास लेहिं जनु जूडी आई ॥  
जब काहू कै देखहिं बिपती । सुखी भए मानहुं जग नृपती ॥  
स्वारथ रत परिवार बिरोधी । लंपट काम लोभ अति कोधी ॥  
मातु पिता गुर संत न मानहिं । आपु गए अरु घालहिं आनहिं ॥  
करहिं मोह बस द्रोह परावा । संत संग हरि कथा न भावा ॥  
अवगुन सिंधु मंदमति कामी । बेद बिदूषक परधन स्वामी ॥  
साधु द्रोह पर द्रोह बिसेषा । दंभ कपट जियें धरें सुबेषा ॥

दो० ऐसे अधम मनुज खल कृतजुग त्रेतों नाहिं ।

द्वापर कछुक बृंद बहु होइहहिं कलिजुग माहिं ॥ 40

पर हित सरिस धर्म नहिं भाई । पर पीड़ा सम नहिं अधमाई ॥  
निर्नय सकल पुरान बेद कर । कहेउं तात जानहिं कोबिद नर ॥  
नर सरीर धरि जे पर पीरा । करहिं ते सहहिं महा भव भीरा ॥  
करहिं मोह बस नर अध नाना । स्वारथ रत परलोक नसाना ॥  
कालरूप तिन्ह कहें मैं भ्राता । सुभ अरु असुभ कर्म फल दाता ॥  
अस बिचारि जे परम सयाने । भजहिं मोहि संसृत दुख जाने ॥  
त्यागहिं कर्म सुभासुभ दायक । भजहिं मोहि सुर नर मुनि नायक ॥  
संत असंतन्ह के गुन भाषे । ते न परहिं भव जिन्ह लखि राखे ॥

दो० सुनहु तात माया कृत गुन अरु दोष अनेक ।

गुन यह उभय न देखिअहिं देखिअ सो अबिबेक ॥ 41

श्रीमुख बचन सुनत सब भाई । हरषे प्रेम न हृदयें समाई ॥  
करहिं बिनय अति बारहिं बारा । हनूमान हियें हरष अपारा ॥  
पुनि रघुपति निज मंदिर गए । एहि बिधि चरित करत नित नए ॥  
बार बार नारद मुनि आवहिं । चरित पुनीत राम के गावहिं ॥  
नित नव चरित देखि मुनि जाहीं । ब्रह्मलोक सब कथा कहाहीं ॥  
सुनि बिरंचि अतिसय सुख मानहिं । पुनि पुनि तात करहु गुन गानहिं ॥  
सनकादिक नारदहि सराहहिं । जद्यपि ब्रह्म निरत मुनि आहहिं ॥  
सुनि गुन गान समाधि बिसारी । सादर सुनहिं परम अधिकारी ॥

दो० जीवनमुक्त ब्रह्मपर चरित सुनहिं तजि ध्यान ।  
 जे हरि कथौ न करहिं रति तिन्ह के हिय पाषान ॥ 42  
 एक बार रघुनाथ बोलाए । गुर मुनि पुरबासी सब आए ॥  
 बैठे गुर मुनि अरु द्विज सज्जन । बोले बचन भगत भव भंजन ॥  
 सुनहु सकल पुरजन मम बानी । कहउँ न कछु ममता उर आनी ॥  
 नहिं अनीति नहिं कछु प्रभुताई । सुनहु करहु जो तुम्हहि सोहाई ॥  
 सोइ सेवक प्रियतम मम सोई । मम अनुसासन मानै जोई ॥  
 जौ अनीति कछु भाषौ भाई । तौ मोहि बरजहु भय बिसराई ॥  
 बड़ें भाग मानष तन पावा । सुर दुर्लभ सब ग्रंथन्हि गावा ॥  
 साधन धाम मोच्छ कर द्वारा । पाइ न जेहिं परलोक सँवारा ॥

दो० सो परत्र दुख पावइ सिर धुनि धुनि पछिताइ ।  
 कालहि कर्महि ईस्वरहि मिथ्या दोष लगाइ ॥ 43  
 एहि तन कर फल बिषय न भाई । स्वर्गउ स्वल्प अंत दुखदाई ॥  
 नर तनु पाइ बिषयें मन देहीं । पलटि सुधा ते सठ बिष लेहीं ॥  
 ताहि कबहुँ भल कहइ न कोई । गुंजा ग्रहइ परस मनि खोई ॥  
 आकर चारि लच्छ चौरासी । जोनि भ्रमत यह जिव अबिनासी ॥  
 फिरत सदा माया कर प्रेरा । काल कर्म सुभाव गुन घेरा ॥  
 कबहुँक करि करुना नर देही । देत ईस बिनु हेतु सनेही ॥  
 नर तनु भव बारिधि कहुँ बेरो । सन्मुख मरुत अनुग्रह मेरो ॥  
 करनधार सदगुर दृढ नावा । दुर्लभ साज सुलभ करि पावा ॥

दो० जो न तरै भव सागर नर समाज अस पाइ ।  
 सो कृत निंदक मंदमति आत्माहन गति जाइ ॥ 44  
 जौ परलोक इहाँ सुख चहहू । सुनि मम बचन हृदयें दृढ गहहू ॥  
 सुलभ सुखद मारग यह भाई । भगति मोरि पुरान श्रुति गाई ॥  
 ग्यान अगम प्रत्यूह अनेका । साधन कठिन न मन कहुँ टेका ॥  
 करत कष्ट बहु पावइ कोऊ । भक्ति हीन मोहि प्रिय नहिं सोऊ ॥  
 भक्ति सुतंत्र सकल सुख खानी । बिनु सतसंग न पावहिं प्रानी ॥  
 पुन्य पुंज बिनु मिलहिं न संता । सतसंगति संसृति कर अंता ॥  
 पुन्य एक जग महुँ नहिं दूजा । मन कम बचन संत पद पूजा ॥  
 सानुकूल तेहि पर मुनि देवा । जो तजि कपटु करइ हरि सेवा ॥

दो० औरउ एक गुपुत मत सबहिं कहउँ कर जोरि ।  
 संकर भजन बिना नर भगति न पावइ मोरि ॥ 45  
 कहहु भगति पथ कवन प्रयासा । जोग न मख जप तप उपवासा ॥  
 सरल सुभाव न मन कुटिलाई । जथा लाभ संतोष सदाई ॥  
 मोर दास कहाइ नर आसा । करइ तौ कहहु कहा बिस्वासा ॥  
 बहुत कहउँ का कथा बढाई । एहि आचरन बस्य मै भाई ॥  
 बैर न बिग्रह आस न त्रासा । सुखमय ताहि सदा सब आसा ॥  
 अनारंभ अनिकेत अमानी । अनघ अरोष दच्छ बिग्यानी ॥  
 प्रीति सदा सज्जन संसर्गा । तृन सम बिषय स्वर्ग अपबर्गा ॥  
 भगति पच्छ हठ नहिं सठताई । दुष्ट तर्क सब दूरि बहाई ॥

दो० मम गुन ग्राम नाम रत गत ममता मद मोह ।  
 ता कर सुख सोइ जानइ परानंद संदोह ॥ 46  
 सुनत सुधासम बचन राम के । गहे सबनि पद कृपाधाम के ॥  
 जननि जनक गुर बंधु हमारे । कृपा निधान प्रान ते प्यारे ॥

तनु धनु धाम राम हितकारी । सब बिधि तुम्ह प्रनतारति हारी ॥  
असि सिख तुम्ह बिनु देइ न कोऊ । मातु पिता स्वारथ रत ओऊ ॥  
हेतु रहित जग जुग उपकारी । तुम्ह तुम्हार सेवक असुरारी ॥  
स्वारथ मीत सकल जग माहीं । सपनेहुँ प्रभु परमारथ नाहीं ॥  
सब के बचन प्रेम रस साने । सुनि रघुनाथ हृदयें हरषाने ॥  
निज निज गृह गए आयसु पाई । बरनत प्रभु बतकही सुहाई ॥

दो० उमा अवधबासी नर नारि कृतारथ रूप ।

ब्रह्म सच्चिदानंद घन रघुनायक जहँ भूप ॥ 47

एक बार बसिष्ट मुनि आए । जहाँ राम सुखधाम सुहाए ॥  
अति आदर रघुनायक कीन्हा । पद पखारि पादोदक लीन्हा ॥  
राम सुनहु मुनि कह कर जोरी । कृपासिंधु बिनती कछु मोरी ॥  
देखि देखि आचरन तुम्हारा । होत मोह मम हृदयें अपारा ॥  
महिमा अमिति बेद नहिं जाना । मैं केहि भॉति कहउँ भगवाना ॥  
उपरोहित्य कर्म अति मंदा । बेद पुरान सुमृति कर निंदा ॥  
जब न लेउँ मैं तब बिधि मोही । कहा लाभ आगें सुत तोही ॥  
परमातमा ब्रह्म नर रूपा । होइहि रघुकुल भूषण भूपा ॥

दो० तब मैं हृदयें बिचारा जोग जग्य ब्रत दान ।

जा कहूँ करिअ सो पैहउँ धर्म न एहि सम आन ॥ 48

जप तप नियम जोग निज धर्मा । श्रुति संभव नाना सुभ कर्मा ॥  
ग्यान दया दम तीरथ मज्जन । जहँ लागि धर्म कहत श्रुति सज्जन ॥  
आगम निगम पुरान अनेका । पढ़े सुने कर फल प्रभु एका ॥  
तव पद पंकज प्रीति निरंतर । सब साधन कर यह फल सुंदर ॥  
छूटइ मल कि मलहि के धोएँ । घृत कि पाव कोइ बारि बिलोएँ ॥  
प्रेम भगति जल बिनु रघुराई । अभिअंतर मल कबहुँ न जाई ॥  
सोइ सर्वग्य तग्य सोइ पंडित । सोइ गुन गृह बिग्यान अखंडित ॥  
दच्छ सकल लच्छन जुत सोई । जाकें पद सरोज रति होई ॥

दो० नाथ एक बर मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥ 49

अस कहि मुनि बसिष्ट गृह आए । कृपासिंधु के मन अति भाए ॥  
हनूमान भरतादिक भ्राता । संग लिए सेवक सुखदाता ॥  
पुनि कृपाल पुर बाहेर गए । गज रथ तुरग मगावत भए ॥  
देखि कृपा करि सकल सराहे । दिए उचित जिन्ह जिन्ह तेइ चाहे ॥  
हरन सकल श्रम प्रभु श्रम पाई । गए जहाँ सीतल अर्वराई ॥  
भरत दीन्ह निज बसन डसाई । बैठे प्रभु सेवहिं सब भाई ॥  
मारुतसुत तब मारुत करई । पुलक बपुष लोचन जल भरई ॥  
गिरिजा जासु प्रीति सेवकाई । बार बार प्रभु निज मुख गाई ॥

दो० तेहि अवसर मुनि नारद आए करतल बीन ।

गावन लागे राम कल कीरति सदा नबीन ॥ 50

मामवलोकय पंकज लोचन । कृपा बिलोकनि सोच बिमोचन ॥  
नील तामरस स्याम काम अरि । हृदय कंज मकरंद मधुप हरि ॥  
जातुधान बरुथ बल भंजन । मुनि सज्जन रंजन अघ गंजन ॥  
भुज बल बिपुल भार महि खंडित । खर दूषन बिराघ बध पंडित ॥  
रावनारि सुखरूप भूपबर । जय दसरथ कुल कुमुद सुधाकर ॥  
सुजस पुरान बिदित निगमागम । गावत सुर मुनि संत समागम ॥

कारुणीक ब्यलीक मद खंडन । सब बिधि कुसल कोसला मंडन ॥  
 कलि मल मथन नाम ममताहन । तुलसिदास प्रभु पाहि प्रनत जन ॥  
 दो० प्रेम सहित मुनि नारद बरनि राम गुन ग्राम ।  
 सोभासिंधु हृदयें धरि गए जहाँ बिधि धाम ॥ 51  
 गिरिजा सुनहु बिसद यह कथा । मैं सब कही मोरि मति जथा ॥  
 राम चरित सत कोटि अपारा । श्रुति सारदा न बरनै पारा ॥  
 राम अनंत अनंत गुनानी । जन्म कर्म अनंत नामानी ॥  
 जल सीकर महि रज गनि जाहीं । रघुपति चरित न बरनि सिराहीं ॥  
 बिमल कथा हरि पद दायनी । भगति होइ सुनि अनपायनी ॥  
 उमा कहिउँ सब कथा सुहाई । जो भुसुंड़ि खगपतिहि सुनाई ॥  
 कछुक राम गुन कहेउँ बखानी । अब का कहौँ सो कहहु भवानी ॥  
 सुनि सुभ कथा उमा हरषानी । बोली अति बिनीत मृदु बानी ॥  
 दो० तुम्हरी कृपाँ कृपायतन अब कृतकृत्य न मोह ।  
 जानेउँ राम प्रताप प्रभु चिदानंद संदोह ॥ 52 (क)  
 नाथ तवानन ससि ठेवत कथा सुधा रघुबीर ।  
 श्रवन पुटन्हि मन पान करि नहिँ अघात मतिधीर ॥ 52 (ख)  
 राम चरित जे सुनत अघाहों । रस बिसेष जाना तिन्ह नाहीं ॥  
 जीवनमुक्त महामुनि जेरु । हरि गुन सुनहिँ निरंतर तेरु ॥  
 भव सागर चह पार जो पावा । राम कथा ता कहँ दृढ़ नावा ॥  
 बिषइन्ह कहँ पुनि हरि गुन ग्रामा । श्रवन सुखद अरु मन अभिरामा ॥  
 श्रवनवंत अस को जग माहीं । जाहिँ न रघुपति चरित सोहाहीं ॥  
 ते जड़ जीव निजात्मक घाती । जिन्हहिँ न रघुपति कथा सोहाती ॥  
 हरिचरित्र मानस तुम्ह गावा । सुनि मैं नाथ अमिति सुख पावा ॥  
 तुम्ह जो कही यह कथा सुहाई । कागभुसुंड़ि गरुड़ प्रति गाई ॥  
 दो० बिरति ग्यान बिग्यान दृढ़ राम चरन अति नेह ।  
 बायस तन रघुपति भगति मोहि परम संदेह ॥ 53  
 नर सह० महँ सुनहु पुरारी । कोउ एक होइ धर्म ब्रतधारी ॥  
 धर्मसील कोटिक महँ कोई । बिषय बिमुख बिराग रत होई ॥  
 कोटि बिरक्त मध्य श्रुति कहई । सम्यक ग्यान सकृत कोउ लहई ॥  
 ग्यानवंत कोटिक महँ कोरु । जीवनमुक्त सकृत जग सोरु ॥  
 तिन्ह सहस्त्र महँ सब सुख खानी । दुर्लभ ब्रह्म लीन बिग्यानी ॥  
 धर्मसील बिरक्त अरु ग्यानी । जीवनमुक्त ब्रह्मपर प्राणी ॥  
 सब ते सो दुर्लभ सुरराया । राम भगति रत गत मद माया ॥  
 सो हरिभगत काग किमि पाई । बिस्वनाथ मोहि कहहु बुझाई ॥  
 दो० राम परायन ग्यान रत गुनागार मति धीर ।  
 नाथ कहहु केहि कारन पायउ काग सरीर ॥ 54  
 यह प्रभु चरित पवित्र सुहावा । कहहु कृपाल काग कहँ पावा ॥  
 तुम्ह केहि भौँति सुना मदनारी । कहहु मोहि अति कौतुक भारी ॥  
 गरुड़ महाग्यानी गुन रासी । हरि सेवक अति निकट निवासी ॥  
 तेहिँ केहि हेतु काग सन जाई । सुनी कथा मुनि निकर बिहाई ॥  
 कहहु कवन बिधि भा संबादा । दोउ हरिभगत काग उरगादा ॥  
 गौरि गिरा सुनि सरल सुहाई । बोले सिव सादर सुख पाई ॥  
 धन्य सती पावन मति तोरी । रघुपति चरन प्रीति नहिँ थोरी ॥

सुनहु परम पुनीत इतिहासा । जो सुनि सकल लोक भ्रम नासा ॥  
दो० ऐसिअ प्रस्न बिहंगपति कीन्हि काग सन जाइ ।

सो सब सादर कहिहउँ सुनहु उमा मन लाइ ॥ 55  
मैं जिमि कथा सुनी भव मोचनि । सो प्रसंग सुनु सुमुखि सुलोचनि ॥  
प्रथम दच्छ गृह तव अवतारा । सती नाम तब रहा तुम्हारा ॥  
दच्छ जग्य तव भा अपमाना । तुम्ह अति कोध तजे तब प्राणा ॥  
मम अनुचरन्ह कीन्ह मख भंगा । जानहु तुम्ह सो सकल प्रसंगा ॥  
तब अति सोच भयउ मन मोरें । दुखी भयउँ बियोग प्रिय तोरें ॥  
सुंदर बन गिरि सरित तड़ागा । कौतुक देखत फिरउँ बेरागा ॥  
गिरि सुमेर उत्तर दिसि दूरी । नील सैल एक सुंदर भूरी ॥  
तासु कनकमय सिखर सुहाए । चारि चारु मोरे मन भाए ॥  
तिन्ह पर एक एक बिटप बिसाला । बट पीपर पाकरी रसाला ॥  
सैलोपरि सर सुंदर सोहा । मनि सोपान देखि मन मोहा ॥

दो० सीतल अमल मधुर जल जलज बिपुल बहुरंग ।

कूजत कल रव हंस गन गुंजत मुजुल भृंग ॥ 56  
तेहिं गिरि रुचिर बसइ खग सोई । तासु नास कल्पांत न होई ॥  
माया कृत गुन दोष अनेका । मोह मनोज आदि अबिबेका ॥  
रहे ब्यापि समस्त जग माहीं । तेहि गिरि निकट कबहुँ नहिं जाहीं ॥  
तहें बसि हरिहि भजइ जिमि कागा । सो सुनु उमा सहित अनुरागा ॥  
पीपर तरु तर ध्यान सो धरई । जाप जग्य पाकरि तर करई ॥  
ऑब छौंह कर मानस पूजा । तजि हरि भजनु काजु नहिं दूजा ॥  
बर तर कह हरि कथा प्रसंगा । आवहिं सुनहिं अनेक बिहंगा ॥  
राम चरित बिचित्र बिधि नाना । प्रेम सहित कर सादर गाना ॥  
सुनहिं सकल मति बिमल मराला । बसहिं निरंतर जे तेहिं ताला ॥  
जब मैं जाइ सो कौतुक देखा । उर उपजा आनंद बिसेषा ॥

दो० तब कछु काल मराल तनु धरि तहें कीन्ह निवास ।

सादर सुनि रघुपति गुन पुनि आयउँ कैलास ॥ 57  
गिरिजा कहेउँ सो सब इतिहासा । मैं जेहि समय गयउँ खग पासा ॥  
अब सो कथा सुनहु जेहि हेतू । गयउ काग पहिं खग कुल केतू ॥  
जब रघुनाथ कीन्हि रन कीड़ा । समुझत चरित होति मोहि ब्रीड़ा ॥  
इंद्रजीत कर आपु बँधायो । तब नारद मुनि गरुड पठायो ॥  
बंधन काटि गयो उरगादा । उपजा हृदयें प्रचंड बिषादा ॥  
प्रभु बंधन समुझत बहु भौंती । करत बिचार उरग आराती ॥  
ब्यापक ब्रह्म बिरज बागीसा । माया मोह पार परमीसा ॥  
सो अवतार सुनेउँ जग माहीं । देखउँ सो प्रभाव कछु नाहीं ॥

दो० भव बंधन ते छूटहिं नर जपि जा कर नाम ।

खर्ब निसाचर बौंधेउ नागपास सोइ राम ॥ 58  
नाना भौंति मनहि समुझावा । प्रगट न ग्यान हृदयें भ्रम छावा ॥  
खेद खिन्न मन तर्क बढ़ाई । भयउ मोहबस तुम्हरिहिं नाई ॥  
ब्याकुल गयउ देवरिषि पाहीं । कहेसि जो संसय निज मन माहीं ॥  
सुनि नारदहि लागि अति दाया । सुनु खग प्रबल राम कै माया ॥  
जो ग्यानिन्ह कर चित अपहरई । बरिआई बिमोह मन करई ॥  
जेहिं बहु बार नचावा मोही । सोइ ब्यापी बिहंगपति तोही ॥  
महामोह उपजा उर तोरें । मिटिहि न बेगि कहें खग मोरें ॥

चतुरानन पहिं जाहु खगेसा । सोइ करेहु जेहि होइ निदेसा ॥  
दो० अस कहि चले देवरिषि करत राम गुन गान ।  
हरि माया बल बरनत पुनि पुनि परम सुजान ॥ 59  
तब खगपति बिरंचि पहिं गयऊ । निज संदेह सुनावत भयऊ ॥  
सुनि बिरंचि रामहि सिरु नावा । समुझि प्रताप प्रेम अति छावा ॥  
मन महुं करइ बिचार बिधाता । माया बस कबि कोबिद ग्याता ॥  
हरि माया कर अमिति प्रभावा । बिपुल बार जेहिं मोहि नचावा ॥  
अग जगमय जग मम उपराजा । नहिं आचरज मोह खगराजा ॥  
तब बोले बिधि गिरा सुहाई । जान महेस राम प्रभुताई ॥  
बैनतेय संकर पहिं जाहू । तात अनत पूछहु जनि काहू ॥  
तहें होइहि तव संसय हानी । चलेउ बिहंग सुनत बिधि बानी ॥  
दो० परमातुर बिहंगपति आयउ तब मो पास ।  
जात रहेउं कुबेर गृह रहिहु उमा कैलास ॥ 60  
तेहिं मम पद सादर सिरु नावा । पुनि आपन संदेह सुनावा ॥  
सुनि ता करि बिनती मृदु बानी । प्रेम सहित मैं कहेउं भवानी ॥  
मिलेहु गरुड़ मारग महे मोही । कवन भौंति समुझावौं तोही ॥  
तबहिं होइ सब संसय भंगा । जब बहु काल करिअ सतसंगा ॥  
सुनिअ तहाँ हरि कथा सुहाई । नाना भौंति मुनिन्ह जो गाई ॥  
जेहि महुं आदि मध्य अवसाना । पभु प्रतिपाद्य राम भगवाना ॥  
नित हरि कथा होत जहें भाई । पठवहुं तहाँ सुनहु तुम्ह जाई ॥  
जाइहि सुनत सकल संदेहा । राम चरन होइहि अति नेहा ॥  
दो० बिनु सतसंग न हरि कथा तेहि बिनु मोह न भाग ।  
मोह गएं बिनु राम पद होइ न दूढ़ अनुराग ॥ 61  
मिलहिं न रघुपति बिनु अनुरागा । किएँ जोग तप ग्यान बिरागा ॥  
उत्तर दिसि सुंदर गिरि नीला । तहें रह कागभुसुंछि सुसीला ॥  
राम भगति पथ परम प्रबीना । ग्यानी गुन गृह बहु कालीना ॥  
राम कथा सो कहइ निरंतर । सादर सुनहिं बिबिध बिहंगबर ॥  
जाइ सुनहु तहें हरि गुन भूरी । होइहि माह जनित दुख दूरी ॥  
मैं जब तेहि सब कहा बुझाई । चलेउ हरिषि मम पद सिरु नाई ॥  
ताते उमा न मैं समुझावा । रघुपति कृपौं मरमु मैं पावा ॥  
होइहि कीन्ह कबहुं अभिमाना । सो खोवै चह कृपानिधाना ॥  
कछु तेहि ते पुनि मैं नहिं राखा । समुझइ खग खगही कै भाषा ॥  
प्रभु माया बलवंत भवानी । जाहि न मोह कवन अस ग्यानी ॥  
दो० ग्यानी भगत सिरोमनि त्रिभुवनपति कर जान ।  
ताहि मोह माया नर पावैर करहिं गुमान ॥ 62 (क)

मासपारायण, अट्ठाईसवौं विश्राम

सिव बिरंचि कहुं मोहइ को है बपुरा आन ।  
अस जियेँ जानि भजहिं मुनि माया पति भगवान ॥ 62 (ख)  
गयउ गरुड़ जहें बसइ भुसुंछा । मति अकुंठ हरि भगति अखंडा ॥  
देखि सैल प्रसन्न मन भयऊ । माया मोह सोच सब गयऊ ।  
करि तड़ाग मज्जन जलपाना । बट तर गयउ हृदयेँ हरषाना ॥  
बृद्ध बृद्ध बिहंग तहें आए । सुनै राम के चरित सुहाए ॥

कथा अरंभ करै सोइ चाहा । तेही समय गयउ खगनाहा ॥  
 आवत देखि सकल खगराजा । हरषेउ बायस सहित समाजा ॥  
 अति आदर खगपति कर कीन्हा । स्वागत पूछि सुआसन दीन्हा ॥  
 करि पूजा समेत अनुरागा । मधुर बचन तब बोलेउ कागा ॥  
 दो० नाथ कृतारथ भयउँ मैं तव दरसन खगराज ।  
 आयसु देहु सो करौं अब प्रभु आयहु केहि काज ॥ 63 (क)  
 सदा कृतारथ रूप तुम्ह कह मृदु बचन खगेस ।  
 जेहि कै अस्तुति सादर निज मुख कीन्हि महेस ॥ 63 (ख)  
 सुनहु तात जेहि कारन आयउँ । सो सब भयउ दरस तव पायउँ ॥  
 देखि परम पावन तव आश्रम । गयउ मोह संसय नाना भ्रम ॥  
 अब श्रीराम कथा अति पावनि । कहहु सुखद दुख पुंज नसावनि ॥  
 सुनत गरुड़ कै गिरा बिनीता । सरल सुप्रेम सुखद सुपुनीता ॥  
 भयउ तासु मन परम उछाहा । लाग कहै रघुपति गुन गाहा ॥  
 प्रथमहिं अति अनुराग भवानी । रामचरित सर कहेसि बखानी ॥  
 पुनि नारद कर मोह अपारा । कहेसि बहुरि रावन अवतारा ॥  
 प्रभु अवतार कथा पुनि गाई । तब सिसु चरित कहेसि मन लाई ॥  
 दो० बालचरित कहि बिबिध बिधि मन महँ परम उछाह ॥  
 रिषि आगवन कहेसि पुनि श्रीरघुबीर बिबाह ॥ 64  
 बहुरि राम अभिषेक प्रसंगा । पुनि नृप बचन राज रस भंगा ॥  
 पुरबासिन्ह कर बिरह बिषादा । कहेसि राम लछिमन संबादा ॥  
 बिपिन गवन केवट अनुरागा । सुरसरि उत्तरि निवास प्रयागा ॥  
 बालमीक प्रभु मिलन बखाना । चित्रकूट जिमि बसे भगवाना ॥  
 सचिवागवन नगर नृप मरना । भरतागवन प्रेम बहु बरना ॥  
 करि नृप किया संग पुरबासी । भरत गए जहँ प्रभु सुख रासी ॥  
 पुनि रघुपति बहुबिधि समुझाए । लै पादुका अवधपुर आए ॥  
 भरत रहनि सुरपति सुत करनी । प्रभु अरु अत्रि भेंट पुनि बरनी ॥  
 दो० कहि बिराध बध जेहि बिधि देह तजी सरभंग ।  
 बरनि सुतीछन प्रीति पुनि प्रभु अगस्ति सतसंग ॥ 65  
 कहि दंडक बन पावनताई । गीध मइत्री पुनि तेहिं गाई ॥  
 पुनि प्रभु पंचवटीं कृत बासा । भंजी सकल मुनिन्ह की त्रासा ॥  
 पुनि लछिमन उपदेस अनूपा । सूपनखा जिमि कीन्हि कुरुपा ॥  
 खर दूषन बध बहुरि बखाना । जिमि सब मरमु दसानन जाना ॥  
 दसकंधर मारीच बतकही । जेहि बिधि भई सो सब तेहिं कही ॥  
 पुनि माता सीता कर हरना । श्रीरघुबीर बिरह कछु बरना ॥  
 पुनि प्रभु गीध किया जिमि कीन्ही । बधि कबंध सबरिहि गति दीन्हीं ॥  
 बहुरि बिरह बरनत रघुबीरा । जेहि बिधि गए सरोबर तीरा ॥  
 दो० प्रभु नारद संबाद कहि मारुति मिलन प्रसंग ।  
 पुनि सुग्रीव मिताई बालि प्रान कर भंग ॥ 66 (क)  
 कपिहि तिलक करि प्रभु कृत सैल प्रबरषन बास ।  
 बरनन वर्षा सरद अरु राम रोष कपि त्रास ॥ 66 (ख)  
 जेहि बिधि कपिपति कीस पठाए । सीता खोज सकल दिसि धाए ॥  
 बिबर प्रबेस कीन्ह जेहि भौंती । कपिन्ह बहोरि मिला संपाती ॥  
 सुनि सब कथा समीरकुमारा । नाघत भयउ पयोधि अपारा ॥  
 लंका कपि प्रबेस जिमि कीन्हा । पुनि सीताहि धीरजु जिमि दीन्हा ॥

बन उजारि रावनहि प्रबोधी । पुर दहि नाघेउ बहुरि पयोधी ॥  
 आए कपि सब जहँ रघुराई । बैदेही की कुसल सुनाई ॥  
 सेन समेति जथा रघुबीरा । उतरे जाइ बारिनिधि तीरा ॥  
 मिला बिभीषन जेहि बिधि आई । सागर निग्रह कथा सुनाई ॥  
 दो० सेतु बॉधि कपि सेन जिमि उतरी सागर पार ।  
 गयउ बसीठी बीरबर जेहि बिधि बालिकुमार ॥ 67 (क)  
 निसिचर कीस लराई बरनिसि बिबिध प्रकार ।  
 कुंभकरन घननाद कर बल पौरुष संघार ॥ 67 (ख)  
 निसिचर निकर मरन बिधि नाना । रघुपति रावन समर बखाना ॥  
 रावन बध मंदोदरि सोका । राज बिभीषन देव असोका ॥  
 सीता रघुपति मिलन बहोरी । सुरन्ह कीन्हि अस्तुति कर जोरी ॥  
 पुनि पुष्पक चढ़ि कपिन्ह समेता । अवध चले प्रभु कृपा निकेता ॥  
 जेहि बिधि राम नगर निज आए । बायस बिसद चरित सब गाए ॥  
 कहेसि बहोरि राम अभिषेका । पुर बरनत नृपनीति अनेका ॥  
 कथा समस्त भुसुंड बखानी । जो मैं तुम्ह सन कही भवानी ॥  
 सुनि सब राम कथा खगनाहा । कहत बचन मन परम उछाहा ॥  
 सो० गयउ मोर संदेह सुनेउँ सकल रघुपति चरित ।  
 भयउ राम पद नेह तव प्रसाद बायस तिलक ॥ 68 (क)  
 मोहि भयउ अति मोह प्रभु बंधन रन महुँ निरखि ।  
 चिदानंद संदोह राम बिकल कारन कवन ॥ 68 (ख)  
 देखि चरित अति नर अनुसारी । भयउ हृदयें मम संसय भारी ॥  
 सोइ भ्रम अब हित करि मैं माना । कीन्ह अनुग्रह कृपानिधाना ॥  
 जो अति आतप ब्याकुल होई । तरु छाया सुख जानइ सोई ॥  
 जौं नहिं होत मोह अति मोही । मिलतेउँ तात कवन बिधि तोही ॥  
 सुनतेउँ किमि हरि कथा सुहाई । अति बिचित्र बहु बिधि तुम्ह गाई ॥  
 निगमागम पुरान मत एहा । कहहिं सिद्ध मुनि नहिं संदेहा ॥  
 संत बिसुद्ध मिलहिं परि तेही । चितवहिं राम कृपा करि जेही ॥  
 राम कृपाँ तव दरसन भयऊ । तव प्रसाद सब संसय गयऊ ॥  
 दो० सुनि बिहंगपति बानी सहित बिनय अनुराग ।  
 पुलक गात लोचन सजल मन हरषेउ अति काग ॥ 69 (क)  
 श्रोता सुमति सुसील सुचि कथा रसिक हरि दास ।  
 पाइ उमा अति गोप्यमपि सज्जन करहिं प्रकास ॥ 69 (ख)  
 बोलेउ कागभुसुंड बहोरी । नभग नाथ पर प्रीति न थोरी ॥  
 सब बिधि नाथ पूज्य तुम्ह मेरे । कृपापात्र रघुनायक केरे ॥  
 तुम्हहि न संसय मोह न माया । माँ पर नाथ कीन्हि तुम्ह दाया ॥  
 पठइ मोह मिस खगपति तोही । रघुपति दीन्हि बड़ाई मोही ॥  
 तुम्ह निज मोह कही खग साई । सो नहिं कछु आचरज गोसाई ॥  
 नारद भव बिरंचि सनकादी । जे मुनिनायक आतमबादी ॥  
 मोह न अंध कीन्ह केहि केही । को जग काम नचाव न जेही ॥  
 तृस्नों केहि न कीन्ह बौराहा । केहि कर हृदय कोध नहिं दाहा ॥  
 दो० ग्यानी तापस सूर कवि कोबिद गुन आगार ।  
 केहि कै लोभ बिडंबना कीन्हि न एहिं संसार ॥ 70 (क)  
 श्री मद बक न कीन्ह केहि प्रभुता बधिर न काहि ।  
 मृगलोचनि के नैन सर को अस लाग न जाहि ॥ 70 (ख)

गुन कृत सन्यपात नहिं केही । कोउ न मान मद तजेउ निबेही ॥  
जोबन ज्वर केहि नहिं बलकावा । ममता केहि कर जस न नसावा ॥  
मच्छर काहि कलंक न लावा । काहि न सोक समीर डोलावा ॥  
चिंता साँपिनि को नहिं खाया । को जग जाहि न ब्यापी माया ॥  
कीट मनोरथ दारु सरीरा । जेहि न लाग घुन को अस धीरा ॥  
सुत बित लोक ईषना तीनी । केहि कै मति इन्ह कृत न मलीनी ॥  
यह सब माया कर परिवारा । प्रबल अमिति को बरनै पारा ॥  
सिव चतुरानन जाहि डेराहीं । अपर जीव केहि लेखे माहीं ॥

दो० ब्यापि रहेउ संसार महुँ माया कटक प्रचंड ।

सेनापति कामादि भट दंभ कपट पाषंड ॥ 71 (क)

सो दासी रघुबीर कै समुझें मिथ्या सोपि ।

छूट न राम कृपा बिनु नाथ कहउँ पद रोपि ॥ 71 (ख)

जो माया सब जगहि नचावा । जासु चरित लखि काहुँ न पावा ॥  
सोइ प्रभु भू बिलास खगराजा । नाच नटी इव सहित समाजा ॥  
सोइ सच्चिदानंद घन रामा । अज बिग्यान रूप बल धामा ॥  
ब्यापक ब्याप्य अखंड अनंता । अखिल अमोघसक्ति भगवंता ॥  
अगुन अदभ्र गिरा गोतीता । सबदरसी अनवद्य अजीता ॥  
निर्मम निराकार निरमोहा । नित्य निरंजन सुख संदोहा ॥  
प्रकृति पार प्रभु सब उर बासी । ब्रह्म निरीह बिरज अबिनासी ॥  
इहाँ मोह कर कारन नाही । रबि सन्मुख तम कबहुँ कि जाहीं ॥

दो० भगत हेतु भगवान प्रभु राम धरेउ तनु भूप ।

किए चरित पावन परम प्राकृत नर अनुरूप ॥ 72 (क)

जथा अनेक बेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥ 72 (ख)

असि रघुपति लीला उरगारी । दनुज बिमोहनि जन सुखकारी ॥  
जे मति मलिन बिषयबस कामी । प्रभु पर मोह धरहिं इमि स्वामी ॥  
नयन दोष जा कहँ जब होई । पीत बरन ससि कहँ कह सोई ॥  
जब जेहि दिसि भ्रम होइ खगोसा । सो कह पच्छिम उयउ दिनेसा ॥  
नौकारुढ चलत जग देखा । अचल मोह बस आपुहि लेखा ॥  
हरि बिषइक अस मोह बिहंगा । सपनेहुँ नहिं अग्यान प्रसंगा ॥  
मायाबस मतिमंद अभागी । हृदयें जमनिका बहुबिधि लागी ॥  
ते सठ हठ बस संसय करहीं । निज अग्यान राम पर धरहीं ॥

दो० काम कोध मद लोभ रत गृहासक्त दुखरूप ।

ते किमि जानहिं रघुपतिहि मूढ परे तम कूप ॥ 73 (क)

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि मुनि मन भ्रम होइ ॥ 73 (ख)

सुनु खगोस रघुपति प्रभुताई । कहउँ जथामति कथा सुहाई ॥  
जेहि बिधि मोह भयउ प्रभु मोही । सोउ सब कथा सुनावउँ तोही ॥  
राम कृपा भाजन तुम्ह ताता । हरि गुन प्रीति मोहि सुखदाता ॥  
ताते नहिं कछु तुम्हहिं दुरावउँ । परम रहस्य मनोहर गावउँ ॥  
सुनहु राम कर सहज सुभाऊ । जन अभिमान न राखहिं काऊ ॥  
संसृत मूल सूलप्रद नाना । सकल सोक दायक अभिमाना ॥  
तात करहिं कृपानिधि दूरी । सेवक पर ममता अति भूरी ॥  
जिमि सिसु तन ब्रन होइ गोसाई । मातु चिराव कठिन की नाई ॥

दो० जदपि प्रथम दुख पावइ रोवइ बाल अधीर ।

ब्याधि नास हित जननी गनति न सो सिसु पीर ॥ 74 (क)

तिमि रघुपति निज दास कर हरहिं मान हित लागि ।

तुलसीदास ऐसे प्रभुहि कस न भजहु भ्रम त्यागि ॥ 74 (ख)

राम कृपा आपनि जड़ताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित बिलोकि हरषाऊँ ॥

जन्म महोत्सव देखउँ जाई । बरष पाँच तहँ रहउँ लोभाई ॥

इष्टदेव मम बालक रामा । सोभा बपुष कोटि सत कामा ॥

निज प्रभु बदन निहारि निहारी । लोचन सुफल करउँ उरगारी ॥

लघु बायस बपु धरि हरि संगी । देखउँ बालचरित बहु रंगा ॥

दो० लरिकाई जहँ जहँ फिरहिं तहँ तहँ संग उड़ाउँ ।

जूठनि परइ अजिर महँ सो उठाइ करि खाउँ ॥ 75 (क)

एक बार अतिसय सब चरित किए रघुबीर ।

सुमिरत प्रभु लीला सोइ पुलकित भयउ सरीर ॥ 75 (ख)

कहइ भसुंड सुनहु खगनायक । राम चरित सेवक सुखदायक ॥

नृप मंदिर सुंदर सब भौंती । खचित कनक मनि नाना जाती ॥

बरनि न जाइ रुचिर अंगनाई । जहँ खेलहिं नित चारिउ भाई ॥

बालबिनोद करत रघुराई । बिचरत अजिर जननि सुखदाई ॥

मरकत मृदुल कलेवर स्यामा । अंग अंग प्रति छबि बहु कामा ॥

नव राजीव अरुन मृदु चरना । पदज रुचिर नख ससि दुति हरना ॥

ललित अंक कुलिसादिक चारी । नूपुर चारु मधुर रवकारी ॥

चारु पुरट मनि रचित बनाई । कटि किंकिनि कल मुखर सुहाई ॥

दो० रेखा त्रय सुंदर उदर नाभी रुचिर गँभीर ।

उर आयत भ्राजत बिबिध बाल बिभूषन चीर ॥ 76

अरुन पानि नख करज मनोहर । बाहु बिसाल बिभूषन सुंदर ॥

कंध बाल केहरि दर ग्रीवा । चारु चिबुक आनन छबि सींवा ॥

कलबल बचन अधर अरुनारे । दुइ दुइ दसन बिसद बर बारे ॥

ललित कपोल मनोहर नासा । सकल सुखद ससि कर सम हासा ॥

नील कंज लोचन भव मोचन । भ्राजत भाल तिलक गोरोचन ॥

बिकट भृकुटि सम श्रवन सुहाए । कुंचित कच मेचक छबि छाए ॥

पीत झीनि झगुली तन सोही । किलकनि चितवनि भावति मोही ॥

रूप रासि नृप अजिर बिहारी । नाचहिं निज प्रतिबिंब निहारी ॥

मोहि सन करहिं बिबिध बिधि कीड़ा । बरनत मोहि होति अति ब्रीड़ा ॥

किलकत मोहि धरन जब धावहिं । चलउँ भागि तब पूप देखावहिं ॥

दो० आवत निकट हँसहिं प्रभु भाजत रुदन कराहिं ।

जाउँ समीप गहन पद फिरि फिरि चितइ पराहिं ॥ 77 (क)

प्राकृत सिसु इव लीला देखि भयउ मोहि मोह ।

कवन चरित्र करत प्रभु चिदानंद संदोह ॥ 77 (ख)

एतना मन आनत खगराया । रघुपति प्रेरित ब्यापी माया ॥

सो माया न दुखद मोहि काहीं । आन जीव इव संसृत नाहीं ॥

नाथ इहाँ कछु कारन आना । सुनहु सो सावधान हरिजाना ॥

ग्यान अखंड एक सीताबर । माया बस्य जीव सचराचर ॥

जौं सब कें रह ग्यान एकरस । ईस्वर जीवहि भेद कहहु कस ॥

माया बस्य जीव अभिमानी । ईस बस्य माया गुनखानी ॥  
 परबस जीव स्वबस भगवंता । जीव अनेक एक श्रीकंता ॥  
 मुधा भेद जद्यपि कृत माया । बिनु हरि जाइ न कोटि उपाया ॥  
 दो० रामचंद्र के भजन बिनु जो चह पद निर्बान ।  
 ग्यानवंत अपि सो नर पसु बिनु पूँछ बिषान ॥ 78 (क)  
 राकापति षोडस उअहिं तारागन समुदाइ ।  
 सकल गिरिन्ह दव लाइअ बिनु रबि राति न जाइ ॥ 78 (ख)  
 ऐसेहिं हरि बिनु भजन खगसा । मिटइ न जीवन्ह केर कलेसा ॥  
 हरि सेवकहि न ब्याप अबिद्या । प्रभु प्रेरित ब्यापइ तेहि बिद्या ॥  
 ताते नास न होइ दास कर । भेद भगति बाढइ बिहंगबर ॥  
 भ्रम तें चकित राम मोहि देखा । बिहँसे सो सुनु चरित बिसेषा ॥  
 तेहि कौतुक कर मरमु न काहूँ । जाना अनुज न मातु पिताहूँ ॥  
 जानु पानि धाए मोहि धरना । स्यामल गात अरुन कर चरना ॥  
 तब मैं भागि चलेउँ उरगारी । राम गहन कहँ भुजा पसारी ॥  
 जिमि जिमि दूरि उड़ाउँ अकासा । तहँ भुज हरि देखेउँ निज पासा ॥  
 दो० ब्रह्मलोक लागि गयउँ मैं चितयउँ पाछ उड़ात ।  
 जुग अंगुल कर बीच सब राम भुजहि मोहि तात । 79 (क)  
 सप्ताबरन भेद करि जहाँ लगें गति मोरि ।  
 गयउँ तहाँ प्रभु भुज निरखि ब्याकुल भयउँ बहोरि ॥ 79 (ख)  
 मूदेउँ नयन त्रसित जब भयउँ । पुनि चितवत कोसलपुर गयउँ ॥  
 मोहि बिलोकि राम मुसुकाहीं । बिहँसत तुरत गयउँ मुख माहीं ॥  
 उदर माझ सुनु अंडज राया । देखेउँ बहु ब्रह्मांड निकाया ॥  
 अति बिचित्र तहँ लोक अनेका । रचना अधिक एक ते एका ॥  
 कोटिन्ह चतुरानन गौरीसा । अगनित उडगन रबि रजनीसा ॥  
 अगनित लोकपाल जम काला । अगनित भूधर भूमि बिसाला ॥  
 सागर सरि सर बिपिन अपारा । नाना भौंति सृष्टि बिस्तारा ॥  
 सुर मुनि सिद्ध नाग नर किंनर । चारि प्रकार जीव सचराचर ॥  
 दो० जो नहिं देखा नहिं सुना जो मनहूँ न समाइ ।  
 सो सब अद्भुत देखेउँ बरनि कवनि बिधि जाइ ॥ 80 (क)  
 एक एक ब्रह्मांड महूँ रहेउँ बरष सत एक ।  
 एहि बिधि देखत फिरउँ मैं अंड कटाह अनेक ॥ 80 (ख)  
 लोक लोक प्रति भिन्न बिधाता । भिन्न बिष्णु सिव मनु दिसित्राता ॥  
 नर गंधर्ब भूत बेताला । किंनर निसिचर पसु खग ब्याला ॥  
 देव दनुज गन नाना जाती । सकल जीव तहँ आनहि भौंती ॥  
 महि सरि सागर सर गिरि नाना । सब प्रपंच तहँ आनइ आना ॥  
 अंडकोस प्रति प्रति निज रूपा । देखेउँ जिनस अनेक अनूपा ॥  
 अवधपुरी प्रति भुवन निनारी । सरजू भिन्न भिन्न नर नारी ॥  
 दसरथ कौसल्या सुनु ताता । बिबिध रूप भरतादिक भ्राता ॥  
 प्रति ब्रह्मांड राम अवतारा । देखेउँ बालबिनोद अपारा ॥  
 दो० भिन्न भिन्न मैं दीख सबु अति बिचित्र हरिजान ।  
 अगनित भुवन फिरेउँ प्रभु राम न देखेउँ आन ॥ 81 (क)  
 सोइ सिसुपन सोइ सोभा सोइ कृपाल रघुबीर ।  
 भुवन भुवन देखत फिरउँ प्रेरित मोह समीर ॥ 81 (ख)  
 भ्रमत मोहि ब्रह्मांड अनेका । बीते मनहूँ कल्प सत एका ॥

फिरत फिरत निज आश्रम आयउँ । तहँ पुनि रहि कछु काल गवोंयउँ ॥  
 निज प्रभु जन्म अवध सुनि पायउँ । निर्भर प्रेम हरषि उठि धायउँ ॥  
 देखउँ जन्म महोत्सव जाई । जेहि बिधि प्रथम कहा मैं गाई ॥  
 राम उदर देखेउँ जग नाना । देखत बनइ न जाइ बखाना ॥  
 तहँ पुनि देखेउँ राम सुजाना । माया पति कृपाल भगवाना ॥  
 करउँ बिचार बहोरि बहोरी । मोह कलिल ब्यापित मति मोरी ॥  
 उभय घरी महँ मैं सब देखा । भयउँ भ्रमित मन मोह बिसेषा ॥  
 दो0 देखि कृपाल बिकल मोहि बिहँसे तब रघुबीर ।  
 बिहँसतहीं मुख बाहेर आयउँ सुनु मतिधीर ॥ 82 (क)  
 सोइ लरिकाई मो सन करन लगे पुनि राम ।  
 कोटि भॉति समुझावउँ मनु न लहइ विश्राम ॥ 82 (ख)  
 देखि चरित यह सो प्रभुताई । समुझत देह दसा बिसराई ॥  
 धरनि परेउँ मुख आव न बाता । त्राहि त्राहि आरत जन त्राता ॥  
 प्रेमाकुल प्रभु मोहि बिलोकी । निज माया प्रभुता तब रोकी ॥  
 कर सरोज प्रभु मम सिर धरेऊ । दीनदयाल सकल दुख हरेऊ ॥  
 कीन्ह राम मोहि बिगत बिमोहा । सेवक सुखद कृपा संदोहा ॥  
 प्रभुता प्रथम बिचारि बिचारी । मन महँ होइ हरष अति भारी ॥  
 भगत बछलता प्रभु कै देखी । उपजी मम उर प्रीति बिसेषी ॥  
 सजल नयन पुलकित कर जोरी । कीन्हिउँ बहु बिधि बिनय बहोरी ॥  
 दो0 सुनि सप्रेम मम बानी देखि दीन निज दास ।  
 बचन सुखद गंभीर मृदु बोले रमानिवास ॥ 83 (क)  
 काकभसुंड़ि मागु बर अति प्रसन्न मोहि जानि ।  
 अनिमादिक सिधि अपर रिधि मोच्छ सकल सुख खानि ॥ 83 (ख)  
 ग्यान बिबेक बिरति बिग्याना । मुनि दुर्लभ गुन जे जग नाना ॥  
 आजु देउँ सब संसय नाही । मागु जो तोहि भाव मन माहीं ॥  
 सुनि प्रभु बचन अधिक अनुरागेउँ । मन अनुमान करन तब लागेउँ ॥  
 प्रभु कह देन सकल सुख सही । भगति आपनी देन न कही ॥  
 भगति हीन गुन सब सुख ऐसे । लवन बिना बहु बिंजन जैसे ॥  
 भजन हीन सुख कवने काजा । अस बिचारि बोलेउँ खगराजा ॥  
 जौ प्रभु होइ प्रसन्न बर देहू । मो पर करहु कृपा अरु नेहू ॥  
 मन भावत बर मागउँ स्वामी । तुम्ह उदार उर अंतरजामी ॥  
 दो0 अबिरल भगति बिसुद्ध तव श्रुति पुरान जो गाव ।  
 जेहि खोजत जोगीस मुनि प्रभु प्रसाद कोउ पाव ॥ 84 (क)  
 भगत कल्पतरु प्रनत हित कपासिंधु सुख धाम ।  
 सोइ निज भगति मोहि प्रभु देहु दया करि राम ॥ 84 (ख)  
 एवमस्तु कहि रघुकुलनायक । बोले बचन परम सुखदायक ॥  
 सुनु बायस तैं सहज सयाना । काहे न मागसि अस बरदाना ॥  
 सब सुख खानि भगति तैं मांगी । नहिं जग कोउ तोहि सम बड़ भागी ॥  
 जो मुनि कोटि जतन नहिं लहहीं । जे जप जोग अनल तन दहहीं ॥  
 रीझेउँ देखि तोरि चतुराई । मांगेहु भगति मोहि अति भाई ॥  
 सुनु बिहंग प्रसाद अब मोरें । सब सुभ गुन बसिहहिं उर तोरें ॥  
 भगति ग्यान बिग्यान बिरागा । जोग चरित्र रहस्य बिभागा ॥  
 जानब तैं सबही कर भेदा । मम प्रसाद नहिं साधन खेदा ॥  
 दो0 माया संभव भ्रम सब अब न ब्यापिहहिं तोहि ।

जानेसु ब्रह्म अनादि अज अगुन गुनाकर मोहि ॥ 85 (क)

मोहि भगत प्रिय संतत अस बिचारि सुनु काग ।

कार्ये बचन मन मम पद करेसु अचल अनुराग ॥ 85 (ख)

अब सुनु परम बिमल मम बानी । सत्य सुगम निगमादि बखानी ॥

निज सिद्धांत सुनावउँ तोही । सुनु मन धरु सब तजि भजु मोही ॥

मम माया संभव संसारा । जीव चराचर बिबिध प्रकारा ॥

सब मम प्रिय सब मम उपजाए । सब ते अधिक मनुज मोहि भाए ॥

तिन्ह महेँ प्रिय बिरक्त पुनि ग्यानी । ग्यानिहु ते अति प्रिय बिग्यानी ॥

तिन्ह ते पुनि मोहि प्रिय निज दासा । जेहि गति मोरि न दूसरि आसा ॥

भगति हीन बिरंचि किन होई । सब जीवहु सम प्रिय मोहि सोई ॥

भगतिवंत अति नीचउ प्राणी । मोहि प्रानप्रिय असि मम बानी ॥

दो० सुचि सुसील सेवक सुमति प्रिय कहु काहि न लाग ।

श्रुति पुरान कह नीति असि सावधान सुनु काग ॥ 86

एक पिता के बिपुल कुमारा । होहिं पृथक गुन सील अचारा ॥

कोउ पंडित कोउ तापस ग्याता । कोउ धनवंत सूर कोउ दाता ॥

कोउ सर्बग्य धर्मरत कोई । सब पर पितहि प्रीति सम होई ॥

कोउ पितु भगत बचन मन कर्मा । सपनेहुँ जान न दूसर धर्मा ॥

सो सुत प्रिय पितु प्रान समाना । जद्यपि सो सब भौंति अयाना ॥

एहि बिधि जीव चराचर जेते । त्रिजग देव नर असुर समेते ॥

अखिल बिस्व यह मोर उपाया । सब पर मोहि बराबरि दाया ॥

तिन्ह महेँ जो परिहरि मद माया । भजै मोहि मन बच अरु काया ॥

दो० पुरुष नपुंसक नारि वा जीव चराचर कोइ ।

सर्ब भाव भज कपट तजि मोहि परम प्रिय सोइ ॥ 87 (क)

सो० सत्य कहउँ खग तोहि सुचि सेवक मम प्रानप्रिय ।

अस बिचारि भजु मोहि परिहरि आस भरोस सब ॥ 87 (ख)

कबहुँ काल न ब्यापिहि तोही । सुमिरेसु भजेसु निरंतर मोही ॥

प्रभु बचनामृत सुनि न अघाऊँ । तनु पुलकित मन अति हरषाऊँ ॥

सो सुख जानइ मन अरु काना । नहिं रसना पहिं जाइ बखाना ॥

प्रभु सोभा सुख जानहिं नयना । कहि किमि सकहिं तिन्हहि नहिं बयना ॥

बहु बिधि मोहि प्रबोधि सुख देई । लगे करन सिसु कौतुक तेई ॥

सजल नयन कछु मुख करि रूखा । चितइ मातु लागी अति भूखा ॥

देखि मातु आतुर उठि धाई । कहि मृदु बचन लिए उर लाई ॥

गोद राखि कराव पय पाना । रघुपति चरित ललित कर गाना ॥

सो० जेहि सुख लागि पुरारि असुभ बेष कृत सिव सुखद ।

अवधपुरी नर नारि तेहि सुख महुँ संतत मगन ॥ 88 (क)

सोई सुख लवलेस जिन्ह बारक सपनेहुँ लहेउ ।

ते नहिं गनहिं खगेस ब्रह्मसुखहि सज्जन सुमति ॥ 88 (ख)

मैं पुनि अवध रहेउँ कछु काला । देखेउँ बालबिनोद रसाला ॥

राम प्रसाद भगति बर पायउँ । प्रभु पद बंदि निजाश्रम आयउँ ॥

तब ते मोहि न ब्यापी माया । जब ते रघुनायक अपनाया ॥

यह सब गुप्त चरित मैं गावा । हरि मायाँ जिमि मोहि नचावा ॥

निज अनुभव अब कहउँ खगेसा । बिनु हरि भजन न जाहिं कलेसा ॥

राम कृपा बिनु सुनु खगराई । जानि न जाइ राम प्रभुताई ॥

जानें बिनु न होइ परतीती । बिनु परतीति होइ नहिं प्रीती ॥

प्रीति बिना नहिं भगति दिदाई । जिमि खगपति जल कै चिकनाई ॥  
 सो० बिनु गुर होइ कि ग्यान ग्यान कि होइ बिराग बिनु ।  
 गावहिं बेद पुरान सुख कि लहिअ हरि भगति बिनु ॥ 89 (क)  
 कोउ बिश्राम कि पाव तात सहज संतोष बिनु ।  
 चलै कि जल बिनु नाव कोटि जतन पचि पचि मरिअ ॥ 89 (ख)  
 बिनु संतोष न काम नसाहीं । काम अछत सुख सपनेहुँ नाहीं ॥  
 राम भजन बिनु मिटहिं कि कामा । थल बिहीन तरु कबहुँ कि जामा ॥  
 बिनु बिग्यान कि समता आवइ । कोउ अवकास कि नभ बिनु पावइ ॥  
 श्रद्धा बिना धर्म नहिं होई । बिनु महि गंध कि पावइ कोई ॥  
 बिनु तप तेज कि कर बिस्तारा । जल बिनु रस कि होइ संसारा ॥  
 सील कि मिल बिनु बुध सेवकाई । जिमि बिनु तेज न रूप गोसोई ॥  
 निज सुख बिनु मन होइ कि थीरा । परस कि होइ बिहीन समीरा ॥  
 कवनिउ सिद्धि कि बिनु बिस्वासा । बिनु हरि भजन न भव भय नासा ॥  
 दो० बिनु बिस्वास भगति नहिं तेहि बिनु द्रवहिं न रामु ।  
 राम कृपा बिनु सपनेहुँ जीव न लह बिश्रामु ॥ 90 (क)  
 सो० अस बिचारि मतिधीर तजि कुतर्क संसय सकल ।  
 भजहु राम रघुबीर करुनाकर सुंदर सुखद ॥ 90 (ख)  
 निज मति सरिस नाथ मैं गाई । प्रभु प्रताप महिमा खगराई ॥  
 कहेउँ न कछु करि जुगुति बिसेषी । यह सब मैं निज नयनन्हि देखी ॥  
 महिमा नाम रूप गुन गाथा । सकल अमित अनंत रघुनाथा ॥  
 निज निज मति मुनि हरि गुन गावहिं । निगम सेष सिव पार न पावहिं ॥  
 तुम्हहि आदि खग मसक प्रजंता । नभ उड़ाहिं नहिं पावहिं अंता ॥  
 तिमि रघुपति महिमा अवगाहा । तात कबहुँ कोउ पाव कि थाहा ॥  
 रामु काम सत कोटि सुभग तन । दुर्गा कोटि अमित अरि मर्दन ॥  
 सक कोटि सत सरिस बिलासा । नभ सत कोटि अमित अवकासा ॥  
 दो० मरुत कोटि सत बिपुल बल रबि सत कोटि प्रकास ।  
 ससि सत कोटि सुसीतल समन सकल भव त्रास ॥ 91 (क)  
 काल कोटि सत सरिस अति दुस्तर दुर्ग दुरंत ।  
 धूमकेतु सत कोटि सम दुराधरष भगवंत ॥ 91 (ख)  
 प्रभु अगाध सत कोटि पताला । समन कोटि सत सरिस कराला ॥  
 तीरथ अमित कोटि सम पावन । नाम अखिल अघ पूग नसावन ॥  
 हिमगिरि कोटि अचल रघुबीरा । सिंधु कोटि सत सम गंभीरा ॥  
 कामधेनु सत कोटि समाना । सकल काम दायक भगवाना ॥  
 सारद कोटि अमित चतुराई । बिधि सत कोटि सृष्टि निपुनाई ॥  
 बिष्नु कोटि सम पालन कर्ता । रुद्र कोटि सत सम संहर्ता ॥  
 धनद कोटि सत सम धनवाना । माया कोटि प्रपंच निधाना ॥  
 भार धरन सत कोटि अहीसा । निरवधि निरुपम प्रभु जगदीसा ॥  
 छं० निरुपम न उपमा आन राम समान रामु निगम कहै ।  
 जिमि कोटि सत खद्योत सम रबि कहत अति लघुता लहै ॥  
 एहि भाँति निज निज मति बिलास मुनीस हरिहि बखानहीं ।  
 प्रभु भाव गाहक अति कृपाल सप्रेम सुनि सुख मानहीं ॥  
 दो० रामु अमित गुन सागर थाह कि पावइ कोइ ।  
 संतन्ह सन जस किछु सुनेउँ तुम्हहि सुनायउँ साइ ॥ 92 (क)  
 सो० भाव बस्य भगवान सुख निधान करुना भवन ।

तजि ममता मद मान भजिअ सदा सीता रवन ॥ 92 (ख)  
 सुनि भुसुंढि के बचन सुहाए । हरषित खगपति पंख फुलाए ॥  
 नयन नीर मन अति हरषाना । श्रीरघुपति प्रताप उर आना ॥  
 पाछिल मोह समुझि पछिताना । ब्रह्म अनादि मनुज करि माना ॥  
 पुनि पुनि काग चरन सिरु नावा । जानि राम सम प्रेम बढ़ावा ॥  
 गुर बिनु भव निधि तरह न कोई । जौं बिरंचि संकर सम होई ॥  
 संसय सर्प ग्रसेउ मोहि ताता । दुखद लहरि कुतर्क बहु ब्राता ॥  
 तव सरूप गारुडि रघुनायक । मोहि जिआयउ जन सुखदायक ॥  
 तव प्रसाद मम मोह नसाना । राम रहस्य अनूपम जाना ॥  
 दो० ताहि प्रसंसि बिबिध बिधि सीस नाइ कर जोरि ।  
 बचन बिनीत सप्रेम मृदु बोलेउ गरुड बहोरि ॥ 93 (क)  
 प्रभु अपने अबिबेक ते बूझुँ स्वामी तोहि ।  
 कृपासिंधु सादर कहहु जानि दास निज मोहि ॥ 93 (ख)  
 तुम्ह सर्बग्य तग्य तम पारा । सुमति सुसील सरल आचारा ॥  
 ग्यान बिरति बिग्यान निवासा । रघुनायक के तुम्ह प्रिय दासा ॥  
 कारन कवन देह यह पाई । तात सकल मोहि कहहु बुझाई ॥  
 राम चरित सर सुंदर स्वामी । पायहु कहाँ कहहु नभगामी ॥  
 नाथ सुना मैं अस सिव पाहीं । महा प्रलयहुँ नास तव नाहीं ॥  
 मुधा बचन नहिं ईस्वर कहई । सोउ मोरें मन संसय अहई ॥  
 अग जग जीव नाग नर देवा । नाथ सकल जगु काल कलेवा ॥  
 अंड कटाह अमित लय कारी । कालु सदा दुरतिकम भारी ॥  
 सो० तुम्हहि न ब्यापत काल अति कराल कारन कवन ।  
 मोहि सो कहहु कृपाल ग्यान प्रभाव कि जोग बल ॥ 94 (क)  
 दो० प्रभु तव आश्रम आएँ मोर मोह भ्रम भाग ।  
 कारन कवन सो नाथ सब कहहु सहित अनुराग ॥ 94 (ख)  
 गरुड गिरा सुनि हरषेउ कागा । बोलेउ उमा परम अनुरागा ॥  
 धन्य धन्य तव मति उरगारी । प्रस्न तुम्हारि मोहि अति प्यारी ॥  
 सुनि तव प्रस्न सप्रेम सुहाई । बहुत जनम कै सुधि मोहि आई ॥  
 सब निज कथा कहउँ मैं गाई । तात सुनहु सादर मन लाई ॥  
 जप तप मख सम दम ब्रत दाना । बिरति बिबेक जोग बिग्याना ॥  
 सब कर फल रघुपति पद प्रेमा । तेहि बिनु कोउ न पावइ छेमा ॥  
 एहिं तन राम भगति मैं पाई । ताते मोहि ममता अधिकाई ॥  
 जेहि तें कछु निज स्वारथ होई । तेहि पर ममता कर सब कोई ॥  
 सो० पन्नगारि असि नीति श्रुति संमत सज्जन कहहिं ।  
 अति नीचहु सन प्रीति करिअ जानि निज परम हित ॥ 95 (क)  
 पाट कीट तें होइ तेहि तें पाटंबर रुचिर ।  
 कृमि पालइ सबु कोइ परम अपावन प्रान सम ॥ 95 (ख)  
 स्वारथ साँच जीव कहँ एहा । मन कम बचन राम पद नेहा ॥  
 सोइ पावन सोइ सुभग सरीरा । जो तनु पाइ भजिअ रघुबीरा ॥  
 राम बिमुख लहि बिधि सम देही । कबि कोबिद न प्रसंसहिं तेही ॥  
 राम भगति एहिं तन उर जामी । ताते मोहि परम प्रिय स्वामी ॥  
 तजुँ न तन निज इच्छा मरना । तन बिनु बेद भजन नहिं बरना ॥  
 प्रथम मोहँ मोहि बहुत बिगोवा । राम बिमुख सुख कबहुँ न सोवा ॥  
 नाना जनम कर्म पुनि नाना । किए जोग जप तप मख दाना ॥

कवन जोनि जनमेउँ जहँ नाहीं । मैं खगेस भ्रमि भ्रमि जग माहीं ॥  
 देखेउँ करि सब करम गोसाईं । सुखी न भयउँ अबहिं की नाई ॥  
 सुधि मोहि नाथ जन्म बहु केरी । सिव प्रसाद मति मोहँ न घेरी ॥  
 दो० प्रथम जन्म के चरित अब कहउँ सुनहु बिहगेस ।  
 सुनि प्रभु पद रति उपजइ जातें मिटहिं कलेस ॥ 96 (क)  
 पूरुब कल्प एक प्रभु जुग कलिजुग मल मूल ।  
 नर अरु नारि अधर्मरत सकल निगम प्रतिकूल ॥ 96 (ख)  
 तेहिं कलिजुग कोसलपुर जाई । जन्मत भयउँ मनुज तनु पाई ॥  
 सिव सेवक मन कम अरु बानी । आन देव निंदक अभिमानी ॥  
 धन मद मत्त परम बाचाला । उग्रबुद्धि उर दंभ बिसाला ॥  
 जदपि रहेउँ रघुपति रजधानी । तदपि न कछु महिमा तब जानी ॥  
 अब जाना मैं अवध प्रभावा । निगमागम पुरान अस गावा ॥  
 कवनेहुँ जन्म अवध बस जोई । राम परायन सो परि होई ॥  
 अवध प्रभाव जान तब प्रानी । जब उर बसहिं रामु धनुपानी ॥  
 सो कलिकाल कठिन उरगारी । पाप परायन सब नर नारी ॥  
 दो० कलिमल ग्रसे धर्म सब लुप्त भए सदग्रंथ ।  
 दंभिन्ह निज मति कल्पि करि प्रगट किए बहु पंथ ॥ 97 (क)  
 भए लोग सब मोहबस लोभ ग्रसे सुभ कर्म ।  
 सुनु हरिजान ग्यान निधि कहउँ कछुक कलिधर्म ॥ 97 (ख)  
 बरन धर्म नहिं आश्रम चारी । श्रुति बिरोध रत सब नर नारी ॥  
 द्विज श्रुति बेचक भूप प्रजासन । कोउ नहिं मान निगम अनुसासन ॥  
 मारग सोइ जा कहुँ जोइ भावा । पंडित सोइ जो गाल बजावा ॥  
 मिथ्यारंभ दंभ रत जोई । ता कहुँ संत कहइ सब कोई ॥  
 सोइ सयान जो परधन हारी । जो कर दंभ सो बड़ आचारी ॥  
 जो कह झूठ मसखरी जाना । कलिजुग सोइ गुनवंत बखाना ॥  
 निराचार जो श्रुति पथ त्यागी । कलिजुग सोइ ग्यानी सो बिरागी ॥  
 जाकै नख अरु जटा बिसाला । सोइ तापस प्रसिद्ध कलिकाला ॥  
 दो० असुभ बेष भूषन धरें भच्छाभच्छ जे खाहिं ।  
 तेइ जोगी तेइ सिद्ध नर पूज्य ते कलिजुग माहिं ॥ 98 (क)  
 सो० जे अपकारी चार तिन्ह कर गौरव मान्य तेइ ।  
 मन कम बचन लबार तेइ बकता कलिकाल महुँ ॥ 98 (ख)  
 काम बिबस नर सकल गासाईं । नाचहिं नट मर्कट की नाई ॥  
 अज्ञ मुनिन्ह उपदेसहिं ग्याना । मेलि जनेऊ लेहिं कुदाना ॥  
 सब नर काम लोभ रत कोधी । देव धेनु श्रुति संत बिरोधी ॥  
 गुन मंदिर सुंदर पति त्यागी । कुलटा भजै पर पुरुष अभागी ॥  
 सौभागिनी बिभूषन हीना । कुलटन्हि के श्रृंगार नबीना ॥  
 गुर सिष बधिर अंध का लेखा । एक न सुनइ एक नहिं देखा ॥  
 हरइ सिष्य धन सोक न हरई । सो गुर घोर नरक महुँ परई ॥  
 मातु पिता बालकन्हि बोलावहिं । उदर भरै सोइ धर्म सिखावहिं ॥  
 दो० ब्रह्म ग्यान बिनु नारि नर कहहिं न दूसरि बात ।  
 कौड़ी लागि लोभ बस करहिं संत गुर घात ॥ 99  
 पर त्रिय लंपट कपट सयाने । मोह द्रोह ममता लपटाने ॥  
 तेइ अभेदबादी ग्यानी नर । देखा मैं चरित्र कलिजुग कर ॥  
 आपु गए अरु तिन्हहू घालहिं । जे कहुँ सत मारग प्रतिपालहिं ॥

कल्प कल्प भरि एक एक नरका । परहिं जे दूषहिं श्रुति करि तरका ॥  
स्वारथरत जे पुरुष खगेसा । कामी कपटी कुटिल कुबेसा ॥  
नारि मुई गृह संपति नासी । मूड मुड़ाइ होहिं संन्यासी ॥  
ते बिप्रन्ह सम आपु पुजावहिं । उभय लोक निज हाथ नसावहिं ॥  
सब नर कल्पित करहिं अचारा । जाइ न बरनि अनीति अपारा ॥

- दो० भए बरन संकर कलि भिन्नसेतु सब लोग ।  
करहिं पाप पावहिं दुख भय रुज सोक बियोग ॥ 100 (क)
- दो० श्रुति संमत हरि भक्ति पथ संजुत बिरति बिबेक ।  
तेहिं न चलहिं नर मोह बस कल्पहिं पंथ अनेक ॥ 100 (ख)
- छं० बहु दाम सँवारहिं धाम जती । बिषया हरि लीन्हि न रहि बिरती ॥  
तपसी धनवंत दरिद्र गृही । कलि कौतुक तात न जात कही ॥  
कुलवंति निकारहिं नारि सती । गृह आनहिं चेरि निबेरि गती ॥  
सुत मानहिं मातु पिता तब लौं । अबलानन दीख नहीं जब लौं ॥  
ससुरारि पिआरि लगी जब तें । रिपुरुप कुटुंब भए तब तें ॥  
नृप पाप परायन धर्म नहीं । करि दंड बिडंब प्रजा नितहीं ॥  
धनवंत क्लीन मलीन अपी । द्विज चिन्ह जनेउ उधारि तपी ॥  
नहिं मान पुरान न बेदहि जो । हरि सेवक संत सही कलि सो ॥  
कबि बृंद उदार दुनी न सुनी । गुन दूषक ब्रात न कोपि गुनी ॥  
कलि बारहिं बार दुकाल परै । बिनु अन्न दुखी सब लोग मरै ॥
- दो० सुनु खगेस कलि कपट हठ दंभ द्वेष पाषंड ।  
मान मोह मारादि मद ब्यापि रहे ब्रह्मंड ॥ 101 (क)  
तामस धर्म करहिं नर जप तप ब्रत मख दान ।  
देव न बरषहिं धरनीं बए न जामहिं धान ॥ 101 (ख)
- छं० अबला कच भूषन भूरि छुधा । धनहीन दुखी ममता बहुधा ॥  
सुख चाहहिं मूढ न धर्म रता । मति थोरि कठोरि न कोमलता ॥ 1  
नर पीड़ित रोग न भोग कहीं । अभिमान बिरोध अकारनहीं ॥  
लघु जीवन संबतु पंच दसा । कलपांत न नास गुमानु असा ॥ 2  
कलिकाल बिहाल किए मनुजा । नहिं मानत कौ अनुजा तनुजा  
नहिं तोष बिचार न सीतलता । सब जाति कुजाति भए मगता ॥ 3  
इरिषा परुषाच्छर लोलुपता । भरि पूरि रही समता बिगता ॥  
सब लोग बियोग बिसोक हुए । बरनाश्रम धर्म अचार गए ॥ 4  
दम दान दया नहिं जानपनी । जड़ता परबंचनताति घनी ॥  
तनु पोषक नारि नरा सगरे । परनिंदक जे जग मो बगरे ॥ 5
- दो० सुनु ब्यालारि काल कलि मल अवगुन आगार ।  
गुनउँ बहुत कलिजुग कर बिनु प्रयास निस्तार ॥ 102 (क)  
कृतजुग त्रेताँ द्वापर पूजा मख अरु जोग ।  
जो गति होइ सो कलि हरि नामते पावहिं लोग ॥ 102 (ख)  
कृतजुग सब जोगी बिग्यानी । करिहरि ध्यान तरहिं भव प्रानी ॥  
त्रेताँ बिबिध जग्य नर करहीं । प्रभुहि समर्पि कम भव तरहीं ॥  
द्वापर करि रघुपति पद पूजा । नर भव तरहिं उपाय न दूजा ॥  
कलिजुग केवल हरि गुन गाहा । गावत नर पावहिं भव थाहा ॥  
कलिजुग जोग न जग्य न ग्याना । एक अधार राम गुन गाना ॥  
सब भरोस तजि जो भज रामहि । प्रेम समेत गाव गुन ग्रामहि ॥  
सोइ भव तर कछु संसय नाही । नाम प्रताप प्रगट कलि माहीं ॥

कलि कर एक पुनीत प्रतापा । मानस पुन्य होहिं नहिं पापा ॥  
 दो० कलिजुग सम जुग आन नहिं जाँ नर कर विश्वास ।  
 गाइ राम गुन गन बिमल भव तर बिनहिं प्रयास ॥ 103 (क)  
 प्रगट चारि पद धर्म के कलि महुँ एक प्रधान ।  
 जेन केन बिधि दीन्ह दान करइ कल्याण ॥ 103 (ख)  
 नित जुग धर्म होहिं सब करे । हृदयें राम माया के प्रेरे ॥  
 सुद्ध सत्व समता बिग्याना । कृत प्रभाव प्रसन्न मन जाना ॥  
 सत्व बहुत रज कछु रति कर्मा । सब बिधि सुख त्रेता कर धर्मा ॥  
 बहु रज स्वल्प सत्व कछु तामस । द्वापर धर्म हरष भय मानस ॥  
 तामस बहत रजोगुन थोरा । कलि प्रभाव बिरोध चहुँ ओरा ॥  
 बुध जुग धर्म जानि मन माहीं । तजि अधर्म रति धर्म कराहीं ॥  
 काल धर्म नहिं ब्यापहिं ताही । रघुपति चरन प्रीति अति जाही ॥  
 नट कृत बिकट कपट खगराया । नट सेवकहि न ब्यापइ माया ॥  
 दो० हरि माया कृत दोष गुन बिनु हरि भजन न जाहिं ।  
 भजिअ राम तजि काम सब अस बिचारि मन माहिं ॥ 104 (क)  
 तेहि कलिकाल बरष बहु बसेउँ अवध बिहगेस ।  
 परेउ दुकाल बिपति बस तब मैं गयउँ बिदेस ॥ 104 (ख)  
 गयउँ उजेनी सुनु उरगारी । दीन मलीन दरिद्र दुखारी ॥  
 गएँ काल कछु संपति पाई । तहें पुनि करउँ संभु सेवकाई ॥  
 बिप्र एक बैदिक सिव पूजा । करइ सदा तेहि काजु न दूजा ॥  
 परम साधु परमारथ बिंदक । संभु उपासक नहिं हरि निंदक ॥  
 तेहि सेवउँ मैं कपट समेता । द्विज दयाल अति नीति निकेता ॥  
 बाहिज नम्र देखि मोहि साई । बिप्र पढाव पुत्र की नाई ॥  
 संभु मंत्र माहि द्विजबर दीन्हा । सुभ उपदेस बिबिध बिधि कीन्हा ॥  
 जपउँ मंत्र सिव मंदिर जाई । हृदयें दंभ अहमिति अधिकाई ॥  
 दो० मैं खल मल संकुल मति नीच बुद्धि बस मोह ।  
 हरिजन द्विज देखे जरउँ करउँ बिष्नु कर द्रोह ॥ 105 (क)  
 सो० गुर नित मोहि प्रबोध दुखित देखि आचरन मम ।  
 मोहि उपजइ अति कोध दंभिहि नीति की भावई ॥ 105 (ख)  
 एक बार गुर लीन्ह बोलाई । मोहि नीति बहु भौंति सिखाई ॥  
 सिव सेवा कर फल सुत सोई । अबिरल भगति राम पद होई ॥  
 रामहि भजहिं तात सिव धाता । नर पावैर कै केतिक बाता ॥  
 जासु चरन अज सिव अनुरागी । तासु द्रोहें सुख चहसि अभागी ॥  
 हर कहुँ हरि सेवक गुर कहेऊ । सुनि खगनाथ हृदय मम दहेऊ ॥  
 अधम व्यक्ति मैं बिद्या पाएँ । भयउँ जथा अहि दूध पिआएँ ॥  
 मानी कुटिल कुभाग्य कुघाती । गुर कर द्रोह करउँ दिन राती ॥  
 अति दयाल गुर स्वल्प न कोधा । पुनि पुनि मोहि सिखाव सुबोधा ॥  
 जेहि ते नीच बड़ाई पावा । सो प्रथमहिं हति ताहि नसावा ॥  
 धूम अनल संभव सुनु भाई । तेहि बुझाव घन पदवी पाई ॥  
 रज मग परी निरादर रहई । सब कर पद प्रहार नित सहई ॥  
 मरुत उड़ाव प्रथम तेहि भरई । पुनि नृप नयन किरीटन्हि परई ॥  
 सुनु खगपति अस समुझि प्रसंगा । बुध नहिं करहिं अधम कर संगी ॥  
 कबि कोबिद गावहिं असि नीती । खल सन कलह न भल नहिं प्रीती ॥  
 उदासीन नित रहिअ गोसाई । खल परिहरिअ स्वान की नाई ॥

मैं खल हृदयें कपट कुटिलाई । गुर हित कहइ न मोहि सोहाई ॥  
दो० एक बार हर मंदिर जपत रहेउँ सिव नाम ।

गुर आयउ अभिमान तें उठि नहिं कीन्ह प्रनाम ॥ 106 (क)

सो दयाल नहिं कहेउ कछु उर न रोष लवलेस ।

अति अघ गुर अपमानता सहि नहिं सके महेस ॥ 106 (ख)

मंदिर माझ भई नभ बानी । रे हतभाग्य अग्य अभिमानी ॥

जद्यपि तव गुरु के नहिं कोधा । अति कृपाल चित सम्यक बोधा ॥

तदपि साप सठ दैहउँ तोही । नीति बिरोध सोहाइ न मोही ॥

जौं नहिं दंड करौं खल तोरा । भ्रष्ट होइ श्रुतिमारग मोरा ॥

जे सठ गुर सन इरिषा करहीं । रौरव नरक कोटि जुग परहीं ॥

त्रिजग जोनि पुनि धरहिं सरीरा । अयुत जन्म भरि पावहिं पीरा ॥

बैठ रहेसि अजगर इव पापी । सर्प होहि खल मल मति ब्यापी ॥

महा बिटप कोटर महुँ जाई । रहु अघमाघम अघगति पाई ॥

दो० हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥ 107 (क)

करि दंडवत सप्रेम द्विज सिव सन्मुख कर जोरि ।

बिनय करत गदगद स्वर समुझि घोर गति मोरि ॥ 107 (ख)

नमामीशमीशान निर्वाण रूपं । विभुं व्यापकं ब्रह्म वेदस्वरूपं ॥

निजं निगुणं निर्विकल्पं निरीहं । चिदाकाशमाकाशवासं भजेहं ॥

निराकारमोंकारमूलं तुरीयं । गिरा ग्यान गोतीतमीशं गिरीशं ॥

करालं महाकाल कालं कृपालं । गुणागार संसारपारं नतोहं ॥

तुषाराद्रि संकाश गौरं गभीरं । मनोभूत कोटि प्रभा श्री शरीरं ॥

स्फुरन्मौलि कल्लोलिनी चारु गंगा । लसद्भालबालेन्दु कंठे भुजंगा ॥

चलत्कुंडलं भू सुनेत्रं विशालं । प्रसन्नाननं नीलकंठं दयालं ॥

मृगाधीशचर्माम्बरं मुण्डमालं । प्रियं शंकरं सर्वनाथं भजामि ॥

प्रचंडं प्रकृष्टं प्रगल्भं परेशं । अखंडं अजं भानुकोटिप्रकाशं ॥

त्रयःशूल निर्मूलनं शूलपाणिं । भजेहं भवानीपतिं भावगम्यं ॥

कलातीत कल्याण कल्पान्तकारी । सदा सज्जनानन्ददाता पुरारी ॥

चिदानंद संदोह मोहापहारी । प्रसीद प्रसीद प्रभो मन्मथारी ॥

न यावद् उमानाथ पादारविन्दं । भजंतीह लोके परे वा नराणां ॥

न तावत्सुखं शान्ति सन्तापनाशं । प्रसीद प्रभो सर्वभूताधिवासं ॥

न जानामि योगं जपं नैव पूजां । नतोहं सदा सर्वदा शंभु तुभ्यं ॥

जरा जन्म दुःखौघ तातप्यमानं । प्रभो पाहि आपन्नमामीश शंभो ॥

श्लोक— रुद्राष्टकमिदं प्रोक्तं विप्रेण हरतोषये ।

ये पठन्ति नरा भक्त्या तेषां शम्भुः प्रसीदति ॥ 9

दो० सुनि बिनती सर्वग्य सिव देखि बिप्र अनुरागु ।

पुनि मंदिर नभबानी भइ द्विजबर बर मागु ॥ 108 (क)

जौं प्रसन्न प्रभु मो पर नाथ दीन पर नेहु ।

निज पद भगति देइ प्रभु पुनि दूसर बर देहु ॥ 108 (ख)

तव माया बस जीव जड़ संतत फिरइ भुलान ।

तेहि पर कोध न करिअ प्रभु कृपासिंधु भगवान ॥ 108 (ग)

संकर दीनदयाल अब एहि पर होहु कृपाल ।

साप अनुग्रह होइ जेहिं नाथ थोरेहीं काल ॥ 108 (घ)

एहि कर होइ परम कल्याना । सोइ करहु अब कृपानिधाना ॥  
 बिप्र गिरा सुनि परहित सानी । एवमस्तु इति भइ नभबानी ॥  
 जदपि कीन्ह एहिं दारुन पापा । मैं पुनि दीन्हि कोप करि सापा ॥  
 तदपि तुम्हारि साधुता देखी । करिहउँ एहि पर कृपा बिसेषी ॥  
 छमासील जे पर उपकारी । ते नर मोहि प्रिय जथा खरारी ॥  
 मोर श्राप द्विज ब्यर्थ न जाइहि । जन्म सहस अवस्य यह पाइहि ॥  
 जनमत मरत दुसह दुख होई । एहि स्वल्पउ नहिं ब्यापिहि सोई ॥  
 कवनेउँ जन्म मिटिहि नहिं ग्याना । सुनहि अधम मम बचन प्रवाना ॥  
 रघुपति पुरीं जन्म तव भयऊ । पुनि तैं मम सेवों मन दयऊ ॥  
 पुरी प्रभाव अनुग्रह मोरें । राम भगति उपजिहि उर तोरें ॥  
 सुनु मम बचन सत्य अब भाई । हरितोषन ब्रत गुर सेवकाई ।  
 अब जनि करहि संत अपमाना । जानेसु संत अनंत समाना ॥  
 इंद्र कुलिस मम सूल बिसाला । कालदंड हरि चक कराला ॥  
 जो इन्ह कर मारा नहिं मरई । संत द्रोह पावक सो जरई ॥  
 अस बिबेक राखेहु मन माही । तुम्ह कहैं जग दुर्लभ कछु नाहीं ॥  
 औरउ एक आसिषा मोरी । अप्रतिहत गति होइहि तोरी ॥

दो० सुनि सिव बचन हरषि गुर एवमस्तु इति भाषि ।  
 मोहि प्रबोधि गयउ गृह संभु चरन उर राखि ॥ 109 (क)  
 प्रेरित काल विन्ध्य गिरि जाइ भयउँ मैं ब्याल ।  
 पुनि प्रयास बिनु सा तनु तजेउँ गएँ कछु काल ॥ 109 (ख)  
 जोइ तनु धरउँ तजउँ पुनि अनायास हरिजान ।  
 जिमि नूतन पट पहिरइ नर परिहरइ पुरान ॥ 109 (ग)  
 सिवें राखी श्रुति नीति अरु मैं नहिं पावा क्लेस ।  
 एहि बिधि धरेउँ बिबिध तनु ग्यान न गयउ खगेस ॥ 109 (घ)  
 त्रिजग देव नर जोइ तनु धरऊँ । तहैं तहैं राम भजन अनुसरऊँ ॥  
 एक सूल मोहि बिसर न काऊ । गुर कर कोमल सील सुभाऊ ॥  
 चरम देह द्विज कै मैं पाई । सुर दुर्लभ पुरान श्रुति गाई ॥  
 खेलउँ तहैं बालकन्ह मीला । करउँ सकल रघुनायक लीला ॥  
 प्रौढ भएँ मोहि पिता पढ़ावा । समुझउँ सुनउँ गुनउँ नहिं भावा ॥  
 मन ते सकल बासना भागी । केवल राम चरन लय लागी ॥  
 कहु खगेस अस कवन अभागी । खरी सेव सुरधेनुहि त्यागी ॥  
 प्रेम मगन मोहि कछु न सोहाई । हारेउ पिता पढ़ाइ पढ़ाई ॥  
 भए कालबस जब पितु माता । मैं बन गयउँ भजन जनत्राता ॥  
 जहैं जहैं बिपिन मुनीस्वर पावउँ । आश्रम जाइ जाइ सिरु नावउँ ॥  
 बूझउँ तिन्हहि राम गुन गाहा । कहहिं सुनउँ हरषित खगनाहा ॥  
 सुनत फिरउँ हरि गुन अनुबादा । अब्याहत गति संभु प्रसादा ॥  
 छूटी त्रिबिध ईषना गाढी । एक लालसा उर अति बाढी ॥  
 राम चरन बारिज जब देखौं । तब निज जन्म सफल करि लेखौं ॥  
 जेहि पूँछउँ सोइ मुनि अस कहई । ईस्वर सर्व भूतमय अहई ॥  
 निर्गुन मत नहिं मोहि सोहाई । सगुन ब्रह्म रति उर अधिकारी ॥

दो० गुर के बचन सुरति करि राम चरन मनु लाग ।  
 रघुपति जस गावत फिरउँ छन छन नव अनुराग ॥ 110 (क)  
 मेरु सिखर बट छायाँ मुनि लोमस आसीन ।  
 देखि चरन सिरु नायउँ बचन कहेउँ अति दीन ॥ 110 (ख)

सुनि मम बचन बिनीत मूदु मुनि कृपाल खगराज ।  
मोहि सादर पूँछत भए द्विज आयहु केहि काज ॥ 110 (ग)  
तब मैं कहा कृपानिधि तुम्ह सर्बग्य सुजान ।

सगुन ब्रह्म अवराधन मोहि कहहु भगवान ॥ 110 (घ)  
तब मुनीस रघुपति गुन गाथा । कहे कछुक सादर खगनाथा ॥  
ब्रह्मग्यान रत मुनि बिग्यानी । मोहि परम अधिकारी जानी ॥  
लागे करन ब्रह्म उपदेसा । अज अद्वैत अगुन हृदयेसा ॥  
अकल अनीह अनाम अरूपा । अनुभव गम्य अखंड अनूपा ॥  
मन गोतीत अमल अबिनासी । निर्बिकार निरवधि सुख रासी ॥  
सो तैं ताहि तोहि नहिं भेदा । बारि बीचि इव गावहिं बेदा ॥  
बिबिध भाँति मोहि मुनि समुझावा । निर्गुन मत मम हृदयें न आवा ॥  
पुनि मैं कहेउँ नाइ पद सीसा । सगुन उपासन कहहु मुनीसा ॥  
राम भगति जल मम मन मीना । किमि बिलगाइ मुनीस प्रबीना ॥  
सोइ उपदेस कहहु करि दाया । निज नयनन्हि दखौं रघुराया ॥  
भरि लोचन बिलोकि अवधेसा । तब सुनिहउँ निर्गुन उपदेसा ॥  
मुनि पुनि कहि हरिकथा अनूपा । खंडि सगुन मत अगुन निरूपा ॥  
तब मैं निर्गुन मत कर दूरी । सगुन निरूपउँ करि हठ भूरी ॥  
उत्तर प्रतिउत्तर मैं कीन्हा । मुनि तन भए कोध के चीन्हा ॥  
सुनु प्रभु बहुत अवग्या किएँ । उपज कोध ग्यानिन्ह के हिएँ ॥  
अति संघरषन जाँ कर कोई । अनल प्रगट चंदन ते होई ॥

दो० बारंबार सकोप मुनि करइ निरूपन ग्यान ।

मैं अपने मन बैठ तब करउँ बिबिध अनुमान ॥ 111 (क)

कोध कि द्वैतबुद्धि बिनु द्वैत कि बिनु अग्यान ।

मायाबस परिछिन्न जड़ जीव कि ईस समान ॥ 111 (ख)

कबहुँ कि दुख सब कर हित ताकें । तेहि कि दरिद्र परस मनि जाकें ॥  
परद्रोही की होहिं निसंका । कामी पुनि कि रहहिं अकलंका ॥  
बंस कि रह मुनि अनहित कीन्हें । कर्म कि होहिं स्वरूपहि चीन्हें ॥  
काहू सुमति कि खल सँग जामी । सुभ गति पाव कि परत्रिय गामी ॥  
भव कि परहिं परमात्मा बिंदक । सुखी कि होहिं कबहुँ हरि निंदक ॥  
राजु कि रहइ नीति बिनु जानें । अघ कि रहहिं हरिचरित बखानें ॥  
पावन जस कि पुन्य बिनु होई । बिनु अघ अजस कि पावइ कोई ॥  
लाभु कि किछु हरि भगति समाना । जेहि गावहिं श्रुति संत पुराना ॥  
हानि कि जग एहि सम किछु भाई । भजिअ न रामहि नर तनु पाई ॥  
अघ कि पिसुनता सम कछु आना । धर्म कि दया सरिस हरिजाना ॥  
एहि बिधि अमिति जुगुति मन गुनऊँ । मुनि उपदेस न सादर सुनऊँ ॥  
पुनि पुनि सगुन पच्छ मैं रोपा । तब मुनि बोलेउ बचन सकोपा ॥  
मूढ़ परम सिख देउँ न मानसि । उत्तर प्रतिउत्तर बहु आनसि ॥  
सत्य बचन बिस्वास न करही । बायस इव सबही ते डरही ॥  
सठ स्वपच्छ तव हृदयें बिसाला । सपदि होहि पच्छी अति काला ॥  
लीन्ह श्राप मैं सीस चढ़ाई । नहिं कछु भय न दीनता आई ॥

दो० तुरत भयउँ मैं काग तब पुनि मुनि पद सिरु नाइ ।

सुमिरि राम रघुबंस मनि हरषित चलेउँ उड़ाइ ॥ 112 (क)

उमा जे राम चरन रत बिगत काम मद कोध ।

निज प्रभुमय देखहिं जगत केहि सन करहिं बिरोध ॥ 112 (ख)

सुनु खगोस नहिं कछु रिषि दूषन । उर प्रेरक रघुबंस बिभूषन ॥  
 कृपासिंधु मुनि मति करि भोरी । लीन्ही प्रेम परिच्छा मोरी ॥  
 मन बच कम मोहि निज जन जाना । मुनि मति पुनि फेरी भगवाना ॥  
 रिषि मम महत सीलता देखी । राम चरन बिस्वास बिसेषी ॥  
 अति बिसमय पुनि पुनि पछिताई । सादर मुनि मोहि लीन्ह बोलाई ॥  
 मम परितोष बिबिध बिधि कीन्हा । हरषित राममंत्र तब दीन्हा ॥  
 बालकरूप राम कर ध्याना । कहेउ मोहि मुनि कृपानिधाना ॥  
 सुंदर सुखद मोहि अति भावा । सो प्रथमहिं मैं तुम्हहि सुनावा ॥  
 मुनि मोहि कछुक काल तहँ राखा । रामचरितमानस तब भाषा ॥  
 सादर मोहि यह कथा सुनाई । पुनि बोले मुनि गिरा सुहाई ॥  
 रामचरित सर गुप्त सुहावा । संभु प्रसाद तात मैं पावा ॥  
 तोहि निज भगत राम कर जानी । ताते मैं सब कहेउँ बखानी ॥  
 राम भगति जिन्ह कें उर नाहीं । कबहुँ न तात कहिअ तिन्ह पाहीं ॥  
 मुनि मोहि बिबिध भौंति समुझावा । मैं सप्रेम मुनि पद सिरु नावा ॥  
 निज कर कमल परसि मम सीसा । हरषित आसिष दीन्ह मुनीसा ॥  
 राम भगति अबिरल उर तोरें । बसिहि सदा प्रसाद अब मोरें ॥

दो० सदा राम प्रिय होहु तुम्ह सुभ गुन भवन अमान ।  
 कामरूप इच्छामरन ग्यान बिराग निधान ॥ 113 (क)  
 जेहिं आश्रम तुम्ह बसब पुनि सुमिरत श्रीभगवंत ।  
 ब्यापिहि तहँ न अबिद्या जोजन एक प्रजंत ॥ 113 (ख)  
 काल कर्म गुन दोष सुभाऊ । कछु दुख तुम्हहि न ब्यापिहि काऊ ॥  
 राम रहस्य ललित बिधि नाना । गुप्त प्रगट इतिहास पुराना ॥  
 बिनु श्रम तुम्ह जानब सब सोऊ । नित नव नेह राम पद होऊ ॥  
 जो इच्छा करिहहु मन माहीं । हरि प्रसाद कछु दुर्लभ नाहीं ॥  
 सुनि मुनि आसिष सुनु मतिधीरा । ब्रह्मगिरा भइ गगन गँभीरा ॥  
 एवमस्तु तब बच मुनि ग्यानी । यह मम भगत कर्म मन बानी ॥  
 सुनि नभगिरा हरष मोहि भयऊ । प्रेम मगन सब संसय गयऊ ॥  
 करि बिनती मुनि आयसु पाई । पद सरोज पुनि पुनि सिरु नाई ॥  
 हरष सहित एहिं आश्रम आयउँ । प्रभु प्रसाद दर्लभ बर पायउँ ॥  
 इहाँ बसत मोहि सुनु खग ईसा । बीते कलप सात अरु बीसा ॥  
 करउँ सदा रघुपति गुन गाना । सादर सुनहिं बिहंग सुजाना ॥  
 जब जब अवधपुरीं रघुबीरा । धरहिं भगत हित मनुज सरीरा ॥  
 तब तब जाइ राम पुर रहऊँ । सिसुलीला बिलोकि सुख लहऊँ ॥  
 पुनि उर राखि राम सिसुरूपा । निज आश्रम आवउँ खगभूपा ॥  
 कथा सकल मैं तुम्हहि सुनाई । काग देह जेहिं कारन पाई ॥  
 कहिउँ तात सब प्रस्न तुम्हारी । राम भगति महिमा अति भारी ॥

दो० ताते यह तन मोहि प्रिय भयउ राम पद नेह ।  
 निज प्रभु दरसन पायउँ गए सकल संदेह ॥ 114 (क)

मासपारायण, उन्तीसवों विश्राम

भगति पच्छ हठ करि रहेउँ दीन्हि महारिषि साप ।  
 मुनि दुर्लभ बर पायउँ देखहु भजन प्रताप ॥ 114 (ख)  
 जे असि भगति जानि परिहरहीं । केवल ग्यान हेतु श्रम करहीं ॥

ते जड़ कामधेनु गृहें त्यागी । खोजत आकु फिरहिं पय लागी ॥  
 सुनु खगेस हरि भगति बिहाई । जे सुख चाहहिं आन उपाई ॥  
 ते सठ महासिंधु बिनु तरनी । पैरि पार चाहहिं जड़ करनी ॥  
 सुनि भसुंढि के बचन भवानी । बोलेउ गरुड़ हरषि मृदु बानी ॥  
 तव प्रसाद प्रभु मम उर माहीं । संसय सोक मोह भ्रम नाहीं ॥  
 सुनेउ पुनीत राम गुन ग्रामा । तुम्हरी कपा लहेउं बिश्रामा ॥  
 एक बात प्रभु पूँछउं तोही । कहहु बुझाइ कृपानिधि मोही ॥  
 कहहिं संत मुनि बेद पुराना । नहिं कछु दुर्लभ ग्यान समाना ॥  
 सोइ मुनि तुम्ह सन कहेउ गोसाई । नहिं आदरेहु भगति की नाई ॥  
 ग्यानहि भगतिहि अंतर केता । सकल कहहु प्रभु कृपा निकेता ॥  
 सुनि उरगारि बचन सुख माना । सादर बोलेउ काग सुजाना ॥  
 भगतिहि ग्यानहि नहिं कछु भेदा । उभय हरहिं भव संभव खेदा ॥  
 नाथ मुनीस कहहिं कछु अंतर । सावधान सोउ सुनु बिहंगबर ॥  
 ग्यान बिराग जोग बिग्याना । ए सब पुरुष सुनहु हरिजाना ॥  
 पुरुष प्रताप प्रबल सब भाँती । अबला अबल सहज मृदु जाती ॥  
 दो० पुरुष त्यागि सक नारिहि जो बिरक्त मति धीर ।  
 न तु कामी बिषयाबस बिमुख जो पद रघुबीर ॥ 115 (क)  
 सो० सोउ मुनि ग्याननिधान मृगनयनी बिधु मुख निरखि ।  
 बिबस होइ हरिजान नारि बिष्णु माया प्रगट ॥ 115 (ख)  
 इहाँ न पच्छपात कछु राखउं । बेद पुरान संत मत भाषउं ॥  
 मोह न नारि नारि के रूपा । पन्नगारि यह रीति अनूपा ॥  
 माया भगति सुनहु तुम्ह दोऊ । नारि बर्ग जानइ सब कोऊ ।  
 पुनि रघुबीरहि भगति पिआरी । माया खलु नर्तकी बिचारी ॥  
 भगतिहि सानुकूल रघुराया । ताते तेहि डरपति अति माया ॥  
 राम भगति निरुपम निरुपाधी । बसइ जासु उर सदा अबाधी ॥  
 तेहि बिलोकि माया सकुचाई । करि न सकइ कछु निज प्रभुताई ॥  
 अस बिचारि जे मुनि बिग्यानी । जाचहिं भगति सकल सुख खानी ॥  
 दो० यह रहस्य रघुनाथ कर बेगि न जानइ कोइ ।  
 जो जानइ रघुपति कृपाँ सपनेहुँ माह न होइ ॥ 116 (क)  
 औरउ ग्यान भगति कर भेद सुनहु सुप्रबीन ।  
 जो सुनि होइ राम पद प्रीति सदा अबिछीन ॥ 116 (ख)  
 सुनहु तात यह अकथ कहानी । समुझत बनइ न जाइ बखानी ॥  
 ईस्वर अंस जीव अबिनासी । चेतन अमल सहज सुखरासी ॥  
 सो मायाबस भयउ गोसाई । बँध्यो कीर मरकट की नाई ॥  
 जड़ चेतनहि ग्रंथि परि गई । जदपि मृषा छूटत कठिनई ॥  
 तब ते जीव भयउ संसारी । छूट न ग्रंथि न होइ सुखारी ॥  
 श्रुति पुरान बहु कहेउ उपाई । छूट न अधिक अधिक अरुझाई ॥  
 जीव हृदयें तम मोह बिसेषी । ग्रंथि छूट किमि परइ न देखी ॥  
 अस संजोग ईस जब करई । तबहुँ कदाचित सो निरुअरई ॥  
 सात्विक श्रद्धा धेनु सुहाई । जाँ हरि कृपाँ हृदयें बस आई ॥  
 जप तप ब्रत जम नियम अपारा । जे श्रुति कह सुभ धर्म अचारा ॥  
 तेइ तून हरित चरै जब गाई । भाव बच्छ सिसु पाइ पेन्हाई ॥  
 नोइ निबृत्ति पात्र बिस्वासा । निर्मल मन अहीर निज दासा ॥  
 परम धर्ममय पय दुहि भाई । अवटै अनल अकाम बनाई ॥

- तोष मरुत तब छमों जुड़ावै । धृति सम जावनु देइ जमावै ॥  
मुदिताँ मथै बिचार मथानी । दम अधार रजु सत्य सुबानी ॥  
तब मथि काढ़ि लेइ नवनीता । बिमल बिराग सुभग सुपुनीता ॥
- दो० जोग अगिनि करि प्रगट तब कर्म सभासुभ लाइ ।  
बुद्धि सिरावै ग्यान घृत ममता मल जरि जाइ ॥ 117 (क)  
तब बिग्यानरूपिनी बुद्धि बिसद घृत पाइ ।  
चित्त दिआ भरि धरै दृढ समता दिअटि बनाइ ॥ 117 (ख)  
तीनि अवस्था तीनि गुन तेहि कपास तें काढ़ि ।  
तूल तुरीय सँवारि पुनि बाती करै सुगाढ़ि ॥ 117 (ग)
- सो० एहि बिधि लेसै दीप तेज रासि बिग्यानमय ।  
जातहिं जासु समीप जरहिं मदादिक सलभ सब ॥ 117 (घ)  
सोहमस्मि इति वृत्ति अखंडा । दीप सिखा सोइ परम प्रचंडा ॥  
आतम अनुभव सुख सुप्रकासा । तब भव मूल भेद भ्रम नासा ॥  
प्रबल अबिद्या कर परिवारा । मोह आदि तम मिटइ अपारा ॥  
तब सोइ बुद्धि पाइ उँजिआरा । उर गृहँ बैठि ग्रंथि निरुआरा ॥  
छोरन ग्रंथि जानि खगराया । बिघ्न अनेक करइ तब माया ॥  
रिद्धि सिद्धि प्रेरइ बहु भाई । बुद्धिहि लोभ दिखावहिं आई ॥  
कल बल छल करि जाहिं समीपा । अंचल बात बुझावहिं दीपा ॥  
होइ बुद्धि जाँ परम सयानी । तिन्ह तन चितव न अनहित जानी ॥  
जाँ तेहि बिघ्न बुद्धि नहिं बाधी । तौ बहोरि सुर करहिं उपाधी ॥  
इंद्री द्वार झरोखा नाना । तहँ तहँ सुर बैठे करि थाना ॥  
आवत देखहिं बिषय बयारी । ते हठि देहिं कपाट उघारी ॥  
जब सो प्रभंजन उर गृहँ जाई । तबहिं दीप बिग्यान बुझाई ॥  
ग्रंथि न छूटि मिटा सो प्रकासा । बुद्धि बिकल भइ बिषय बतासा ॥  
इंद्रिन्ह सुरन्ह न ग्यान सोहाई । बिषय भोग पर प्रीति सदाई ॥  
बिषय समीर बुद्धि कृत भोरी । तेहि बिधि दीप को बार बहोरी ॥
- दो० तब फिरि जीव बिबिधि बिधि पावइ संसृति क्लेस ।  
हरि माया अति दुस्तर तरि न जाइ बिहगेस ॥ 118 (क)  
कहत कठिन समुझत कठिन साधत कठिन बिबेक ।  
होइ घुनाच्छर न्याय जाँ पुनि प्रत्यूह अनेक ॥ 118 (ख)  
ग्यान पंथ कृपान कै धारा । परत खगेस होइ नहिं बारा ॥  
जो निर्बिघ्न पंथ निर्बहई । सो कैवल्य परम पद लहई ॥  
अति दुर्लभ कैवल्य परम पद । संत पुरान निगम आगम बद ॥  
राम भजत सोइ मुकुति गोसाई । अनइच्छित आवइ बरिआई ॥  
जिमि थल बिनु जल रहि न सकाई । कोटि भौंति कोउ करै उपाई ॥  
तथा मोच्छ सुख सुनु खगराई । रहि न सकइ हरि भगति बिहाई ॥  
अस बिचारि हरि भगत सयाने । मुक्ति निरादर भगति लुभाने ॥  
भगति करत बिनु जतन प्रयासा । संसृति मूल अबिद्या नासा ॥  
भोजन करिअ तृपिति हित लागी । जिमि सो असन पचवै जटरागी ॥  
असि हरि भगति सुगम सुखदाई । को अस मूढ़ न जाहि सोहाई ॥
- दो० सेवक सेब्य भाव बिनु भव न तरिअ उरगारि ।  
भजहु राम पद पंकज अस सिद्धांत बिचारि ॥ 119 (क)  
जो चेतन कहँ जड़ करइ जड़हि करइ चैतन्य ।  
अस समर्थ रघुनायकहि भजहिं जीव ते धन्य ॥ 119 (ख)

कहेउँ ग्यान सिद्धांत बुझाई । सुनहु भगति मनि कै प्रभुताई ॥  
 राम भगति चिंतामनि सुंदर । बसइ गरुड़ जाके उर अंतर ॥  
 परम प्रकास रूप दिन राती । नहिं कछ, चहिअ दिआ घृत बाती ॥  
 मोह दरिद्र निकट नहिं आवा । लोभ बात नहिं ताहि बुझावा ॥  
 प्रबल अबिद्या तम मिटि जाई । हारहिं सकल सलभ समुदाई ॥  
 खल कामादि निकट नहिं जाहीं । बसइ भगति जाके उर माहीं ॥  
 गरल सुधासम अरि हित होई । तेहि मनि बिनु सुख पाव न कोई ॥  
 ब्यापहिं मानस रोग न भारी । जिन्ह के बस सब जीव दुखारी ॥  
 राम भगति मनि उर बस जाके । दुख लवलेस न सपनेहुँ ताके ॥  
 सो मनि जदपि प्रगट जग अहई । राम कृपा बिनु नहिं कोउ लहई ॥  
 सुगम उपाय पाइबे केरे । नर हतभाग्य देहिं भटभेरे ॥  
 पावन पर्वत बेद पुराना । राम कथा रुचिराकर नाना ॥  
 मर्मी सज्जन सुमति कुदारी । ग्यान बिराग नयन उरगारी ॥  
 भाव सहित खोजइ जो प्रानी । पाव भगति मनि सब सुख खानी ॥  
 मोरें मन प्रभु अस बिस्वासा । राम ते अधिक राम कर दासा ॥  
 राम सिंधु घन सज्जन धीरा ॥ चंदन तरु हरि संत समीरा ॥  
 सब कर फल हरि भगति सुहाई । सो बिनु संत न काहूँ पाई ॥  
 अस बिचारि जोइ कर सतसंगा । राम भगति तेहि सुलभ बिहंगा ॥  
 दो० ब्रह्म पयोनिधि मंदर ग्यान संत सुर आहिं ।

कथा सुधा मथि काढ़हिं भगति मधुरता जाहिं ॥ 120 (क)

बिरति चर्म असि ग्यान मद लोभ मोह रिपु मारि ।

जय पाइअ सो हरि भगति देखु खगेस बिचारि ॥ 120 (ख)

पुनि सप्रेम बोलेउ खगरारु । जौ कृपाल मोहि ऊपर भारु ॥  
 नाथ मोहि निज सेवक जानी । सप्त प्रस्न मम कहहु बखानी ॥  
 प्रथमहिं कहहु नाथ मतिधीरा । सब ते दुर्लभ कवन सरीरा ॥  
 बड़ दुख कवन कवन सुख भारी । सोउ संछेपहिं कहहु बिचारी ॥  
 संत असंत मरम तुम्ह जानहु । तिन्ह कर सहज सुभाव बखानहु ॥  
 कवन पुन्य श्रुति बिदित बिसाला । कहहु कवन अघ परम कराला ॥  
 मानस रोग कहहु समुझाई । तुम्ह सर्वग्य कृपा अधिकाई ॥  
 तात सुनहु सादर अति प्रीती । मैं संछेप कहउँ यह नीती ॥  
 नर तन सम नहिं कवनिउ देही । जीव चराचर जाचत तेही ॥  
 नरक स्वर्ग अपबर्ग निसेनी । ग्यान बिराग भगति सुभ देनी ॥  
 सो तनु धरि हरि भजहिं न जे नर । होहिं बिषय रत मंद मंद तर ॥  
 कौंच किरिच बदले ते लेहीं । कर ते डारि परस मनि देहीं ॥  
 नहिं दरिद्र सम दुख जग माहीं । संत मिलन सम सुख जग नाहों ॥  
 पर उपकार बचन मन काया । संत सहज सुभाउ खगराया ॥  
 संत सहहिं दुख पर हित लागी । पर दुख हेतु असंत अभागी ॥  
 भूर्ज तरु सम संत कृपाला । परहित निति सह बिपति बिसाला ॥  
 सन इव खल पर बंधन करई । खाल कढ़ाइ बिपति सहि मरई ॥  
 खल बिनु स्वारथ पर अपकारी । अहि मूषक इव सुनु उरगारी ॥  
 पर संपदा बिनासि नसाहीं । जिमि ससि हति हिम उपल बिलाहीं ॥  
 दुष्ट उदय जग आरति हेतू । जथा प्रसिद्ध अधम ग्रह केतू ॥  
 संत उदय संतत सुखकारी । बिस्व सुखद जिमि इंदु तमारी ॥  
 परम धर्म श्रुति बिदित अहिंसा । पर निंदा सम अघ न गरीसा ॥

हर गुर निंदक दादुर होई । जन्म सह० पाव तन सोई ॥  
 सुर श्रुति निंदक जे अभिमानी । रौरव नरक परहिं ते प्रानी ॥  
 होहिं उलूक संत निंदा रत । मोह निसा प्रिय ग्यान भानु गत ॥  
 सब कै निंदा जे जड करहीं । ते चमगादुर होइ अवतरहीं ॥  
 सुनहु तात अब मानस रोगा । जिन्ह ते दुख पावहिं सब लोगा ॥  
 मोह सकल ब्याधिन्ह कर मूला । तिन्ह ते पुनि उपजहिं बहु सूला ॥  
 काम बात कफ लोभ अपारा । कोध पित्त नित छाती जारा ॥  
 प्रीति करहिं जौं तीनिउ भाई । उपजइ सन्यपात दुखदाई ॥  
 बिषय मनोरथ दुर्गम नाना । ते सब सूल नाम को जाना ॥  
 ममता दादु कंडु इरषाई । हरष बिषाद गरह बहुताई ॥  
 पर सुख देखि जरनि सोइ छई । कुष्ट दुष्टता मन कुटिलई ॥  
 अहंकार अति दुखद डमरुआ । दंभ कपट मद मान नेहरुआ ॥  
 तृस्ना उदरबृद्धि अति भारी । त्रिबिध ईषना तरुन तिजारी ॥  
 जुग बिधि ज्वर मत्सर अबिबेका । कहें लगि कहौं कुरोग अनेका ॥  
 दो० एक ब्याधि बस नर मरहिं ए असाधि बहु ब्याधि ।  
 पीड़हिं संतत जीव कहुं सो किमि लहै समाधि ॥ 121 (क)  
 नेम धर्म आचार तप ग्यान जग्य जप दान ।  
 भेषज पुनि कोटिन्ह नहिं रोग जाहिं हरिजान ॥ 121 (ख)  
 एहि बिधि सकल जीव जग रोगी । सोक हरष भय प्रीति बियोगी ॥  
 मानस रोग कछुक मै गाए । हहिं सब कें लखि बिरलेन्ह पाए ॥  
 जाने ते छीजहिं कछु पापी । नास न पावहिं जन परितापी ॥  
 बिषय कुपथ्य पाइ अंकुरे । मुनिहु हृदयें का नर बापुरे ॥  
 राम कृपा नासहिं सब रोगा । जौं एहि भौंति बनै संयोगा ॥  
 सदगुर बैद बचन बिस्वासा । संजम यह न बिषय कै आसा ॥  
 रघुपति भगति सजीवन मूरी । अनूपान श्रद्धा मति पूरी ॥  
 एहि बिधि भलेहिं सो रोग नसाहीं । नाहिं त जतन कोटि नहिं जाहीं ॥  
 जानिअ तब मन बिरुज गोसोई । जब उर बल बिराग अधिकाई ॥  
 सुमति छुधा बाढ़इ नित नई । बिषय आस दुर्बलता गई ॥  
 बिमल ग्यान जल जब सो नहाई । तब रह राम भगति उर छाई ॥  
 सिव अज सुक सनकादिक नारद । जे मुनि ब्रह्म बिचार बिसारद ॥  
 सब कर मत खगनायक एहा । करिअ राम पद पंकज नेहा ॥  
 श्रुति पुरान सब ग्रंथ कहाहीं । रघुपति भगति बिना सुख नाहीं ॥  
 कमठ पीठ जामहिं बरु बारा । बंध्या सुत बरु काहुहि मारा ।  
 फूलहिं नभ बरु बहुबिधि फूला । जीव न लह सुख हरि प्रतिकूला ॥  
 तृषा जाइ बरु मृगजल पाना । बरु जामहिं सस सीस बिषाना ॥  
 अधकारु बरु रबिहि नसावै । राम बिमुख न जीव सुख पावै ॥  
 दो० बारि मथें घृत होइ बरु सिकता ते बरु तेल ।  
 बिनु हरि भजन न भव तरिअ यह सिद्धांत अपेल ॥ 122 (क)  
 मसकहि करइ बिरंचि प्रभु अजहि मसक ते हीन ।  
 अस बिचारि तजि संसय रामहि भजहिं प्रबीन ॥ 122 (ख)

श्लोक— विनिश्चितं वदामि ते न अन्यथा वचांसि मे ।  
 हरिं नरा भजन्ति येतिदुस्तरं तरन्ति ते ॥ 122 (ग)

कहेउँ नाथ हरि चरित अनूपा । ब्यास समास स्वमति अनुरूपा ॥  
 श्रुति सिद्धांत इहइ उरगारी । राम भजिअ सब काज बिसारी ॥  
 प्रभु रघुपति तजि सेइअ काही । मोहि से सठ पर ममता जाही ॥  
 तुम्ह बिग्यानरूप नहिं मोहा । नाथ कीन्ह मो पर अति छोहा ॥  
 पूँछिहु राम कथा अति पावनि । सुक सनकादि संभु मन भावनि ॥  
 सत संगति दुर्लभ संसारा । निमिष दंड भरि एकउ बारा ॥  
 देखु गरुड़ निज हृदयें बिचारी । मैं रघुबीर भजन अधिकारी ॥  
 सकुनाधम सब भौंति अपावन । प्रभु मोहि कीन्ह बिदित जग पावन ॥  
 दो० आजु धन्य मैं धन्य अति जद्यपि सब बिधि हीन ।  
 निज जन जानि राम मोहि संत समागम दीन ॥ 123 (क)  
 नाथ जथामति भाषेउँ राखेउँ नहिं कछु गोइ ।  
 चरित सिंधु रघुनायक थाह कि पावइ कोइ ॥ 123 (ख)  
 सुमिरि राम के गुन गन नाना । पुनि पुनि हरष भुसुंङि सुजाना ॥  
 महिमा निगम नेति करि गाई । अतुलित बल प्रताप प्रभुताई ॥  
 सिव अज पूज्य चरन रघुराई । मो पर कृपा परम मृदुलाई ॥  
 अस सुभाउ कहूँ सुनउँ न देखउँ । केहि खगेस रघुपति सम लेखउँ ॥  
 साधक सिद्ध बिमुक्त उदासी । कबि कोबिद कृतग्य संन्यासी ॥  
 जोगी सूर सुतापस ग्यानी । धर्म निरत पंडित बिग्यानी ॥  
 तरहिं न बिनु सेएँ मम स्वामी । राम नमामि नमामि नमामी ॥  
 सरन गएँ मो से अघ रासी । होहिं सुद्ध नमामि अबिनासी ॥  
 दो० जासु नाम भव भेषज हरन घोर त्रय सूल ।  
 सो कृपाल मोहि तो पर सदा रहउ अनुकूल ॥ 124 (क)  
 सुनि भुसुंङि के बचन सुभ देखि राम पद नेह ।  
 बोलेउ प्रेम सहित गिरा गरुड़ बिगत संदेह ॥ 124 (ख)  
 मैं कृतकृत्य भयउँ तव बानो । सुनि रघुबीर भगति रस सानी ॥  
 राम चरन नूतन रति भई । माया जनित बिपति सब गई ॥  
 मोह जलधि बोहित तुम्ह भए । मो कहूँ नाथ बिबिध सुख दए ॥  
 मो पहिं होइ न प्रति उपकारा । बंदउँ तव पद बारहिं बारा ॥  
 पूरन काम राम अनुरागी । तुम्ह सम तात न कोउ बड़भागी ॥  
 संत बिटप सरिता गिरि धरनी । पर हित हेतु सबन्ह कै करनी ॥  
 संत हृदय नवनीत समाना । कहा कबिन्ह परि कहै न जाना ॥  
 निज परिताप द्रवइ नवनीता । पर दुख द्रवहिं संत सुपुनीता ॥  
 जीवन जन्म सुफल मम भयऊ । तव प्रसाद संसय सब गयऊ ॥  
 जानेहु सदा मोहि निज किंकर । पुनि पुनि उमा कहइ बिहंगबर ॥  
 दो० तासु चरन सिरु नाइ करि प्रेम सहित मतिधीर ।  
 गयउ गरुड़ बैकुंठ तब हृदयें राखि रघुबीर ॥ 125 (क)  
 गिरिजा संत समागम सम न लाभ कछु आन ।  
 बिनु हरि कृपा न होइ सो गावहिं बेद पुरान ॥ 125 (ख)  
 कहेउँ परम पुनीत इतिहासा । सुनत श्रवन छूटहिं भव पासा ॥  
 प्रनत कल्पतरु करुना पुंजा । उपजइ प्रीति राम पद कंजा ॥  
 मन कम बचन जनित अघ जाई । सुनहिं जे कथा श्रवन मन लाई ॥  
 तीर्थाटन साधन समुदाई । जोग बिराग ग्यान निपुनाई ॥  
 नाना कर्म धर्म ब्रत दाना । संजम दम जप तप मख नाना ॥  
 भूत दया सुर गुर सेवकाई । बिद्या बिनय बिबेक बड़ाई ॥

जहँ लगी साधन बेद बखानी । सब कर फल हरि भगति भवानी ॥  
 सो रघुनाथ भगति श्रुति गाई । राम कृपों काहँ एक पाई ॥  
 दो० मुनि दुर्लभ हरि भगति नर पावहिं बिनहिं प्रयास ।  
 जे यह कथा निरंतर सुनहिं मानि बिस्वास ॥ 126  
 सोइ सर्वग्य गुनी सोइ ग्याता । सोइ महि मंडित पंडित दाता ॥  
 धर्म परायन सोइ कुल त्राता । राम चरन जा कर मन राता ॥  
 नीति निपुन सोइ परम सयाना । श्रुति सिद्धांत नीक तेहिं जाना ॥  
 सोइ कबि कोबिद सोइ रनधीरा । जो छल छाड़ि भजइ रघुबीरा ॥  
 धन्य देस सो जहँ सुरसरी । धन्य नारि पतिव्रत अनुसरी ॥  
 धन्य सो भूपु नीति जो करई । धन्य सो नर निज धर्म न टरई ॥  
 सो धन धन्य प्रथम गति जाकी । धन्य पुन्य रत मति सोइ पाकी ॥  
 धन्य घरी सोइ जब सतसंगा । धन्य जन्म हरि भगति अभंगा ॥  
 दो० सो कुल धन्य उमा सुनु जगत पूज्य सुपुनीत ।  
 श्रीरघुबीर परायन जेहिं नर उपज बिनीत ॥ 127  
 मति अनुरूप कथा मैं भाषी । जद्यपि प्रथम गुप्त करि राखी ॥  
 तब मन प्रीति देखि अधिकारि । तब मैं रघुपति कथा सुनाई ॥  
 यह न कहिअ सठही हठसीलहि । जो मन लाइ न सुन हरि लीलहि ॥  
 कहिअ न लोभिहि कोधिहि कामिहि । जो न भजइ सचराचर स्वामिहि ॥  
 मुनि द्रोहिहि न सुनाइअ कबहूँ । सुरपति सरिस होइ नृप जबहूँ ॥  
 राम कथा के तेइ अधिकारी । जिन्ह के सतसंगति अति प्यारी ॥  
 गुर पद प्रीति नीति रत जेई । मुनि सेवक अधिकारी तेई ॥  
 ता कहूँ यह बिसेष सुखदाई । जाहि प्रानिप्रिय श्रीरघुराई ॥  
 दो० राम चरन रति जो चह अथवा पद निर्बान ।  
 भाव सहित सो यह कथा करउ श्रवन पुट पान ॥ 128  
 राम कथा गिरिजा मैं बरनी । कलि मल समनि मनोमल हरनी ॥  
 संसृति रोग सजीवन मूरी । राम कथा गावहिं श्रुति सूरी ॥  
 एहि महँ रुचिर सप्त सोपाना । रघुपति भगति केर पथाना ॥  
 अति हरि कृपा जाहि पर होई । पाउँ दइ एहिं मारग सोई ॥  
 मन कामना सिद्धि नर पावा । जे यह कथा कपट तजि गावा ॥  
 कहहिं सुनहिं अनुमोदन करहीं । ते गोपद इव भवनिधि तरहीं ॥  
 सुनि सब कथा हृदय अति भाई । गिरिजा बोली गिरा सुहाई ॥  
 नाथ कृपों मम गत संदेहा । राम चरन उपजेउ नव नेहा ॥  
 दो० मैं कृतकृत्य भइउँ अब तव प्रसाद बिस्वेस ।  
 उपजी राम भगति दृढ़ बीते सकल कलेस ॥ 129  
 यह सुभ संभु उमा संबादा । सुख संपादन समन बिषादा ॥  
 भव भंजन गंजन संदेहा । जन रंजन सज्जन प्रिय एहा ॥  
 राम उपासक जे जग माहीं । एहि सम प्रिय तिन्ह के कछु नाहीं ॥  
 रघुपति कृपों जथामति गावा । मैं यह पावन चरित सुहावा ॥  
 एहिं कलिकाल न साधन दूजा । जोग जग्य जप तप ब्रत पूजा ॥  
 रामहि सुमिरिअ गाइअ रामहि । संतत सुनिअ राम गुन ग्रामहि ॥  
 जासु पतित पावन बड़ बाना । गावहिं कबि श्रुति संत पुराना ॥  
 ताहि भजहि मन तजि कुटिलाई । राम भजे गति केहिं नहिं पाई ॥  
 छ० पाई न केहि गति पतित पावन राम भजि सुनु सठ मना ।  
 गनिका अजामिल ब्याध गीध गजादि खल तारे घना ॥

आभीर जमन किरात खस स्वपचादि अति तपरूप जे ।  
 कहि नाम बारक तेपि पावन होहिं राम नमामि ते ॥ 1  
 रघुबंस भूषन चरित यह नर कहहिं सुनहिं जे गावहीं ।  
 कलि मल मनोमल धोइ बिनु श्रम राम धाम सिधावहीं ॥  
 सत पंच चौपाई मनोहर जानि जो नर उर धरै ।  
 दारुन अबिद्या पंच जनित बिकार श्रीरघुबर हरै ॥ 2  
 सुंदर सुजान कृपा निधान अनाथ पर कर प्रीति जो ।  
 सो एक राम अकाम हित निर्बानप्रद सम आन को ॥  
 जाकी कृपा लवलेस ते मतिमंद तुलसीदासहूँ ।  
 पायो परम विश्रामु राम समान प्रभु नाहीं कहूँ ॥ 3  
 दो० मो सम दीन न दीन हित तुम्ह समान रघुबीर ।  
 अस बिचारि रघुबंस मनि हरहु बिषम भव भीर ॥ 130 (क)  
 कामिहि नारि पिआरि जिमि लोभिहि प्रिय जिमि दाम ।  
 तिमि रघुनाथ निरंतर प्रिय लागहु माहि राम ॥ 130 (ख)

श्लोक— यत्पूर्व प्रभुणा कृतं सुकविना श्रीशम्भुना दुर्गमं  
 श्रीमद्रामपदाब्जभक्तिमनिशं प्राप्त्यै तु रामायणम् ।  
 मत्वा तद्रघुनाथनामनिरतं स्वान्तस्तमःशान्तये  
 भाषाबद्धमिदं चकार तुलसीदासस्तथा मानसम् ॥ 1  
 पुण्यं पापहरं सदा शिवकरं विज्ञानभक्तिप्रदं  
 मायामोहमलापहं सुविमलं प्रेमाम्बुपूरं शुभम् ।  
 श्रीमद्रामचरित्रमानसमिदं भक्त्यावगाहन्ति ये  
 ते संसारपतंगघोरकिरणैर्दहन्ति नो मानवाः ॥ 2

मासपारायण, तीसवों विश्राम  
 नवांन्हपारायण, नवों विश्राम